

॥ श्रीः ॥

श्रीमद्गोस्वामी तुलसीदासजीविरचित

श्रीरामचरितमानस

[मूल-मझली साइज]

(सचित्र)



गीताप्रेस, गोरखपुर

मुद्रक तथा प्रकाशक

मोतीलाल जालान
गीताप्रेस, गोरखपुर

सं० १९९९

मूल्य २.०० (दो रुपया)

पता—गीताप्रेस, पो० गीताप्रेस (गोरखपुर)



॥ श्रीहरिः ॥

नम्र निवेदन

गीताप्रेससे श्रीरामचरितमानसका एक सटीक एवं सचित्र संस्करण कुछ अन्य उपयोगी सामग्रीके साथ 'कल्याण' के विशेषाङ्कके रूपमें भास्से लगभग बीस वर्ष पूर्व निकला था। उसमें बहुत-सी न्यूनताएँ होनेपर भी मानसप्रेमी जनताने उसका कितना आदर किया, यह सब लोगोंको विदित ही है। कुछ वर्षोंके अंदर ही उसकी ९८, ६०० प्रतियाँ निकल चुकीं। मानसाङ्क निकालने समय यह विचार था—और उसे सम्पादकीय निवेदनमें व्यक्त भी कर दिया गया था—कि इसके बाद जल्दी ही मानसका एक मूल संस्करण मोटे अक्षरोंमें अलग निकाला जाय, जिसमें पाठभेद आदि दिखे जायें तथा आवश्यक टिप्पणियाँ भी रहें और उसके बाद उसीके आधारपर मूल तथा सटीक, छोटे-बड़े कई संस्करण निकाले जायें। परंतु इच्छा रहने-पर भी कई कारणोंसे वह संस्करण जल्दी नहीं निकल सका। पहले तो यह आशा थी कि भगवान्‌की कृपासे कदाचित् कहींसे गोस्वामीजीके हाथकी लिखी कोई पूरी प्रामाणिक प्रति मिल जाय, जिससे झुद-से-झुद पाठ मानस-प्रेमियोंके पास पहुँचाया जा सके; परंतु जब यह आशा जल्दी पूरी होती नहीं देखी गयी, तब मानसाङ्कके पाठको ही एक बार फिरसे देखकर तथा मानसके कतिपय मर्मज्ञोंका परामर्श लेकर उसीमें आवश्यकतानुसार यत्र-तत्र कुछ संशोधन करके छपनेको दे दिया गया।

अभी यह संस्करण छप ही नहीं पाया था कि कई मित्रोंका यह अनुरोध हुआ कि नवीन संस्करणरम्भके पहले ही श्रीरामचरितमानसका एक गुटका बहुत शीघ्र छापकर तैयार किया जाय, जिसमें नवरात्रमें होने-वाले मानसपारायणके लिये (जिसकी सूचना कई माससे 'कल्याण'में छपी जा रही थी) मानसप्रेमियोंको एक पाठोपयोगी छोटा एवं सस्ता संस्करण मिल जाय। इसलिये जो उतना बड़ा मानसाङ्क नहीं खरीद सकते, उनका सुविधाके लिये वह गुटका छपा गया। जनताने उसका बहुत अधिक आदर किया। लगभग बाईस वर्षोंमें उसकी इक्कीस लाख बीस हजार प्रतियाँ छप गयीं।

इसी बीचमें पाठभेदवाला मूल मोटे टाइपका संस्करण भी छपकर तैयार हो गया। परंतु उसमें मानस व्याकरण, भूमिका और प्राचीन

प्रतियोंके अनेक पाठभेद रहनेसे तथा मोटे टाइप होनेके कारण उसका मूल्य ३.०० रखना पड़ा। इसलिये सर्वसाधारणको उसे खरीदनेमें कठिनाई पड़ती थी। इधर गुटकाके टाइप बहुत छोटे होनेसे बहुत-से लोगोंको उसे पढ़नेमें असुविधा रहती है। इसलिये अनेक सज्जनोंने यह आग्रह किया कि एक ऐसा संस्करण निकाला जाय, जिसमें टाइप भी कुछ बड़े हों और दाम भी ठीक-ठीक हों। इसीलिये यह मझले साइजका मूल संस्करण आजसे उन्नीस वर्ष पूर्व निकाला गया था, जिसकी नौ आवृत्तियोंमें एक छान्द एकद्वार हजार ढाई सौ प्रतियाँ छप चुकी हैं। उसीका यह दसवाँ संस्करण मानसप्रेमी पाठकोंके सम्मुख प्रस्तुत है। अबतक कुल मिलाकर मानसकी ३२, ९१, ३५० प्रतियाँ गीताप्रेससे छप चुकी हैं।

यों तो हमारा साराही प्रयास भूलोंसे भरा है। पूज्य गोस्वामीजीके हाथकी लिखी हुई कोई पूरी प्रामाणिक प्रति प्रयास करनेपर भी न मिल सकनेके कारण सर्वथा शुद्ध पाठका दावा तो हमलोग कर ही नहीं सकते; इसके अतिरिक्त अपनी समझसे पूरी सावधानी बरती जानेपर भी इसमें प्रमादवश प्रफ आदिकी भूलें अवश्य रह गयी होंगी। आशा है कृपालु पाठक हमारी कठिनाइयोंको समझकर इसके लिये हमें क्षमा करेंगे। पाठके सम्बन्धमें हमें इतना ही निवेदन करना है कि जो कुछ सामग्री हमें प्राप्त हो सकी, उसका हमलोगोंने अपनी समझसे ईमानदारीके साथ उपयोग किया है और यथाशक्य प्राचीन पाठकी रक्षा की है।

पाठके सम्बन्धमें हमें पूज्यपाद परमहंस श्रीअवधविहारीदासजी महाराज (नागाबाबा), पूज्य पं० श्रीविजयानन्दजी त्रिपाठी तथा पूज्य पं० श्रीजयरामदासजी 'दीन' रामायणीसे, जो तीनों ही महानुभाव साकेत-बासी हो चुके हैं, बहुमूल्य परामर्श प्राप्त हुए। इसके लिये हम उनके हृदयसे कृतज्ञ हैं। पाठके निर्णयमें हमें 'मानसपीयूष'से तथा उसके सम्पादक महात्मा श्रीअंजनीनन्दनशरण शीतलासहायजीसे भी काफी सहायता मिली है, जिसके लिये हम उनके भी विशेष कृतज्ञ हैं।

अन्तमें हम सब लोगोंसे अपनी त्रुटियोंके लिये क्षमा माँगते हैं और भगवान्की वस्तु भगवान्को समर्पित करते हैं।

— प्रकाशक

॥ श्रीहरिः ॥

श्रीरामचरितमानसकी संक्षिप्त

विषय-सूची

विषय	पृष्ठ	विषय	पृष्ठ
पारायण-विधि	७	अयोध्याकाण्ड	
नवाह्नपारायणके विश्रामस्थान	१०	मंगलाचरण	२०३
मासपारायणके विश्रामस्थान	१०	राम-राज्याभिषेककी तैयारी	२०४
रामशलाका प्रश्नावली	११	श्रीसीता-राम-संवाद	२३१
बालकाण्ड		श्रीलक्ष्मण-सुमित्रा-संवाद	२३७
मंगलाचरण	१७	वन-गमन	२४०
श्रीनामवन्दना	३०	केवटका प्रेम	२५०
याज्ञवल्क्य-भरद्वाज-संवाद	४४	भरद्वाज-संवाद	२५३
सतीका मोह	४६	श्रीराम-वाल्मीकि-संवाद	२६१
शिव-पार्वती-संवाद	७५	चित्रकूट-निवास	२६५
नारदका अभिमान	८४	दशरथ-मरण	२७५
मनु-शतरूपाका तप	९१	भरत-कौसल्या-संवाद	२८०
भानुप्रतापकी कथा	९६	भरतका चित्रकूटके लिये	
राम-जन्म	११६	प्रस्थान	२९०
विश्वामित्रकी यज्ञरक्षा	१२५	भरत-भरद्वाज-संवाद	२९९
पुष्पवाटिका-निरीक्षण	१३३	राम-भरत-मिलन	३१५
धनुष-भंग	१५०	जनकजीका आगमन	३३१
श्रीसीता-राम-विवाह	१७४	श्रीराम-भरत-संवाद	३४१

भरतजीकी विदाई ३५१

नन्दिप्राममें निवास ३५३

अरण्यकाण्ड

मंगलचरण ३५७

जयन्तकी कुटिलता ३५८

श्रीसीता-अनसूया-मिलन ३६०

सुतीक्ष्णजीका प्रेम ३६३

पञ्चवटी-निवास ३६७

खर-दूषण-वध ३७३

मारीच-प्रसंग ३७६

सीता-हरण ३७८

शबरीपर कृपा ३८३

किष्किन्धाकाण्ड

मंगलचरण ३९३

श्रीराम हनुमान्-भेंट ३९४

बालि-वध ३९९

सीताजीकी खोजके लिये

कंदरोंका प्रस्थान ४०६

हनुमान्-जाम्बवन्त-संवाद ४१०

सुन्दरकाण्ड

मंगलचरण ४१३

लंकामें प्रवेश ४१६

सीता-हनुमान्-संवाद ४२०

लंकादहन ४२७

श्रीराम-हनुमान्-संवाद ४२९

लंकाके लिये प्रस्थान ४३१

विभीषणकी शरणागति ४३७

समुद्रपर कोप ४४३

लंकाकाण्ड

मंगलचरण ४४७

सेतुबन्ध ४४८

अंगद-रावण-संवाद ४५८

लक्ष्मण-मेघनाद-युद्ध ४७७

श्रीरामकी प्रयापलीला ४८०

कुम्भकर्ण-वध ४८६

मेघनाद-वध ४९०

राम-रावण-युद्ध ४९९

रावण-वध ५०९

सीताजीकी अग्नि-परीक्षा ५१४

अवधके लिये प्रस्थान ५२१

उत्तरकाण्ड

मंगलचरण ५२५

भरत-हनुमान्-मिलन ५२६

भरत-मिथ्या ५२९

राम-राज्याभिषेक ५३३

श्रीरामजीका प्रजाको उपदेश ५५१

गरुड-भुशुण्डि-संवाद ५६१

काकभुशुण्डि-श्रीमश-संवाद ५८९

ज्ञान-भक्ति-निरूपण ५९३

रामायणकी आरती ६०८

॥ श्रीहरिः ॥

पारायण-विधि

श्रीरामचरितमानसका विधिपूर्वक पाठ करनेवाले महानुभावोंको पाठारम्भके पूर्व श्रीतुलसीदासजी, श्रीबाल्मीकिजी, श्रीशिवजी तथा श्रीहनुमान्जीका आवाहन-पूजन करनेके पश्चात् तीनों भाइयोंसहित श्रीसोतारामजीका आवाहन, षोडशोपचार-पूजन और ध्यान करना चाहिये । तदनन्तर पाठका आरम्भ करना चाहिये । सबके आवाहन, पूजन और ध्यानके मन्त्र क्रमशः नीचे लिखे जाते हैं—

अथ आवाहनमन्त्रः

तुलसीक नमस्तुभ्यमिहागच्छ शुचिव्रत । नैर्ऋत्य उपविश्येदं
पूजनं प्रतिगृह्यताम् ॥ ॐ तुलसीदासाय नमः ॥ १ ॥ श्रीबाल्मीक
नमस्तुभ्यमिहागच्छ शुभप्रद । उत्तरे पूर्वयोर्मध्ये तिष्ठ गृह्णीष्व
मेऽर्चनम् ॥ ॐ बाल्मीकाय नमः ॥ २ ॥ गौरीपते नमस्तुभ्यमिहा-
गच्छ महेश्वर । पूर्वदक्षिणयोर्मध्ये तिष्ठ पूजां गृहाण मे ॥ ॐ गौरी-
पतये नमः ॥ ३ ॥ श्रीलक्ष्मण नमस्तुभ्यमिहागच्छ सहप्रियः । याम्य-
भागे समातिष्ठ पूजनं संगृहाण मे ॥ ॐ श्रीसपत्नीकाय लक्ष्मणाय
नमः ॥ ४ ॥ श्रीशत्रुघ्न नमस्तुभ्यमिहागच्छ सहप्रियः । पीठस्य
पश्चिमे भागे पूजनं स्वीकुरुष्व मे ॥ ॐ श्रीसपत्नीकाय शत्रुघ्नाय
नमः ॥ ५ ॥ श्रीभक्त नमस्तुभ्यमिहागच्छ सहप्रियः । पीठ-
कस्योत्तरे भागे तिष्ठ पूजां गृहाण मे ॥ ॐ श्रीसपत्नीकाय भरताय
नमः ॥ ६ ॥ श्रीहनुमन्नमस्तुभ्यमिहागच्छ कृपानिधे । पूर्वभागे
समातिष्ठ पूजनं स्वीकुरु प्रभा । ॐ हनुमते नमः ॥ ७ ॥

अथ प्रधानपूजा च कर्तव्या विधिपूर्वकम् ।

पुष्पाञ्जलिं गृहीत्वा तु ध्यानं कुर्यात्परस्य च ॥ ८ ॥

रक्ताम्भोजदलाभिरामनयनं पीताम्बरालङ्कृतं
दयामाङ्गं द्विभुजं प्रसन्नवदनं श्रीसीतया शोभितम् ।

कारुण्यामृतसागरं प्रियगणैर्भ्रात्रादिभिर्भावितं
वन्दे विष्णुशिवादिविषयमनिशं भक्तेष्टसिद्धिप्रदम् ॥ ९ ॥

आगच्छ जानकीनाथ जानक्या सह राघव ।
गृहाण मम पूजां च वायुपुत्रादिभिर्युतः ॥ १० ॥
इत्यावाहनम्

सुवर्णरचितं राम दिव्यास्तरणशोभितम् ।
आसनं हि मया दत्तं गृहाण मणिवित्रितम् ॥ ११ ॥

इति षोडशोपचारैः पूजयेत्

ॐ अस्य श्रीमन्मानसरामायणश्रीरामचरितस्य श्रीशिव-
काकभुशुण्डियाश्वत्थगोखामितुलसीदासा ऋषयः श्रीसीता-
रामो देवता श्रीरामनाम बीजं भवरोगहरी भक्तिः शक्तिः मम
नियन्त्रिताशेषविघ्नतया श्रीसीतारामप्रीतिपूर्वकसकलमनोरथ-
सिद्ध्यर्थं पाठे विनियोगः ।

अथाचमनम्

श्रीसीतारामाय नमः । श्रीरामचन्द्राय नमः

श्रीरामभद्राय नमः । इति मन्त्रत्रितयेन आचमनं कुर्यात् ।
श्रीयुगलबीजमन्त्रेण प्राणायामं कुर्यात् ॥

अथ करन्यासः

जग मंगल गुनग्राम राम के । दानि मुकुति धन धरम धाम के ॥

अङ्गुष्ठाभ्यां नमः

राम राम कहि जे जमुहाहीं । तिन्हहि न पापपुंज समुहाहीं ॥

तर्जनीभ्यां नमः

राम सकल नामन्ह ते अधिका । होउ नाथ अघ खग गन बधिका ॥

मध्यमाभ्यां नमः

उमा दारु जोषित की नाई । सबहि नचावत रामु गोसाई ॥

अनामिकाभ्यां नमः

सन्मुख होइ जीव मोहि जबहीं । जन्म कोटि अघ नासहि तबहीं ॥

कनिष्ठिकाभ्यां नमः

मामभिरक्षय रघुकुलनायक । धृत बर चाप रुचिर कर सायक ॥

करतलकरपृष्ठाभ्यां नमः

इति करन्यासः

अथ हृदयादिन्यासः

जग मंगल गुनग्राम राम के । दानि मुकुति धन धरम धाम के ॥

हृदयाय नमः ।

राम राम कहि जे जमुहाहीं । तिन्हहि न पापपुंज समुहाहीं ॥

शिरसे स्वाहा ।

राम सकल नामन्ह ते अधिका । होउ नाथ अघ खग गन बधिका ॥

शिखायै वषट् ।

उमा दारु जोषित की नाई । सबहि नचावत रामु गोसाई ॥

कवचाय हुम् ।

सन्मुख होइ जीव मोहि जबहीं । जन्म कोटि अघ नासहि तबहीं ॥

नेत्राभ्यां वौषट् ।

मामभिरक्षय रघुकुलनायक । धृत बर चाप रुचिर कर सायक ॥

अस्त्राय फट् ।

इति हृदयादिन्यासः

अथ ध्यानम्

मामवलोकय पंकजलोचन । कृपा बिलोकनि सोच बिमोचन ॥

नील तामरस स्याम काम अरि । हृदय कंज मकरंद मधुप हरि ॥

जातुधान बरूथ बल भंजन । मुनि सज्जन रंजन अघ गंजन ॥

भूसुर ससि नव वृंद बलाहक । असन सरन दीन जन गाहक ॥

भुजबल बिपुल भार महि खंडित । खर दूषण बिराध बध पंडित ॥

रावनारि सुखरूप भूपबर । जय दसरथ कुल कुमुद सुधाकर ॥

सुजस पुरान बिदित निगमागम । गावत सुर मुनि संत समागम ॥

कारुणीक व्यलीक मद खंडन । सब बिधि कुसल कोसला मंडन ॥

कलि मल मथन नाम ममताहन । तुलसिदास प्रभु पाहि प्रनत जन ॥

इति ध्यानम्

[१०]
नवाह्नपारायणके विश्राम-स्थान

	पृष्ठ		पृष्ठ
पहला विश्राम ८१	छठा विश्राम ३८०
दूसरा ,, १३९	सातवाँ ,, ४५४
तीसरा ,, १९९	आठवाँ ,, ५३३
चौथा ,, २५७	नवाँ ,, ६०७
पाँचवाँ ,, ३१३		

मासपारायणके विश्राम-स्थान

	पृष्ठ		पृष्ठ
पहला विश्राम ३३	सोलहवाँ विश्राम २५७
दूसरा ,, ४९	सत्रहवाँ ,, २६५
तीसरा ,, ६५	अठारहवाँ ,, २८५
चौथा ,, ८१	उन्नीसवाँ ,, ३०३
पाँचवाँ ,, ९६	बीसवाँ ,, ३१३
छठा ,, १११	इक्कीसवाँ ,, ३५५
सातवाँ ,, १२६	बाईसवाँ ,, ३९१
आठवाँ ,, १३९	तेईसवाँ ,, ४११
नवाँ ,, १५४	चौबीसवाँ ,, ४४५
दसवाँ ,, १६९	पचीसवाँ ,, ४७४
ग्यारहवाँ ,, १८३	छब्बीसवाँ ,, ५०५
बारहवाँ ,, २०१	सत्ताईसवाँ ,, ५२३
तेरहवाँ ,, २१६	अट्ठाईसवाँ ,, ५६१
चौदहवाँ ,, २३१	उन्तीसवाँ ,, ५९३
पंद्रहवाँ ,, २४६	तीसवाँ ,, ६०७

श्रीरामशलाका प्रश्नावली

मानसानुरागी महानुभावोंको श्रीरामशलाका प्रश्नावलीका विशेष परिचय देनेकी कोई आवश्यकता नहीं प्रतीत होती, उसकी महत्ता एवं उपयोगितासे प्रायः सभी मानसप्रेमी परिचित होंगे। अतः नीचे उसका स्वरूपमात्र अङ्कित करके उससे प्रश्नोत्तर निकालनेकी विधि तथा उसके उत्तर-फलकोंका उल्लेख कर दिया जाता है। श्रीरामशलाका प्रश्नावलीका स्वरूप इस प्रकार है—

सु	प्र	उ	वि	हो	मु	ग	व	सु	नु	बि	ष	धि	इ	द
र	रु	फ	सि	सि	रें	वस	इ	मं	ल	न	ल	य	न	अं
सुज	सो	ग	सु	कु	म	स	ग	त	न	ई	ल	धा	बे	नो
त्य	र	न	कु	जो	म	रि	र	र	अ	की	हो	सं	रा	य
पु	सु	थ	सी	जे	इ	ग	*म	स	क	रे	हो	स	स	नि
त	र	त	र	स	इ	ह	ब	ब	प	नि	स	य	स	तु
म	का	।	र	र	मा	मि	मी	म्हा	।	जा	हू	हीं	।	जू
ता	रा	रे	री	हृ	का	फ	खा	जि	ई	र	रा	पू	द	ल
नि	को	मि	गो	न	म	ज	य	ने	मनि	क	ज	प	स	ल
हि	रा	म	स	रि	ग	द	न	ष	म	खि	जि	मनि	त	ज
सि	मु	न	न	कौ	मि	ज	र	ग	धु	ख	सु	का	स	र
गु	क	म	अ	ध	नि	म	ल	।	न	ब	ती	न	रि	भ
ना	पु	व	अ	ढा	र	ल	का	ए	तु	र	न	नु	व	थ
सि	इ	सु	म्ह	रा	र	स	हि	र	त	न	ष	।	जा	।
र	सा	।	ला	धी	।	री	ज	हू	हीं	पा	जू	ई	रा	रे

इस रामशलाका प्रश्नावलीके द्वारा जिस किसीको जब कभी अपने अभीष्ट प्रश्नका उत्तर प्राप्त करनेकी इच्छा हो तो सर्वप्रथम उस व्यक्तिको भगवान् श्रीरामचन्द्रजीका ध्यान करना चाहिये। तदनन्तर श्रद्धा-विश्वासपूर्वक मनसे अभीष्ट प्रश्नका चिन्तन करते हुए

प्रश्नावलीके मनचाहे कोष्ठकमें अँगुली या कोई शलाका रख देना चाहिये और उस कोष्ठकमें जो अक्षर हो उसे अलग किसी कोरे कागज या स्लेटपर लिख लेना चाहिये । प्रश्नावलीके कोष्ठकपर भी ऐस्त कोई निशान लगा देना चाहिये जिससे न तो प्रश्नावली गंदी हो और न प्रश्नोत्तर प्राप्त होनेतक कोष्ठक भूल जाय । अब जिस कोष्ठकका अक्षर लिख लिया गया है उससे आगे बढ़ना चाहिये तथा उसके नवें कोष्ठकमें जो अक्षर पड़े उसे भी लिख लेना चाहिये । इस प्रकार प्रति नवें अक्षरके नवें अक्षरको क्रमसे लिखते जाना चाहिये और तबतक लिखते जाना चाहिये, जबतक उसी पहले कोष्ठकके अक्षरतक अँगुली अथवा शलाका न पहुँच जाय । पहले कोष्ठकका अक्षर जिस कोष्ठकके अक्षरसे नवाँ पड़ेगा, वहाँतक पहुँचते-पहुँचते एक चौपाई पूरी हो जायगी, जो प्रश्नकर्ताके अभीष्ट प्रश्नका उत्तर होगी । यहाँ इस बातका ध्यान रखना चाहिये कि किसी-किसी कोष्ठकमें केवल 'आ' की मात्रा (१) और किसी-किसी कोष्ठकमें दो-दो अक्षर हैं । अतः गिनते समय न तो मात्रावाले कोष्ठकको छोड़ देना चाहिये और न दो अक्षरोंवाले कोष्ठकको दो बार गिनना चाहिये । जहाँ मात्राका कोष्ठक आवे वहाँ पूर्वलिखित अक्षरके आगे मात्रा लिख लेना चाहिये और जहाँ दो अक्षरोंवाला कोष्ठक आवे वहाँ दोनों अक्षर एक साथ लिख लेना चाहिये ।

अब उदाहरणके तौरपर इस रामशलाका प्रश्नावलीसे किसी प्रश्नके उत्तरमें एक चौपाई निकाल दी जाती है । पाठक ध्यानसे देखें । किसीने भगवान् श्रीरामचन्द्रजीका ध्यान और अपने प्रश्नका

चिन्तन करते हुए यदि प्रश्नावलीके* इस चिह्नसे संयुक्त 'म' वाले कोष्ठकमें अँगुली या शलाका रक्खा और वह ऊपर बताये क्रमके अनुसार अक्षरोंको गिन-गिनकर लिखता गया तो उत्तरस्वरूप यह चौपाई बन जायगी—

हो इ है सो ई जो रा मळ र चि रा खा ।

को क रि त र क ब ढा व हिं सा षा ॥

यह चौपाई बालकाण्डान्तर्गत शिव और पार्वतीके संवादमें है । प्रश्नकर्ताको इस उत्तरस्वरूप चौपाईसे यह आशय निकालना चाहिये कि कार्य होनेमें सन्देह है, अतः उसे भगवान्‌पर छोड़ देना श्रेयस्कर है ।

इस चौपाईके अतिरिक्त श्रीरामशलाका प्रश्नावलीसे और भी जितनी चौपाइयाँ बनती हैं, उन सबका स्थान और फलसहित उल्लेख नीचे किया जाता है ।

१—सुनु सिय सत्य असीस हमारी । पूजहि मन कामबा तुम्हारी ॥
स्थान—यह चौपाई बालकाण्डमें श्रीसीताजीके गौरीपूजनके प्रसङ्गमें है । गौरीजीने श्रीसीताजीको आशीर्वाद दिया है ।

फल—प्रश्नकर्ताका प्रश्न उत्तम है, कार्य सिद्ध होगा ।

२—प्रबिसि नगर कीजे सब काजा । हृदय राखि कोसलपुर राजा ॥
स्थान—यह चौपाई सुन्दरकाण्डमें हनुमान्‌जीके लंकामें प्रवेश करनेके समयकी है ।

फल—भगवान्‌का स्मरण करके कार्यारम्भ करो, सफलता मिलेगी ।

३—उघरें अंत न होइ निबाहू । कालनेम जिमि रावन राहू ॥
स्थान—यह चौपाई बालकाण्डके आरम्भमें सत्संग-वर्णनके प्रसङ्गमें है ।
फल—इस कार्यमें भलाई नहीं है । कार्यकी सफलतामें सन्देह है ।

३-विधि बस सुजन कुसंगत परहीं । फनि मनिसम निज गुन अनुसरहीं ॥
 स्यान-यह चौपाई भी बालकाण्डके आरम्भमें ही सत्संगवर्णनके प्रसङ्गकी है ।

फल-छोटे मनुष्योंका सङ्ग छोड़ दो । कार्य पूर्ण होनेमें सन्देह है ।

५-मुद मंगलमय संत समाजू । जिमि जग जंगम तीरथ राजू ॥
 स्यान-यह चौपाई बालकाण्डमें संत-समाजरूपी तीर्थके वर्णनमें है ।
 फल-प्रश्न उत्तम है, कार्य सिद्ध होगा ।

६-गरल सुधा रिपु करय मितार्ह । गोपद सिंधु अनल सित्कार्ह ॥
 स्यान-यह चौपाई श्रीहनुमान्जीके लंकामें प्रवेश करनेके समयकी है ।
 फल-प्रश्न बहुत श्रेष्ठ है । कार्य सफल होगा ।

७-बरुन कुबेर सुरेस समीरा । रन सनमुख धरि काह न धीरा ॥
 स्यान-यह चौपाई लंकाकाण्डमें रावणकी मृत्युके पश्चात् मन्दोदरीके विलापके प्रसङ्गमें है ।

फल-कार्य पूर्ण होनेमें सन्देह है ।

८-सुफल मनोरथ होहुँ तुम्हारे । रामु लखनु सुनि भए सुखारे ॥
 स्यान-यह चौपाई बालकाण्डमें पुष्पवाटिकासे पुष्प लानेपर विष्णु-मित्रजीका आशीर्वाद है ।

फल-प्रश्न बहुत उत्तम है । कार्य सिद्ध होगा ।

इस प्रकार रामशायका प्रश्नावलीसे कुल नौ चौपाइयाँ बनती हैं, जिनमें सभी प्रकारके प्रश्नोंके उत्तराशय सन्निहित हैं ।



॥ श्रीरामाय नमः ॥

श्रीरामचरितमानस

बालकाण्ड



गीताप्रेस, गोरखपुर

मायामुक्त नारदजी



तव मुनि अति सभित हरि चरना ।
गहे पाहि प्रनतारति हरना ॥

श्रीगणेशाय नमः

श्रीजानकीवल्लभो विजयते

श्रीरामचरितमानस

प्रथम सोपान

(बालकाण्ड)

श्लोक

वर्णानामर्थसंधानां रसानां छन्दसामपि ।
मङ्गलानां च कर्त्तारौ वन्दे वाणीविनायकौ ॥ १ ॥
भवानीशङ्करौ वन्दे श्रद्धाविश्वासरूपिणौ ।
याभ्यां विना न पश्यन्ति सिद्धाः स्वान्तःस्थमीश्वरम् ॥ २ ॥
वन्दे बोधमयं नित्यं गुरुं शङ्कररूपिणम् ।
यमाश्रितो हि वक्रोऽपि चन्द्रः सर्वत्र वन्द्यते ॥ ३ ॥
सीतारामगुणग्रामपुण्यारण्यविहारिणौ ।
वन्दे विशुद्धविज्ञानौ कवीश्वरकपीश्वरौ ॥ ४ ॥
उद्भवस्थितिसंहारकारिणीं क्लेशहारिणीम् ।
सर्वश्रेयस्करिणीं सीतां नतोऽहं रामवल्लभाम् ॥ ५ ॥
यन्मायावशवर्त्ति विश्वमखिलं ब्रह्मादिदेवासुरा
यत्सत्त्वादमृषैव भाति सकलं रज्जौ यथाहेर्भ्रमः ।
यत्पादप्लवमेकमेव हि भवाम्भोधेस्तितीर्षवतां
वन्देऽहं तमशेषकारणपरं रामाख्यमीशं हरिम् ॥ ६ ॥

नानापुराणनिगमागमसम्मतं यद्
रामायणे निगदितं क्वचिदन्यतोऽपि ।

स्वान्तःसुखाय तुलसी रघुनाथगाथा-

भाषानिबन्धमतिमञ्जुलमातनोति ॥ ७ ॥

सो०—जो सुमिरत सिधि होइ गन नायक करिबर बदन ।

करउ अनुग्रह सोइ बुद्धि रासि सुभ गुन सदन ॥ १ ॥

मूक होइ बाचाल पंगु चढ़इ गिरिबर गहन ।

जासु कृपाँ सो दयाल द्रवउ सकल कलि मल दहन ॥ २ ॥

नील सरोरुह स्याम तरुन अरुन बारिज नयन ।

करउ सो मम उर धाम सदा छीरसागर सयन ॥ ३ ॥

कुंद इंदु सम देह उमा रमन करुना अयन ।

जाहि दीन पर नेह करउ कृपा मर्दन मयन ॥ ४ ॥

बंदउँ गुरु पद कंज कृपा सिंधु नररूप हरि ।

महामोह तम पुंज जासु बचन रबि कर निकर ॥ ५ ॥

बंदउँ गुरु पद पदुम परागा । सुरुचि सुबास सरस अनुरागा ॥

अमिअ मूरिमय चूरन चारू । समन सकल भव रुज परिवारू ॥

सुकृति संभु तन बिमल बिभूती । मंजुल मंगल मोद प्रसूती ॥

जन मन मंजु मुकुर मल हरनी । किँ तिलक गुन गन बस करनी

श्रीगुर पद नख मनि गन जोती । सुमिरत दिव्य दृष्टि हियँ होती ॥

दलन मोह तम सो सप्रकास । बड़े भाग उर आवइ जास ॥

उघरहिं बिमल बिलोचन ही के । मिटहिं दोष दुख भव रजनी के ॥

सुझहिं राम चरित मनि मानिक । गुपुत प्रगट जहँ जो जेहि खानिक

दो०—जथा सुअंजन अंजि दृग साधक सिद्ध सुजान ।

कौतुक देखत सैल बन भूतल भूरि निधान ॥ १ ॥

गुरु पद रज मृदु मंजुल अंजन । नयन अमिअ दृग दोष बिभंजन ॥
तेहिं करि बिमल बिबेक बिलोचन । बरनउँ राम चरित भव मोचन ॥
बंदउँ प्रथम महीसुर चरना । मोह जनित संसय सब हरना ॥
सुजन समाज सकल गुन खानी । करउँ प्रनाम सप्रेम सुबानी ॥
साधु चरित सुभ चरित कपासू । निरस बिसद गुनमय फल जासू ॥
जो सहि दुख परछिद्र दुरावा । बंदनीय जेहिं जग जस पावा ॥
मुद मंगलमय संत समाजू । जो जग जंगम तीरथराजू ॥
राम भक्ति जहँ सुरसरि धारा । सरसइ ब्रह्म बिचार प्रचारा ॥
बिधि निषेधमय कलि मल हरनी । करम कथा रबिनंदनि चरनी ॥
हरि हर कथा बिराजति बेनी । सुनत सकल मुद मंगल देनी ॥
बटु बिस्वास अचल निज धरमा । तीरथराज समाज सुकरमा ॥
सबहि सुलभ सब दिन सब देसा । सेवत सादर समन कलेसा ॥
अकथ अलौकिक तीरथराऊ । देइ सद्य फल प्रगट प्रभाऊ ॥
दो०—सुनि समुझहिं जन मुदित मन मज्जहिं अति अनुराग ।

लहहिं चारि फल अछत तनु साधु समाज प्रयाग ॥ २ ॥
मज्जन फल पेखिअ ततकाला । काक होहिं पिक बकउ मराला ॥
सुनि आचरज करै जनि कोई । सतसंगति महिमा नहिं गोई ॥
बालमीक नारद घटजोनी । निज निज मुखनि कही निज होनी ॥
जलचर थलचर नभचर नाना । जे जड़ चेतन जीव जहाना ॥
मति कीरति गति भूति भलाई । जब जेहिं जतन जहाँ जेहिं पाई ॥

सो जानब सतसंग प्रभाऊ । लोकहुँ बेद न आन उपाऊ ॥
 बिनु सतमंग विवेक न होई । राम कृपा बिनु सुलभ न सोई ॥
 सतसंगत मुद मंगल मूला । सोइफल सिधि सब साधन फूला
 सठ सुधरहि सतसंगति पाई । पारस परस कुघात सुहाई ॥
 विधिबस सुजन कुसंगत परहीं । फनि मनि सम निज गुन अनुसरहीं
 विधि हरि हर कबि कोबिद बानी । कहत साधु महिमा सकुचानी ॥
 सो मो सन कहि जात न कैसैं । साक बनिक मनि गुन गन जैसैं ॥
 दो०—बंदउँ संत समान चित हित अनहित नहिं कोइ ।

अंजलि गत सुभ सुमन जिमि सम सुगंध कर दोइ ॥ ३(क) ॥

मंत सरल चित जगत हित जानि सुभाउ सनेहु ।

बालबिनय मुनि करि कृपा राम चरन रति देहु ॥ ३(ख) ॥
 बहुरि बंदि खल गन सतिभाएँ । जे बिनु काज दाहिनेहु बाएँ ॥
 पर हित हानिलाभ जिन्ह केरें । उजरें हरष बिषाद बसेरें ॥
 हरि हर जस राकेस राहु से । पर अकाज भट सहसबाहु से ॥
 जे पर दोष लखहि सहसाखी । पर हित घृत जिन्ह के मन माखी
 तेज कृसानु शेष महिषेसा । अघ अवगुन धन धनी धनेसा ॥
 उदय केत सम हित सबही के । कुंभकरन सम सोवत नीके ॥
 पर अकाजु लगि तनु परिहरहीं । जिमि हिम उपल कृषी दलि गरहीं
 बंदउँ खल जस शेष सरोषा । सहस बदन बरनइ पर दोषा ॥
 पुनि प्रनवउँ पृथुराज समाना । पर अघ सुनइ सहस दस काना ॥
 बहुरि सक्र सम बिनवउँ तेही । संतत सुरानीक हित जेही ॥
 बचन बज्र जेहि सदा पिआरा । सहस नयन पर दोष निहारा ॥

दो०—उदासीन अरि मीत हित सुनत जरहिं खल रीति ।

जानि पानि जुग जोरि जन बिनती करइ सप्रीति ॥ ४ ॥

मैं अपनी दिसि कीन्ह निहोरा । तिन्ह निज ओर नलाउब भोरा
बायस पलिअहिं अति अनुरागा । होहिं निरामिष कबहुँ कि कागा
बंदउँ संत असजन चरना । दुखप्रद उभय बीच कलु बरना ॥
बिछुरत एक प्रान हरि लेहीं । मिलत एक दुख दारुन देहीं ॥
उपजहिं एक संग जग माहीं । जलज जोंक जिमि गुन बिलगाहीं
सुधा सुरा सम साधु असाधू । जनक एक जग जलधि अगाधू ॥
भल अनभल निज निज करतूती । लहत सुजस अपलोक बिभूती ॥
सुधा सुधाकर सुरसरि साधू । गरल अनल कलिमल सरि व्याधू
गुन अवगुन जानत सब कोई । जो जेहि भाव नाक तेहि सोई ॥

दो०—भलो भलाइहि पे लहइ लहइ निचाइहि नीचु ।

सुधा सराहिअ अमरताँ गरल सराहिअ मीचु ॥ ५ ॥

खल अघ अगुन साधु गुन गाहा । उभय अपार उदधि अवगाहा ॥
तेहि तैं कलु गुन दोष बखाने । संग्रह त्यागन बिनु पहिचाने ॥
भलेउ पोच सब बिधि उपजाए । गनि गुन दोष बेद बिलगाए ॥
कहहिं बेद इतिहास पुराना । बिधि प्रपंचु गुन अवगुन साना ॥
दुख सुख पाप पुन्य दिन राती । साधु असाधु सुजाति कुजाती ॥
दानव देव ऊँच अरु नीचू । अमिअ सुजीवनु माहुरु मीचू ॥
माया ब्रह्म जीव जगदीसा । लच्छि अलच्छि रंक अवनीसा ॥
कासी मग सुरसरि क्रमनासा । मरु मारव महिदेव गवासा ॥
सरग नरक अनुराग बिरागा । निगमागम गुन दोष बिभागा ॥

दो०—जड़ चेतन गुन दोषमय बिस्व कीन्ह करतार ।

संत हंस गुन गहहिं पय परिहरि बारि बिकार ॥ ६ ॥

अस बिबेक जब देख बिधाता । तब तजि दोष गुनहिं मनु राता ॥
 काल सुभाउ करम बरिआई । भलेउ प्रकृति बस चुकइ भलाई ॥
 सो सुधारि हरिजन जिमि लेहीं । दलि दुख दोष बिमल जसु देहीं ॥
 खलउ करहिं भल पाइ सुसंगू । मिटइ न मलिन सुभाउ अभंगू ॥
 लखि सुबेष जग बंचक जेऊ । बेष प्रताप पूजिअहिं तेऊ ॥
 उघरहिं अंत न होइ निबाहू । कालनेमि जिमि रावन राहू ॥
 किएहुँ कुबेषु साधु सनमानू । जिमि जग जामवंत हनुमानू ॥
 हानि कुसंग सुसंगति लाहू । लोकहुँ बेद बिदित सब काहू ॥
 गगन चढ़इ रज पवन प्रसंगा । कीचहिं मिलइ नीच जल संग्गा ॥
 साधु असाधु सदन सुक सारीं । सुमिरहिं राम देखिं गनि गारीं ॥
 धूम कुसंगति कारिख होई । लिखिअ पुरान मंजु मसि सोई ॥
 सोइ जल अनल अनिल संघाता । होइ जलद जग जीवन दाता ॥

दो०—ग्रह भेषज जल पवन पट पाइ कुजोग सुजोग ।

होहिं कुबस्तु सुबस्तु जग लखहिं सुलच्छन लोग ॥ ७(क) ॥

सम प्रकास ज्ञान पाख दुहुँ नाम भेद बिधि कीन्ह ।

ससि सोषक पोषक समुझि जग जस अपजस दीन्ह ॥ ७(ख) ॥

जड़ चेतन जग जीव जत सकल राममय जानि ।

बंदउँ सब के पद कमल सदा जोरि जुग पानि ॥ ७(ग) ॥

देव दनुज नर नाग खग भ्रेत पितर गंधर्व ।

बंदउँ किंनर रजनिचर कृपा करहु अब सर्व ॥ ७(घ) ॥

आकर चारि लाख चौरासी । जाति जीव जल थल नभ बासी ॥
 सीय राममय सब जग जानी । करउँ प्रनाम जोरि जुग पानी ॥
 जानि कृपाकर किंकर मोहू । सब मिलि करहु छाड़ि छल छोहू
 निज बुधि बल भरोस मोहि नहीं । तातें बिनय करउँ सब पाहीं ॥
 करन चहउँ रघुपति गुन गाहा । लघु मति मोरि चरित अवगाहा ॥
 स्रज न एकउ अंग उपाऊ । मन मति रंक मनोरथ राऊ ॥
 मति प्रति नीच ऊँचि रुचि आछो । चहिअ अमिअ जग जुरइन छाछी
 छमिहहिं सज्जन मोरि दिठार्ई । सुनिहहिं बालबचन मन लाई ॥
 जौ बालक कह तोतरि बाता । सुनिहिं मुदित मन पितु अरु माता
 हँसिहहिं कूर कुटिल कुबिचारी । जे पर दूषन भूषनधारी ॥
 निज कवित्त केहि लाग न नीका । सरस होउ अथवा अति फीका ॥
 जे पर भनिति सुनत हरषाहीं । ते बर पुरुष बहुत जग नाहीं ॥
 जग बहु नर सर सरि सम भाई । जे निज बाढ़ि बढ़हिं जल पाई ॥
 सज्जन सकृत् सिंधु सम कोई । देखि पूर बिधु बाढ़ि जोई ॥
 दो०—भाग छोट अभिलाष बढ करउँ एक बिस्वास ।

पैहहिं सुख सुनि सुजन सब खल करिहहिं उपहास ॥ ८ ॥

खल परिहास होइ हित मोरा । काक कहहिं कलकंठ कठोरा ॥
 हंसहि बक दादुर चातकही । हँसहिं मलिन खल बिमल बतकही
 कवित रसिक न राम पद नेहू । तिन्ह कहँ सुखद हाम रम एहू ॥
 भाषा भनिति भोरि मति मोरी । हँसिबे जोग हँसें नहिं खांकी ॥
 प्रभु पद प्रीति न सामुझि नीकी । तिन्हहि कथा सुनि लागिहि फीकी

हरि हर पद रति मति न कुतरकी । तिन्ह कहँ मधुर कथा रघुबर की
 राम भगति भूषित जियँ जानी । सुनिहहिं सुजन सराहि सुबानी ॥
 कबि न होउँ नहिं बचन प्रवीनू । सकल कला सब विद्या हीनू ॥
 आखर अरथ अलंकृति नाना । छंद प्रबंध अनेक विधाना ॥
 भाव भेद रस भेद अपारा । कवित दोष गुन विविध प्रकारा ॥
 कवित बिबेक एक नहिं मोरें । सन्य कहउँ लिखि कामद कोरें ॥
 दो०—भनिति मोरि सब गुन रहित विस्व भिदित गुन एक ।

सो विचारि सुनिहहिं सुमति जिन्ह कें विमल बिबेक ॥ ९ ॥

एहि महँ रघुपति नाम उदारा । अति पावन पुरान श्रुति सारा ॥
 मंगल भवन अमंगल हारी । उमा सहित जेहि जपत पुरारी ॥
 भनिति बिचित्र सुकवि कृत जोऊ । राम नाम विनु सोह न सोऊ ॥
 विधुबदनी सब भाँति सँवारी । सोह न वसन बिनाबर नारी ॥
 सब गुन रहित कुकवि कृत बानी । राम नाम जस अंकित जानी ॥
 सादर कहहिं सुनिहिं बुध ताही । मधुकर सरिस संत गुनग्राही ॥
 जदपि कवित रस एकउ नार्हा । राम प्रताप प्रगट एहि माहीं ॥
 सोइ भरोस मोरें मन आवा । केहि न सुसंग बड़प्पनु पावा ॥
 धूमउ तजइ सहज करुआई । अगरु प्रसंग सुगंध बसाई ॥
 भनिति भदेस वस्तु भलि बरनी । राम कथा जग मंगल करनी ॥

छं०—मंगल करनि कलि मल हरनि तुलसी कथा रघुनाथ की ।

गति कूर कविता सरित की ज्यों सरित पावन पाथ की ॥

प्रभु सुजस संगति भनिति भलि होइहि मुजन मन भावनी ।

भव अंग भूति मसान की सुमिरत सुहावनि पावनी ॥

दो०—प्रिय लागिहि अति सबहि मम भनिति राम जस संग ।

दारु विचारु कि करइ कोउ वंदिअ मलय प्रसंग ॥१०(क)॥

स्याम सुरभि पय बिसद अति गुनद करहिं सब पान ।

गिरा ग्राम्य सिय राम जस गावहिं सुनहिं सुजान ॥१०(ख)॥

मनि मानिक मुकुता छवि जैसी । अहि गिरि गज सिर सोह न तैसी
नृप किरीट तरुनी तनु पाई । लहहिं सकल मोभा अधिकाई ॥
तैसेहिं सुकवि कवित बुध कहहीं । उपजहिं अनत अनत छवि लहहीं
भगति हेतु बिधि भवन बिहाई । सुमिरत सारद आवति धाई ॥
राम चरित सर विनु अन्हवाएँ । सो श्रम जाइ न कोटि उपाएँ ॥
कवि कोविद अस हृदयँ विचारी । गावहिं हरि जस कलि मल हारी ॥
कीन्हें प्राकृत जन गुन गाना । मिर धुनि गिरा लगत पछिताना
हृदय सिंधु मति मीप सभाना । स्वाति सारदा कहहिं सुजाना ॥
जौं बरषइ वर बारि बिचारू । होहिं कवित मुकुतामनि चारू ॥
दो०—जुगुति बेधि पुनि पोहिअहिं राम चरित वर ताग ।

पहिरहिं सज्जन विमल उर सोभा अति अनुराग ॥ ११ ॥

जे जनमे कलिकाल कराला । करतव बायस बेष मराला ॥
चलत कुपंथ बेद मग छाँड़े । कपट कलेवर कलि मल भाँड़े ॥
बंचक भगत कहाइ राम के । किंकर कंचन कोह काम के ॥
तिन्ह महँ प्रथम रेख जग मोरी । भींग धरमध्वज धंधक धोरी ॥
जौं अपने अवगुन सब कहऊँ । बाढ़इ कथा पार नहिं लहऊँ ॥
ताते मैं अति अल्प बखाने । थोरे महुँ जानिहहिं सयाने ॥
समुझि विविधि बिधि विनती मोरी । कोउ न कथा सुनि देइहि खोरी ॥

एतेहु पर करिहहिं जे असंका । मोहि ते अधिक ते जड़ मति रंका
 कबिन होउँ नहिं चतुर कहावउँ । मति अनुरूप राम गुन गावउँ ॥
 कहँ रघुपति के चरित अपारा । कहँ मति मोरि निरत संसारा ॥
 जेहि मारुत गिरि मेरु उड़ाहीं । कहहु तूल केहि लेखे माहीं ॥
 समुझत अमित राम प्रभुताई । करत कथा मन अति कदराई ॥
 दो०—सारद सेस महेस विधि आगम निगम पुरान ।

नेति नेति कहि जासु गुन करहिं निरंतर गान ॥ १२ ॥

सब जानत प्रभु प्रभुता सोई । तदपि कहें बिनु रहा न कोई ॥
 तहाँ बेद अस कारन राखा । भजन प्रभाउ भाँति बहु भाषा ॥
 एक अनीह अरूप अनामा । अज सच्चिदानंद पर धामा ॥
 व्यापक बिस्वरूप भगवाना । तेहिं धरि देह चरित कृत नाना ॥
 सो केवल भगतन हित लागी । परम कृपाल प्रनत अनुरागी ॥
 जेहि जन पर ममता अति छोहू । जेहिं करुना करि कीन्ह न कोहू ॥
 गई बहोर गरीब नेवाजू । सरल सबल साहिब रघुराजू ॥
 बुधबरनहिं हरि जस अस जानी । कहिं पुनीत सुफल निज बानी ॥
 तेहिं बल मैं रघुपति गुन गाथा । कहिहउँ नाइ राम पद माथा ॥
 मुनिन्ह प्रथम हरि कीरति गाई । तेहिं मग चलत सुगम मोहि भाई
 दो०—अति अपार जे सरित बर जौ नृप सेतु कराहि ।

चदि पिपीलिकउ परम लघु बिनु श्रम पारहिं जाहिं ॥ १३ ॥

एहि प्रकार बल मनहि देखार्ह । करिहउँ रघुपति कथा सुहाई ॥
 न्यास आदि कबिपुंगव नाना । जिन्ह सादर हरि सुजस बखाना
 चरन कमल बंदउँ तिन्ह केरे । पुरवहुँ सकल मनोरथ मेरे ॥

कलि के कबिन्ह करउँ परनामा । जिन्ह बरने रघुपति गुन ब्रामा ॥
 जे प्राकृत कवि परम सयाने । भाषाँ जिन्ह हरि चरित बखाने ॥
 भए जे अहहिं जे होइहहिं आगें । प्रनवउँ सबहि कपट सब त्यागें ॥
 होहु प्रसन्न देहु बरदानू । साधु समाज भनिति सनमानू ॥
 जो प्रबंध बुध नहिं आदरहीं । सो श्रम बादि बाल कवि करहीं ॥
 कीरति भनिति भूति भलि सोई । सुरसरि सम सब कहँ हित होई ॥
 राम सुकीरति भनिति भदेसा । असमंजस अस मोहि अँदेसा ॥
 तुम्हरी कृपाँ सुलभ सोउ मोरे । सिअनि सुहाबनि टाट पटोरे ॥
 दो०—सरल कवित कीरति विमल सोइ आदरहिं सुजान ।

सहज वयर विसराइ रिपु जो सुनि करहिं बखान ॥१४(क)॥
 सो न होइ बिनु विमल मति मोहि मति बल अति थोर ।
 करहु कृपा हरि जस कहउँ पुनि पुनि करउँ निहोर ॥१४(ख)॥
 कवि कोबिद रघुबर चरित मानस मंजु मराल ।
 बालबिनय सुनि सुरुचि लखि मो पर होहु कृपाल ॥१४(ग)॥
 सो०—बंदउँ मुनि पद कंजु रामायन जेहिं निरमयउ ।
 सखर सुकोमल मंजु दोष रहित दूषन सहित ॥१४(घ)॥
 बंदउँ चारिउ बेद भव बारिधि बोहित सरिस ।
 जिन्हहि न सपनेहुँ खेद बरनत रघुबर बिसद जसु ॥१४(ङ)॥
 बंदउँ विधि पद रेनु भव सागर जेहिं कीन्ह जहँ ।
 संत सुधा ससि धेनु प्रगटे खल बिष बारुनी ॥१४(च)॥

दो०—बिबुध विप्र बुध ग्रह चरन बंदि कहउँ कर जोरि ।
 होइ प्रसन्न पुरवहु सकल मंजु मनोरथ मोरि ॥१४(छ)॥
 पुनि बंदउँ सारद सुरसरिता । जुगल पुनीत मनोहर चरिता ॥

मज्जन पान पाप हर एका । कहत सुनत एक हर अबिवेका ॥
 गुर पितु मातु महेस भवानी । प्रनवउँ दीनबंधु दिन दानी ॥
 सेवक स्वामि सखा सिय पी के । हित निरुपधि सब बिधि तुलसी के
 कलि बिलोकि जग हित हर गिरिजा ॥ साबर मंत्र जाल जिन्ह सिरिजा
 अनमिल आखर अरथ न जापू । प्रगट प्रभाउ महेस प्रतापू ॥
 सो उमेस मोहि पर अनुकूला । करिहि कथा मुद मंगल मूला ॥
 सुमिरि सिवा सिव पाइ पसाऊ । बरनउँ राम चरित चित चाऊ ॥
 भनिति मोरि सिव कृपाँ बिभाती । ससि समाज मिलि मनहुँ सुराती
 जे एहि कथहि सनेह समेता । कहिहहि सुनिहहि समुझि सचेता
 होइहहि राम चरन अनुरागी । कलि मल रदित सुमंगल भागी ॥

दो०—सपनेहुँ साचेहुँ मोहि पर जौ हर गौरि पसाउ ।

तौ फुर होउ जो कहेउँ सब भाषा भनिति प्रभाउ ॥ १५ ॥

बंदउँ अवध पुरी अति पावनि । सरजू सरि कलि कलुष नसावनि ॥
 प्रनवउँ पुर नर नारि बहोरी । ममता जिन्ह पर प्रभुहि न थोरी ॥
 सिय निंदक अध ओघ नसाए । लोक बिसोक बनाइ बसाए ॥
 बंदउँ कौसल्या दिसि प्राची । कीरति जासु सकल जग माची ॥
 प्रगटेउ जहँ रघुपति ससि चारू । बिस्व सुखद खल कमल तुसारू ॥
 दसरथ राउ सहित सब रानी । सुकृत सुमंगल मूरति मानी ॥
 करउँ प्रनाम करम मन बानी । करहु कृपा सुत सेवक जानी ॥
 जिन्हहि बिरचि बड़ भयउ बिधाता । महिमा अवधि राम पितु माता

सो०—बंदउँ अवध मुआल सत्य प्रेम जेहि राम पद ।

बिछुरत दीनदयाल प्रिय तनु तन इव परिहरेउ ॥ १६ ॥

प्रनवउँ परिजन सहित बिदेहू । जाहि राम पद गूढ़ सनेहू ॥
जोग भोग महँ राखेउ गोई । राम बिलोकत प्रगटेउ सोई ॥
प्रनवउँ प्रथम भरत के चरना । जासु नेम ब्रत जाइन बरना ॥
राम चरन पंकज मन जासू । लुबुध मधुप इव तजइन पासू ॥
बंदउँ लछिमन पद जलजाता । सीतल सुभग भगत सुख दाता ॥
रघुपति कीरति बिमल पताका । दंड समान भयउ जस जाका ॥
सेष सहस्रसीस जग कारन । जो अवतरेउ भूमि भय टारन ॥
सदा सो सानुकूल रह मो पर । कृपासिंधु सौमित्रि गुनाकर ॥
रिपुसूदन पद कमल नमामी । सूर सुसील भरत अनुगामी ॥
महावीर बिनवउँ हनुमाना । राम जासु जस आप बखाना ॥

सो०—प्रनवउँ पवनकुमार ग्वल वन पावक ग्यानधन ।

जासु हृदय आगार बसहि राम सर चाप धर ॥ १७ ॥

कपिपति रीछ निसाचर राजा । अंगदादि जे कीस समाजा ॥
बंदउँ सब के चरन सुहाए । अधमसरीर राम जिन्ह पाए ॥
रघुपति चरन उपासक जेते । खग मृग सुर नर असुर समेते ॥
बंदउँ पद सरोज सब केरे । जे बिनु काम राम के चेरे ॥
सुकसनकादि भगत मुनि नारद । जे मुनिबर विग्यान बिसारद ॥
प्रनवउँ सबहि धरनि धरि सीसा । करहु कृपा जन जानि मुनीसा ॥
जनकसुता जग जननि जानकी । अतिसय प्रिय करुनानिधान की
ताके जुग पद कमल मनावउँ । जासु कृपाँ निरमल मति पावउँ ॥
पुनि मन बचन कर्म रघुनायक । चरन कमल बंदउँ सब लायक ॥
राजिवनयन धरें धनु सायक । भगत बिपति भंजन सुख दायक ॥

दो०—गिरा. अरथ जल बीचि सम कहिअत भिन्न न भिन्न ।

बंदउँ सीता राम पद जिन्हहि परम प्रिय खिन्न ॥ १८ ॥

बंदउँ नाम राम रघुवर को । हेतु कृसानु भानु हिमकर को ॥
 बिधि हरि हरमय बेद ग्रान सो । अगुन अनूपम गुन निधान सो ॥
 महामंत्र जोइ जपत महेस्र । कासीं मुकुति हेतु उपदेस्र ॥
 महिमा जासु जान गनराऊ । प्रथम पूजिअत नाम प्रभाऊ ॥
 जान आदिकबि नाम प्रतापू । भयउ सुद्ध करि उलटा जापू ॥
 सहस नाम सम सुनि सिव बानी । जपि जेई पिय संग भवानी ॥
 हरषे हेतु हेरि हर ही को । किय भूषन तिय भूषन ती को ॥
 नाम प्रभाउ जान सिव नीको । कालकूट फलु दोन्ह अमी को ॥

दो०—बरषा रितु रघुपति भगति तुलसी सालि सुदास ।

राम नाम बर बरन जुग सावन भादव मास ॥ १९ ॥

आखर मधुर मनोहर दोऊ । बरन बिलोचन जन जिय जोऊ ॥
 सुमिरत सुलभ सुखद सब काहू । लोक लाहु परलोक निबाहू ॥
 कहत सुनत सुमिरत सुठि नीके । राम लखन सम प्रिय तुलसी के ॥
 बरनत बरन प्रीति बिलगाती । ब्रह्म जीव सम सहज सँघाती ॥
 नर नारायन सस्सि सुभ्राता । जग पालक बिसेषि जन त्राता ॥
 भगति सुतिय कल करन बिभूषन । जग हित हेतु बिमल बिधु पूषन
 स्वाद तोष सम सुगति सुधा के । कमठ सेष सम धर बसुधा के ॥
 जन मन मंजु कंज मधुकर से । जीह जसोमति हरि हलधर से ॥

दो०—एकु छत्रु एकु मुकुटमनि सब बरननि पर जोउ ।

तुलसी रघुवर नाम के बरन बिराजत दोउ ॥ २० ॥

समुझत सरिस नाम अरु नामी । प्रीति परसपर प्रभु अनुगामी ॥
 नाम रूप दुइ ईस उपाधी । अकथ अनादि सुसामुझि साधी
 को बड़ छोट कहत अपराधू । सुनि गुन भेदु समुझिहहि साधू ॥
 देखिअहि रूप नाम आधीना । रूप ग्यान नहि नाम बिहीना ॥
 रूप बिसेष नाम बिनु जानें । करतल गत न परहि पहिचानें ॥
 सुमिरिअ नाम रूप बिनु देखें । आवत हृदय सनेह बिसेषें ॥
 नाम रूप गति अकथ कहानी । समुझत सुखद न परति बखानी ॥
 अगुन सगुन बिच नाम सुसाखी । उभय प्रबोधक चतुर दुभाषी ॥
 दो०—राम नाम मनि दीप धरु जीह देहरी द्वार ।

तुलती भीतर बाहेरहुँ जौ चाहसि उजिआर ॥ २१ ॥

नाम जीहँ जपि जागहि जोगी । बिरति बिरंचि प्रपंच बियोगी ॥
 ब्रह्मसुखहि अनुभवहि अनूपा । अकथ अनामय नाम नरूपा ॥
 जाना चहहि गूढ़ गति जेऊ । नाम जीहँ जपि जानहि तेऊ ॥
 साधक नाम जपहि लय लाएँ । होहि सिद्ध अनिमादिक पाएँ ॥
 जपहि नामु जन आरत भारी । मिटहि कुसंकट होहि सुखारी ॥
 राम भगत जग चारि प्रकारा । सुकृती चारिउ अनघ उदारा ॥
 चहू चतुर कहूँ नाम अधारा । ग्यानी प्रभुहि बिसेषि पिआरा ॥
 चहुँ जुग चहुँ श्रुति नाम प्रभाऊ । कलि बिसेषि नहि आनउपाऊ ॥
 दो०—सकल कामना हीन जे राम भगति रस लीन ।

नाम सुप्रेम पियूष हृद तिन्हहुँ किए मन मीन ॥ २२ ॥

अगुन सगुन दुइ ब्रह्म सरूपा । अकथ अगाध अनादि अनूपा ॥
 मोरें मत बड़ नामु दुहू तें । किए जेहि जुग निज बस निज बूतें

प्रीति सुजन जनि जानहि जन की । कहउँ प्रतीति प्रीति रुचि मन की ॥
 एकु दारुगत देखिअ एकू । पावक सम जुग ब्रह्म बिबेकू ॥
 उभय अगम जुग सुगम नाम तैं । कहेउँ नामु बड़ ब्रह्म राम तैं ॥
 व्यापकु एकु ब्रह्म अबिनासी । सत चेतन घन आनँद रासी ॥
 अस प्रभु हृदयँ अछत अबिकारी । सकल जीव जग दीन दुखारी ॥
 नाम निरूपन नाम जतन तैं । सोउ प्रगटत जिमि मोल रतन तैं ॥
 दो०—निरगुन तैं एहि भाँति बड़ नाम प्रभाउ अपार ।

कहउँ नामु बड़ राम तैं निज विचार अनुसार ॥ २३ ॥
 राम भगत हित नर तनु धारी । सहि संकट किए साधु सुखारी ॥
 नामु सप्रेम जपत अनयासा । भगत होहिं मुद मंगल बासा ॥
 राम एक तापस तिय तारी । नाम कोटि खल कुमति सुधारी ॥
 रिषि हित राम सुकेतुसुता की । सहित सेन सुत कीन्हि बिचाकी ॥
 सहित दोष दुख दास दुरासा दलइ नामु जिमि रबि निसि नासा ॥
 मंजेउ राम आपु भव चापू । भव भय भंजन नाम प्रतापू ॥
 दंडक बन प्रभु कीन्ह सुहावन । जन मन अमित नाम किए पावन ॥
 निसिचर निकर दले रघुनंदन । नामु सकल कलि कलुष निकंदन ॥
 दो०—सबरी गीधू सुसेवकनि सुगति दीन्हि रघुनाथ ।

नाम उधारे अमित खल बेद विदित गुन गाथ ॥ २४ ॥
 राम सुकंठ बिभीषन दोऊ । राखे सरन जान सबु कोऊ ॥
 नाम गरीब अनेक नेवाजे । लोक बेद बर बिरिद बिराजे ॥
 राम भालु कपि कटकु बटोरा । सैतु हेतु श्रमु कीन्ह नथोरा ॥
 नामु लेत भवसिंधु सुखाहीं । करहु बिचारु सुजन मन माहीं ॥

राम सकुल गन रावनु मारा । सीय सहित निज पुर पगु धारा ॥
राजा रामु अवध रजधानी । गावत गुन सुर मुनि बर बानी ॥
सेवक सुमिरत नामु सप्रीती । बिनु श्रम प्रबल मोह दलु जीती ॥
फिरत सनेहँ मगन सुख अपनेँ । नाम प्रसाद सोच नहिँ सपनेँ ॥

दो०—ब्रह्म राम तेँ नामु बड़ बर दायक बर दानि ।

रामचरित सत कोटि महँ लिय महेस जियँ जानि ॥ २५ ॥

मासपारायण, पहला विश्राम

नाम प्रसाद संभु अविनासी । साजु अमंगल मंगल रासी ॥
सुक सनकादि सिद्ध मुनि जोगी । नाम प्रसाद ब्रह्मसुख भोगी ॥
नारद जानेउ नाम प्रतापू । जग प्रिय हरि हरि हर प्रिय आपू ॥
नामु जपत प्रभु कीन्ह प्रसादू । भगत सिरोमनि मे प्रहलादू ॥
ध्रुवँ सगलानि जपेउ हरि नाऊँ । पायउ अचल अनूपम ठाऊँ ॥
सुमिरि पवनसुत पावन नामू । अपने बम करि राखे रामू ॥
अपतु अजामिलु गजु गनिकाऊ । भए मुकुत हरि नाम प्रभाऊ ॥
कहौँ कहाँ लगि नाम बड़ाई । रामु न सकहिँ नाम गुन गाई ॥

दो०—नामु राम को कलपतरु कलि कल्याण निवासु ।

जो सुमिरत भयो भाँग तेँ तुलसी तुलसीदासु ॥ २६ ॥

चहुँ जुग तीन काल तिहुँ लोका । भए नाम जपि जीव बिसोका ॥
बेद पुरान संत मत एहू । सकल सुकृत फल राम सनेहू ॥
ध्यानु प्रथम जुग मखविधि दूजै । द्वापर परितोषत प्रभु पूजै ॥
कलि केवल मल मूल मलीना । पाप पयोनिधि जन मन मीना ॥
नाम कामतरु काल कराला । सुमिरत समन सकल जग जाला ॥

राम नाम कलि अभिमत दाता । हित परलोक लोक पितु माता ॥
 नहिं कलि करम न भगति बिबेकू । राम नाम अवलंबन एकू ॥
 कालनेमि कलि कपट निधानू । नाम सुमति समरथ हनुमानू ॥

दो०—राम नाम नरकेसरी कनककसिपु कलिकाल ।

जापक जन प्रहलाद जिमि पालिहि दलि सुरसाल ॥ २७ ॥

भायँ कुभायँ अनख आलसहूँ । नाम जपत मंगल दिसि दसहूँ ॥
 सुमिरि सो नाम राम गुन गाथा । करउँ नाइ रघुनाथहि माथा ॥
 मोरि सुधारिहि सो सब भाँती । जासु कृपा नहिं कृपाँ अघाती ॥
 राम सुखामि कुसेवकु मोसो । निज दिसि देखि दयानिधि पोसो ॥
 लोकहुँ बेद सुसाहिब रीती । बिनय सुनत पहिचानत प्रीती ॥
 गनी गरीब ग्रामनर नागर । पंडित मूढ़ मलीन उजागर ॥
 सुकबि कुकबि निज मति अनुहारी । नृपहि सराहत सब नर नारी ॥
 साधु सुजान सुसील नृपाला । ईस अंस भव परम कृपाला ॥
 सुनि सनमानहिं सबहि सुबानी । भनिति भगति नति गति पहिचानी
 यह प्राकृत महिपाल सुभाऊ । जान भिरोमनि कोसलराऊ ॥
 रीझत राम मनेह निमोतें । को जग मंद मलिनमति मोतें ॥

दो०—सठ सेवकै की प्रीति रुचि रखिहिं राम कृपालु ।

उपल किए जलजान जेहिं सचिव सुमति कपि भालु ॥ २८ (क) ॥

हौहु कहावत सयु कहत राम सहत उपहास ।

साहिब सीतानाथ सो सेवक तुलसीदास ॥ २८ (ख) ॥

अति बड़ि मोरि ढिठाई खोरी । सुनि अघ नरकहुँ नाक सकोरी ॥
 समुझि सहम मोहि अपडर अपनैं । सो सुधि राम कीन्हि नहिं सपनैं ॥

सुनि अवलोकि सुचित चख चाही । भगति मोरि मति स्वामि सराही
कहत नसाइ होइ हियँ नीकी । रीझत राम जानि जन जी की ॥
रहति न प्रभु चित चूक किए की । करत सुरति सय बार दिए की ॥
जेहिं अघ बधेउ व्याध जिमि वाली । फिरि सुकंठ सोइ कीन्हि कुचाली
सोइ करतूति बिभीषन केरी । सपनेहुँ सो न राम हियँ हेरी ॥
ते भरतहि भेंटत सनमाने । राजसभाँ रघुबीर बखाने ॥

दो०—प्रभु तरु तर कपि डार पर ते किए आपु समान ।

तुलसी कहूँ न राम से साहिब सीलनिधान ॥२९(क)॥

राम निकाई रावरी है सबही को नीक ।

जौ यह साँची है सदा तौ नीको तुलसीक ॥२९(ख)॥

एहि बिधि निज गुन दोष कहि सबहि बहुरि सिरु नाइ ।

बरनउँ रघुबर विसद जसु सुनि कलि कलुष नसाइ ॥२९(ग)॥

जागबलिक जो कथा सुहाई । भरद्वाज सुनिबरहि सुनाई ॥
कहिहँउ सोइ संवाद बखानी । सुनहुँ सकल सज्जन सुखु मानी ॥
संभु कीन्ह यह चरित सुहावा । बहुरि कृपा करि उमहि सुनावा ॥
सोइ मित्र कागभुसुंडिहि दीन्हा । राम भगत अधिकारी चीन्हा ॥
तेहि मन जागबलिक पुनि पावा । तिन्ह पुनि भरद्वाज प्रति गावा ॥
ते श्रोता वकता समसीला । सवँदरसी जानहिं हरिलीला ॥
जानहिं तीनि काल निज ग्याना । करतल गत आमलक समाना ॥
औरउ जे हरिभगत सुजाना । कहहिं सुनहिं समुझहिं बिधि नाना ॥

दो०—मैं पुनि निज गुर सन सुनी कथा सो सूकरखेंत ।

समुझी नहिं तसि बालपन तब अति रहेउँ अचेत ॥३०(क)॥

श्रोता बकता ग्याननिधि कथा राम कै गूढ़ ।

किमि समझौं मैं जीव जड़ कलि मल ग्रसित बिमूढ़ ॥ ३० (ख) ॥

तदपि कही गुर बारहिं बारा । समुझि परी कछु मति अनु सारा ॥
 भाषाबद्ध करबि मैं सोई । मोरें मन प्रबोध जेहिं होई ॥
 जस कछु बुधि बिबेक बल मेरें । तस कहिहउँ हियँ हरि के प्रे ॥
 निज संदेह मोह भ्रम हरनी । करउँ कथा भव सरिता तरनी ॥
 बुध विश्राम सकल जन रंजनि । रामकथा कलि कलुष बिभंजनि ॥
 रामकथा कलि पंनग भरनी । पुनि बिबेक पावक कहूँ अरनी ॥
 रामकथा कलि कामद गाई । सुजन सजीवनि मूरि सुहाई ॥
 सोढ बसुधातल सुधा तरंगिनि । भय मंजनि भ्रम भेक भुअंगिनि ॥
 असुर सेन सम नरक निरंदिनि । साधु बिबुध कूल हित गिरिनंदिनि
 संत समाज पयोधि रमा सी । बिस्व भार भर अचल छमा सी ॥
 जम गन मुहँ ममि जग जमुना सी । जीवन मुकुति हेतु जनु कासी ॥
 रामहि प्रिय पावनि तुलसी सी । तुलसिदास हित हियँ हुलसी सी ॥
 सिवप्रिय मेकल सैल सुता सी । सकल सिद्धि सुख संपति रासी ॥
 सदगुन सुरगन अंब अदिति सी । रघुबर भगति प्रेम परमिति सी ॥

दो०—रामकथा ३ मंदाकिनी चित्रकूट चित चारु ।

तुलसी सुभग सनेह बन सिय रघुबीर बिहारु ॥ ३१ ॥

रामचरित चिंतामनि चारु । संत सुमति तिय सुभग सिंगारु ॥
 जग मंगल गुन ग्राम राम के । दानि मुकुति धन धरम धाम के ॥
 सदगुर ग्यान बिगाग जोग के । बिबुध बैद भव भीम रोग के ॥
 जननि जनक सिय राम प्रेम के । बीज सकल व्रत धरम नेम के ॥

समन पाप संताप सोक के । प्रिय पालक परलोक लोक के ॥
 सचिव सुभट भूपति बिचार के । कुंभज लोभ उदधि अपार के ॥
 काम कोह कलिमल करिगन के । केहरि सावक जन मन बन के ॥
 अतिथि पूज्य प्रियतम पुरारि के । कामद घन दारिद दवारि के ॥
 मंत्र महामनि बिषय ब्याल के । मेढत कठिन कुअंक भाल के ॥
 हरन मोह तम दिनकर कर से । सेवक सालि पाल जलधर से ॥
 अभिमत दानि देवतरु बर से । सेवत सुलभ सुखद हरिहर से ॥
 सुकबि सरद नभ मन उडगन से । रामभगत जन जीवन धन से ॥
 सकल सुकृत फल भूरि भोग से । जग हित निरुपधि साधु लोग से
 सेवक मन मानस मराल से । पावन गंग तरंग माल से ॥

दो०—कुपथ कुतरक कुचालि कलि कपट दंभ पाषंड ।

दहन राम गुन ग्राम जिमि इंधन अनल प्रचंड ॥ ३२(क) ॥

रामचरित राकेस कर सरिस सुखद सब काहु ।

सज्जन कुमुद चकोर चित हित बिसेषि बड़ लाहु ॥ ३२(ख) ॥

कीन्हि प्रस्न जेहि भाँति भवानी । जेहि बिधि संकर कहा बखानी ॥
 सो सब हेतु कहब मैं गाई । कथाप्रबंध बिचित्र बनाई ॥
 जेहि यह कथा सुनी नहिं होई । जनि आचरजु करै सुनि सोई ॥
 कथा अलौकिक सुनहिं जे ग्यानी । नहिं आचरजु करहिं अस जानी ॥
 राम कथा कै मिति जग नाही । असि प्रतीति तिन्ह के मन माहीं ॥
 नाना भाँति राम अवतारा । रामायन सत कोटि अपारा ॥
 कल्पभेद हरि चरित सुहाए । भाँति अनेक मुनीसन्ह गाए ॥
 करिअन संसय अस उर आनी । सुनिअ कथासादर रति मानी ॥

दो०—राम अनंत अनंत गुन अमित कथा बिस्तार ।

मुनि आचरजु न मानिहहिं जिन्ह कें बिमल बिचार ॥ ३३ ॥

एहि बिधि सब संसय करि दूरी । सिर धरि गुर पद पंकज धूरी ॥
 पुनि सबही बिनवउँ कर जोरी । करत कथा जेहिं लाग न खोरी ॥
 सादर सिवहि नाइ अब माथा । बरनउँ बिसद राम गुन गाथा ॥
 संबत सोरह सै एकतीसा । करउँ कथा हरि पद धरि सीसा ॥
 नौमी भौम बार मधु मासा । अवधपुरीं यह चरित प्रकासा ॥
 जेहि दिन रामजनम श्रुति गावहिं । तीरथ सकल तहाँ चलि आवहिं
 असुर नाग खग नर मुनि देवा । आइ करहिं रघुनायक सेवा ॥
 जन्म महोत्सव रचहिं सुजाना । करहिं राम कल कीरति गाना ॥

दो०—मज्जहिं सज्जन बृंद बहु पावन सरजू नीर ।

जपहिं राम धरि ध्यान उर सुंदर स्याम सरीर ॥ ३४ ॥

दरस परस मज्जन अरु पाना । हरइ पाप कह बेद पुराना ॥
 नदी पुनीत अमित महिमा अति । कहि न सकइ सारदा बिमलमति
 राम धामदा पुरी सुहावनि । लोक समस्त बिदित अति पावनि
 चारि खानि जगू जीव अपारा । अवध तजें तनु नहिं संसारा ॥
 सब बिधि पुरी मनोहर जानी । सकल सिद्धिप्रद मंगल खानी ॥
 बिमल कथा कर कीन्ह अरंभा । सुनत नसाहिं काम मद दंभा ॥
 रामचरितमानस एहि नामा । सुनत श्रवन पाइ अविश्रामा ॥
 मन करि बिषय अनल बन जरई । होइ सुखी जौं एहिं सर परई ॥
 रामचरितमानस मुनि भावन । बिरचेउ संभ्र सुहावन पावन ॥
 त्रिविध दोष दुख दारिद दावन । कलि कुचालि कुलि कलुष नसावन

रचि महेस निज मानस राखा । पाइ सुसमउ सिवा सन भाषा ॥
तातें रामचरितमानस बर । धरेउ नाम हियँ हेरि हरषि हर ॥
कहउँ कथा सोइ सुखद सुहाई । सादर सुनहु सुजन मन लाई ॥
दो०—जस मानस जेहि विधि भयउ जग प्रचार जेहि हेतु ।

अब सोइ कहउँ प्रसंग सब सुमिरि उमा वृषकेतु ॥ ३५ ॥

संभु प्रसाद सुमति हियँहुलसी । रामचरितमानस कबि तुलसी ॥
करइ मनोहर मति अनुहारी । सुजनसुचित सुनि लेहु सुधारी ॥
सुमति भूमि थल हृदय अगाधू । वेद पुरान उदधि घन साधू ॥
बरषहिँ राम सुजस बर वारी । मधुर मनोहर मंगलकारी ॥
लीला सगुन जो कहहिँ बखानी । सोइ खच्छता करइ मल हानी ॥
प्रेम भगति जो बरनि न जाई । सोइ मधुरता सुसीतलताई ॥
सो जरु सुकृत सालि हित होई । राम भगत जन जीवन सोई ॥
मेधा महि गत सो जल पावन । सकलि श्रवन मग चलेउ सुहावन
भरेउ सुमानस सुथल थिराना । सुखद सीत रुचि चारु चिराना ॥
दो०—सुठि सुंदर संवाद बर विरचे बुद्धि विचारि ।

तेइ एहि पावन सुभग सर घाट मनोहर चारि ॥ ३६ ॥

सप्त प्रबंध सुभग सोपाना । ग्यान नयन निरखत मन माना ॥
रघुपति महिमा अगुन अबाधा । बरनब सोइ बर बारि अगाधा ॥
राम सीय जम सलिल सुधासम । उपमा बीचि बिलास मनोरम ॥
पुरइनि मघन चारु चौपाई । जुगुति मंजु मनि सीप सुहाई ॥
छंद सोरठा सुंदर दोहा । सोइ बहुरंग कमल कुल सोहा ॥
अरथ अनूप सुभाव सुभासा । सोइ पराग मकरंद सुबासा ॥

सुकृत पुंज मंजुल अलि माला । ग्यान बिराग बिचार मराला ॥
 धुनि अवरेव कबित गुन जाती । मीन मनोहर ते बहुभाँती ॥
 अरथ धरम कामादिक चारी । कहब ग्यान विग्यान बिचारी ॥
 नव रस जप तप जोग बिरागा । ते सब जलचर चारु तड़ागा ॥
 सुकृती साधु नाम गुन गाना । ते बिचित्र जलबिहग समाना ॥
 संतसभा चहुँ दिसि अवँराई । श्रद्धा रितु बसंत सम गाई ॥
 भगति निरूपन बिबिधविधाना । छमा दया दम लता बिताना ॥
 सम जम नियम फूल फल ग्याना । हरि पद रति रस बेद बखाना ॥
 औरउ कथा अनेक प्रसंगा । तेइ सुकपिक बहुचरन बिहंगा ॥
 दो०—पुलक बाटिका बाग बन सुख सुबिहंग बिहार ।

माली सुमन सनेह जल सींचत लोचन चारु ॥ ३७ ॥

जे गावहिं यह चरित सँभारे । तेइ एहि ताल चतुररखवारे ॥
 सदा सुनहिं सादर नर नारी । तेइ सुरबर मानस अधिकारी ॥
 अति खल जे बिषई बग कागा । एहि सर निकट न जाहिं अभागा
 संबुक भेक सेवार समाना । इहाँ न बिषय कथारस नाना ॥
 तेहि कारन आवत हियँ हारे । कामी काक बलाक बिचारे ॥
 आवत एहिं सर क्षति कठिनाई । राम कृपा बिनु आइ न जाई ॥
 कठिन कुसंग कुपंथ कराला । तिन्ह के बचन बाध हरि ब्याला
 गृह कारज नाना जंजाला । ते अति दुर्गम सैल विपाला ॥
 बन बहु विषम मोह मद माना । नदीं कुतर्क भयंकर नाना ॥
 दो०—जे श्रद्धा संबल रहित नहिं संतन्ह कर साथ ।

तिन्ह कहूँ मानस अगम अति जिन्हहि न प्रिय रघुनाथ ॥ ३८ ॥

जौं करि कष्ट जाइ पुनि कोई । जातहिं नीद जुड़ाई होई ॥
जड़ता जाड़ बिषम उर लागा । गएहुँ न मज्जन पाव अभागा ॥
करि न जाइ सर मज्जन पाना । फिरि आवइ समेत अभिमाना ॥
जौं बहोरि कोउ पूछन आवा । सर निंदा करि ताहि बुझावा ॥
सकल बिघ्न व्यापहिं नहिं तेही । राम सुकृपाँ बिलोकहिं जेही ॥
सोइ सादर सर मज्जनु करई । महा घोर त्रयताप न जरई ॥
ते नर यह सर तजहिं न काऊ । जिन्ह कें रामचरन भल भाऊ ॥
जो नहाइ चह एहिं सर भाई । सो सतसंग करउ मन लाई ॥
अस मानस मानस चख चाही । भइ कबि बुद्धि बिमल अवगाही ॥
भयउ हृदयँ आनंद उछाहू । उमगेउ प्रेम प्रमोद प्रबाहू ॥
चली सुभग कबिता सरिता सो । राम बिमल जस जल भरिता सो ॥
सरजू नाम सुमंगल मूला । लोक बेद मत मंजुल कूला ॥
नदी पुनीत सुमानस नंदिनि । कलिमल तृन तरु मूल निकंदिनि

दो०—श्रोता त्रिविध समाज पुर ग्राम नगर दुहुँ कूल ।

संतसभा अनुपम अवध सकल सुमंगल मूल ॥ ३९ ॥

रामभगति सुरसरितहि जाई । मिली सुकीरति सरजु सुहाई ॥
सानुज राम समरजसु पावन । मिलेउ महानदु सोन सुहावन ॥
जुग बिच भगति देवधुनिधारा । सोहति सहित सुविरति बिचारा ॥
त्रिविध ताप त्रासक तिमुहानी । राम सरूप सिंधु समुहानी ॥
मानस मूल मिली सुरसरिही । सुनत सुजन मन पावन करिही ॥
बिच बिच कथा बिचित्र बिभागा । जनु सरि तीर तीर बन बागा ॥
उमा महेस बिबाह बराती । ते जलचर अगनित बहुभाँती ॥

रघुवर जनम अनंद बधाई । भवँर तरंग मनोहरताई ॥

दो०—बालचरित चहु बंधु के बनज बिपुल बहुरंग ।

नृप रानी परिजन सुकृत मधुकर बारि बिहंग ॥ ४० ॥

सीय स्वयंबर कथा सुहाई । सरित सुहावनि सोछबिछाई ॥
 नदी नाव पटु प्रस्न अनेका । केवट कुसल उतर सबिवेका ॥
 सुनि अनुकथन परस्पर होई । पथिक समाज सोह सरिसोई ॥
 घोर धार भृगुनाथ रिसानी । घाट सुबद्ध राम बर बानी ॥
 सानुज राम बिबाह उछाहू । सो सुभ उमग सुखद सब काहू ॥
 कहत सुनत हरषहि पुलकाहीं । ते सुकृती मन मुदित नदाहीं ॥
 राम तिलक हित मंगल साजा । परब जोग जनु जुरे समाजा ॥
 काई कुमति केकई केरी । परी जासु फल बिपति घनेरी ॥

दो०—समन अमित उतपात सब भरत चरित जप जाग ।

कलि अघ खल अवगुन कथन ते जलमल बग काग ॥ ४१ ॥

कीरति सगित छहूँ रितु रूरी । समय सुहावनि पावनि भूरी ॥
 हिम हिमसैलसुतासिव व्याहू । सिसिर सुखद प्रभु जनम उछाहू ॥
 बरबब राम बिबाह समाजू । सो मुद मंगलमय रितुराजू ॥
 ग्रीषम दुसह राम बनगमनू । पंथकथा खर आतप पवनू ॥
 वरषा घोर निसाचर रारी । सुरकुल सालि सुमंगलकारी ॥
 राम राज सुख बिनय बड़ाई । बिसद सुखद सोइ सरद सुहाई ॥
 सती सिरोमनि सिय गुनगाथा । सोइ गुन अमल अनूपम पाथा ॥
 भरत सुभाउ सुसीतलताई । सदा एकरस बरनि न जाई ॥

दो०—अवलोकनि बोलनि मिलनि श्रीति परसपर हास ।

भायप भलि चहु बंधु की जल माधुरी सुवास ॥ ४२ ॥

आरति बिनय दीनता मोरी । लघुताललित सुवारि न थोरी ॥
अदभुत सलिल सुनत गुनकारी । आस पिआस मनोमल हारी ॥
राम सुप्रेमहि पोषत पानी । हरत सकल कलि कलुष गलानी ॥
भव श्रम सोषक तोषक तोषा । समन दुरित दुख दारिद दोषा ॥
काम कोह मद मोह नसावन । बिमल विबेक विराग बढ़ावन ॥
सादर मज्जन पान किए तें । मिटहिं पाप परिताप हिए तें ॥
जिन्ह एहिं बारि न मानस धोए । ते कायर कलिकाल विगोए ॥
तृषित निरखि रबि कर भव वारी । फिरिहहिं मृग जिमि जीव दुखारी

दो०—मति अनुहारि सुवारि गुन गन गनि मन अन्हवाइ ।

सुमिरि भवानी संकरहि कह कबि कथा सुहाइ ॥ ४३(क) ॥

अब रघुपति पद पंकरुह हियँ धरि पाइ प्रसाद ।

कहउँ जुगल मुनिवर्य कर मिलन सुभग संवाद ॥ ४३(ख) ॥

भरद्वाज मुनि बमहिं प्रयागा । तिन्हहि राम पद अति अनुरागा ॥
तापस सम दम दया निधाना । परमारथ पथ परम सुजाना ॥
माघ मकरगत रबि जब होई । तीरथपतिहि आव सब कोई ॥
देव दनुज किंनर नर श्रेणी । सादर मज्जहिं सकल त्रिबेनी ॥
पूजहिं माधव पद जलजाता । परसि अखय बटु हरषहिं गाता ॥
भरद्वाज आश्रम अति पावन । परम रम्य मुनिवर मन भावन ॥
तहाँ होइ मुनि रिपय समाजा । जाहिं जे मज्जन तीरथराजा ॥
मज्जहिं प्रात समेत उछाहा । कहहिं परसपर हरि गुन गाहा ॥

दो०—ब्रह्म निरूपन धरम बिधि बरनहिं तत्त्व विभाग ।

कहहिं भगति भगवंत कै संजुत ग्यान बिराग ॥ ४४ ॥

एहि प्रकार भरि माघ नहाहीं । पुनि सब निज निज आश्रम जाहीं
प्रति संवत अति होइ अनंदा । मकर मज्जि गवनहिं मुनिबृंदा ॥
एक बार भरि मकर नहाए । सब मुनीस आश्रमन्ह सिधाए ॥
जागबलिक मुनि परम बिबेकी । भरद्वाज राखे पद टेकी ॥
सादर चरन सरोज पखारे । अति पुनीत आसन बैठारे ॥
करि पूजा मुनि सुजसु बखानी । बोले अति पुनीत मृदु बानी ॥
नाथ एक संसउ बड़ मोरें । करगत बेदतत्त्व सबु तोरें ॥
कहत सो मोहि लागत भय लाजा । जौ न कहउँ बड़ होइ अकाजा ॥

दो०—संत कहहिं असि नीति प्रभु श्रुति पुरान मुनि गाव ।

होइ न विमल बिबेक उर गुर सन किएँ दुराव ॥ ४५ ॥

अस बिचारि प्रगटउँ निज मोहू । हरहु नाथ करि जन पर छोहू ॥
राम नाम कर अमित प्रभावा । संत पुरान उपनिषद गावा ॥
संतत जपत संभु अबिनासी । सिव भगवान ग्यान गुन रासी ॥
आकर चारि जीव जग अहहीं । कासीं मरत परम पद लहहीं ॥
सोपि राम महिमा मुनिराया । सिव उपदेसु करत करि दाया ॥
रामु कवन प्रभु पूछउँ तोही । कहि अबुझाइ कृपानिधि मोही ॥
एक राम अवधेस कुमारा । तिन्ह कर चरित बिदित संसारा ॥
नारि विरहँ दुखु लहेउ अपारा । भयउ रोषु रन रावनु मारा ॥

दो०—प्रभु सोइ राम कि अपर कोउ जाहि जपत त्रिपुरारि ।

सत्यधाम सर्वग्य तुम्ह कहहु बिबेकु बिचारि ॥ ४६ ॥

जैसेँ मिटै मोर भ्रम भारी । कहहु सो कथा नाथ बिस्तारी ॥
जागबलिक बोले मुसुकाई । तुम्हहि विदित रघुपति प्रभुताई ॥
रामभगत तुम्ह मन क्रम बानी । चतुराई तुम्हारि मैं जानी ॥
चाहहु सुनै राम गुन गूढ़ा । कीन्हिहु प्रस्न मनहुँ अति मूढ़ा ॥
तात सुनहु सादर मनु लाई । कहउँ राम कै कथा सुहाई ॥
महामोहु महिषेसु बिसाला । रामकथा कालिका कराला ॥
रामकथा ससि किरन समाना । संत चकोर करहिं जेहि पाना ॥
ऐसेइ संसय कीन्ह भवानी । महादेव तब कहा बखानी ॥

दो०—कहउँ सो मति अनुहारि अब उमा संभु संवाद ।

भयउ समय जेहि हेतु जेहि सुनु मुनि मिटिहि बिषाद ॥ ४७ ॥

एक बार त्रेता जुग मोहीं । संभु गए कुंभज रिषि पाहीं ॥
संग सती जगजननि भवानी । पूजे रिषि अखिलेस्वर जानी ॥
रामकथा मुनिबर्ज बखानी । सुनी महेस परम सुखु मानी ॥
रिषि पूछी हरिभगति सुहाई । कही संभु अधिकारी पाई ॥
कहत सुनत रघुपति गुन गाथा । कलु दिन तहाँ रहे गिरिनाथा ॥
मुनि सन बिदा मागि त्रिपुरारी । चले भवन सँग दच्छकुमारी ॥
तेहि अवसर भंजन महिभारा । हरि रघुवंस लीन्ह अवतारा ॥
पिता बचन तजि राजु उदासी । दंडकवन बिचरत अबिनासी ॥

दो०—हृदयँ विचारत जात हर केहि विधि दरसनु होइ ।

गुप्त रूप अवतरेउ प्रभु गएँ जान सवु कोइ ॥ ४८(क) ॥

सो०—संकर उर अति छोभु सती न जानहिं मरमु सोइ ।

तुलसी दरसन लोभु मन डरु लोचन लालची ॥ ४८(ख) ॥

रावन मरन मनुज कर जाचा । प्रभु बिधि बचनु कीन्ह चह साचा॥
 जौं नहिं जाउँ रहइ पछितावा । करत बिचारु न बनत बनावा ॥
 एहि बिधि भए सोचबस ईसा । तेही समय जाइ दससीसा ॥
 लोन्ह नीच मारीचहि संगी । भयउ तुरत सोइ कपट कुरंगा ॥
 करि छलु मूढ़ हरी बैदेही । प्रभु प्रभाउ तस बिदित न तेही ॥
 मृग बधि बंधु महित हरि आए । आश्रमु देखि नयन जल छाए ॥
 बिरह बिकल नर इव रघुगई । खोजत बिपिन फिरत दोउ भाई ॥
 कबहूँ जोग बियोग न जाकें । देखा प्रगट बिरह दुखु ताकें ॥

दो०—अति विचित्र रघुपति चरित जानहिं परम सुजान ।

जे मतिमंद विमोह बस हृदयँ धरहिं कछु आन ॥ ४९ ॥

संभु समय तेहि रामहि देखा । उपजा हियँ अति हरषु बिसेषा ॥
 भरि लोचन छवि सिंधु निहारी । कुसमय जानि न कीन्हि चिन्हारी
 जय सच्चिदानंद जग पावन । अस कहि चलेउ मनोज नसावन
 चले जात सिव सती समेता । पुनि पुनि पुलकत कृपानिकेता ॥
 सतीं सो दसा संभु कै देखी । उर उपजा संदेहु बिसेषी ॥
 संकरु जगतबंध जगदीसा । सुर नर मुनि सब नावत सीसा ॥
 तिन्ह नृपसुतहि कीन्ह परनामा । कहि सच्चिदानंद परधामा ॥
 भए मगन छवि तासु बिलोकी । अजहूँ प्रीति उर रहति न रोकी ॥

दो०—ब्रह्म जो व्यापक विरज अज अकल अनीह अभेद ।

सो कि देह धरि होइ नर जाहि न जानत वेद ॥ ५० ॥

बिष्णु जो सुर हित नर तनु धारी । सोउ सर्वग्य जथा त्रिपुरारी ॥
 खोजइ सो कि अग्य इव नारी । ग्यानधाम श्रीपति असुरारी ॥

संभुगिरा पुनि मृषा न होई । सिव सर्वग्य जान सबु कोई ॥
अस संसय मन भयउ अपारा । होइ न हृदयँ प्रबोध प्रचारा ॥
जद्यपि प्रगट न कहेउ भवानी । हर अंतरजामी सब जानी ॥
सुनहि सती तव नारि सुभाऊ । संसय अस न धरिअ उर काऊ ॥
जासु कथा कुंभज रिषि गाई । भगति जासु मै मुनिहि सुनाई ॥
सोइ मम इष्टदेव रघुबीरा । सेवत जाहि सदा मुनिधीरा ॥

छं०—मुनि धीर जोगी सिद्ध संतत विमल मन जेहि ध्यावहीं ।
कहि नेति निगम पुरान आगम जासु कीरति गावहीं ॥
सोइ रामु व्यापक ब्रह्म भुवन निकाय पति माया धनी ।
अवतरेउ अपने भगत हित निजतंत्र नित रघुकुलमनी ॥

सो०—लाग न उर उपदेसु जदपि कहेउ सिवँ बार बहु ।
बोले बिहसि महेसु हरिमाया बलु जानि जियँ ॥ ५१ ॥

जौं तुम्हरेँ मन अति संदेहू । तौ किन जाइ परीछा लेहू ॥
तब लगि बैठ अहउँ बटछाहीं । जब लगि तुम्ह ऐहहु मोहि पाहीं ॥
जैसेँ जाइ मोह भ्रम भारी । करेहु सो जतनु विवेक विचारी ॥
चलीं सती सिव आयसु पाई । करहिं विचारु कगैं का भाई ॥
इहाँ संभु अस मन अनुमाना । दच्छसुता कहूँ नहिं कल्याणा ॥
मोरेहु कहें न संसय जाहीं । विधि बिपरीत भलाई नाहीं ॥
होइहि सोइ जो राम रचि गखा । कां करि तर्क बढ़ावै साखा ॥
अस कहि लगे जपन हरिनामा । गई सती जहँ प्रभु सुखधामा ॥

दो०—पुनि पुनि हृदयँ विचारु करि धरि सीताकर रूप ।
आगेँ होइ चलि पंथ तेहिं जेहिं आवत नरभूप ॥ ५२ ॥

लछिमन दीख उमाकृत बेषा । चकित भए भ्रम हृदयँ विसेषा ॥
 कहि न सकत कछु अति गंभीरा । प्रभु प्रभाउ जानत मतिधीरा ॥
 सती कपटु जानेउ सुरस्वामी । सबदरसी सब अंतरजामी ॥
 सुमिरत जाहि मिटइ अग्याना । सोइ सर्वग्य रामु भगवाना ॥
 सती कीन्ह चह तहहुँ दुराऊ । देखहु नारि सुभाव प्रभाऊ ॥
 निज माया बलु हृदयँ बखानी । बोले बिहसि रामु मृदु बानी ॥
 जोरि पानि प्रभु कीन्ह प्रनामू । पिता समेत लीन्ह निज नामू ॥
 कहेउ बहोरि कहाँ बृषकेतू । बिपिन अकेलि फिरहु केहि हेतू ॥

दो०—राम बचन मृदु गूढ़ सुनि उपजा अति संकोचु ।

सती सभीत महेस पहिं चलीं हृदयँ बड़ सोचु ॥ ५३ ॥

मैं संकर कर कहा न माना । निज अग्यानु राम पर आना ॥
 जाइ उतरु अब देहउँ काहा । उर उपजा अति दारुन दाहा ॥
 जाना राम सतीं दुखु पावा । निज प्रभाउ कछु प्रगटिजनावा ॥
 सतीं दीख कौतुकु मग जाता । आगें रामु सहित श्री आता ॥
 फिरि चितवा पाछें प्रभु देखा । सहित बंधु सिय सुंदर बेषा ॥
 जहँ चितवहिं तहँ प्रभु आसीना । सेवहिं सिद्ध मुनीस प्रवीना ॥
 देखे सिव बिधि बिष्णु अनेका । अमित प्रभाउ एक तें एका ॥
 बंदत चरन करत प्रभु सेवा । विविध बेष देखे सब देवा ॥

दो०—सती विधात्री इंदिरा देखीं अमित अनूप ।

जेहिं जेहिं बेष अजादि सुर तेहि तेहि तन अनुरूप ॥ ५४ ॥

देखे जहँ तहँ रघुपति जेने । सक्तिन्ह सहित सकल सुर तेते ॥
 जीव चराचर जो संसारा । देखे सकल अनेक प्रकारा ॥

पूजहिं प्रभुहि देव बहु वेषा । राम रूप दूसर नहिं देखा ॥
 अवलोके रघुपति बहुतेरे । सीता सहित न वेष घनेरे ॥
 सोइ रघुवर सोइ लछिमनु सीता । देखि सती अति भई सभीता ॥
 हृदय कंप तन सुधि कछु नाहीं । नयन मूढ़ि बैठीं मग माहीं ॥
 बहुरि बिलोकेउ नयन उधारी । कछु न दीख तहँ दच्छ कुमारी ॥
 पुनि पुनि नाइ राम पद सीसा । चलीं तहाँ जहँ रहे गिरीसा ॥

दो०—गईं समीप महेस तब हँसि पूछी कुसलात ।

लीन्हि परीछा कवन विधि कहहु सत्य सब यात ॥ ५५ ॥

मासपारायण, दूसरा विश्राम

सतीं समुझि रघुबीर प्रभाऊ । भय बस सिव सन कीन्ह दुराऊ ॥
 कछु न परीछा लीन्हि गोसाईं । कीन्ह प्रनामु तुम्हारिहि नाई ॥
 जो तुम्ह कहा सो मृषा न होई । मोरें मन प्रतीति अति सोई ॥
 तब संकर देखेउ धरि ध्याना । सतीं जो कीन्ह चरित सबु जाना ॥
 बहुरि राममायहि मिरु नावा । प्रेरि सतिहि जेहिं झूठ कहावा ॥
 हरि इच्छा भावी बलवाना । हृदयँ विचारत संभु सुजाना ॥
 सतीं कीन्ह सीता कर वेषा । सिव उर भयउ बिपाद बिसेषा ॥
 जौं अब करउँ सती सन प्रीती । मिटइ भगति पथु होइ अनीती ॥

दो०—परम पुनीत न जाइ तजि किएँ प्रेम बड़ पापु ।

प्रगटि न कहत महेसु कछु हृदयँ अधिक संतापु ॥ ५६ ॥

तब संकर प्रभु पद सिरु नावा । सुमिरत रामु हृदयँ अस आवा ॥
 एहिं तन सतिहि भेट मोहि नाहीं । सिव संकल्पु कीन्ह मन माहीं ॥
 अस विचारि संकरु मतिधीरा । चले भवन सुमिरत रघुबीरा ॥

चलत गगन भै गिरा सुहाई । जय महेस भलि भगति दृढ़ाई ॥
 अस पन तुम्ह बिनु करइ को आना । रामभगत समरथ भगवाना ॥
 सुनि नभगिरा सती उर सोचा । पूछा सिवहि समेत सकोचा ॥
 कीन्ह कवन पन कहहु कृपाला । सत्यधाम प्रभु दीनदयाला ॥
 जदपि सती पूछा बहु भाँती । तदपि न कहेउ त्रिपुर आराती ॥

दो०—सती हृदयँ अनुमान किय सबु जानेउ सर्वग्य ।

कीन्ह कपटु मैं संभु सन नारि सहज जड़ अग्य ॥५७(क)॥

सो०—जलु पय सरिस बिकाइ देखहु प्रीति किरीति भलि ।

विलग होइ रसु जाइ कपट खटाई परत पुनि ॥५७(ख)॥

हृदयँ सोचु समुझत निज करनी । चिंता अमित जाइ नहिं बरनी ॥
 कृपामिधु सिव परम अगाधा । प्रगट न कहेउ मोर अपराधा ॥
 संकर रुख अवलोकि भवानी । प्रभु मोहि तजेउ हृदयँ अकुलानी ॥
 निज अघ समुझि न कलु कहि जाई । तपइ अवाँ इव उर अधिकाई ॥
 सतिहि ससोच जानि वृषकेतू । कहीं कथा सुंदर मुख हेतू ॥
 बरनत पंथ बिबिध इतिहासा । बिखनाथ पहुँचे कैलासा ॥
 तहँ पुनि संभु समुझि पन आपन । बैठे बट तर करि कमलासन ॥
 संकर सहज सरूपु सम्हारा । लागि समाधि अखंड अपारा ॥

दो०—सती बसहिँ कैलास तब अधिक सोचु मन माहिँ ।

मरम न कोऊ जान कलु जुग सम दिवस सिराहि ॥ ५८ ॥

नित नव सोचु सती उर भारा । कब जैहउँ दुख सागर पारा ॥
 मैं जो कीन्ह रघुपति अपमाना । पुनि पति बचनु मृषा करि जाना ॥
 सो फलु मोहि बिधाताँ दीन्हा । जो कलु उचित रहा सोइ कीन्हा ॥

अब बिधि अस बूझिअ नहिं तोही। संकर बिमुख जिआवसि मोही॥
कहिन जाइ कछु हृदय गलानी । मन महुँ रामहि सुमिर सयानी॥
जौं प्रभु दीनदयालु कहावा । आरति हरन बेद जसु गावा ॥
तौ मै बिनय करउँ कर जोरी । छूटउ बेगि देह यह मोरी ॥
जौं मोरें सिव चरन मनेहू । मन क्रम बचन सत्य ब्रतु एहू॥

दो०—तौ सबदरसी सुनिअ प्रभु करउ सो बेगि उपाइ ।

होइ मरनु जेहिं बिनहि श्रम दुसह बिपत्ति बिहाइ ॥ ५९ ॥

एहि बिधि दुखित प्रजेषकुमारी। अकथनीय दारुन दुखु भारी ॥
बीतें संबत सहस सतासी । तजी समाधि संभुअबिनासी ॥
राम नाम सिव सुमिरन लागे । जानेउ सतीं जगतपति जागे ॥
जाइ संभु पद बंदनु कीन्हा । सनमुखमंकर आसनु दीन्हा ॥
लगे कहन हरिकथा रसाला । दच्छ प्रजेष भए तेहि काला ॥
देखा बिधि बिचारि सब लायक। दच्छहि कीन्ह प्रजापति नायक॥
बड़ अधिकार दच्छ जब पावा । अति अभिमानु हृदयै तब आवा॥
नहिं कोउ अस जनमा जग माहीं। प्रभुता पाइ जाहि मद नाहीं ॥

दो०—दच्छ लिए मुनि बोलि सब करन लगे बड़ जाग ।

नेवते सादर सकल सुर जे पावत मख भाग ॥ ६० ॥

किंनर नाग सिद्ध गंधर्वा । बधुन्ह समेत चले सुर सर्वा ॥
बिष्णु विरंचि महेसु बिहाई । चले सकल सुर जान बनाई ॥
सतीं बिलोके व्योम बिमाना । जात चले सुंदर बिधि नाना ॥
सुर सुंदरी करहिं कल गाना । सुनत श्रवन छूटहिं मुनि ध्याना॥
पूछेउ तब सिवैं कहेउ बखानी । पिता जग्य सुनि कछु हरषानी॥

जौं महेसु मोहि आयसु देहीं । कछु दिन जाइ रहौं मिस एहीं ॥
पति परित्याग हृदयँ दुखु भारी । कहइ न निज अपराध बिचारी ॥
बोली सती मनोहर बानी । भय संकोच प्रेम रस सानी ॥

दो०—पिता भवन उत्सव परम जौं प्रभु आयसु होइ ।

तौ मैं जाउँ कृपायतन सादर देखन सोइ ॥ ६१ ॥

कहेहु नीक मोरेहुँ मन भावा । यह अनुचित नहिं नेवत पठावा ॥
दच्छ सकल निज सुता बोलाई । हमरें बयर तुम्हउ बिसराई ॥
ब्रह्मसभाँ हम सन दुखु माना । तेहि तें अजहुँ करहिं अपमाना ॥
जौं बिनु बोलें जाहु भवानी । रहइ न सीलु सनेहु न कानी ॥
जदपि मित्र प्रभु पितु गुर गेहा । जाइअ बिनु बोलेहुँ न सँदेहा ॥
तदपि बिरोध मान जहँ कोई । तहाँ गएँ कल्यानु न होई ॥
भाँति अनेक संभु समुझावा । भावी बस न ग्यानु उर आवा ॥
कह प्रभु जाहु जो चिनहिं बोलाएँ । नहिं भलि बात हमारे भाएँ ॥

दो०—कहि देखा हर जतन बहु रहइ न दच्छकुमारि ।

दिए मुख्य गन संग तब विदा कीन्ह त्रिपुरारि ॥ ६२ ॥

पिता भवन अब गई भवानी । दच्छ त्रास काहुँ न सनमानी ॥
सादर भलेहिं मिली एक माता । भगिनीं मिलीं बहुत मुसुकाता ॥
दच्छ न कछु पूछी कुसलाता । सतिहि बिलोकि जरे सब गाता ॥
सतीं जाइ देखेउ तब जागा । कतहुँ न दीख संभु कर भागा ॥
तब चित चढ़ेउ जो संकर कहेऊ । प्रभु अपमानु समुझि उर दहेऊ ॥
पाछिल दुखु न हृदयँ अस व्यापा । जस यह भयउ महापरितापा ॥
जद्यपि जग दारुन दुख नाना । सब तें कठिन जाति अवमाना ॥

समुझि सो सतिहि भयउ अतिक्रोधा। बहु बिधि जननी कीन्ह प्रबोधा

दो०—सिव अपमानु न जाइ सहि हृदयँ न होइ प्रबोध ।

सकल सभहि हठि हटकि तब बोलीं वचन सक्रोध ॥ ६३ ॥

सुनहु सभासद सकल मुनिंदा । कही सुनी जिन्ह संकर निंदा ॥
सो फलु तुरत लहब सब काहूँ । भली भाँति पछिताव पिताहूँ ॥
संत संभु श्रीपति अपवादा । सुनिअ जहाँ तहँ असि मरजादा ॥
काटिअ तासु जीभ जो बसाई । श्रवन मूदि न त चलिअ पगाई ॥
जगदातमा महेसु पुरागी । जगत जनक सब के हितकारी ॥
पिता मंदमति निंदत तेही । दच्छ सुक्र संभव यह देही ॥
तजिहउँ तुरत देह तेहि हेतू । उर धरि चंद्रमौलि बृषकेतू ॥
अस कहि जोग अग्नि तनु जारा । भयउ सकल मख हाहाकारा ॥

दो०—सती मरनु सुनि संभु गन लगं करन मख खीस ।

जग्य बिधंस बिलोकि भृगु रच्छा कीन्ह मुनीस ॥ ६४ ॥

समाचार सब संकर पाए । वीरभट्ट करि कोप पठाए ॥
जग्य बिधंस जाइ तिन्ह कीन्हा । सकल सुरन्ह बिधिवत फलु दीन्हा
मै जगबिदित दच्छ गति सोई । जसि कछु संभु बिमुख कै होई ॥
यह इतिहास सकल जग जानी । ताते मै संछेप बखानी ॥
सतीं मरत हरि सन बरु मागा । जनम जनम सिव पद अनुगगा ॥
तेहि कारन हिमगिरि गृह जाई । जनमीं पारबती तनु पाई ॥
जब तें उमा सैल गृह जाई । सकल सिद्धि संपति तहँ छाई ॥
जहँ तहँ मुनिन्ह सुआश्रम कीन्हे । उचित बास हिम भूधर दीन्हे ॥

दो०—सदा सुमन फल सहित सब दुम नव नाना जाति ।

प्रगटी सुंदर सैल पर मनि आकर बहु भाँति ॥ ६५ ॥

सरिता सब पुनीत जलु बहहीं । खग मृग मधुप सुखी सब रहहीं ॥
सहज बयरु सब जीवन्ह त्यागा ॥ गिरि पर सकल करहिँ अनुरागा ॥
सोह सैल गिरिजा गृह आएँ । जिमि जनु राम भगति के पाएँ ॥
नित नूतन मंगल गृह ताम्ब । ब्रह्मादिक गावहिँ जसु जास ॥
नारद समाचार सब पाए । कौतुकहीं गिरि गेह सिधाए ॥
सैलराज बड़ आदर कीन्हा । पद पखारि बर आसनु दीन्हा ॥
नारि सहित मुनिपद सिरु नावा । चरन सलिल सबु भवन सिंचावा
निज सौभाग्य बहुत गिरि बरना । सुता बोलि मेली मुनि चरना ॥

दो०—त्रिकालग्य सर्वग्य तुम्ह गति सर्वत्र तुम्हारि ।

कहहु सुता के दोष गुन मुनिबर हृदयँ बिचारि ॥ ६६ ॥

कह मुनि बिहसि गूढ़ मृदु बानी । सुता तुम्हारि सकल गुन खानी ॥
सुंदर सहज सुसील सयानी । नाम उमा अंबिका भवानी ॥
सब लच्छन संपन्न कुमारी । होइहि संतत पियहि पिआरी ॥
सदा अचल एहि कर अहिवाता । एहि तें जसु पैहहिँ पितु माता ॥
होइहि पूज्य सकल जग माहीं । एहि सेवत कछु दुर्लभ नाहीं ॥
एहि कर नामु सुमिरि संसारा । त्रिय चढ़िहहिँ पतिव्रत असिधारा
सैल सुलच्छन सुता तुम्हारी । सुनहु जे अब अवगुन दुइ चारी ॥
अगुन अमान मातु पितु होना । उदामीन सब संसय छीना ॥

दो०—जोगी जटिल अकाम मन नगन अमंगल वेष ।

अस स्वामी एहि कहँ मिलिहि परी हस्त असि रेख ॥ ६७ ॥

सुनि सुनि गिरा सत्य जियँ जानी । दुख दंपतिहि उमा हरषानी ॥
नारदहूँ यह भेद न जाना । दसा एक समुझब बिलगाना ॥
सकल सखीं गिरिजा गिरि मैना । पुलक सरीर भरे जल नैना ॥
होइ न मृषा देवरिषि भाषा । उमा सो बचनु हृदयँ धरिराखा ॥
उपजेउ सिव पद कमल सनेहू । मिलन कठिन मन भा संदेहू ॥
जानि कुअवसरु प्रीति दुराई । सखी उछँग बैठी पुनि जाई ॥
झूठि न होइ देवरिषि बानी । सोचहिँ दंपति सखी सयानी ॥
उर धरि धीर कहइ गिरिराऊ । कहहु नाथ का करिअ उपाऊ ॥

दो०—कह मुनीस हिमवंत सुनु जो विधि लिखा लिलार ।

देव दनुज नर नाग मुनि कोउ न मेटनिहार ॥ ६८ ॥

तदपि एक मै कहउँ उपाई । होइ करै जौँ दैउ सहाई ॥
जस वरु मै बरनेउँ तुम्ह पाहीं । मिलिहि उमहितस संसय नाहीं ॥
जे जे बर के दोष बखाने । ते सब सिव पहिँ मै अनुमाने ॥
जौँ बिबाहु संकर सन होई । दोषउ गुन सम कह सब कोई ॥
जौँ अहि सेज सयन हरि करहीं । बुध कछु तिन्ह कर दोषु न धरहीं ॥
भानु कृसानु सर्व रस खाहीं । तिन्ह कहँ मंद कहत कोउ नाहीं ॥
सुभ अरु असुभ सलिल सब बहई । सुरसरि कोउ अपुनीत न कहई ॥
समरथ कहूँ नहिँ दोषु गोमाई । रबि पावक सुरसरि की नाई ॥

दो०—जौँ अस हिसिषा करहिँ नर जड़ बिबेक अभिमान ।

परहिँ कलप भरि नरक महुँ जीव कि ईस समान ॥ ६९ ॥

सुरसरि जल कृत वारुनि जाना । कबहुँ न संत करहिँ तेहि पाना ॥
सुरसरि मिलें सो पावन जैसैं । ईस अनीसहि अंतरु तैसैं ॥

संभु सहज समरथ भगवाना । एहि बिबाहँ सब बिधि कल्याणा ॥
 दुराराध्य पै अहहिं महेसू । आसुतोष पुनि किएँ कलेसू ॥
 जौं तपु करै कुमारि तुम्हारी । भाविउ मेटि सकहिं त्रिपुरारी ॥
 जधपि बर अनेक जग माहीं । एहि कहँ सिव तजि दूसर नाहीं ॥
 बर दायक प्रनतारति भंजन । कृपासिंधु सेवक मन रंजन ॥
 इच्छित फल बिनु सिव अवराधेँ । लहिअ न कोटि जोग जप सार्धेँ ॥

दो०—अस कहि नारद सुमिरि हरि गिरिजहि दीन्हि असीस ।

होइहि यह कल्यान अब संसय तजहु गिरीस ॥ ७० ॥

कहि अस ब्रह्मभवन मुनि गयऊ । आगिल चरित सुनहु जस भयऊ
 पतिहि एकांत पाइ कह मैना । नाथ न मैं समुझे मुनि बैना ॥
 जौं घरु वरु कुलु होइ अनूपा । करिअ विवाहु सुता अनुरूपा ॥
 न त कन्या वरु रहउ कुआरी । कंत उमा मम प्रान पिआरी ॥
 जौं न मिलिहि वरुगिरिजहि जोगू । गिरिजइ सहज कहिहि सबु लोगू
 सोइ बिचारि पति करेहु बिवाहू । जेहिं न बहोरि होइ उर दाहू ॥
 अस कहि परी चरन धरि सीसा । बोले सहित सनेह गिरीसा ॥
 वरु पावक प्रगटै ससि माहीं । नारद बचनु अन्यथा नाहीं ॥

दो०—प्रिया सांचुँ परिहरहु सबु सुमिरहु श्रीभगवान ।

पारवतिहि निरमयउ जेहिं सोइ करिहि कल्यान ॥ ७१ ॥

अब जौं तुम्हटि सुता पर नेहू । तौ अस जाइ सिखावनु देहू ॥
 करै सो तपु जेहिं मिलहिं महेसू । आन उपायँ न मिटिहि कलेसू ॥
 नारद बचन सगर्भ सहेनू । सुंदर सब गुन निधि वृषकेनू ॥
 अस बिचारि तुम्ह तजहु असंका । सबहि भाँति संकरु अकलंका ॥

मुनि पति बचन हरषि मन माहीं । गई तुगत उठि गिरिजा पाहीं ॥
उमहिं बिलोकि नयन भरे बारी । सहित सनेह गोद बैठाही ॥
बारहिं बार लेति उर लाई । गदगद कंठ न कछु कहि जाई ॥
जगत मातु सर्वग्य भवानी । मातु सुखद बोलीं मृदु बानी ॥

दो०—सुनहि मातु मैं दीख अस सपन सुनावउ तोहि ।

सुंदर गौर सुविप्रवर अस उपदेसेउ मोहि ॥ ७२ ॥

करहि जाइ तपु सैलकुमारी । नागद कहा सो सत्य विचारी ॥
मातु पितहि पुनि यह मत भावा । तपु सुखप्रद दुख दोष नसावा ॥
तपबल रचइ प्रपंचु बिभाता । तपबल बिष्नु सकल जग त्राता ॥
तपबल संभु करहि संघारा । तपबल सेषु धरइ महिभारा ॥
तप आधार सब सृष्टि भवानी । करहि जाइ तपु अस जियँ जानी ॥
सुनत बचन बिसमित महतारी । सपन सुनायउ गिरिहि हैंकारी ॥
मातु पितहि बहु बिधि समुझाई । चलीं उमा तप हित हरषाई ॥
प्रिय परिवार पिता अरु माता । भए बिकल मुख आव न बाता ॥

दो०—बेदसिरा मुनि आइ नव सबहि कहा समुझाई ।

पारवती महिमा सुनत रहें प्रबोधहि पाइ ॥ ७३ ॥

उर धरि उमा प्रानपति चरना । जाइ बिपिन लागीं तपु करना ॥
अति सुकुमार न तनु तप जोगू । पति पद सुमिरि तजेउ सबु भोगू ॥
नित नव चरन उपज अनुरागा । बिपरी देह तपहि मनु लागा ॥
संबत सहस मूल फल खाए । सागु खाइ सत बरष गवाँए ॥
कछु दिन भोजनु बारि शतासा । किए कठिन कछु दिन उपवासा ॥
बेल पाती महि पगइ सुखाई । तीनि सहस संबत सोइ खाई ॥

पुनि परिहरे सुखानेउ परना । उमहि नामु तब भयउ अपरना ॥
देखि उमहि तप खीनसरीरा । ब्रह्मगिरा भैं गगन गभीरा ॥

दो०—भयउ मनोरथ सुफल तब सुनु गिरिराज कुमारि ।

परिहरु दुसह कलेस सब अब मिलिहहिं त्रिपुरारि ॥ ७४ ॥

अस तपु काहुँ न कीन्ह भवानी । भए अनेक धीर मुनि ग्यानी ॥
अब उर धरहु ब्रह्म बर बानी । सत्य सदा संतत सुचि जानी ॥
आवै पिता बोलावन जबहीं । हठ परिहरि घर जाएहु तबहीं ॥
मिलहिं तुम्हहि जब मत्त रिषीसा । जानेहु तब प्रमान बागीसा ॥
सुनत गिरा बिधि गगन वखानी । पुलक गत गिरिजा हरषानी ॥
उमा चरित सुंदर भैं गावा । सुनहु संभु कर चरित सुहावा ॥
जब तैं सतीं जाइ तनु न्यागा । तब तैं सिव मन भयउ बिरागा ॥
जपहिं सदा रघुनायक नामा । जहँ तहँ सुनहिं राम गुन ग्रामा ॥

दो०—चिदानंद सुखधाम सिव विगत मोह मद काम ।

बिचरहिं महि धरि हृदयँ हरि सकल लोक अभिराम ॥ ७५ ॥

कतहुँ मुनिन्ह उपदेसहिं ग्याना । कतहुँ राम गुन करहिं बखाना ॥
जदपि अकाम तदुपि भगवाना । भगत बिरह दुख दुखित सुजाना ॥
एहि बिधि गयउ कालु बहु बीती । नित नै होइ राम पद प्रीती ॥
नेमु प्रेमु संकर कर देखा । अबिचल हृदयँ भगति कै रेखा ॥
प्रगटे राम कृतग्र कृपाला । रूप सील निधि तेज बिमाला ॥
बहु प्रकार संकटहि मराहा । तुम्ह बिनु अस ब्रतु का निरबाहा ॥
बहु बिधि राम सिवहि समुझावा । पारवती कर जन्मु सुनावा ॥
अति पुनीत गिरिजा कै करनी । बिस्तर सहित कृपानिधि बरनी ॥

दो०—अब बिनती मम सुनहु सिव जौ मो पर निज नेहु ।

जाइ बिबाहहु सैलजहि यह मोहि मागें देहु ॥ ७६ ॥

कह सिव जदपि उचित अस नाहीं । नाथ बचन पुनि मेटि न जाहीं
सिर धरि आयसु करिअ तुम्हारा । परम धरमु यह नाथ हमारा ॥
मातु पिता गुर प्रभु कै बानी । बिनहिं बिचार करिअ सुभ जानी
तुम्ह सब भाँति परम हितकारी । अग्या सिर पर नाथ तुम्हारी ॥
प्रभु तोषेउ सुनि संकर बचना । भक्ति बिबेक धर्म जुत रचना ॥
कह प्रभु हर तुम्हार पन रहेऊ । अब उर राखेहु जो हम कहेऊ ॥
अंतरधान भए अम भाषी । संकर सोइ मूरति उर राखी ॥
तबहिं ससरिषि मित्र पहि आए । बोले प्रभु अति बचन सुहाए ॥

दो०—पारबती पहिं जाइ तुम्ह प्रेम परिच्छा लेहु ।

गिरिहि प्रेरि पठएहु भवन दूरि करेहु संदेहु ॥ ७७ ॥

रिषिन्ह गौरि देखी तहँ कैसी । मूरतिमंत तपस्या जैसी ॥
बोले मुनि सुनु सैलकुमारी । करहु कवन कारन तपु भारी ॥
केहि अवराधहु का तुम्ह चहहू । हम सन सत्य मरमु किन कहहू ॥
कहत बचन मनु अनि सकुचाई । हँसिहहु सुनि हमारि जड़ताई ॥
मनु हठ परान सुनइ सिखावा । चहत बारि पर भीति उठावा ॥
नारद कहा सत्य सोइ जाना । बिनु पंखन्ह हम चहहिं उड़ाना ॥
देखहु मुनि अबिबेक हमारा । चाहिअ मदा सिवहि भरतारा ॥

दो०—सुनत बचन बिहसे रिषय गिरिसंभव तव देह ।

नारद कर उपदेसु सुनि कहहु बसेउ किसु गेह ॥ ७८ ॥

दच्छसुतन्ह उपदेसेन्हि जाई । तिन्ह फिरि भवनु न देखा आई ॥

चित्रकेतु कर घरु उन घाला । कनककसिपु कर पुनि अस हाला ॥
 नारद सिख जे सुनहिं नर नारी। अवसि होहिं तजि भवनु भिखारी ॥
 मन कपटी तन सज्जन चीन्हा । आपु सरिस सबही चह कीन्हा ॥
 तेहि कैं बचन मानि बिखासा । तुम्ह चाहहु पति सहज उदासा ॥
 निर्गुन निलज कुबेष कपाली । अकुल अगेह दिगंबर ब्याली ॥
 कहहु कवन सुखु अस बरु पाएँ । भल भूलिहु ठग के बौराएँ ॥
 पंच कहैं सिवैं सती बिबाही । पुनि अवडेरि मर।एन्ह ताही ॥

दो०—अब सुख सोवत सोचु नहिं भीख मागि भव खाहि ।

महज एकाकिन्ह के भवन कबहुँ कि नारि खटाहि ॥ ७९ ॥

अजहूँ मानहु कहा हमारा । हम तुम्ह कहूँ बरु नोक बिचारा ॥
 अति सुंदर सुचि सुखद सुमीला । गावहिं वेद जासु जस लीला ॥
 दूषन रहित सकल गुन रासी । श्रीपति पुर बैकुंठ निवासी ॥
 अस बरु तुम्हहि मिलाउब आनी । सुनत बिहसि कह बचन भवानी
 मत्स्य कहेहु गिरिभव तनु एहा । हठ न छूट छूटै बरु देहा ॥
 कनकउ पुनि पषान तें होई । जारेहुँ सहजु न परिहर सोई ॥
 नारद बचन न मैं परिहरऊँ । बसउ भवनु उजरउ नहिं डरऊँ ॥
 गुर कैं बचन प्रतिपति न जेही । सपनेहुँ सुगम न सुख सिधितेही

दो०—महादेव अवगुन भवन बिष्नु सकल गुन धाम ।

जेहि कर मनु रम जाहि मन तेहि तेही सन काम ॥ ८० ॥

जौ तुम्ह मिलतेहु प्रथम मुनीसा । सुनतिउँ मिख तुम्हागि धरि सीमा
 अब मैं जन्मु संभु दित हाग । को गुन दूषन करै बिचारा ॥
 जौ तुम्हरे हठ हृदयँ बिसेषी । गहि न जाइ बिनु किएँ बगैषी ॥

तौ कौतुकि अन्ह आलसु नाहीं । बर कन्या अनेक जग माहीं ॥
जन्म कोटि लगि रगर हमारी । बरउँ संभु न त रहउँ कुआरी ॥
तजउँ न नारद कर उपदेस । आपु कहहि सत बार महेस ॥
मैं पा परउँ कहइ जगदंबा । तुम्ह गृह गवनहु भयउ बिलंबा ॥
देखि प्रेसु बोले मुनि ग्यानी । जय जय जगदंबिके भवानी ॥
दो०—तुम्ह माया भगवान सिव सकल जगत पितु मातु ।

नाइ चरन सिर मुनि चले पुनि पुनि हरषत गातु ॥ ८१ ॥

जाइ मुनिन्ह हिमवंतु पठाए । करि बिनती गिरजहि गृह ल्याए
बहुरि सप्तरिषि सिव पहिं जाई । कथा उमा कै सकल सुनाई ॥
भए मगन सिव सुनत सनेहा । हरषि सप्तरिषि गवने गेहा ॥
मनु थिर करि तब संभु सुजाना । लगे करन रघुनायक ध्याना ॥
तारकु असुर भयउ तेहि काला । भुज प्रताप बल तेज बिसाला ॥
तेहिं सब लांक लोकपति जीते । भए देव सुख संपति रीते ॥
अजर अमर सो जीति न जाई । हारे सुर करि बिबिध लराई ॥
तब बिरंचि सन जाइ पुकारे । देखे विधि सब देव दुखारे ॥

दो०—सब सन कहा बुझाइ विधि दनुज निधन तब होइ ।

संभु सुक संभूत सुत एहि जीतइ रन सोइ ॥ ८२ ॥

मोर कहा मुनि करहु उपाई । होइहि ईस्वर करिहि सहाई ॥
सतीं जो तजो दच्छ मख देहा । जनमी जाइ हिमाचल गेहा ॥
तेहिं तपु कीन्ह संभु पति लागी । सिव समाधि बैठे सबु त्यागी ॥
जदपि अहइ असमंजस भारी । तदपि बात एक सुनहु हमारी ॥
पठवहु कामु जाइ सिव पाहीं । करै छोभु संकर मन माहीं ॥

तब हम जाइ सिवहि सिर नाई । करवाउब बिबाहु बरिआई ॥
एहि बिधि भलेहि देवहित होई । मत अति नीक कहइ सबु कोई ॥
अस्तुति सुरन्ह कीन्हि अति हेतू । प्रगटेउ बिषमबान झषकेतू ॥

दो०—सुरन्ह कही निज बिपति सब सुनि मन कीन्ह बिचार ।

संभु बिरोध न कुसल मोहि बिहसि कहेउ अस मार ॥ ८३ ॥

तदपि करब मैं काजु तुम्हारा । श्रुति कह परम धरम उपकारा ॥
पर हित लागि तजइ जो देही । संतत संत प्रसंसहिं तेही ॥
अस कहि चलेउ सबहि सिरु नाई । सुमन धनुष कर सहित सहाई ॥
चलत मार अस हृदयँ बिचारा । सिव बिरोध ध्रुव मरनु हमारा ॥
तब आपन प्रभाउ बिस्तारा । निज बस कीन्ह सकल संसारा ॥
कोपेउ जबहिं बारिचरकेतू । छन महँ मिटे सकल श्रुति सेतू ॥
ब्रह्मचर्ज ब्रत संजम नाना । धीरज धरम ग्यान बिग्याना ॥
सदाचार जप जोग बिरागा । सभय बिबेक कटकु सबु भागा ॥

छं०—भागेउ बिबेकु सहाय सहित सो सुभट संजुग महि मुरे ।

सदयथ पर्वत कंदरन्हि महँ जाइ तेहि अवसर दुरे ॥

होनिहार का करतार को रखवार जग खरभरु परा ।

दुइ माथ केहि रैतिनाथ जेहि कहँ कोपि कर धनु सरु धरा ॥

दो०—जे सजीव जग अचर चर नारि पुरुष अस नाम ।

ते निज निज मरजाद तजि भए सकल बस काम ॥ ८४ ॥

सब के हृदयँ मदन अभिलाषा । लता निहारि नवहिं तरु साखा ॥
नदीं उमगि अंबुधि कहँ धाई । संगम करहिं तलाव तलाई ॥
जहँ असि दसा जड़न्ह कै बरनी । को कहि सकइ सचेतन करनी ॥

पसु पन्छीनभ जल थलचारी । भए कामबस समय बिसारी ॥
मदन अंध ब्याकुल सब लोका । निसि दिनु नहिं अवलोकहिं कोका
देव दनुज नर किंनर ब्याला । प्रेत पिशाच भूत बेताला ॥
इन्ह कैदसा न कहेउँ बखानी । सदा काम के चेरे जानी ॥
सिद्ध विरक्त महामुनि जोगी । तेपि कामबस भए बियोगी ॥
छं०—भए कामबस जोगीस तापस पावँरन्हि की को कहै ।

देखहिं चराचर नारिमय जे ब्रह्ममय देखत रहे ॥
अबला बिलोकहिं पुरुषमय जगु पुरुष सब अबलामयं ।
हुइ दंड भरि ब्रह्मांड भीतर कामकृत कौतुक अयं ॥
सो०—धरी न काहूँ धीर सब के मन मनसिज हरे ।
जे राखे रघुवीर ते उवरे नेहि काल महुँ ॥ ८५ ॥

उभय घरी अस कौतुक भयऊ । जौ लगि कामुसंभु पहिं गयऊ ॥
सिवहि बिलोकि ससंकेंउ मारू । भयउ जथाथिति मबु संसारू ॥
भए तुरत सब जीव सुखारे । जिमि मद उतरि गएँ मतवारे ॥
रुद्रहि देखि मदन भय माना । दुराधरष दुर्गम भगवाना ॥
फिरत लाज कछु करि नहिं जाई । मरनु ठानि मन रचेसि उपाई ॥
प्रगटेसि तुरत रुचिर रितुराजा । कुसुमित नव तरु राजि बिराजा ॥
बन उपवन बापिका तड़ागा । परम सुभग सब दिसा बिभागा ॥
जहँ तहँ जनु उमगत अनुरागा । देखि मुएहुँ मन मनसिज जागा ॥
छं०—जागइ मनोभव मुएहुँ मन बन सुभगता न परै कही ।

सीतल सुगंध सुमंद मारुत मदन अनल सखा सही ॥
बिकसे सरन्हि बहु कंज गुंजत पुंज मंजुल मधुकरा ।
कलहंस पिक सुक सरस रव करि गान नाचहिं अपछरा ॥

दो०--सकल कला करि कोटि विधि हारेउ सेन समेत ।

चली न अचल समाधि सिव कोपेउ हृदय निकेत ॥ ८६ ॥

देखि रसाल बिटप बर साखा । तेहि पर चढ़ेउ मदनु मन माखा ॥
 सुमन चाप निज सर संधाने । अति रिस ताकि श्रवन लगि ताने
 छाड़े बिषम बिसिख उर लागे । छूटि समाधि संभ्रु तब जागे ॥
 भयउ ईस मन छोभु बिसेषी । नयन उधारि सकल दिसि देखी ॥
 सौरभ पल्लव मदनु बिलोका । भयउ कोपु कंपेउ त्रैलोका ॥
 तब सिव तीसर नयन उधारा । चितवत कामु भयउ जरि छारा ॥
 हाहाकार भयउ जग भारी । डरपे सुर भए असुर सुखारी ॥
 समुझि काम सुखु सोचहि भोगी । भए अकंटक साधक जोगी ॥

छं०--जोगी अकंटक भए पति गति सुनत रति मुरुछित भई ।

रोदति बदति बहु भौंति करुना करति संकर पहिं गई ॥

अति प्रेम करि विनती विविध विधि जोरि कर सन्मुख रही ।

ब्रभु आसुतोप कृपाल सिव अवला निरखि बोले सही ॥

दो०--अब नैं रति तव नाथ कर होइहि नामु अनंगु ।

बिनु बपु व्यापिहि सवहि पुनि सुनु निज मिलन प्रसंगु ॥ ८७ ॥

जब जदुबंस कृष्ण अवतारा । होइहि हरन मडा महिभारा ॥
 कृष्ण तनय होइहि पति तोरा । बचनु अन्यथा होइ न मोरा ॥
 रति गवनी सुनि संकर बानी । कथा अपर अब कहउँ बखानी ॥
 देवन्ह समाचार सब पाए । ब्रह्मादिक बैकुंठ सिधाए ॥
 सब सुर बिष्णु बिरंचि समेता । गए जहाँ सिव कृपानिकेता ॥
 पृथक पृथक तिन्ह कीन्हि प्रसंसा । भए प्रसन्न चंद्र अवतंसा ॥

बोले कृपासिंधु वृषकेतू । कहहु अमर आए केहि हेतू ॥
कह बिधितुम्ह प्रभु अंतरजामी । तदपि भगति बस बिनवउँ स्वामी
दो०—सकल सुरन्ह के हृदयँ अस संकर परम उछाहु ।

निज नयनन्हि देखा चहहिं नाथ तुम्हार बिबाहु ॥ ८८ ॥

यह उत्सव देखिअ भरि लोचन । सोइ कछु करहु मदन मद मोचन
कामु जारि रति कहँ बरु दीन्हा । कृपासिंधु यह अति भल कीन्हा ॥
सासति करि पुनि करहिं पसाऊ । नाथ प्रभुन्ह कर सहज सुभाऊ ॥
पारबतीं तपु कीन्ह अपारा । करहु तासु अब अंगीकारा ॥
सुनि बिधि बिनय समुझि प्रभु बानी । ऐसेइ होउ कहा सुखु मानी ॥
तब देवन्ह दुंदुभीं बजाई । बरषि सुमन जय जय सुर साई ॥
अवसरु जानि सप्तरिषि आए । तुरतहिं बिधि गिरि भवन पठाए ॥
प्रथम गए जहँ रहीं भवानी । बोले मधुर बचन छल सानी ॥

दो०—कहा हमार न सुनेहु तब नारद कें उपदेस ।

अब भा झूठ तुम्हार पन जारेउ कामु महेस ॥ ८९ ॥

मासपारायण, तीसरा विश्राम

सुनि बोलीं मुसुकाइ भवानी । उचित कहेहु मुनिबर बिग्यानी ॥
तुम्हरेँ जान कामु अबु जारा । अब लगि संभ्रु रहे सबिकारा ॥
हमरेँ जान सदा सिव जोगी । अज अनवद्य अकाम अभोगी ॥
जौं मैं सिव सेये अस जानी । प्रीति समेत कर्म मन बानी ॥
तौ हमार पन सुनहु मुनीसा । करिहहिं सत्य कृपानिधि ईसा ॥
तुम्ह जो कहा हर जारेउ मारा । सोइ अति बड़ अबिबेकु तुम्हारा ॥
तात अनल कर सहज सुभाऊ । हिम तेहि निकट जाइ नहिं काऊ ॥

गएँ सभौप सो अवसि नसाई । असि मन्मथ महेस की नाई ॥

दो०—हियँ हरषे मुनि बचन सुनि देखि प्रीति बिस्वास ।

चले भवानिहि नाइ सिर गए हिमाचल पास ॥ ९० ॥

सबु प्रसंगु गिरिपतिहि सुनावा । मदन दहन सुनि अति दुखु पावा
बहुरि कहेउ रति कर बरदाना । सुनि हिमवंत बहुत सुखु माना ॥
हृदयँ बिचारि संभु प्रभुताई । सादर मुनिवर लिए बोलाई ॥
सुदिनु सुनखतु सुघरी सोचाई । बेगि बेदबिधि लगन धराई ॥
पत्री सप्तर्षिन्ह सोइ दीन्ही । गहि पद बिनय हिमाचल कीन्ही
जाइ बिधिहि तिन्ह दीन्हि सो पाती । बाचत प्रीति न हृदयँ समाती
लगन बाँचि अज सबहि सुनाई । हरषे मुनि सब सुर समुदाई ॥
सुमन वृष्टि नभ बाजन बाजे । मंगल कलस दसहुँ दिसि साजे ॥

दो०—लगे सँवारन सकल सुर बाहन बिबिध विमान ।

होहि सगुन मंगल सुभद करहि अपछरा गान ॥ ९१ ॥

सिवहि संभु गन करहि सिंगारा । जटा मुकुट अहि मौरु सँवारा ॥
कुंडल कंकन पढ़िरे ब्याला । तन बिभूति पट केहरि छाला ॥
ससि ललाट सुंदर सिर गंगा । नयन तीनि उपबीत भुजंगा ॥
गरल कंठ उर नर सिर माला । असिव बेष सिवधाम कृपाला ॥
कर त्रिसूल अरु डमरु विराजा । चले बसहुँ चढ़ि बाजहिं बाजा ॥
देखि सिवहि सुरत्रिय मुसुकाहीं । बर लायक दुलहिनि जग नाहीं ॥
बिष्णु बिरंचि आदि सुरब्राता । चढ़ि चढ़ि बाहन चले बराता ॥
सुर समाज सब भाँति अनूपा । नहिं बरात दूलह अनुरूपा ॥

दो०—बिष्णु कहा अस बिहसि तब बोलि सकल दिसिराज ।

बिलग बिलग होइ चलहु सब निज निज सहित समाज ॥९२॥

बर अनुहारि बरात न भाई । हँसी करैहहु पर पुर जाई ॥
बिष्णु बचन सुनि सुर मुसुकाने । निज निज सेन सहित बिलगाने ॥
मनहीं मन महेसु मुसुकाहीं । हरि के बिंग्य बचन नहीं जाहीं ॥
अति प्रिय बचन सुनत प्रिय केरे । भृंगिहि प्रेरि सकल गन टेरे ॥
सिव अनुसासन सुनि सब आए । प्रभु पद जलज सीस तिन्ह नाए ॥
नाना बाहन नाना बेषा । बिहसे सिव समाज निज देखा ॥
कोउ मुखहीन बिपुल मुख काहू । बिनु पद कर कोउ बहु पद बाहू ॥
बिपुल नयन कोउ नयन बिहीना । रिष्ट पुष्ट कोउ अति तनखीना ॥

छं०—तन खीन कोउ अति पीन पावन कोउ अपावन गति धरें ।

भूषन कराल कपाल कर सब सद्य सोनित तन भरें ॥

खर स्वान सुअर सूकाल मुख गन बेष अगनित को गनै ।

बहु जिनस प्रेत पिशाच जोगि जमात बरनत नहीं बनै ॥

सो०—नाचहि गावहि गीत परम तरंगी भूत सब ।

देखत अति बिपरीत बोलहि बचन बिचित्र बिधि ॥ ९३ ॥

जस दूलहु तसि बनी बराता । कौतुक बिबिध होहि मग जाता ॥
इहाँ हिमाचल रचेउ बिताना । अति बिचित्र नहि जाइ बखाना ॥
सैल सकल जहँ लगि जग माहीं । लघु बिसाल नहि बरनि सिराहीं ॥
बन सागर सब नदीं तलावा । हिमगिरि सब कहूँ नेवत पठावा ॥
कामरूप सुंदर तन धारी । सहित समाज सहित बर नारी ॥
गए सकल तुहिनाचल गेहा । गावहि मंगल सहित सनेहा ॥
प्रथमहि गिरि बहु गृह सँवराए । जथाजोगु तहँ तहँ सब छाए ॥

पुर सोभा अवलोकि सुहाई । लागइ लघु बिरंचि निपुनाई ॥

छं०—लघु लाग बिधि की निपुनता अवलोकि पुर सोभा सही ।

बन बाग कूप तड़ाग सरिता सुभग सब सक को कही ॥

मंगल बिपुल तोरन पताका केतु गृह गृह सोहहीं ।

बनिता पुरुष सुंदर चतुर छवि देखि मुनि मन मोहहीं ॥

दो०—जगदंबा जहँ अवतरी सो पुरु बरनि कि जाइ ।

रिद्धि सिद्धि संपत्ति सुख नित नूतन अधिकाइ ॥ ९४ ॥

नगर निकट बरात सुनि आई । पुर खरभरु सोभा अधिकाई ॥

करि बनाव सजि बाहन नाना । चले लेन सादर अगवाना ॥

हियँ हरषे सुर सेन निहारी । हरिहि देखि अति भए सुखारी ॥

सिव समाज जब देखन लागे । बिडरि चले बाहन सब भागे ॥

धरि धीरजु तहँ रहे सयाने । बालक सब लै जीव पराने ॥

गएँ भवन पूछहि पितु माता । कहहि बचन भय कंपित गाता ॥

कहिअ काह कहि जाइ न बाता । जम कर धार किधौं बरिआता ॥

बरु बौराह बसहँ असवारा । ब्याल कपाल बिभूषन छारा ॥

छं०—तन छार ब्याल कपाल भूषन नगन जटिल भयंकरा ।

सँग भूत प्रेत पिशाच जोगिनि बिकट मुख रजनीचरा ॥

जो जित रहिहि बरात देखत पुन्य बड़ तेहि कर सही ।

देखिहि सो उमा बिबाहु घर घर बात असि लरिकन्ह कही ॥

दो०—समुझि महेस समाज सब जननि जनक मुसुकाहिं ।

बाल बुझाए बिबिध बिधि निडर होहु डर नाहिं ॥ ९५ ॥

लै अगवान बरातहि आए । दिए सबहि जनवास सुहाए ॥

मैनाँ सुभ आरती सँवारी । संग सुमंगल गावहि नारी ॥

कंचन थार सोह बर पानी । परिछन चली हरहि हरषानी ॥
बिकट बेष रुद्रहि जब देखा । अबलन्ह उर भयभयउ बिसेषा ॥
भागि भवन पैठीं अति त्रासा । गए महेसु जहाँ जनवासा ॥
मैना हृदयँ भयउ दुखु भारी । लीन्ही बोलि गिरीसकुमारी ॥
अधिक सनेहँ गोद बैठारी । स्याम सरोज नयन भरे बारी ॥
जेहिं बिधि तुम्हहि रूपु अस दीन्ह। तेहिं जड़ बरु बाउर कस कीन्हा

छं०—कस कीन्ह बरु बौराह बिधि जेहिं तुम्हहि सुंदरता दर्ई ।

जो फलु चाहिअ सुरतरुहिं सो बरबस बबूरहिं लागई ॥

तुम्ह सहित गिरि तैं गिरौं पायक जरौं जलनिधि महुँ परौं ।

घरु जाउ अपजसु होउ जग जीवत बिबाहुन हौं करौं ॥

दो०—भई बिकल अबला सकल दुखित देखि गिरिनारि ।

करि बिलापु रोदति बदति सुता सनेहु सँभारि ॥ ९६ ॥

नारद कर मैं काह बिगारा । भवनु मोर जिन्ह बसत उजारा ॥
अस उपदेसु उमहि जिन्ह दीन्हा । बौरै बरहि लागि तपु कीन्हा ॥
साचेहुँ उन्ह कैं मोह न माया । उदासीन धनु धामु न जाया ॥
पर घर घालक लाज न भीरा । बाँझ कि जान प्रसव कैं पीरा ॥
जननिहि बिकल बिलोकि भवानी । बोली जुत बिबेक मृदु बानी ॥
अस बिचारि सोचहि मति माता । सो न टरइ जो रचइ बिधाता ॥
करम लिखा जौं बाउर नाहू । तौ कत दोसु लगाइअ काहू ॥
तुम्ह सन मिटहिं कि बिधि के अंका । मातु व्यर्थ जनि लेहु कलंका ॥

छं०—जनि लेहु मातु कलंकु करुना परिहरहु अवसर नहीं ।

दुखु सुखु जो लिखा लिलार हमरें जाब जहँ पाउब तहीं ॥

सुनि उमा बचन बिनीत कोमल सकल अबला सोचहीं ।

बहु भाँति बिधिहि लगाइ दूषन नयन बारि बिमोचहीं ॥

दो०—तेहि अवसर नारद सहित अरु रिषि सप्त समेत ।

समाचार सुनि तुहिनगिरि गवने तुरत निकेत ॥९७॥

तब नारद सबही समुझावा । पूरुब कथा प्रसंगु सुनावा ॥

मयना सत्य सुनहु मम बानी । जगदंबा तब सुता भवानी ॥

अजा अनादि सक्ति अबिनासिनि । सदा संभु अरधंग निवासिनि ॥

जग संभव पालन लय कारिनि । निज इच्छा लीलाबपु धारिनि ॥

जनमीं प्रथम दच्छ गृह जाई । नामु सती सुंदर तनु पाई ॥

तहँहुँ सती संकरहि बिबाहीं । कथा प्रसिद्ध सकल जग माहीं ॥

एक बार आवत सिव संगी । देखेउ रघुकुल कमल पतंगी ॥

भयउ मोहु सिव कहा न कीन्हा । भ्रम बस बेषु सीय कर लीन्हा ॥

छं०—सिय बेषु सतीं जो कीन्हा तेहि अपराध संकर परिहरौं ।

हर विरहँ जाइ बहोरि पितु कें जग्य जोगानल जरीं ॥

अब जनमि तुम्हरे भवन निज पति लागि दारुन तप किया ।

अस जानि संसय तजहु गिरिजा सर्वदा संकर प्रिया ॥

दो०—सुनि नारद के^३ बचन तब सब कर मिटा बिषाद ।

छन महुँ व्यापेउ सकल पुर घर घर यह संवाद ॥९८॥

तब मयना हिमवंतु अनंदे । पुनि पुनि पारवती पद बंदे ॥

नारि पुरुष सिसु जुवा सयाने । नगर लोग सब अति हरषाने ॥

लगे होन पुर मंगल गाना । सजे सबहिं हाटक घट नाना ॥

भाँति अनेक भई जेवनारा । छपसास्त्र जस कछु व्यवहारा ॥

सो जेवनार कि जाइ बखानी । बसहिं भवन जेहिं मातु भवानी ॥
सादर बोले सकल बराती । बिष्नु बिरंचि देव सब जाती ॥
बिबिधि पाँति बैठी जेवनारा । लागे परुसन निपुन सुआरा ॥
नारिचुंद सुर जेवँत जानी । लगीं देन गारीं मृदु बानी ॥

छं०—गारीं मधुर स्वर देहिं सुंदरि बिंग्य बचन सुनावहीं ।
भोजनु करहिं सुर अति बिलंबु बिनोदु सुनि सचु पावहीं ॥
जेवँत जो बढ्यो अनंदु सो मुख कोटिहूँ न परै कह्यो ।
अचवाँइ दीन्हे पान गवने बास जहँ जाको रह्यो ॥

दो०—बहुरि मुनिन्ह हिमवंत कहूँ लगन सुनाई आइ ।
समय बिलोकि विबाह कर पठए देव बोलाइ ॥९९॥

बोलि सकल सुर सादर लीन्हे । सबहि जथोचित आसन दीन्हे ॥
बेदी बेद विधान सँवारी । सुभग सुमंगल गावहिं नारी ॥
सिंघासनु अति दिव्य सुहावा । जाइ न बरनि बिरंचि बनावा ॥
बैठे सिव बिप्रन्ह सिरु नाई । हृदयँ सुमिरि निज प्रभु रघुराई ॥
बहुरि मृनीसन्ह उमा बोलाई । करि सिंगारु सखीं लै आई ॥
देखत रूपु सकल सुर मोहे । बरनै छवि अस जग कबि को है ॥
जगदंबिका जानि भव भामा । सुरन्ह मनहिं मन कीन्ह प्रनामा ॥
सुंदरता मरजाद भवानी । जाइ न कोटिहूँ बदन बखानी ॥

छं०—कोटिहूँ बदन नहिं बनै बरनत जग जननि सोभा महा ।
सकुचहिं कहत श्रुति सेष सारद मंदमति तुलसी कहा ॥
छबिखानि मातु भवानि गवनीं मध्य मंडप सिव जहाँ ।
अवलोकि सकहिं न सकुच पति पद कमल मनु मधुकरु तहाँ ॥

दो०—मुनि अनुसासन गनपतिहि पूजेउ संभु भवानि ।

कोउ सुनि संसय करै जनि सुर अनादि जियँ जानि ॥१००॥

जसि बिबाह कै बिधि श्रुति गाई । महामुनिन्ह सो सब करवाई ॥
गहि गिरीस कुस कन्या पानी । भवहि समरपीं जानि भवानी ॥
पानिग्रहन जब कीन्ह महेसा । हियँ हरषे तब सकल सुरेसा ॥
बेदमंत्र मुनिबर उच्चरहीं । जय जय जय संकर सुर करहीं ॥
बाजहिं बाजन बिबिध बिधाना । सुमनवृष्टि नभ मै बिधि नाना ॥
हर गिरिजा कर भयउ बिबाह । सकल भुवन भरि रहा उछाह ॥
दासीं दास तुरग रथ नागा । धेनु बसन मनि बस्तु बिभागा ॥
अन्न कनक भाजन भरि जाना । दाइज दीन्ह न जाइ बखाना ॥

छं०—दाइज दियो बहु भाँति पुनि कर जोरि हिमभूधर कह्यो ।

का देउँ पूरनकाम संकर चरन पंकज गहि रह्यो ॥

सिवँ कृपा सागर ससुर कर संतोषु सब भाँतिहि कियो ।

पुनि गहे पद पाथोज मयना प्रेम परिपूरन हियो ॥

दो०—नाथ उमा मम प्राण सम गृहकिंकरी करेहु ।

छमेहु सकल अपराध अब होइ प्रसन्न बरु देहु ॥१०१॥

बहु बिधिसंभुसासु समुझाई । गवनी भवन चरन सिरु नाई ॥
जननी उमाबोलि तब लीन्ही । लै उछंग सुंदर सिख दीन्ही ॥
करेहु सदा संकर पद पूजा । नारिधरमु पति देउ न दूजा ॥
बचन कहत भरे लोचन बारी । बहुरि लाइ उर लीन्हि कुमारी ॥
कत बिधिसृजीं नारि जग माहीं । पराधीन सपनेहुँ सुखु नाहीं ॥
मै अति प्रेम बिकल महतारी । धीरजु कीन्ह कुसमय विचारी ॥

पुनिपुनि मिलति परति गहि चरना । परम प्रेमु कछु जाइ न बरना
सब नारिन्ह मिलि भेटि भवानी । जाइ जननि उर पुनि लपटानी ॥

छं०—जननिहि बहुरि मिलि चली उचित असीस सब काहूँ दई ।
फिरिफिरि बिलोकति मातु तन तब सखीं लै सिव पहिं गई ॥
जाचक सकल संतोषि संकरु उमा सहित भवन चले ।
सब अमर हरषे सुमन बरषि निसान नभ बाजे भले ॥

दो०—चले संग हिमवंतु तब पहुँचावन अति हेतु ।
बिबिध भाँति परितोषु करि बिदा कीन्ह वृषकेतु ॥ १०२ ॥

तुरत भवन आए गिरिराई । सकल सैल सर लिए बोलाई ॥
आदर दान बिनय बहुमाना । सब कर बिदा कीन्ह हिमवाना ॥
जबहिं संभु कैलासहिं आए । सुर सब निज निज लोक सिधाए
जगत मातु पितु संभु भवानी । तेहिं सिंगारु न कहउँ बखानी ॥
करहिं बिबिध विधि भोग बिलासा । गनन्ह समेत बसहिं कैलासा ॥
हर गिरिजा बिहार नित नयऊ । एहि विधि बिपुल काल चलि गयऊ
तब जनमेउ षटबदन कुमारा । तारकु असुरु समर जेहिं मारा ॥
आगम निगम प्रसिद्ध पुराना । षन्मुख जन्मु सकल जग जाना ॥

छं०—जगु जान षन्मुख जन्मु कर्मु प्रतापु पुरुषारथु महा ।
तेहि हेतु मैं वृषकेतु सुत कर चरित संछेपहिं कहा ॥
यह उमा संभु बिबाहु जे नर नारि कहहिं जे गावहीं ।
कल्यान काज बिबाह मंगल सर्वदा सुख पावहीं ॥

दो०—चरित सिंधु गिरिजा रमन बेद न पावहिं पारु ।
बरनै तुलसीदासु किमि अति मतिमंद गवाँरु ॥ १०३ ॥

संशु चरित सुनि सरससुहावा । भरद्वाज मुनि अति सुख पावा ॥
 बहु लालसा कथा पर बाढ़ी । नयनन्हि नीरु रोमावालि ठाढ़ी ॥
 प्रेम बिबस मुख आव न बानी । दसा देखि हरषे मुनि ग्यानी ॥
 अहो धन्य तव जन्मु मुनीसा । तुम्हहि प्रानसम प्रिय गौरीसा ॥
 सिव पद कमल जिन्हहि रति नाहीं । रामहि ते सपनेहुँ न सोहाहीं ॥
 बिनु छल बिखनाथ पद नेहू । राम भगत कर लच्छन एहू ॥
 सिव सम को रघुपति व्रतधारी । बिनु अघ तजी सती असि नारी ॥
 पनु करि रघुपति भगति देखाई । को सिव सम रामहि प्रिय भाई ॥

दो०—प्रथमहि मैं कहि सिव चरित बूझा मरमु तुम्हार ।

सुचि सेवक तुम्ह राम के रहित समस्त बिकार ॥ १०४ ॥

मैं जाना तुम्हार गुन सीला । कहउँ सुनहु अब रघुपति लीला ॥
 सुनु मुनि आजु समागम तोरें । कहि न जाइ जस सुख मन मोरें ॥
 राम चरित अति अमित मुनीसा । कहि न सकहिं सत कोटि अहीसा
 तदपि जथाश्रुत कहउँ बखानी । सुमिरि गिरापति प्रभु धनु पानी ॥
 सारद दारुनारि सम स्वामी । राम स्रुतधर अंतरजामी ॥
 जेहि पर कृपा करहिं जनु जानी । कबि उर अजिर नचावहिं बानी ॥
 प्रनवउँ सोइ कृपाल रघुनाथा । बरनउँ बिसद तासु गुन गाथा ॥
 परम रम्य गिरिबरु कैलास । सदा जहाँ सिव उमा निवास ॥

दो०—सिद्ध तपोधन जोगिजन सुर किंनर मुनिबृंद ।

बसहिं तहाँ सुकृती सकल सेवहिं सिव सुखकंद ॥ १०५ ॥

हरि हर बिमुख धर्म रति नाहीं । ते नर तहँ सपनेहुँ नहिं जाहीं ॥
 तेहि गिरि पर बट बिटप बिसाला । नित नूतन सुंदर सब काला ॥

त्रिविध समीर सुसीतलि छाया । सिव विश्राम बिटप श्रुति गाया ॥
एक बार तेहि तर प्रभु गयऊ । तरु बिलोकि उर अति सुखु भयऊ
निज कर डासि नागरिपु छाला । बैठे सहजहि संभु कृपाला ॥
कुंद इंदु दर गौर सरीरा । भुज प्रलंब परिधन मुनि चीरा ॥
तरुन अरुन अंबुज सम चरना । नख दुति भगत हृदय तम हरना ॥
भुजग भूति भूषन त्रिपुरारी । आननु सरद चंद छवि हारी ॥

दो०—जटा मुकुट सुरसरित सिर लोचन नलिन बिसाल ।

नीलकंठ लावन्यनिधि सोह बालविधु भाल ॥ १०६ ॥

बैठे सोह कामरिपु कैसैं । धरें सरीरु सांतरसु जैसैं ॥
पारबती भल अवसरु जानी । गई संभु पहिं मातु भवानी ॥
जानि प्रिया आदरु अति कीन्हा । बाम भाग आसनु हर दीन्हा ॥
बैठौं सिव समीप हरषाई । पूरुब जन्म कथा चित आई ॥
पति हियँ हेतु अधिक अनुमानी । बिहसि उमा बोलीं प्रिय बानी ॥
कथा जो सकल लोक हितकारी । सोइ पूछन चह सैलकुमारी ॥
बिखनाथ मम नाथ पुरारी । त्रिभुवन महिमा बिदित तुम्हारी
चर अरु अचर नाग नर देवा । सकल करहिं पद पंकज सेवा ॥

दो०—प्रभु समरथ सर्वग्य सिव सकल कला गुन धाम ।

जोग ग्यान बैराग्य निधि प्रनत कलपतरु नाम ॥ १०७ ॥

जौं मो पर प्रसन्न सुखरासी । जानिअ सत्य मोहि निज दासी ॥
तौ प्रभु हरहु मोर अग्याना । कहि रघुनाथ कथा बिधि नाना ॥
जासु भवनु सुरतरु तर होई । सहि कि दरिद्र जनित दुखु सोई ॥
ससिभूषन अस हृदयँ बिचारी । हरहु नाथ मम मति भ्रम भारी ॥

प्रभु जे मुनि परमारथवादी । कहहिं राम कहूँ ब्रह्म अनादी ॥
 सेस सारदा बेद पुराना । सकल करहिं रघुपति गुन गाना ॥
 तुम्ह पुनि राम राम दिनु राती । सादर जपहु अनंग आराती ॥
 रामु सो अवध नृपति सुत सोई । की अज अगुन अलख गति कोई ॥

दो०—जौं नृप तनय त ब्रह्म किमि नारि बिरहँ मति भोरि ।

देखि चरित महिमा सुनत भ्रमति बुद्धि अति मोरि ॥ १०८ ॥

जौं अनीह व्यापक बिभु कोऊ । कहहु बुझाई नाथ मोहि सोऊ ॥
 अग्य जानि रिस उर जनि धरहु । जेहि बिधि मोह मिटै सोइ करहु ॥
 मै बन दीख राम प्रभुताई । अति भय बिकल न तुम्हहि सुनाई ॥
 तदपि मलिन मन बोधु न आवा । सो फलु भली भाँति हम पावा ॥
 अजहूँ कलु संसउ मन मोरें । करहु कृपा बिनवउँ कर जोरें ॥
 प्रभु तब मोहि बहु भाँति प्रबोधा । नाथ सो समझि करहु जनि क्रोधा
 तब कर अस बिमोह अब नाहीं । रामकथा पर रुचि मन माहीं ॥
 कहहु पुनीत राम गुन गाथा । भुजगराज भूषन सुरनाथा ॥

दो०—बंदउँ पद धरि धरनि सिरु बिनय करउँ कर जोरि ।

बरनहु रघुवर बिसद जसु श्रुति सिद्धांत निचोरि ॥ १०९ ॥

जदपि जोषिता नहिं अधिकारी । दासी मन क्रम बचन तुम्हारी ॥
 गूढ़उ तत्त्व न साधु दुरावहिं । आरत अधिकारी जहँ पावहिं ॥
 अति आरति पूछउँ सुरराया । रघुपति कथा कहहु करि दाया ॥
 प्रथम सो कारन कहहु बिचारी । निर्गुन ब्रह्म सगुन बपु धारी ॥
 पुनि प्रभु कहहु राम अवतारा । बालचरित पुनि कहहु उदारा ॥
 कहहु जथा जानकी बिबाहीं । राज तजा सो दूषन काहीं ॥

बन बसि कीन्हे चरित अपारा । कहहु नाथ जिमि रावन मारा ॥
राज बैठि कीन्हैं बहु लीला । सकल कहहु संकर सुखसीला ॥

दो०—बहुरि कहहु करुनायतन कीन्ह जो अचरज राम ।

प्रजा सहित रघुवंसमनि किमि गवने निज धाम ॥११०॥

पुनि प्रभु कहहु सो तत्त्व बखानी । जेहिं बिग्यान मगन मुनि ग्यानी
भगति ग्यान बिग्यान बिरागा । पुनि सब बरनहु सहित बिभागा ॥
औरउ राम रहस्य अनेका । कहहु नाथ अति बिमल बिबेका ॥
जो प्रभु मैं पूछा नहिं होई । सोउ दयाल राखहु जनि गोई ॥
तुम्ह त्रिभुवन गुर बेद बखाना । आन जीव पाँवर का जाना ॥
प्रस्न उमा कै सहज सुहाई । छल बिहीन सुनि सिव मन भाई ॥
हर हियँ रामचरित सब आए । प्रेम पुलक लोचन जल छाए ॥
श्रीरघुनाथ रूप उर आवा । परमानंद अमित सुख पावा ॥

दो०—मगन ध्यानरस दंड जुग पुनि मन बाहेर कीन्ह ।

रघुपति चरित महेस तब हरषित बरनै लीन्ह ॥१११॥

झूठेउ सत्य जाहि बिनु जानें । जिमि भुजंग बिनु रजु पहिचानें ॥
जेहि जानें जग जाइ हेराई । जागें जथा सपन भ्रम जाई ॥
बंदउँ बालरूप सोइ राम । सब सिधि सुलभ जपत जिसु नाम ॥
मंगल भवन अमंगल हारी । द्रवउ सोदसरथ अजिर बिहारी ॥
करि प्रनाम रामहि त्रिपुरारी । हरषि सुधा सम गिरा उचारी ॥
धन्य धन्य गिरिराजकुमारी । तुम्ह समान नहिं कोउ उपकारी ॥
पूँछेहु रघुपति कथा प्रसंगा । सकल लोक जग पावनि गंगा ॥
तुम्ह रघुबीर चरन अनुरागी । कीन्हिहु प्रसन्न जगत हित लागी ॥

दो०—राम कृपा तैं पारबति सपनेहुँ तव मन माहिं ।

सोक मोह संदेह भ्रम मम बिचार कछु नाहिं ॥११२॥

तदपि असंका कीन्हिहु सोई । कहत सुनत सब कर हित होई ॥

जिन्ह हरि कथा सुनी नहिं काना । श्रवन रंघ्र अहिभवन समाना ॥

नयनन्हि संत दरस नहिं देखा । लोचन मोरपंख कर लेखा ॥

ते सिर कटु तुंबरि समतूला । जेन नमत हरि गुर पद मूला ॥

जिन्ह हरि भगति हृदयँ नहिं आनी । जीवत सब समान तेइ प्राणी ॥

जो नहिं करइ राम गुन गाना । जीह सो दादुर जीह समाना ॥

कुलिस कठोर निठुर सोइ छाती । सुनि हरिचरित न जो हरषाती ॥

गिरिजा सुनहु राम कै लीला । सुर हित दनुज बिमोहन सीला ॥

दो०—रामकथा सुरधेनु सम सेवत सब सुख दानि ।

सतसमाज सुरलोक सब को न सुनै अस जानि ॥११३॥

रामकथा सुंदर कर तारी । संसय बिहग उड़ावनिहारी ॥

रामकथा कलि बिटप कुठारी । सादर सुनु गिरिराजकुमारी ॥

राम नाम गुन चरित सुहाए । जनम करम अगनित श्रुति गाए ॥

जथा अनंत राम भगवाना । तथा कथा कीरति गुन नाना ॥

तदपि जथा श्रुत जसि मति मोरी । कहिहउँ देखि प्रीति अति तोरी ॥

उमा प्रसन्न तव सहज सुहाई । सुखद संतसंमत मोहि भाई ॥

एक बात नहिं मोहि सोहानी । जदपि मोहबस कहेहु भवानी ॥

तुम्ह जो कहा राम कोउ आना । जेहि श्रुति गाव धरहिं मुनि ध्याना ॥

दो०—कहहिं सुनहिं अस अधम नर प्रसे जे मोह पिसाच ।

पाखंडी हरि पद बिमुख जानहिं झूठ न साच ॥११४॥

अग्य अकोविद अंध अभागी । काई बिषय मुकुर मन लागी ॥
लंपट कपटी कुटिल बिसेषी । सपनेहुँ संतसभा नहिं देखी ॥
कहहिं ते बेद असंमत बानी । जिन्ह कें स्रज लाभु नहिं हानी ॥
मुकुर मलिन अरु नयन बिहीना । राम रूप देखहिं किमि दीना ॥
जिन्ह कें अगुन न सगुन बिबेका । जल्पहिं कल्पित बचन अनेका ॥
हरिमाया बस जगत भ्रमाहीं । तिन्हहि कहत कछु अघटित नाहीं
बातुल भूत बिबस मतवारे । ते नहिं बोलहिं बचन बिचारे ॥
जिन्ह कृत महामोह मद पाना । तिन्ह कर कहा करिअ नहिं काना

सो०—अस निज हृदयँ बिचारि तजु संसय भजु राम पद ।

सुनु गिरिराज कुमारि भ्रम तम रवि कर बचन मम ॥११५॥

सगुनहि अगुनहि नहिं कछु भेदा । गावहिं मुनि पुरान बुध बेदा ॥
अगुन अरूप अलख अज जोई । भगत प्रेम बस सगुन सो होई ॥
जो गुन रहित सगुन सोइ कैसें । जलु हिम उपल बिलग नहिं जैसें
जामु नाम भ्रम तिमिर पतंगा । तेहि किमि कहिअ बिमोह प्रसंगा
राम सच्चिदानंद दिनेसा । नहिं तहँ मोह निसा लवलेसा ॥
सहज प्रकासरूप भगवाना । नहिं तहँ पुनि बिग्यान बिहाना ॥
हरष बिषाद ग्यान अग्याना । जीवधर्म अहमिति अभिमाना ॥
राम ब्रह्म व्यापक जग जाना । परमानंद परेस पुराना ॥

दो०—पुरुष प्रसिद्ध प्रकास निधि प्रगट परावर नाथ ।

रघुकुलमनि मम स्वामि सोइ कहि सिवँ नायउ माथ ॥११६॥

निज भ्रम नहिं समुझहिं अग्यानी । प्रभु पर मोह धरहिं जड़ प्रानी ॥
जथा गगन घन पटल निहारी । झाँपेउ भानु कहहिं कुबिचारी ॥

चितव जो लोचन अंगुलि लाएँ । प्रगट जुगल मसि तेहि के भाएँ
 उमा राम बिषइक अस मोहा । नभ तम धूमधूरि जिमि सोहा ॥
 बिषय करन सुर जीव समेता । सकल एक तैं एक सचेता ॥
 सब कर परम प्रकासक जोई । राम अनादि अवधपति सोई ॥
 जगत प्रकास्य प्रकासक रामू । मायाधीस ग्यान गुन धामू ॥
 जासु सत्यता तैं जड़ माया । भास सत्य इव मोह सहाया ॥

दो०—रजत सीप महुँ भास जिमि जथा भानु कर बारि ।

जदपि मृषा तिहुँ काल सोइ भ्रम न सकइ कोउ टारि ॥११७॥

एहि बिधि जग हरि आश्रित रहई । जदपि असत्य देत दुख अहई ॥
 जौ सपनैं सिर काटै कोई । बिनु जागैं न दूरि दुख होई ॥
 जासु कृपाँ अस भ्रम मिटि जाई । गिरिजा सोइ कृपाल रघुराई ॥
 आदि अंत कोउ जासु न पावा । मति अनुमानि निगम अस गावा
 बिनु पद चलइ सुनइ बिनु काना । कर बिनु करम करइ बिधि नाना
 आनन रहित सकल रस भोगी । बिनु बानी बकता बड़ जोगी ॥
 तन बिनु परस नयन बिनु देखा । ग्रहइ घ्रान बिनु बास असेषा ॥
 असि सब भाँति अलौकिक करनी । महिमा जासु जाइ नहिं बरनी ॥

दो०—जेहि इमि गाँवहिं वेद बुध जाहि धरहिं मुनि ध्यान ।

सोइ दसरथ सुत भगत हित कोसलपति भगवान ॥११८॥

कासीं मरत जंतु अवलोकी । जासु नाम बल करउँ बिसोकी ॥
 सोइ प्रभु मोर चराचर स्वामी । रघुबर सब उर अंतरजामी ॥
 बिबसहुँ जासु नाम नर कहहीं । जनम अनेक रचित अघ दहहीं ॥
 सादर सुमिरन जे नर करहीं । भव बारिधि गोपद इव तरहीं ॥

राम सो परमातमा भवानी । तहँ भ्रम अति अबिहित तव बानी ॥
अस संसय आनत उर माहीं । ग्यान बिराग सकल गुन जाहीं ॥
सुनि सिव के भ्रम भंजन बचना । मिटि गै सब कुतरक कै रचना ॥
भइ रघुपति पद प्रीति प्रतीती । दारुन असंभावना बीती ॥
दो०—पुनि पुनि प्रभु पद कमल गहि जोरि पंकरुह पानि ।

बोली गिरिजा बचन बर मनहुँ प्रेम रस सानि ॥११९॥

ससि कर सम सुनि गिरातुम्हारी । मिटा मोह सरदातप भारी ॥
तुम्ह कृपाल सबु संसउ हरेऊ । राम स्वरूप जानि मोहि परेऊ ॥
नाथ कृपाँ अब गयउ विषादा । सुखी भयउँ प्रभु चरन प्रसादा ॥
अब मोहि आपनि किंकरि जानी । जदपि सहज जड़ नारि अयानी ॥
प्रथम जो मैं पूछा सोइ कहहू । जौं मो पर प्रसन्न प्रभु अहहू ॥
राम ब्रह्म चिनमय अबिनासी । सर्व रहित सब उर पुर बासी ॥
नाथ धरेउ नरतनु केहि हेतू । मोहि समुझाइ कहहु वृषकेतू ॥
उमा बचन सुनि परम विनीता । रामकथा पर प्रीति पुनीता ॥
दो०—हियँ हरषे कामारि तब संकर सहज सुजान ।

बहु विधि उमहि प्रसंसि पुनि बोले कृपानिधान ॥१२०(क)॥

नवाह्नपारायण, पहला विश्राम

मासपारायण, चौथा विश्राम

सो०—सुनु सुभ कथा भवानि रामचरितमानस बिमल ।

कहा भुसुंड़ि बखानि सुना बिहग नायक गरुड़ ॥१२०(ख)॥

सो संवाद उदार जेहि बिधि भा आगें कहब ।

सुनहु राम अवतार चरित परम सुंदर अनघ ॥१२०(ग)॥

हरि गुन नाम अपार कथा रूप अगनित अमित ।

मैं निज मति अनुसार कहउँ उमा सादर सुनहु ॥१२०(घ)॥

सुनु गिरिजा हरिचरित सुहाए । बिपुल बिसद निगमागम गाए ॥
हरि अवतार हेतु जेहि होई । इदमित्थं कहि जाइ न सोई ॥
राम अतर्क्य बुद्धि मन बानी । मत हमार अस सुनहि सयानी ॥
तदपि संत मुनि बेद पुराना । जस कछु कहहिं स्वमति अनुमाना
तस मैं सुमुखि सुनावउँ तोही । समुझि परइ जस कारन मोही ॥
जब जब होइ धरम कै हानी । बाढ़हिं असुर अधम अभिमानी ॥
करहिं अनीति जाइ नहिं बरनी । सीदहिं बिप्र धेनु सुर धरनी ॥
तब तब प्रभु धरि बिबिध सरीरा । हरहिं कृपानिधि सज्जन पीरा ॥

दो०—असुर मारि थापहिं सुरन्ह राखहिं निज श्रुति सेतु ।

जग बिस्तारहिं बिसद जस राम जन्म कर हेतु ॥१२१॥

सोइ जस गाइ भगत भव तरहीं । कृपासिंधु जन हित तनु धरहीं ॥
राम जनम के हेतु अनेका । परम बिचित्र एक तैं एका ॥
जनम एक दुइ कहउँ बखानी । सावधान सुनु सुमति भवानी ॥
द्वारपाल हरि के प्रिय दोऊ । जय अरु बिजय जान सब कोऊ ॥
बिप्र श्राप तैं दूँ उ भाई । तामस असुर देह तिन्ह पाई ॥
कनककसिपु अरु हाटकलोचन । जगत बिदित सुरपति मद मोचन
बिजई समर वीर बिख्याता । धरि बराह वपु एक निपाता ॥
होइ नरहरि दूसर पुनि मारा । जन प्रहलाद सुजस बिस्तारा ॥

दो०—भए निसाचर जाइ तेइ महावीर बलवान ।

कुंभकरन रावन सुभट सुर बिजई जग जान ॥१२२॥

मुकुत न भए हते भगवाना । तीनि जनम द्विज बचन प्रवाना ॥
 एक बार तिन्ह के हित लागी । धरेउ सरीर भगत अनुरागी ॥
 कस्यप अदितितहाँ पितु माता । दसरथ कौसल्या बिख्याता ॥
 एक कलप एहि बिधि अवतारा । चरित पवित्र किए संसारा ॥
 एक कलप सुर देखि दुखारे । समर जलंधर सन सब हारे ॥
 संभु कीन्ह संग्राम अपारा । दनुज महाबल मरइ न मारा ॥
 परम सती असुराधिप नारी । तेहि बल ताहि न जितहि पुरारी ॥

दो०—छल करि टारेउ तासु ब्रत प्रभु सुर कारज कीन्ह ।

जब तेहि जानेउ मरम तब आप कोप करि दीन्ह ॥१२३॥

तासु आप हरि दीन्ह प्रमाना । कौतुकनिधि कृपाल भगवाना ॥
 तहाँ जलंधर रावन भयऊ । रन हति राम परमपद दयऊ ॥
 एक जनम कर कारन एहा । जेहि लगि राम धरी नरदेहा ॥
 प्रति अवतार कथा प्रभु केरी । सुनु मुनि बरनी कबिन्ह घनेरी ॥
 नारद आप दीन्ह एक बारा । कलप एक तेहि लगि अवतारा ॥
 गिरिजा चकित भई सुनि बानी । नारद बिष्णु भगत पुनि ग्यानी ॥
 कारन कवन आप मुनि दीन्हा । का अपराध रमापति कीन्हा ॥
 यह प्रसंग मोहि कहहु पुरारी । मुनि मन मोह आचरज भारी ॥

दो०—बोले बिहसि महेस तब ग्यानी मूढ़ न कोइ ।

जेहि जस रघुपति करहिं जब सो तस तेहि छन होइ ॥१२४(क)॥

सो०—कहउँ राम गुन गाथ भरद्वाज सादर सुनहु ।

भव भंजन रघुनाथ भजु तुलसी तजि मान मद ॥१२४(ख)॥

हिमगिरि गुहा एक अति पावनि । वह समीप सुरसरी सुहावनि ॥

आश्रम परम पुनीत सुहावा । देखि देवरिषि मन अति भावा ॥
 निरखि सैल सरि बिपिन बिभागा । भयउ रमापति पद अनुरागा ॥
 सुमिरत हरिहि श्राप गति बाधी । सहज बिमल मन लागि समाधी ॥
 मुनि गति देखि सुरेस डेराना । कामहि बोलि कीन्ह सनमाना ॥
 सहित सहाय जाहु मम हेतू । चलेउ हरषि हियँ जलचर केतू ॥
 सुनासीर मन महुँ असि त्रासा । चहत देवरिषि मम पुर बासा ॥
 जे कामी लोलुप जंग माहीं । कुटिल काक इव सबहि डेराहीं ॥

दो०—सूख हाड़ लै भाग सठ स्वान निरखि मृगराज ।

छीनि लेइ जनि जान जड़ तिमि सुरपतिहि न लाज ॥१२५॥

तेहि आश्रमहिं मदन जब गयऊ । निज मायाँ बसंत निरमयऊ ॥
 कुसुमित बिबिध बिटप बहुरंगा । कूजहिं कोकिल गुंजहिं भृंगा ॥
 चली सुहावनि त्रिविध बयारी । काम कृसानु बढ़ावनिहारी ॥
 रंभादिक सुरनारि नबीना । सकल असमसर कला प्रबीना ॥
 करहिं गान बहु तान तंगा । बहुबिधि क्रीड़हिं पानि पतंगा ॥
 देखि सहाय मदन हरषाना । कीन्हेसि पुनि प्रपंच विधि नाना ॥
 काम कला कछु मुनिहि न व्यापी । निज भयँ डरेउ मनोभव पापी ॥
 सीम कि चाँपि सकइ कोउ तासू । बड़ रखवार रमापति जासू ॥

दो०—सहित सहाय समीत अति मानि हारि मन मैन ।

गहेसि जाइ मुनि चरन तब कहि सुठि आरत बैन ॥१२६॥

भयउ न नारद मन कछु रोषा । कहि प्रिय बचन काम परितोषा ॥
 नाइ चरन सिरु आयसु पाई । गयउ मदन तब सहित सहाई ॥
 मुनि सुसीलता आपनि करनी । सुरपति सभाँ जाइ सब बरनी ॥

सुनि सब कै मन अचरजु आवा । मुनिहि प्रसंसि हरिहि सिरु नावा
तब नारद गवने सिब पाहीं । जिता काम अहमिति मन माहीं ॥
मार चरित संकरहि सुनाए । अतिप्रिय जानि महेस सिखाए ॥
बार बार बिनवउँ मुनि तोही । जिमि यह कथा सुनायहु मोही ॥
तिमि जनिहरिहि सुनावहु कबहुँ । चलेहुँ प्रसंग दुराएहु तबहुँ ॥

दो०—संभु दीन्ह उपदेस हित नहि नारदहि सोहान ।

भरद्वाज कौतुक सुनहु हरि इच्छा बलवान ॥१२७॥

राम कीन्ह चाहिं सोइ होई । करै अन्यथा अस नहि कोई ॥
संभु बचन मुनि मन नहि भाए । तब बिरंचि के लोक सिधाए ॥
एक बार करतल बर बीना । गावत हरि गुन गान प्रबीना ॥
छीरसिंधु गवने मुनिनाथा । जहँ बस श्रीनिवास श्रुतिमाथा ॥
हरषि मिले उठि रमानिकेता । बैठे आसन रिषिहि समेता ॥
बोले बिहसि चराचर राया । बहुते दिनन कीन्हि मुनि दाया ॥
कामचरित नारद सब भाषे । जद्यपि प्रथम बरजि सिवँ राखे ॥
अति प्रचंड रघुपति कै माया । जेहि न मोह अस को जग जाया ॥

दो०—रूख बदन करि बचन मृदु बोले श्रीभगवान ।

तुम्हरे सुमिरन तें मिटहि मोह मार मद मान ॥१२८॥

सुनि मुनि मोह होइ मन तार्कै । ग्यान बिराग हृदय नहि जार्कै ॥
ब्रह्मचरज व्रत रत मतिधीरा । तुम्हहि कि करइ मनोभव पीरा ॥
नारद कहेउ सहित अभिमाना । कृपा तुम्हारि सकल भगवाना ॥
करुनानिधि मन दीख बिचारी । उर अंकुरेउ गरब तरु भारी ॥
बेगि सो मैं डारिहउँ उत्तारी । पन हमार सेवक हितकारी ॥

मुनि कर हित मम कौतुक होई । अवसि उपाय करबि मैं सोई ॥
तब नारद हरि पद सिर नाई । चले हृदयँ अहमिति अधिकारि ॥
श्रीपति निज माया तब प्रेरी । सुनहु कठिन करनी तेहि केरी ॥

दो०—बिरचेउ मग महुँ नगर तेहिं सत जोजन बिस्तार ।

श्रीनिवासपुर तें अधिक रचना विविध प्रकार ॥१२९॥

बसहिं नगर सुंदर नर नारी । जनु बहु मनसिजरति तनु धारी ॥
तेहिं पुर बसइ सीलनिधिराजा । अगनित हय गय सेन समाजा ॥
सत सुरेस सम बिभव बिलासा । रूप तेज बल नीति निवासा ॥
विश्वमोहनी तासु कुमारी । श्री बिमोह जिमु रूपु निहारी ॥
सोइ हरिमाया सब गुन खानी । सोभा तासु कि जाइ बखानी ॥
करइ स्वयंबर सो नृपचाला । आए तहँ अगनित महिपाला ॥
मुनि कौतुकी नगर तेहिं गयऊ । पुरवासिन्ह सब पूछत भयऊ ॥
मुनि सब चरित भूप गृहँ आए । करि पूजा नृप मुनि बैठाए ॥

दो०—आनि देखाई नारदहि भूपति राजकुमारि ।

कहहु नाथ गुन दोष सब एहि के हृदयँ विचारि ॥१३०॥

देखि रूप मुनि बैरति बिसारी । बड़ी बार लगि रहे निहारी ॥
लच्छन तासु बिलोकि भुलाने । हृदयँ हरष नहिं प्रगट बखाने ॥
जो एहि बरइ अमर सोइ होई । समरभूमि तेहि जीत न कोई ॥
सेवहिं सकल चराचर ताही । बरइ सीलनिधि कन्या जाही ॥
लच्छन सब बिचारि उर राखे । कलुक वनाइ भूप सन भाषे ॥
सुता सुलच्छन कहि नृप पाहीं । नारद चले सोच मन माहीं ॥
करौं जाइ सोइ जतन बिचारी । जेहि प्रकार मोहि बरैं कुमारी ॥

जप तप कछु न होइ तेहि काला । हे बिधि मिलइ कवन बिधि बाला

दो०—एहि अवसर चाहिअ परम सोभा रूप बिसाल ।

जो बिलोकि रीझै कुअँरि तब मैलै जयमाल ॥१३१॥

हरि सन मागौं सुंदरताई । होइहि जात गहरु अति भाई ॥
मोरें हित हरि सम नहिं कोऊ । एहि अवसर सहाय सोइ होऊ ॥
बहु बिधि विनय कीन्हि तेहि काला । प्रगटेउ प्रभु कौतुकी कृपाला ॥
प्रभु बिलोकि मुनि नयन जुड़ाने । होइहि काजु हिउँ हरषाने ॥
अति आरति कहि कथा सुनाई । करहु कृपा करि होहु सहाई ॥
आपन रूप देहु प्रभु मोदी । आन भाँति नहिं पावौं ओही ॥
जेहि बिधि नाथ होइ हित मोरा । करहु सो बेगि दास मैं तोरा ॥
निज माया बल देखि बिसाला । हियँ हँसि बोले दीनदयाला ॥

दो०—जेहि बिधि होइहि परम हित नारद सुनहु तुम्हार ।

सोइ हम करब न आन कछु बचन न मृषा हमार ॥१३२॥

कुपथ माग रुज व्याकुल रोगी । बैद न देइ सुनहु मुनि जोगी ॥
एहि बिधि हित तुम्हार मैठयऊ । कहि अस अंतरहित प्रभु भयऊ ॥
माया बिबस भए मुनि मूढ़ा । समुझी नहिं हरि गिरा निगूढ़ा ॥
गवने तुरत तहाँ रिषिराई । जहाँ स्वयंवर भूमि बनाई ॥
निज निज आसन बैठे राजा । बहु बनाव करि सहित समाजा ॥
मुनि मन हरषरूप अति मोरें । मोहि तजि आनहि बरिहि न भोरें ॥
मुनि हित कारन कृपानिधाना । दीन्ह कुरूप न जाइ बखाना ॥
सो चरित्र लखि काहुँ न पावा । नारद जानि सबहिं सिर नावा ॥

दो०—रहे तहाँ दुइ रुद्र गन ते जानहि सब भेउ ।

विप्र बेष देखत फिरहि परम कौतुकी तेउ ॥१३३॥

जेहि समाज बैठे मुनि जाई । हृदयँ रूप अहमिति अधिकारि ॥
तहँ बैठे महेस गन दोऊ । विप्रबेष गति लखइ न कोऊ ॥
करहि कूटि नारदहि सुनाई । नीक दीन्ह हरि सुंदरताई ॥
रीझिहि राजकुअँरि छबि देखी । इन्हहि बरिहि हरि जानि बिसेषी ॥
मुनिहि मोह मन हाथ परायँ । हँसहि संभु गन अति सचु पायँ ॥
जदपि सुनिहि मुनि अटपटि बानी । समुझि न परइ बुद्धि भ्रम सानी
काहुँ न लखा सो चरित बिसेषा । सो सरूप नृपकन्याँ देखा ॥
मर्कट बदन भयँकर देही । देखत हृदयँ क्रोध भा तेही ॥

दो०—सखी संग लै कुअँरि तब चलि जनु राजमराल ।

देखत फिरइ महीप सब कर सरोज जयमाल ॥१३४॥

जेहि दिसि बैठे नारद फूली । सो दिसि तेहिं न बिलोकी भूली ॥
पुनि पुनि मुनि उकसहिं अकुलाहीं । देखि दसा हरगन मुसुकाहीं ॥
धरि नृपतनु तहँ गयउ कृपाला । कुअँरि हरषि मेलेउ जयमाला ॥
दुलहिनि लै गे लच्छिनिवासा । नृप समाज सब भयउ निरासा ॥
मुनि अति बिकल मोहँ मति नाठी । मनि गिरि गई छटि जनु गाँठी
तब हर गन बोले मुसुकाई । निज मुख मुकुर बिलोकहु जाई ॥
अस कहि दोउ भागे भयँ भारी । बदन दीख मुनि बारि निहारी ॥
बेषु बिलोकि क्रोध अति बाढ़ा । तिन्हहि सराप दीन्ह अति गाढ़ा ॥

दो०—होहु निसाचर जाइ तुम्ह कपटी पापी दोउ ।

हँसेहु हमहि सो लेहु फल बहुरि हँसेहु मुनि कोउ ॥१३५॥

पुनि जल दीख रूप निज पावा । तदपि हृदयँ संतोष न आवा ॥
 फरकत अधर कोप मन माहीं । सपदि चले कमलापति पाहीं ॥
 देहउँ श्राप कि मरिहउँ जाई । जगत मोरि उपहास कराई ॥
 बीचहि पंथ मिले दनुजारी । संग रमा सोइ राजकुमारी ॥
 बोले मधुर बचन सुरसाई । मुनि कहँ चले बिकल की नाई ॥
 सुनत बचन उपजा अति क्रोधा । माया बस न रहा मन बोधा ॥
 पर संपदा सकहु नहि देखी । तुम्हरे इरिषा कपट बिसेषी ॥
 मथत सिंधु रुद्रहि बौरायहु । सुरन्ह प्रेरि बिष पान करायहु ॥
 दो०—असुर सुरा बिष संकरहि आपु रमा मनि चारु ।

स्वारथ साधक कुटिल तुम्ह सदा कपट व्यवहारु ॥१३६॥

परम स्वतंत्र न सिर पर कोई । भावइ मनहि करहु तुम्ह सोई ॥
 भलेहि मंद मंदेहि भल करहु । बिसमय हरप न हियँ कलु धरहु ॥
 डहकि डहकि परिचेहु सब काहु । अति असंक मन सदा उछाहु ॥
 करम सुभासुभ तुम्हहि न बाधा । अब लगि तुम्हहि न काहूँ साधा ॥
 भले भवन अब बायन दीन्हा । पावहुगे फल आपन कीन्हा ॥
 बंचेहु मोहि जवनि धरि देहा । सोइ तनु धरहु श्राप मम एहा ॥
 कपि आकृति तुम्ह कीन्हि हमारी । करिहहिं कीस सहाय तुम्हारी ॥
 मम अपकार कीन्ह तुम्ह भारी । नारि बिरहँ तुम्ह होब दुखारी ॥
 दो०—श्राप सीस धरि हरषि हियँ प्रभु बहु बिनती कीन्हि ।

निज माया कै प्रबलता करषि कृपानिधि लीन्हि ॥१३७॥

जब हरि माया दूरि निवारी । नहिं तहँ रमा न राजकुमारी ॥
 तब मुनि अति सभित हरि चरना । गहे पाहि प्रनतारति हरना ॥

मृषा होउ मम श्राप कृपाला । मम इच्छा कह दीनदयाला ॥
 मैं दुर्बचन कहे बहुतेरे । कह मुनि पाप मिटिहिं किमि मेरे
 जपहु जाइ संकर सत नामा । होइहि हृदयँ तुरत विश्रामा ॥
 कोउ नहिं सिव समान प्रिय मोरें । असि परतीति तजहु जनि भोरें ॥
 जेहि पर कृपा न करहिं पुरारी । सो न पाव मुनि भगति हमारी ॥
 अस उरधरि महि बिचरहु जाई । अब न तुम्हहि माया निअराई ॥

दो०—बहुविधि मुनिहि प्रबोधि प्रभु तब भए अंतरधान ।

सत्यलोक नारद चले करत राम गुन गान ॥१३८॥
 हर गन मुनिहि जात पथ देखी । विगतमोह मन हरष बिसेषी ॥
 अति सभित नारद पहिं आए । गहि पद आरत बचन सुनाए ॥
 हर गन हम न बिप्र मुनिराया । बड़ अपराध कीन्ह फल पाया ॥
 श्राप अनुग्रह करहु कृपाला । बोले नारद दीनदयाला ॥
 निसिचर जाइ होहु तुम्ह दोऊ । बैभव बिपुल तेज बल होऊ ॥
 भुजबल बिस्व जितव तुम्ह जहिआ । धरिहहिं बिष्णु मनुज तनु तहिआ ॥
 समर मरन हरि हाथ तुम्हारा । होइहहु मुकुत न पुनि संसारा ॥
 चले जुगल मुनि पद सिर नाई । भए निसाचर कालहि पाई ॥
 दो०—एक कलप एहि हेतु प्रभु लीन्ह मनुज अवतार ।

सुर रंजन सज्जन सुखद हरि भंजन भुवि भार ॥१३९॥
 एहि विधि जनम करम हरि केरे । सुंदर सुखद विचित्र घनेरे ॥
 कलप कलप प्रति प्रभु अवतरहीं । चारु चरित नाना विधि करहीं ॥
 तब तब कथा सुनोसन्ह गाई । परम पुनीत प्रबंध बनाई ॥
 विविध प्रसंग अनूप बखाने । करहिं न सुनि आचरजु सयाने ॥

हरि अनंत हरिकथा अनंता । कहहिं सुनहिं बहुविधि सब संता ॥
 रामचंद्र के चरित सुहाए । कलप कोटि लगि जाहिं न गाए ॥
 यह प्रसंग मैं कहा भवानी । हरिमायाँ मोहहिं मुनि ग्यानी ॥
 प्रभु कौतुकी प्रनत हितकारी । सेवत सुलभ सकल दुख हारी ॥

सो०—सुर नर मुनि कोउ नाहिं जेहि न मोह माया प्रबल ।

अस विचारि मन माहिं भजिअ महामाया पतिहि ॥१४०॥

अपर हेतु सुनु सैलकुमारी । कहउँ बिचित्र कथा बिस्तारी ॥
 जेहि कारन अज अगुन अरूपा । ब्रह्म भयउ कोसलपुर भूपा ॥
 जो प्रभु विपिन फिरत तुम्ह देखा । बंधु समेत धरें मुनिबेषा ॥
 जासु चरित अवलोकि भवानी । सती सरीर रहिहु बौरानी ॥
 अजहुँ न छाया मिटति तुम्हारी । तासु चरित सुनु भ्रम रुज हारी ॥
 लीला कीन्हि जो तेहि अवतारा । सो सब कहिहउँ मति अनुसारा ॥
 भरद्वाज सुनि संकर बानी । सकुचि सप्रेम उमा मुसुकानी ॥
 लगे बहुरि बरनै वृषकेतू । सो अवतार भयउ जेहि हेतू ॥

दो०—सो मैं तुम्ह सन कहउँ सबु सुनु मुनीस मन लाइ ।

राम कथा कलि मल हरनि मंगल करनि सुहाइ ॥१४१॥

स्वायंभू मनु अरु सतरूपा । जिन्ह तें मैं नरसृष्टि अनूपा ॥
 दंपति धरम आचरन नीका । अजहुँ गाव श्रुति जिन्ह कै लीका ॥
 नृप उत्तानपाद सुत तासु । ध्रुव हरिभगत भयउ सुत जासु ॥
 लघुसुत नाम प्रियव्रत ताही । बेद पुरान प्रसंसहिं जाही ॥
 देवहूति पुनि तासु कुमारी । जो मुनि कर्दम कै प्रिय नारी ॥
 आदिदेव प्रभु दीनदयाला । जठर धरेउ जेहि कपिल कृपाला ॥

सांख्य सास्त्र जिन्ह प्रगट बखाना । तत्त्व बिचार निपुन भगवान् ॥
तेहिं मनु राज कीन्ह बहु काला । प्रभु आयसु सब बिधि प्रतिपाला ॥

सो०—होइ न बिषय बिराग भवन बसत भा चौथपन ।

हृदयँ बहुत दुख लाग जनम गयउ हरिभगति बिनु ॥१४२॥

बरबस राज सुतहि तब दीन्हा । नारि समेत गवन बन कीन्हा ॥
तीरथ बर नैमिष बिरूयाता । अति पुनीत साधक सिधि दाता ॥
बसहिं तहाँ मुनि सिद्ध समाजा । तहँ हियँ हरषि चलेउ मनु राजा ॥
पंथ जात सोहहिं मतिधीरा । ग्यान भगति जनु धरें सरीरा ॥
पहुँचे जाइ धेनुमति तीरा । हरषि नहाने निरमल नीरा ॥
आए मिलन सिद्ध मुनि ग्यानी । धरम धुरंधर नृपरिषि जानी ॥
जहँ जहँ तीरथ रहे सुहाए । मुनिन्ह सकल सादर करवाए ॥
कृस सरीर मुनिपट परिधाना । सत समाज नित सुनहिं पुराना ॥

दो०—द्वादस अच्छर मंत्र पुनि जपहि सहित अनुराग ।

बासुदेव पद पंकरुह दंपति मन अति लाग ॥१४३॥

करहिं अहार साक फल कंदा । सुमिरहिं ब्रह्म सच्चिदानंदा ॥
पुनि हरि हेतु करुन तप लागे । बारि अधार मूल फल त्यागे ॥
उर अभिलाष निरंतर होई । देखिअ नयन परम प्रभु सोई ॥
अगुन अखंड अनंत अनादी । जेहि चिंतहिं परमारथवादी ॥
नेति नेति जेहि बेद निरूपा । निजानंद निरूपाधि अनूपा ॥
संभु बिरंचि बिष्नु भगवाना । उपजहिं जासु अंस तें नाना ॥
ऐसेउ प्रभु सेवक बस अहई । भगत हेतु लीलातनु गहई ॥
जौ यह बचन सत्य श्रुति भाषा । तौ हमार पूजिहि अभिलाषा ॥

दो०—एहि बिधि बीते बरष षट सहस्र बारि आहार ।

संबत सत सहस्र पुनि रहे समीर अधार ॥१४४॥

बरष सहस्र दस त्यागेउ सोऊ । ठाढ़े रहे एक पद दोऊ ॥
बिधि हरि हर तप देखि अपारा । मनु समीप आए बहु बारा ॥
मागहु बर बहु भौंति लोभाए । परम धीर नहिं चलहिं चलाए ॥
अस्थिमात्र होइ रहे सरीरा । तदपि मनाग मनहिं नहिं पीरा ॥
प्रभु सर्वग्य दास निज जानी । गति अनन्य तापस नृप रानी ॥
मागु मागु बरु मै नभ बानी । परम गभीर कृपामृत सानी ॥
मृतक जिआवनि गिरा सुहाई । श्रवन रंध्र होइ उर जब आई ॥
हृष्टपुष्ट तन भए सुहाए । मानहुँ अवहिं भवन ते आए ॥

दो०—श्रवन सुधा सम बचन सुनि पुलक प्रफुल्लित गात ।

बोले मनु करि दंडवत प्रेम न हृदयें संमात ॥१४५॥

सुनु सेवक सुरतरु सुरधेनू । बिधि हरि हर बंदित पद रेनू ॥
सेवत सुलभ सकल सुखदायक । प्रनतपाल सचराचर नायक ॥
जौं अनाथ हित हम पर नेहू । तौ प्रसन्न होइ यह बर देहू ॥
जो सरूप बस सिव मन माहीं । जेहि कारन मुनि जतन कराहीं ॥
जो भुखुंडि मन मानस हंसा । सगुन अगुन जेहि निगम प्रसंसा ॥
देखहिं हम सो रूप भरि लोचन । कृपा करहु प्रनतारति मोचन ॥
दंपति बचन परम प्रिय लागे । मृदुल विनीत प्रेम रस पागे ॥
भगत बछल प्रभु कृपानिधाना । बिस्वबास प्रगटे भगवाना ॥

दो०—नील सरोरुह नील मनि नील नीरधर स्याम ।

लाजहिं तम सोभा निरखि कोटि कोटि सत काम ॥१४६॥

सरद मयंक बदन छवि सीवा । चारु कपोल चिबुक दर ग्रीवा ॥
 अधर अरुन रद सुंदर नासा । बिधु कर निकर बिनिंदक हासा ॥
 नव अंबुज अंबक छवि नीकी । चितवनिललित भावँती जी की ॥
 भृकुटि मनोज चाप छवि हारी । तिलक ललाट पटल दुतिकारी ॥
 कुंडल मकर मुकुट सिर भ्राजा । कुटिल केस जनु मधुप समाजा ॥
 उर श्रीवत्स रुचिर बनमाला । पदिक हार भूषन मनिजाला ॥
 केहरि कंधर चारु जनेऊ । बाहु बिभूषन सुंदर तेऊ ॥
 करि कर सरिस सुभग भुजदंडा । कटि निषंग कर सर कोदंडा ॥
 दो०—तड़ित बिनिंदक पीत पट उदर रेख बर तीनि ।

नाभि मनोहर लेति जनु जमुन भवँर छवि छीनि ॥१४७॥

पद राजीव बरनि नहिं जाहीं । मुनि मन मधुप बसहिं जेन्ह माहीं ॥
 बाम भाग सोभति अनुकूला । आदिसक्ति छबिनिधि जगमूला ॥
 जासु अंस उपजहिं गुनखानी । अगनित लच्छि उमा ब्रह्मानी ॥
 भृकुटि बिलास जासु जग होई । राम बाम दिसि सीता सोई ॥
 छविसमुद्र हरि रूप बिलोकी । एकटक रहे नयन पट रोकी ॥
 चितवहिं सादर रूप अनूपा । दृष्टि न मानहिं मनु सतरूपा ॥
 हरष बिबस तन दसा भुलानी । परे दंड इव गहि पद पानी ॥
 सिर परसे प्रभु निज कर कंजा । तुरत उठाए करुनापुंजा ॥

दो०—बोले कृपानिधान पुनि अति प्रसन्न मोहि जानि ।

मागहु बर जोइ भाव मन महादानि अनुमानि ॥१४८॥

सुनि प्रभु बचन जोरि जुग पानी । धरि धीरजु बोली मृदु बानी ॥
 नाथ देखि पद कमल तुम्हारे । अब पूरे सब काम हमारे ॥

एक लालसा बड़ि उर माहीं । सुगम अगम कहि जात सो नाहीं ।
तुम्हहि देत अति सुगम गोसाईं । अगम लाग मोहि निज कृपनाई ॥
जथा दरिद्र बिबुधतरु पाई । बहु संपति मागत सकुचाई ॥
तासु प्रभाउ जान नहिं सोई । तथा हृदयें मम संसय होई ॥
सो तुम्ह जानहु अंतरजामी । पुरवहु भोर मनोरथ स्वामी ॥
सकुच बिहाइ मागु नृप मोही । मारें नहिं अदेय कलु तोही ॥

दो०—दानि सिरोमनि कृपानिधि नाथ कहउँ सतिभाउ ।

चाहउँ तुम्हहि समान सुत प्रभु सन कवन दुराउ ॥१४९॥

देखि प्रीति सुनि बचन अमोले । एवमस्तु करुनानिधि बोले ॥
आपु सरिस खोजौ कहँ जाई । नृप तव तनय होच मैं आई ॥
सतरूपहि बिलोकि कर जोरें । देबि मागु बरु जो रुचि तोरें ॥
जो बरु नाथ चतुर नृप मागा । सोइ कृपाल मोहि अति प्रिय लागा
प्रभु परंतु सुठि होति ठिठाई । जदपि भगत हित तुम्हहि सोहाई
तुम्ह ब्रह्मादि जनक जग स्वामी । ब्रह्म सकल उर अंतरजामी ॥
अस समुझत मन संसय होई । कहा जो प्रभु प्रवान पुनि सोई ॥
जे निज भगत नाथ तव अहहीं । जो सुख पावहिं जो गति लहहीं ॥

दो०—सोइ सुख सोइ गति सोइ भगति सोइ निज चरन सनेहु ।

सोइ बिबेक सोइ रहनि प्रभु हमहि कृपा करि देहु ॥१५०॥

सुनि मृदु गूढ़ रुचिर बर रचना । कृपासिंधु बोले मृदु बचना ॥
जो कलु रुचि तुम्हरे मन माहीं । मैं सो दीन्ह सब संसय नाहीं ॥
मातु बिबेक अलौकिक तोरें । कबहुँ न मिटिहि अनुग्रह मोरें ॥
बंदि चरन मनु कहेउ बहोरी । अवर एक बिनती प्रभु मोरी ॥

सुत बिषइक तव पद रति होऊ । मोहि बड़ मूढ़ कहै किन कोऊ ॥
मनि बिनु फनि जिमि जल बिनु मीना । ममजीवन तिमि तुम्हहि अधीना ॥
अस बरु मागि चरन गहि रहेऊ । एवमस्तु करुनानिधि कहेऊ ॥
अब तुम्ह मम अनुसासन मानी । बसहु जाइ सुरपति रजधानी ॥

सो०—तहँ करि भोग बिसाल तात गएँ कछु काल पुनि ।

होइहहु अवध भुआल तब मैं होब तुम्हार सुत ॥१५१॥

इच्छामय नरवेष सँवारें । होइहउँ प्रगट निकेत तुम्हारें ॥
अंसन्ह सहित देह धरि ताता । करिहउँ चरित भगत सुखदाता ॥
जे सुनि सादर नर बड़भागी । भव तरिहहिँ ममता मद त्यागी ॥
आदि सक्ति जेहिँ जग उपजाया । सोउ अवतरिहि मोरि यह माया
पुरउब मैं अभिलाष तुम्हारा । सत्य सत्य पन सत्य हमारा ॥
पुनि पुनि अस कहि कृपानिधाना । अंतरधान भए भगवाना ॥
दंपति उर धरि भगत कृपाला । तेहिँ आश्रम निवसे कछु काला ॥
समय पाइ तनु तजि अनयासा । जाइ कीन्ह अमरावति बासा ॥

दो०—यह इतिहास पुनीत अति उमहि कही बृषकेतु ।

भरद्वाज सुनु अपर पुनि राम जनम कर हेतु ॥१५२॥

मासपारायण, पाँचवाँ विश्राम

सुनु मुनि कथा पुनीत पुरानी । जो गिरिजा प्रति संभु बखानी ॥
बिख बिदित एक कैकय देख । सत्यकेतु तहँ बसइ नरेख ॥
धरम धुरंधर नीति निधाना । तेज प्रताप सील बलवाना ॥
तेहिँ के भए जुगल सुत बीरा । सब गुन धाम महा रनधीरा ॥

राज धनी जो जेठ सुत आही । नाम प्रतापभानु अस ताही ॥
अपर सुतहि अरिमर्दन नामा । भुजबल अतुल अचल संग्रामा ॥
भाइहि भाइहि परम समीती । सकल दोष छल बरजित प्रीती ॥
जेठे सुतहि राज नृप दीन्हा । हरि हित आपु गवन बन कीन्हा
दो०—जब प्रतापरवि भयउ नृप फिरी दोहाई देस ।

प्रजा पाल अति बेदविधि कतहुँ नहीं अघ लेस ॥१५३॥

नृप हितकारक सचिव सयाना । नाम धरमरुचि सुक्र समाना ॥
सचिव सयान बंधु बलबीरा । आपु प्रतापपुंज रनधीरा ॥
सेन संग चतुरंग अपारा । अमित सुभट मव समर जुझारा ॥
सेन बिलोकि राउ हरपाना । अरु बाजे गहगहे निसाना ॥
विजय हेतु कटकई बनाई । सुदिन साधि नृप चलेउ वजाई ॥
जहँ तहँ परीं अनेक लराई । जीते सकल भूप बरिआई ॥
सप्त दीप भुजबल बस कीन्हे । लै लै दंड छाड़ि नृप दीन्हे ॥
सकल अवनि मंडल तेहि काला । एक प्रतापभानु महिपाला ॥

दो०—स्ववस बिस्व करि बाहुबल निज पुर कीन्ह प्रवेसु ।

अरथ धरम कामादि सुख सेवइ समयँ नरेसु ॥१५४॥

भूप प्रतापभानु बल पाई । कामधेनु भै भूमि सुहाई ॥
सब दुख बरजित प्रजा सुखारी । धरमसील सुंदर नर नारी ॥
सचिव धरमरुचि हरि पद प्रीती । नृप हित हेतु सिखव नित नीती ॥
गुर सुर संत पितर महिदेवा । करइ सदा नृप सब कै सेवा ॥
भूप धरम जे बेद बखाने । सकल करइ सादर सुख माने ॥
दिन प्रति देइ विविध विधि दाना । सुनइ सास्त्र बर बेद पुराना ॥

नाना बापीं कूप तड़ागा । सुमन बाटिका सुंदर बागा ॥
विप्रभवन सुरभवन सुहाए । सब तीरथन्ह बिचित्र बनाए ॥

दो०—जहँ लगि कहे पुरान श्रुति एक एक सब जाग ।

बार सहस्र सहस्र नृप किए सहित अनुराग ॥१५५॥

हृदयँन कलु फल अनुसंधाना । भूप विवेकी परम सुजाना ॥
करइ जे धरम करम मन बानी । बासुदेव अपित नृप ग्यानी ॥
चढ़ि बर बाजि बार एक राजा । मृगया कर सब साजि समाजा ॥
बिंध्याचल गभीर बन गयऊ । मृग पुनीत बहु मारत भयऊ ॥
फिरत बिपिन नृप दीख बराहू । जनु बन दुरेउ ससिहि ग्रसि राहू
बड़ बिधु नहि समात मुख माहीं । मनहुँ क्रोध बस उगिलत नाहीं ॥
कोल कराल दसन छवि गाई । तनु बिसाल पीवर अधिकाई ॥
घुरुघुरात हय आरौ पाएँ । चकित बिलोकत कान उठाएँ ॥

दो०—नील महीधर सिखर सम देखि बिसाल बराहु ।

चपरि चलेउ हय सुटुकि नृप हाँकि न होइ निबाहु ॥१५६॥

आवत देखि अधिक रव बाजी । चलेउ बराह मरुत गति भाजी ॥
तुरत कीन्ह नृप सर संधाना । महि मिलि गयउ बिलोकत बाना
तकि तकि तीर महीस चलावा । करि छल सुअर सरीर बचावा ॥
प्रगटत दुरत जाइ मृग भागा । रिस बस भूप चलेउ सँग लागा ॥
गयउ दूरि घन गहन बराहू । जहँ नाहिन गज बाजि निबाहू ॥
अति अकेल बन बिपुल कलेसू । तदपि न मृग मग तजइ नरेसू ॥
कोल बिलोकि भूप बड़ धीरा । भागि पैठ गिरिगुहाँ गभीरा ॥
अगम देखि नृप अति पछिताई । फिरेउ महाबन परेउ भुलाई ॥

दो०—खेद खिन्न ह्रुद्धित तृषित राजा बाजि समेत ।

खोजत व्याकुल सरित सर जल बिनु भयउ अचेत ॥१५७॥

फिरत विपिन आश्रम एक देखा । तहँ बस नृपति कपट मुनि बेषा
जासु देस नृप लीन्ह छड़ाई । समर सेन तजि गयउ पराई ॥
समय प्रतापभानु कर जानी । आपन अति असमय अनुमानी ॥
गयउ न गृह मन बहुत गलानी । मिला न राजहि नृप अभिमानी ॥
रिस उर मारि रंक जिमि राजा । विपिन बसइ तापस केँ साजा ॥
तासु समीप गवन नृप कीन्हा । यह प्रतापैरवि तेहिँ तव चीन्हा ॥
राउ तृषित नहिँ सो पहिचाना । देखि सुबेय महामुनि जाना ॥
उतरि तुरग तेँ कीन्ह प्रनामा । परम चतुर न कहेउ निज नामा ॥

दो०—भूपति तृषित विलोकि तेहिँ सरवरु दीन्ह देखाइ ।

मज्जन पान समेत हय कीन्ह नृपति हरषाइ ॥१५८॥

गै श्रम सकल सुखी नृप भयउ । निज आश्रम तापस लै गयउ ॥
आसन दीन्ह अस्त रवि जानी । पुनि तापस बोलेउ मृदु बानी ॥
को तुम्ह कस बन फिरहु अकेलें । सुंदर जुवा जीव परहेलें ॥
चक्रवर्ति के लच्छन तोरें । देखत दया लागि अति मोरें ॥
नाम प्रतापभानु अवनीसा । तासु सचिव मै सुनहु मुनीसा ॥
फिरत अहेरें परेउँ भुलाई । बड़ें भाग देखेउँ पद आई ॥
हम कहँ दुर्लभ दरस तुम्हारा । जानत हौँ कछु भल होनिहारा ॥
कह मुनि तात भयउ अँधिआरा । जो जन सत्तरि नगरु तुम्हारा ॥

दो०—निसा घोर गंभीर बन पंथ न सुनहु सुजान ।

वसहु आजु अस जानि तुम्ह जाएहु होत बिहान ॥१५९(क)॥

तुलसी जसि भवतव्यता तैसी मिलइ सहाइ ।

आपुन आवइ ताहि पहिं ताहि तहाँ लै जाइ ॥१५९(ख)॥

भलेहिं नाथ आयसु धरि सीसा । बाँधि तुरग तरु बैठ महीसा ॥
 नृप बहु भाँति प्रसंसेउ ताही । चरन बंदि निज भाग्य सराही ॥
 पुनि बोलेउ मृदु गिरा सुहाई । जानि पिता प्रभु करउँ टिठाई ॥
 मोहि मुनीस सुत सेवक जानी । नाथ नाम निज कहहु बखानी ॥
 तेहि न जान नृप नृपहि सो जाना । भूप सुहृद सो कपट सयाना ॥
 बैरी पुनि छत्री पुनि राजा । छल बल कीन्ह चहइ निज काजा ॥
 समुझि राजसुख दुखित अराती । अवाँ अनल इव सुलगइ छाती ॥
 सरल बचन नृप के सुनि काना । बयर सँभारि हृदयँ हरषाना ॥

दो०—कपट बोरि बानी मृदुल बोलेउ जुगुति समेत ।

नाम हमार भिखारि अब निर्धन रहित निकेत ॥१६०॥

कह नृप जे बिग्यान निधाना । तुम्ह सारिखे गलित अभिमाना ॥
 सदा रहहिं अपनपौ दुराएँ । सब विधि कुसल कुबेप बनाएँ ॥
 तेहि तें कहहिं संत श्रुति टेरे । परम अकिंचन प्रिय हरि केरे ॥
 तुम्ह सम अधन भिखारि अगेहा । होत विरंचि सिवहि संदेहा ॥
 जोमि सोसितव चरन नमामी । सो पर कृपा करिअ अब स्वामी ॥
 सहज प्रीति भूपति कै देखी । आपु विषय विस्वास बिसेषी ॥
 सब प्रकार राजहि अपनाई । बोलेउ अधिक सनेह जनाई ॥
 सुनु मतिभाउ कहउँ महिपाला । इहाँ बसत बीते बहु काला ॥

दो०—अब लगि मोहि न मिलेउ कोउ मैं न जनावउँ काहु ।

लोकमान्यता अनल सम कर तप कानन दाहु ॥१६१(क)॥

सो०—तुलसी देखि सुबेषु भूलहिं मूढ़ न चतुर नर ।

सुंदर केकिहि पेलु बचन सुधा सम असन अहि ॥१६१(ख)॥

तातें गुप्त रहउँ जग माहीं । हरितजि किमपि प्रयोजन नाहीं ॥
प्रभु जानत सब बिनहि जनाएँ । कहहु कवनि सिधि लोक रिझाएँ ॥
तुम्ह सुचि सुमति परम प्रिय मोरें । प्रीति प्रतीति मोहि पर तोरें ॥
अब जौं त त दुरावउँ तोही । दारुन दोष घटइ अति मोही ॥
जिमि जिमि तापसु कथइ उदासा ॥ तिमि तिमि नृपहि उपज बिस्वासा
देखा स्वबस कर्म मन बानी । तब बोला तापस बगध्यानी ॥
नाम हमार एकतनु भाई । सुनि नृप बोलेउ पुनि सिरु नाई ॥
कहहु नाम कर अरथ बखानी । मोहि सेवक अति आपन जानी ॥

दो०—आदि सृष्टि उपजी जबहिं तब उतपति भै मोरि ।

नाम एकतनु हेतु तेहि देह न घरी बहोरि ॥१६२॥

जनि आचरजु करहु मन माहीं । सुत तप तें दुर्लभ कलु नाहीं ॥
तपबल तें जग सृजइ विधाता । तपबल बिष्नु भए परित्राता ॥
तपबल संभु करहिं संघारा । तप तें अगम न कलु संमारा ॥
भयउ नृपहि सुनि अति अनुरागा । कथा पुरातन कहै सो लागा ॥
करम धरम इतिहास अनेका । करइ निरूपन बिरति बिबेका ॥
उदभव पालन प्रलय कहानी । कहेसि अमित आचरज बखानी ॥
सुनि महीप तापस बस भयऊ । आपन नाम कहन तब लयऊ ॥
कह तापस नृप जानउँ तोही । कीन्हेहु कपट लाग भल मोही ॥

सो०—सुनु महीस असि नीति जहँ तहँ नाम न कहहिं नृप ।

मोहि तोहि पर अति प्रीति सोइ चतुरता बिचारि तब ॥१६३॥

नाम तुम्हार प्रताप दिनेसा । सत्यकेतु तव पिता नरेसा ॥
 गुर प्रसाद सब जानिअ राजा । कहिअ न आपन जानि अकाजा ॥
 देखि तात तव सहज सुधार्ई । प्रीति प्रतीति नीति निपुनार्ई ॥
 उपजि परी ममता मन मोरें । कहउँ कथा निज पृछे तोरें ॥
 अब प्रसन्न मैं संसय नाहीं । मागु जो भूप भाव मन माहीं ॥
 सुनि सुवचन भूपति हरषाना । गहि पद विनय कीन्ह विधि नाना
 कृपासिंधु मुनि दरसन तोरें । चारि पदारथ करतल मोरें ॥
 प्रभुहि तथापि प्रसन्न बिलोकी । मागि अगम बर होउँ असोकी ॥
 दो०—जरा मरन दुख रहित तनु समर जितै जनि कोउ ।

एकछत्र रिपुहीन महि राज कलप सत होउ ॥१६४॥

कह तापस नृप ऐसेउ होऊ । कारन एक कठिन सुनु सोऊ ॥
 कालउ तुअ पद नाइहि सीसा । एक बिप्रकुल छाड़ि महीसा ॥
 तपबल बिप्र सदा बरिआरा । तिन्ह के कोप न कोउ रखवारा ॥
 जौ बिप्रन्ह बस करहु नरेसा । तौ तुअ बस विधि बिष्नु महेसा ॥
 चल न ब्रह्मकुल सन वरिआई । सत्य कहउँ दोउ भुजा उठाई ॥
 बिप्र श्राप बिनु सुनु महिपाला । तोर नास नहिं कबनेहुँ काला ॥
 हरषेउ राउ वचन सुनि तासू । नाथ न होइ मोर अब नासू ॥
 तव प्रसाद प्रभु कृपानिधाना । मो कहूँ सर्व काल कल्याणा ॥

दो०—एवमस्तु कहि कपट मुनि बोला कुटिल बहोरि ।

मिलव हमार मुलाव निज कहहु त हमहि न खोरि ॥१६५॥

तातें मैं तोहि वरजउँ राजा । कहें कथा तव परम अकाजा ॥
 छठें श्रवन यह परत कहानी । नास तुम्हार सत्य भम बानी ॥

यह प्रगटें अथवा द्विजश्रापा । नास तोर सुनु भानुप्रतापा ॥
आन उपायँ निधन तव नाहीं । जौं हरि हर कोपहिं मन माहीं ॥
सत्य नाथ पद गहि नृप भाषा । द्विज गुर कोप कहहु को राखा ॥
राखइ गुर जौं कोप बिधाता । गुर विरोध नहिं कोउ जग त्राता ॥
जौं न चलब हम कहे तुम्हारें । होउ नास नहिं सोच हमारें ॥
एकहिं डर डरपत मन मोरा । प्रभु महिदेव श्राप अति घोरा ॥

दो०—होहिं विप्र बस कवन विधि कहहु कृपा करि सोउ ।

तुम्ह तजि दीनदयाल निज हितू न देखउँ कोउ ॥१६६॥

सुनु नृप बिबिध जतन जग माहीं । कष्ट साध्य पुनि होहिं कि नाहीं
अहइ एक अति सुगम उपाई । तहाँ परंतु एक कठिनाई ॥
मम आधीन जुगुति नृप सोई । मोर जाब तव नगर न होई ॥
आजु लगें अरु जब तें भयऊँ । काहू के गृह ग्राम न गयऊँ ॥
जौं न जाउँ तव होइ अकाजू । बना आइ असमंजस आजू ॥
सुनि महीस बोलेउ मृदु वानी । नाथ निगम असि नीति बखानी
बड़े सनेह लघुन्ह पर करहीं । गिरि निज सिरनि सदा तृन धरहीं
जलधि अगाध मौलि बह फेनू । संतत धरनि धरत सिर रेनू ॥

दो०—अस कहि गहे नरेस पद स्वामी होहु कृपाल ।

मोहि लागि दुख सहिअ प्रभु सज्जन दीनदयाल ॥१६७॥

जानि नृपहि आपन आधीना । बोला तापस कपट प्रवीना ॥
सत्य कहउँ भूपति सुनु तोही । जग नाहिन दुर्लभ कछु मोही ॥
अवसि काज मै करिहुँ तोरा । मन तन बचन भगत तैं मोरा ॥
जोग जुगुति तप मंत्र प्रभाऊ । फलइ तबहिं जब करिअ दुराऊ ॥

जौ नरेस मैं करौ रसोई । तुम्ह परसहु मोहि जान न कोई ॥
 अन्न सो जोइ जोइ भोजन करई । सोइ सोइ तव आयसु अनुसरई ॥
 पुनि तिन्ह के गृह जेवई जोऊ । तव बस होइ भूप सुनु सोऊ ॥
 जाइ उपाय रचहु नृप एहू । संवत भरि संकलप करेहू ॥

दो०—नित नूतन द्विज सहस सत बरेहु सहित परिवार ।

मैं तुम्हरे संकलप लगि दिनहिं करबि जेवनार ॥१६८॥

एहि विधि भूप कष्ट अति थोरें । होइहहिं सकल बिप्र बस तोरें ॥
 करिहहिं विप्र होम मख सेवा । तेहिं प्रसंग सहजेहिं बस देवा ॥
 और एक तोहि कहउँ लखाऊ । मैं एहिं बेष न आउब काऊ ॥
 तुम्हरे उपरोहित कहूँ राया । हरि आनब मैं करि निज माया ॥
 तपबल तेहि करि आपु समाना । रखिहउँ इहाँ बरष परवाना ॥
 मैं धरि तासु बेषु सुनु राजा । सब विधि तोर सँवारब काजा ॥
 गै निमि बहुत सयन अब कीजे । मोहि तोहि भूप भेंट दिन तीजे ॥
 मैं तपबल तोहि तुरग समेता । पहुँचैहउँ सोवतहि निकेता ॥

दो०—मैं आउब सोइ वेपु धरि पहिचानेहु तब मोहि ।

जब एकांत बोलाइ सब कथा सुनावौ तोहि ॥१६९॥

सयन कीन्ह नृप आयसु मानी । आसन जाइ बैठ छलग्यानी ॥
 श्रमित भूप निद्रा अति आई । सो किमि सोव सोच अधिकाई ॥
 कालकेतु निमिचर तहँ आवा । जेहिं सुकर होइ नृपहि भुलावा ॥
 परम मित्र तापस नृप केरा । जानइ सो अति कपट घनेरा ॥
 तेहि के सत सुत अरु दस भाई । खल अति अजय देव दुखदाई ॥
 प्रथमहिं भूप समर सब मारे । बिप्र संत सुर देखि दुखारे ॥

तेहिं खल पाछिल बयरु सँभारा । तापस नृप मिलि मंत्र बिचारा ॥
जेहिं रिपु छय सोइ रचेन्हि उपाऊ । भावी बस न जान कछु राऊ ॥

दो०—रिपु तेजसी अकेल अपि लघु करि गनिअ न ताहु ।

अजहुँ देत दुख रबि ससिहि सिर अवसेपित राहु ॥१७०॥

तापस नृप निज सखहि निहारी । हरषि मिलेउ उठि भयउ सुखारी
मित्रहि कहि सब कथा सुनाई । जातुधान बोला सुख पाई ॥
अब साधेउँ रिपु सुनहु नरेसा । जौं तुम्ह कीन्ह मोर उपदेसा ॥
परिहरि सोच रहहु तुम्ह सोई । बिनु औषध बिआधि बिधि खोई ॥
कुल समेत रिपु मूल बिहाई । चौथें दिवस मिलब मैं आई ॥
तापस नृपहि बहुत परितोषी । चला महाकपटी अतिरोषी ॥
भानुप्रतापहि बाजि समेता । पहुँचाएसि छन माझ निकेता ॥
नृपहि नारि पहिं सयन कराई । हयगृहँ बाँधेसि बाजि बनई ॥

दो०—राजा के उपरोहितहि हरि लै गयउ बहोरि ।

लै राखेसि गिरि खोह महुँ मायाँ करि मति भोरि ॥१७१॥

आपु बिरचि उपरोहित रूपा । परेउ जाइ तेहि सेज अनूपा ॥
जागेउ नृप अनभएँ बिहाना । देखि भवन अति अचरजु माना ॥
मुनि महिमा मन महुँ अनुमानी । उठेउ गवँहि जेहिं जान न रानी ॥
कानन गयउ बाजि चढ़ि तेहीं । पुर नर नारि न जानेउ केहीं ॥
गएँ जाम जुग भूपति आवा । घर घर उत्सव बाज बधावा ॥
उपरोहितहि देख जब राजा । चकित बिलोक सुमरि सोइ काजा
जुग सम नृपहि गए दिन तीनी । कपटी मुनि पद रह मति लीनी ॥
समय जानि उपरोहित आवा । नृपहि मते सब कहि समुझावा ॥

दो०—नृप हरषेउ पहिचानि गुरु भ्रम बस रहा न चेत ।

बरे तुरत सत सहस बर बिप्र कुटुंब समेत ॥१७२॥

उपरोहित जेवनार बनाई । छरस चारि बिधि जसि श्रुति गाई ॥
मायामय तेहि कीन्हि रसोई । बिंजन बहु गनि सकइ न कोई ॥
बिबिध मृगन्ह कर आमिष राँधा । तेहि महुँ बिप्र माँसु खल साँधा
भोजन कहुँ सब बिप्र बोलाए । पद पखारि सादर बैठाए ॥
परुसन जबहिँ लाग महिपाला । भै अकासबानी तेहि काला ॥
बिप्रबुंद उठि उठि गृह जाहू । है बड़ि हानि अनजनि खाहू ॥
भयउ रसोई भूसुर माँसू । सब द्विज उठे मानि बिस्वासू ॥
भूप विकल मति मोहँ भुलानी । भावी बस न आव मुख बानी ॥

दो०—बोले बिप्र सकोप तब नहिँ कछु कीन्ह विचार ।

जाइ निसाचर होहु नृप मूढ़ सहित परिवार ॥१७३॥

छत्रबंधु तैं बिप्र बोलाई । घालै लिए सहित समुदाई ॥
ईखर राखा धरम हमारा । जैहसि तैं समेत परिवारा ॥
संबत मध्य नास तब होऊ । जलदाता न रहिहि कुल कोऊ ॥
नृप सुनि श्राप विकल अति त्रासा । भै बहोरि बर गिरा अकासा ॥
बिप्रहु श्राप बिचारि न दीन्हा । नहिँ अपराध भूप कछु कीन्हा ॥
चकित बिप्र सब सुनि नभ बानी । भूप गयउ जहँ भोजन खानी ॥
तहँ न असन नहिँ बिप्र सुआरा । फिरेउ राउ मन सोच अपारा ॥
सब प्रसंग महिसुरन्ह सुनाई । त्रसित परेउ अवनीँ अकुलाई ॥

दो०—भूपति भावी मिटइ नहिँ जदपि न दूषन तोर ।

किँएँ अन्यथा होइ नहिँ बिप्रश्राप अति घोर ॥१७४॥

अस कहि सब महिदेव सिधाए । समाचार पुरलोगन्ह पाए ॥
 सोचहिं दूषन दैवहि देहीं । विरचत हंस काग किय जेहीं ॥
 उपरोहितहि भवन पहुँचाई । असुर तापसहि खबरि जनाई ॥
 तेहिं खल जहँ तहँ पत्र पठाए । सजि सजि सेन भूप सब धाए ॥
 घेरेन्हि नगर निसान बजाई । बिबिध भाँति नित होइलराई ॥
 जूझे सकल सुभट करि करनी । बंधु समेत परेउ नृप धरनी ॥
 सत्यकेतु कुल कोउ नहिं बाँचा । बिप्र थाप किमि होइ असाँचा ॥
 रिपुजिति सब नृप नगर बसाई । निज पुर गवने जय जसु पाई ॥

दो०—भरद्वाज सुनु जाहि जब होइ विधाता वाम ।

धूरि मेरुसम जनक जम ताहि व्याल सम दाम ॥१७५॥

काल पाइ मुनि सुनु सोइ राजा । भयउ निसाचर सहित समाजा ॥
 दस सिर ताहि बीस भुजदंडा । रावन नाम वीर बरिबंडा ॥
 भूप अनुज अरिमर्दन नामा । भयउ सो कुंभकरन बलधामा ॥
 सचिव जो रहा धरमरुचि जासू । भयउ विमात्र बंधु लघु तासू ॥
 नाम बिभीषन जेहि जग जाना । बिष्नुभगत बिग्यान निधाना ॥
 रहे जे सुत सेवक नृप केरे । भए निसाचर घोर घनेरे ॥
 कामरूप खल जिनस अनेका । कुटिल भयंकर बिगत बिबेका ॥
 कृपा रहित हिंसक सब पापी । बरनिन जाहिं बिख परितापी ॥

दो०—उपजे जदपि पुलस्त्यकुल पावन अमल अनूप ।

तदपि महीसुर थाप बस भए सकल अघ रूप ॥१७६॥

कीन्ह बिबिध तप तीनिहुँ भाई । परम उग्र नहि बरनि सो जाई ॥
 गयउ इनकट तप देखि विधाता । मागहु बर प्रसन्न में ताता ॥

करि बिनती पद गहि दससीसा । बोलेउ बचन सुनहु जगदीसा ॥
 हम काहू के मरहिं न मारें । बानर मनुज जाति दुइ बारें ॥
 एवमस्तु तुम्ह बड़ तप कीन्हा । मैं ब्रह्माँ मिलि तेहि बर दीन्हा ॥
 पुनि प्रभु कुंभकरन पहिं गयऊ । तेहि बिलोकि मन बिसमय भयऊ
 जौं एहिं खल नित करब अहारू । होइहि सब उजारि संसारू ॥
 सारद प्रेरि तासु मति फेरी । मागेसि नीद मास षट केरी ॥

दो०—गाए बिभीषन पास पुनि कहेउ पुत्र बर मागु ।

तेहि मागेउ भगवंत पद कमल अमल अनुरागु ॥१७७॥

तिन्हहि देइ बर ब्रह्म सिधाए । हरषित ते अपने गृह आए ॥
 मय तनुजा मंदोदरि नामा । परम सुंदरी नारि ललामा ॥
 सोइ मय दीन्हि रावनहि आनी । होइहि जातुधानपति जानी ॥
 हरषित भयउ नारि भलि पाई । पुनि दोउ बंधु चिआहेसि जाई ॥
 गिरि त्रिकूट एक सिंधु मझारी । विधि निर्मित दुर्गम अति भारी ॥
 सोइ मय दानवैं बहुरि सँवारा । कनकरचित मनि भवन अपारा ॥
 भोगावति जसि अहिकुल बासा । अमरावति जसि सक्र निवासा ॥
 तिन्ह ते अधिक रम्य अति बंका । जग बिख्यात नाम तेहिलंका ॥

दो०—खाई सिंधु गभौर अति चारिहुँ दिसि फिरि आव ।

कनक कोट मनि खचित दृढ़ बरनि न जाइ बनाव ॥१७८(क)॥

हरि प्रेरित जेहिं कल्प जोइ जातुधान पति होइ ।

सूर प्रतापी अतुलबल दल समेत बस सोइ ॥१७८(ख)॥

रहे तहाँ निसिचर भट भारे । ते सब सुरन्ह समर संधारे ॥
 अब तहँ रहहिं सक्र के प्रेरे । रच्छक कोटि जच्छपति केरे ॥

दसमुख कतहुँ खबरि असि पाई । सेन साजि गढ़ घेरेसि जाई ॥
देखि बिकट भट बड़ि कटकाई । जच्छ जीव लै गए पराई ॥
फिरि सब नगर दसानन देखा । गयउ सोच सुख भयउ विसेषा
सुंदर सहज अगम अनुमानी । कीन्हि तहाँ रावन रजधानी ॥
जेहि जस जोग बाँटि गृह दीन्हे । सुखी सकल रजनीचर कीन्हे ॥
एक बार कुबेर पर धावा । पुष्पक जान जीति लै आवा ॥

दो०—कौतुकहीं कैलास पुनि लीन्हेसि जाइ उठाइ ।

मनहुँ तौलि निज बाहुबल चला बहुत सुख पाइ ॥१७९॥

सुख संपति सुत सेन सहाई । जय प्रताप बल बुद्धि बड़ाई ॥
नित नूतन सब बाढ़त जाई । जिमि प्रति लाभ लोभ अधिकाई ॥
अतिबल कुंभकरन अस भ्राता । जेहि कहूँ नहिं प्रतिभट जग जाता
करइ पान सोवइ षट मासा । जागत हांइ तिहूँ पुर त्रासा ॥
जौं दिन प्रति अहार कर सोई । बिस्व बेगि सब चौपट होई ॥
समर धीर नहिं जाइ बखाना । तेहि सम अमित बीर बलवाना ॥
बारिदनाद जेठ सुत तासू । भट महुँ प्रथम लीक जग जासू ॥
जेहि न हांइरन सनमुख कोई । सुरपुर नितहिं परावन होई ॥

दो०—कुमुख अकंपन कुलिसरद धूमकेतु अतिकाय ।

एक एक जग जीति सक ऐसे सुभट निकाय ॥१८०॥

कामरूप जानहिं सब माया । सपनेहुँ जिन्ह के धरम न दाया ॥
दसमुख बैठ सभाँ एक बारा । देखि अमित आपन परिवारा ॥
सुत समूह जन परिजन नाती । गर्ने को पार निसाचर जाती ॥
सेन बिलोकि सहज अभिमानी । बोला बचन क्रोध मद सानी ॥

सुनहु सकल रजनीचरजूथा । हमरे बैरी बिबुध बरूथा ॥
 ते सनमुख नहिं करहिं लराई । देखि सबल रिपु जाहिं पराई ॥
 तेन्ह कर मरन एक बिधि होई । कहउँ बुझाई सुनहु अब सोई ॥
 द्विज भोजन मख होम सराधा । सब कै जाइ करहु तुम्ह बाधा ॥

दो०—छुधा छीन बलहीन सुर सहजेहिं मिलिहहिं आइ ।

तब मारिहउँ कि छाड़िहउँ भली भौंति अपनाइ ॥१८१॥

मेघनाद कहूँ पुनि हँकरावा । दीन्ही सिख बलु बयरु बढ़ावा ॥
 जे सुर समर धीर बलवाना । जिन्ह केंलरिबे कर अभिमाना ॥
 तिन्हहि जीति रन आनेसु बाँधी । उठि सुत पितु अनुसासन काँधी
 एहि बिधि सबहीं अग्या दीन्ही । आपुनु चलेउ गदा कर लीन्ही ॥
 चलत दसानन डोलति अवनी । गर्जत गर्भ स्रवहिं सुर रवनी ॥
 रावन आवत सुनेउ सकोहा । देवन्ह तके मेरु गिरि खोहा ॥
 दिगपालन्ह के लोक सुहाए । सूने सकल दसानन पाए ॥
 पुनि पुनि सिंघनाद करि भारी । देइ देवतन्ह गारि पचारी ॥
 रन मद मत्त फिरइ जग धावा । प्रतिभट खोजत कतहुँ न पावा ॥
 रबि ससि पवन बरूँन धनधारी । अगिनि काल जम सब अधिकारी
 किंनर सिद्ध मनुज सुर नागा । हठि सबही के पंथहिं लागा ॥
 ब्रह्मसृष्टि जहँ लगि तनुधारी । दसमुख बसवर्ती नर नारी ॥
 आयसु करहिं सकल भयभीता । नवहिं आइ नित चरन विनीता ॥

दो०—भुजबल बिस्व बस्य करि राखेसि कोउ न सुतंत्र ।

मंडलीक मनि रावन राज करइ निज मंत्र ॥१८२(क)॥

देव जच्छ गंधर्व नर किंनर नाग कुमारि ।

जीति बरीं निज बाहुबल बहु सुंदर बर नारि ॥१८२(ख)॥

इंद्रजीत सन जो कल्लु कहेऊ । सो सब जनु पहिलेहिं करि रहेऊ ॥
प्रथमहिं जिन्ह कहूँ आयसु दीन्हा । तिन्ह कर चरित सुनहु जो कीन्हा
देखत भीमरूप सब पापी । निसिचर निकर देव परितापी ॥
करहिं उपद्रव असुर निकाया । नाना रूप धरहिं करि माया ॥
जेहि बिधि हाइ धर्म निर्मूला । सो सब करहिं बेद प्रतिकूला ॥
जेहिं जेहिं देस धेनु द्विज पावहिं । नगर गाउँ पुर आगि लगावहिं
सुभ आचरन कतहुँ नहिं होई । देव बिप्र गुरु मान न कोई ॥
नहिं हरिभगति जग्य तप दाना । सपनेहुँ सुनिअ न बेद पुराना ॥

छं०—जप जोग विरागा तप मखं भागा श्रवन सुनइ दससीसा ।

आपुन उठि धावइ रहै न पावइ धरि सब घालइ खीसा ॥

अस अष्ट अचारा भा संसारा धर्म सुनिअ नहिं काना ।

तेहि बहुविधि त्रासइ देस निकासइ जो कह बेद पुराना ॥

सो०—बरनि न जाइ अनीति घोर निसाचर जो करहिं ।

हिंसा पर अति ग्रीति तिन्ह के पापहि कवनि मिति ॥१८३॥

मासपारायण, छठा विश्राम

बाढ़े खल बहु चोर जुआरा । जे लंपट परधन परदारा ॥
मानहिं मातु पिता नहिं देवा । साधुन्ह सन करवावहिं सेवा ॥
जिन्ह के यह आचरन भवानी । ते जानेहु निसिचर सब प्रानी ॥
अतिसय देखि धर्म कै ग्लानी । परम समीत धरा अकूलानी ॥
गिरि सरि सिंधु भार नहिं मोही । जस मोहि गरुअ एक परद्रोही ॥

सकल धर्म देखइ बिपरीता । कहि न सकइ रावन भय भीता ॥
 धेनु रूप धरि हृदयँ बिचारी । गई तहाँ जहँ सुर मुनि झारी ॥
 निज संताप सुनाएसि रोई । काहू तें कछु काज न होई ॥

छं०—सुर मुनि गंधर्वा मिलि करि सर्वा गे विरंचि के लोका ।
 सँग गो तनुधारी भूमि बिचारी परम बिकल भय सोका ॥
 ब्रह्मँ सब जाना मन अनुमाना मोर कछु न बसाई ।
 जा करि तैं दासी सो अविनासी हमरेउ तोर सहाई ॥

सो०—धरनि धरहि मन धीर कह विरंचि हरिपद सुमिरु ।
 जानत जन की पीर प्रभु भंजिहि दारुन विपति ॥१८४॥

बैठे सुर सब करहिं बिचारा । कहँ पाइअ प्रभु करिअ पुकारा ॥
 पुर बैकुंठ जान कह कोई । कोउ कह पयनिधि बस प्रभु सोई
 जाके हृदयँ भगति जसि प्रीती । प्रभु तहँ प्रगट सदा तेहिं रीती ॥
 तेहिं समाज गिरिजा मैं रहेऊँ । अवसर पाइ बचन एक कहेऊँ ॥
 हरि व्यासक सर्वत्र समाना । प्रेम तें प्रगट होहिं मैं जाना ॥
 देस काल दिसि विदिसिहु माहीं । कहहु सो कहाँ जहाँ प्रभु नाहीं ॥
 अग जगमय सवरैहित विरागी । प्रेम तें प्रभु प्रगटइ जिमि आगी ॥
 मोर बचन सब के मन माना । साधु साधु करि ब्रह्म बखाना ॥

दो०—सुनि विरंचि मन हरप तन पुलकि नयन ब्रह्म नीर ।

अस्तुति करत जोरि कर सावधान मतिधीर ॥१८५॥

छं०—जय जय सुरनायक जन सुखदायक प्रनतपाल भगवंता ।

गो द्विज हितकारी जय असुरारी सिंधुमुता प्रिय कंता ॥

पालन सुर धरनी अद्भुत करनी मरम न जानइ कोई ।
जो सहज कृपाला दीनदयाला करउ अनुग्रह सोई ॥
जय जय अविनासी सब घट वासी व्यापक परमानंदा ।
अविगत गोतीतं चरित पुनीतं मायारहित मुकुंदा ॥
जैहि लागि बिरागी अति अनुरागी बिगतमोह मुनिबुंदा ।
निसि बासर ध्यावहिं गुनगन गावहिं जयति सच्चिदानंदा ॥
जैहिं सृष्टि उपाई त्रिविध बनाई संग सहाय न दूजा ।
सो करउ अघारी चित हमारी जानिअ भगति न पूजा ॥
जो भव भय भंजन मुनि मन रंजन गंजन विपति बरूथा ।
मन बच क्रम बानी छाड़ि सयानी सरन सकल सुरजूथा ॥
सारद श्रुति सेवा रिषय असेपा जा कहूँ कोउ नहिं जाना ।
जैहि दीन पिआरे बेद पुकारे द्रवउ सो श्रीभगवाना ॥
भव वारिधि मंदर सब विधि सुंदर गुनमंदिर सुखपुंजा ।
मुनि सिद्ध सकल सुर परम भयातुर नमत नाथपद कंजा ॥
दो०—जानि सभय सुर भूमि सुनि बचन समेत सनेह ।

गगनगिरा गंभीर भइ हरनि सोक संदेह ॥१८६॥
जनि डरपहु मुनि सिद्ध सुरेसा । तुम्हहि लागि धरिहउँ नर बेसा ॥
अंसन्ह सहित मनुज अवतारा । लेहउँ दिनकर बंस उदारा ॥
कस्यप अदिति महातप कीन्हा । तिन्ह कहूँ मैं पूरब वर दीन्हा ॥
ते दसरथ कौसल्या रूपा । कोसलपुगीं प्रगट नरभूपा ॥
तिन्ह कैं गृह अवतरिहउँ जाई । रघुकुल तिलक सो चारिउ भाई ॥
नारद बचन सत्य सब करिहउँ । परम सक्ति समेत अवतरिहउँ ॥
हरिहउँ सकल भूमि गरुआई । निर्भय होहु देव समुदाई ॥

गगन ब्रह्मबानी सुनि काना । तुरत फिरे सुर हृदय जुड़ाना ॥
तब ब्रह्माँ धरनिहि समुझावा । अभय भई भरोस जियँ आवा ॥

दो०—निज लोकहि बिरंचि गे देवन्ह इहइ सिखाइ ।

वानर तनु धरि धरि महि हरि पद सेवहु जाइ ॥१८७॥

गए देव सब निज निज धामा । भूमि सहित मन कहँ विश्रामा ॥
जो कछु आयसु ब्रह्माँ दीन्हा । हरषे देव बिलंब न कीन्हा ॥
बनचर देह धरी छिति माहीं । अतुलित बल प्रताप तिन्ह पाहीं ॥
गिरि तरुनख आयुध सब बीरा । हरि मारग चितवहिं मतिधीरा ॥
गिरि कानन जहँ तहँ भरि पूरी । रहे निज निज अनीकरचिरूरी ॥
यह सब रुचिर चरित मैं भाषा । अब सो सुनहु जो बीचहिं राखा ॥
अवधपुरीं रघुकुलमनि राऊ । बेद बिदित तेहि दसरथ नाऊँ ॥
धरम धुरंधर गुननिधि ग्यानी । हृदयँ भगति मति सारँगपानी ॥

दो०—कौसल्यादि नारि प्रिय सब आचरन पुनीत ।

पति अनुकूल प्रेम दद हरि पद कमल विनीत ॥१८८॥

एक बार भूपति मन माहीं । मै गलानि मोरें सुत नाहीं ॥
गुर गृह गयउ तुरत महिपाला । चरन लागि करि विनय विसाला
निज दुख सुख सब गुरहि सुनायउ। कहि बसिष्ठ बहु बिधि समुझायउ
धरहु धीर होइहहिं सुत चारी । त्रिभुवन बिदित भगत भय हारी ॥
सृंगी रिपिहि बसिष्ठ बोलावा । पुत्रकाम सुभ जग्य करावा ॥
भगति सहित मुनि आहुति दीन्हें । प्रगटे अग्नि चरू करलीन्हें ॥
जो बसिष्ठ कछु हृदयँ बिचारा । सकल काजु भा सिद्ध तुम्हारा ॥
यह हबि बाँटि देहु नृप जाई । जथा जोग जेहि भाग बनाई ॥

दो०—तब अहस्य भए पावक सकल सभहि समुझाइ ।

परमानंद मगन नृप हरष न हृदयँ समाइ ॥१८९॥

तबहिं रायँ प्रिय नारि बोलाई । कौसल्यादि तहाँ चलि आई ॥
अर्ध भाग कौसल्यहि दीन्हा । उभय भाग आघे कर कीन्हा ॥
कैकई कहँ नृप सो दयऊ । रह्यो सो उभय भाग पुनि भयऊ ॥
कौसल्या कैकई हाथ धरि । दीन्ह सुमित्रहि मन प्रसन्न करि ॥
एहि बिधि गर्भ सहित सब नारी । भई हृदयँ हरषित सुख भारी ॥
जा दिन तें हरि गर्भहिं आए । सकल लोक सुख संपति छाप ॥
मंदिर महँ सब राजहिं रानीं । सोभा सील तेज की खानीं ॥
सुख जुत कलुककाल चलि गयऊ । जेहिं प्रभु प्रगट सो अवसर भयऊ

दो०—जोग लगन ग्रह वार तिथि सकल भए अनुकूल ।

चर अरु अचर हर्षजुत राम जनम सुखमूल ॥१९०॥

नौमी तिथि मधु मास पुनीता । सुकल पच्छ अभिजित हरि प्रीता ॥
मध्य दिवस अति सीत न घामा । पावन काल लोक विश्रामा ॥
सीतल मंद सुरभि बह बाऊ । हरषित सुर संतन मन चाऊ ॥
बन कुसुमित गिरिगन मनिआरा । सबहिं सकल सरिताऽमृतधारा
सो अघसर बिरंचि जब जाना । चले सकल सुर साजि बिमाना ॥
गगन बिमल संकुल सुर जूथा । गावहिं गुन गंधर्व बरूथा ॥
बरषहिं सुमन सुअंजुलि साजी । गहगहि गगन दुंदुभी बाजी ॥
अस्तुति करहिं नाग मुनि देवा । बहु बिधि लावहिं निज निज सेवा

दो०—सुर समूह विनती करि पहुँचे निज निज धाम ।

जगनिवास प्रभु प्रगटे अखिल लोक विश्राम ॥१९१॥

छं०—भए प्रगट कृपाला दीनदयाला कौसल्या हितकारी ।
 हरषित महतारी मुनि मन हारी अद्भुत रूप बिचारी ॥
 लोचन अभिरामा तनु घनस्यामा निज आयुध भुज चारी ।
 भूषन वनमाला नयन विसाला सोभासिंधु खरारो ॥
 कह दुइ कर जोरी अस्तुति तोरी केहि विधि करौ अनंता ।
 माया गुन ग्यानातीत अमाना वेद पुरान भनंता ॥
 करुना सुख सागर सब गुन आगर जेहि गावहिं श्रुति संता ।
 सो मम हित लागी जन अनुरागी भयउ प्रगट श्रीकंता ॥
 ब्रह्मांड निकाया निर्मित माया रोम रोम प्रति बेद कहै ।
 मम उर सो वासी यह उपहासी सुनत धीर मति थिर न रहै ॥
 उपजा जब ग्याना प्रभु मुसुकाना चरित बहुत विधि कीन्ह चहै
 कहि कथा सुहाई मातु बुझाई जेहि प्रकार सुत प्रेम लहै ॥
 माता पुनि बोली सो मति डोली तजहु तात यह रूपा ।
 कीजै सिसुलीला अति प्रियसीला यह सुख परम अनूपा ॥
 सुनि बचन सुजाना रोदन ठाना होइ बालक सुरभूपा ।
 यह चरित जे गावहिं हरि पद पावहिं ते न परहिं भवकूपा ॥

दो०—विप्र धेनु झुर संत हित लीन्ह मनुज अवतार ।

निज इच्छा निर्मित तनु माया गुन गोपार ॥१९२॥

सुनि सिसु रुदन परम प्रिय बानी । संभ्रम चलि आई सब रानी ॥
 हरषित जहँ तहँ धाई दासी । आनंद मगन सकल पुरबासी ॥
 दसरथ पुत्रजन्म सुनि काना । मानहुँ ब्रह्मानंद समाना ॥
 परम प्रेम मन पुलक सरीरा । चाहत उठन करत मति धीरा ॥
 जाकर नाम सुनत सुभ होई । मोरें गृह आवा प्रभु सोई ॥

परमानंद पूरि मन राजा । कहा बोलाइ बजावहु बाजा ॥
गुर बसिष्ठ कहँ गयउ हँकारा । आए द्विजन सहित नृप द्वारा ॥
अनुपम बालक देखेन्हि जाई । रूप रासि गुन कहि न सिराई ॥

दो०—नंदीमुख सराध करि जातकरम सब कीन्ह ।

हाटक धेनु बसन मनि नृप बिप्रन्ह कहँ दीन्ह ॥१९३॥

ध्वज पताक तोरन पुर छावा । कहि न जाइ जेहि भाँति बनावा ॥
सुमनवृष्टि अकास तें होई । ब्रह्मानंद मगन सब लोई ॥
बृंद बृंद मिलि चलीं लोगाई । सहज सिंगार किएँ उठि धाई ॥
कनक कलस मंगल भरि थारा । गावत पैठहिं भूप दुआरा ॥
करि आरति नेवछावरि करहीं । बार बार सिसु चरनन्हि परहीं ॥
मागध सूत बंदिगन गायक । पावन गुन गावहिं रघुनायक ॥
सर्वस दान दीन्ह सब काहू । जेहिं पावा राखा नहिं ताहू ॥
मृगमद चंदन कुंकुम कीचा । मची सकल बीथिन्ह बिचबीचा ॥
दो०—गृह गृह बाज बधाव सुभ प्रगटे सुषमा कंद ।

हरषवंत सब जहँ तहँ नगर नारि नर बृंद ॥१९४॥

कैकयसुता सुमित्रा दोऊ । सुंदर सुत जनमत भैं ओऊ ॥
बह सुख संपति समय समाजा । कहि न सकइ सारद अहिगजा ॥
अवधपुरी सोहइ एहि भाँती । प्रभुहि मिलन आई जनु राती ॥
देखि भानु जनु मन सकुचानी । तदपि बनी संघ्या अनुमानी ॥
अगर धूप बहु जनु अँधिआरी । उड़इ अबीर मनहुँ अरुनारी ॥
मंदिर मनि समूह जनु तारा । नृप गृह कलस सोइंदु उदारा ॥
भवन बेद धुनि अति मृदु बानी । जनु खग मुखर समयँ जनु सानी ॥

कौतुक देखि पतंग भुलाना । एक मास तेई जात न जाना ॥

दो०—मास दिवस कर दिवस भा मरम न जानइ कोइ ।

रथ समेत रवि थाकेउ निसा कवन बिधि होइ ॥१९५॥

यह रहस्य काहूँ नहिं जाना । दिनमनि चले करत गुन गाना ॥
देखि महोत्सव सुर मुनि नागा । चले भवन बरनत निज भागा ॥
औरउ एक कहउँ निज चोरी । सुनु गिरिजा अति दृढ़ मति तोरी
काकभुसुंड़ि संग हम दोऊ । मनुजरूप जानइ नहिं कोऊ ॥
परमानंद प्रेमसुख फूले । बीथिन्ह फिरहिं मगन मन भूले ॥
यह सुभ चरित जान पै सोई । कृपा राम कै जापर होई ॥
तेहि अवसर जो जेहि बिधि आवा । दीन्ह भूप जो जेहि मन भावा
गज रथ तुरग हम गो हीरा । दीन्हे नृप नानाबिधि चीरा ॥

दो०—मन संतोष सबन्हि के जहँ तहँ देहिं असीस ।

सकल तनय चिर जीवहुँ तुलसिदास के ईस ॥१९६॥

कलुक दिवस बीते एहि भाँती । जात न जानिअ दिन अरु राती ॥
नामकरन कर अँवसरु जानी । भूप बोलि पठए मुनि ग्यानी ॥
करि पूजा भूपति अस भाषा । धरिअ नाम जो मुनि गुनि राखा ॥
इन्ह के नाम अनेक अनूपा । मै नृप कहब स्वमति अनुरूपा ॥
जो आनंद सिंधु सुखरासी । सीकर तें त्रैलोक सुपासी ॥
सो सुख धाम राम अस नामा । अखिल लोक दायक विश्रामा ॥
बिख भरन पोषन कर जोई । ताकर नाम भरत अस होई ॥
जाके सुमिरन तें रिपु नासा । नाम सशुहन बेद प्रकासा ॥

दो०—लच्छन धाम राम प्रिय सकल जगत आधार ।

गुरु बसिष्ट तेहि राखा लछिमन नाम उदार ॥१९७॥

धरे नाम गुर हृदयँ बिचारी । बेद तत्व नृप तव सुत चारी ॥
 मुनि धन जन सरबस सिव प्राणा । बालकेलि रस तेहिँ सुख माना ॥
 बारैहि ते निज हित पति जानी । लछिमन राम चरन रति मानी ॥
 भरत सत्रुहन दूनउ भाई । प्रभु सेवक जसि प्रीति बड़ाई ॥
 स्याम गौर सुंदर दोउ जोरी । निरखाहिँ छवि जननीँ तन तोरी ॥
 चारिउ सील रूप गुन धामा । तदपि अधिक सुखसागर रामा ॥
 हृदयँ अनुग्रह इंदु प्रकासा । सूचन किरन मनोहर हासा ॥
 कबहुँ उलंग कबहुँ बर पलना । मातु दुलारइ कहि प्रिय ललना ॥

दो०—व्यापक ब्रह्म निरंजन निर्गुन विगत विनोद ।

सो अज प्रेम भगति बस कौसल्या कें गोद ॥१९८॥

काम कोटि छवि स्याम सरीरा । नील कंज बारिद गंभीरा ॥
 अरुन चरन पंकज नख जोती । कमल दलन्हि बैठे जनु मोती ॥
 रेख कुलिस ध्वज अंकुस सोहे । नूपुर धुनि सुनि मुनि मन मोहे ॥
 कटि किंकिनी उदर त्रय रेखा । नाभि गभीर जान जेहिँ देखा ॥
 भुज बिसाल भूषन जुत भूरी । हियँ हरि नख अति सोभारूरी ॥
 उर मनिहार पदिक की सोभा । बिप्र चरन देखत मन लोभा ॥
 कंबु कंठ अति चिबुक सुहाई । आनन अमित मदन छवि छाई ॥
 दुइ दुइ दसन अधर अरुनारे । नासा तिलक को बरनै पारे ॥
 सुंदर श्रवन सुचारु कपोला । अति प्रिय मधुर तोतरे बोला ॥
 चिकन कच कुंचित गभुआरे । बहु प्रकार रचि मातु सँवारे ॥

पीत झगुलिआ तनु पहिराई । जानु पानि बिचरनि मोहि भाई ॥
रूप सकहिं नहिं कहि श्रुति सेषा । सो जानइ सपनेहुँ जेहिं देखा ॥

दो०—सुख संदोह मोहपर ग्यान गिरा गोतीत ।

दंपति परम प्रेम बस कर सिमुचरित पुनीत ॥१९९॥

एहि बिधि राम जगत पितु माता । कोसलपुर वासिन्ह सुखदाता ॥
जिन्ह रघुनाथ चरन रति मानी । निन्ह की यह गति प्रगट भवानी
रघुपति विमुख जतन कर कोगी । कवन सकइ भव बंधन छोरी ॥
जीव चराचर बस कै राखे । सो माया प्रभु सों भय भाखे ॥
भृकुटि बिलास नचावइ ताही । अस प्रभु छाड़ि भजिअ कहु काही
मन क्रम बचन छाड़ि चतुराई । भजत कृपा करिहहिं रघुराई ॥
एहि बिधि सिमु बिनोद प्रभु कीन्हा ॥ सकल नगर वासिन्ह सुख दीन्हा
लै उछंग कवहुँक हलरावै । कवहुँ पालने घालि झुलावै ॥

दो०—प्रेम मगन कौसल्या निसि दिन जात न जान ।

सुत सनेह बस माता बालचरित कर गान ॥२००॥

एक बार जननीं अन्हवाए । करि सिंगार पलनाँ पौढ़ाए ॥
निज कुल इष्टदेव भगवाना । पूजा हेतु कीन्ह अस्नाना ॥
करि पूजा नैवेद्य चढ़ावा । आपु गई जहँ पाक बनावा ॥
बहुरि मातु तहवाँ चलि आई । भोजन करत देख सुत जाई ॥
गै जननी सिमु पहिं भयभीता । देखा बाल तहाँ पुनि सूता ॥
बहुरि आई देखा सुत सोई । हृदयँ कंप मन धीर न होई ॥
इहाँ उहाँ दुइ बालक देखा । मति भ्रम मोर कि आन बिसेषा ॥
देखि राम जननी अकुलानी । प्रभु हँसि दीन्ह मधुर मुसुकानी ॥

दो०—देखरावा मातहि निज अद्भुत रूप अखंड ।

रोम रोम प्रति लागे कोटि कोटि ब्रह्मंड ॥२०१॥

अगनित रबिससि सिव चतुरानन । बहु गिरि सरित सिंधु महि कानन
काल कर्म गुन ग्यान सुभाऊ । सोउ देखा जो सुना न काऊ ॥
देखी माया सब बिधि गाढ़ी । अति सभित जोरें कर ठाढ़ी ॥
देखा जीव नचावइ जाही । देखी भगति जो छोगइ ताही ॥
तन पुलकित मुख बचन न आवा । नयन मूदि चरननि सिरु नावा
बिसमयवंत देखि महतारी । भए बहुरि मिसुरूप खरारी ॥
अस्तुति करि न जाइ भय माना । जगत पिता मैं सुत करि जाना ॥
हरि जननी बहुबिधि समुझाई । यह जनि कतहुँ कहसि सुनु माई ॥
दो०—बार बार कौसल्या विनय करइ कर जोरि ।

अब जनि कवहूँ व्यापै प्रभु मोहि माया तोरि ॥२०२॥

बालचरित हरि बहुबिधि कीन्हा । अति अनंद दासन्ह कहँ दीन्हा ॥
कलुक काल बीतें सब भाई । बड़े भए परिजन सुखदाई ॥
चूड़ाकरन कीन्ह गुरु जाई । बिप्रन्ह पुनि दछिना बहु पाई ॥
परम मनोहर चरित अपारा । करत फिरत चारिउ सुकुमारा ॥
मन क्रम बचन अगोचर जोई । दसरथ अजिर बिचर प्रभु सोई ॥
भोजन करत बोल जब राजा । नहि आवत तजि बाल समाजा ॥
कौसल्या जब बोलन जाई । ठुमुकु ठुमुकु प्रभु चलहिं पराई ॥
निगमनेति सिव अंत न पावा । ताहि धरै जननी हठि धावा ॥
धूसर धूरि भरें तनु आए । भूपति बिहसि गोद बैठाए ॥

दो०—भोजन करत चपल चित इत उत अवसरु पाइ ।

भाजि चले किलकत मुख दधि ओदन लपटाइ ॥२०३॥

बालचरित अति सरल सुहाए । सारद सेष संभ्रु श्रुति गाए ॥
जिन्ह कर मन इन्ह सन नहिं राता । ते जन बंचित किए बिधाता ॥
भए कुमार जबहिं सब भ्राता । दीन्ह जनेऊ गुरु पितु माता ॥
गुरगृहँ गए पढ़न रघुराई । अल्प काल बिद्या सब आई ॥
जाकी सहज स्वास श्रुति चारी । सो हरि पढ़ यह कौतुक भारी ॥
बिद्या बिनय निपुन गुन सीला । खेलहिं खेल सकल नृपलीला ॥
करतल बान धनुष अति मोहा । देखत रूप चराचर मोहा ॥
जिन्ह बोधिन्ह बिहरहिं सब भाई । थकित होहिं सब लोग लुगाई ॥

दो०—कोसलपुर बासी नर नारि बृद्ध अरु बाल ।

ग्रानहु ते प्रिय लागत सब कहूँ राम कृपाल ॥२०४॥

बंधु सखा सँग लेहिं बोलाई । बन मृगया नित खेलहिं जाई ॥
पावन मृग मारहिं जियँ जानी । दिन प्रति नृपहिं देखावहिं आनी
जे मृग राम बान के मारे । ते तनु तजि सुरलोक सिधारे ॥
अनुज सखा सँग भोजन करहीं । मातु पिता अग्या अनुसरहीं ॥
जेहि बिधि सुखी होंहिं पुरलोगा । करहिं कृपानिधि सोइ संजोगा ॥
बेद पुरान सुनहिं मन लाई । आपु कहहिं अनुजन्ह समुझाई ॥
प्रातकाल उठि कै रघुनाथा । मातु पिता गुर नावहिं माथा ॥
आयसु मागि करहिं पुर काजा । देखि चरित हरषइ मन राजा ॥

दो०—व्यापक अकल अनीह अज निर्गुन नाम न रूप ।

भगत हेतु नाना बिधि करत चरित्र अनूप ॥२०५॥

यह सब चरित कहा मैं गाई । आगिलि कथा सुनहु मन लाई ॥
 बिस्वामित्र महामुनि ग्यानी । बसहिं बिपिन सुभ आश्रम जानी ॥
 जहँ जप जग्य जोग मुनि करहीं । अति मारीच सुबाहुहि डरहीं ॥
 देखत जग्य निसाचर धावहिं । करहिं उपद्रव् मुनि दुख पावहिं ॥
 गाधितनय मन चिंता व्यापी । हरि बिनु मरहिं न निसिचर पापी ॥
 तब मुनिबर मन कीन्ह बिचारा । प्रभु अवतरेउ हरन महि भारा ॥
 एहँ मिस देखौ पद जाई । करि बिनती आनौ दोउ भाई ॥
 ग्यान बिराग सकल गुन अयना । सो प्रभु मैं देखब भरि नयना ॥

दो०—बहु विधि करत मनोरथ जात लागि नहिं बार ।

करि मज्जन सरज जल गए भूप दरवार ॥२०६॥

मुनि आगमन सुना जब राजा । मिलन गयउ लै बिप्र समाजा ॥
 करि दंडवत मुनिहि सनमानी । निज आसन बैठारेन्हि आनी ॥
 चरन पखारि कीन्हि अति पूजा । मो सम आजु धन्य नहिं दूजा ॥
 विविध भाँति भोजन करवावा । मुनिबर हृदयँ हरष अति पावा ॥
 पुनि चरननि मेले सुत चारी । राम देखि मुनि देह बिसारी ॥
 भए मगन देखत मुख सोभा । जनु चकोर पूरन ससि लोभा ॥
 तब मन हरषि बचन कह राऊ । मुनि अस कृपा न कीन्हिहु काऊ ॥
 केहि कारन आगमन तुम्हारा । कहहु सो करत न लावउँ बारा ॥
 असुर समूह सतावहिं मोही । मैं जाचन आयउँ नृप तोही ॥
 अनुज समेत देहु रघुनाथा । निसिचर बध मैं होब सनाथा ॥

दो०—देहु भूप मन हरषित तजहु मोह अग्यान ।

धर्म सुजस प्रभु तुम्ह कौ इन्ह कहँ अति कल्याण ॥२०७॥

सुनि राजा अति अप्रिय बानी । हृदय कंप मुख दुति कुमुलानी ॥
 चौथेंपन पायउँ सुत चारी । विप्र बचन नहिं कहेहु बिचारी ॥
 मागहु भूमि धेनु धन कोसा । सर्वस देउँ आजु सहरोसा ॥
 देह प्रान तेँ प्रिय कलु नाहीं । सोउ मुनि देउँ निमिष एक माहीं
 सब सुत प्रिय मोहि प्रान कि नाई । राम देत नहिं बनइ गोसाईं ॥
 कहँ निसिचर अति घोर कठोरा । कहँ सुंदर सुत परम किसोरा ॥
 सुनि नृप गिरा ग्रेम रस सानी । हृदयँ हरष माना मुनि ग्यानी ॥
 तव वसिष्ठ बहुविधि समुझावा । नृप संदेह नास कहँ पावा ॥
 अति आदर दोउ तनय बोलाए । हृदयँ लाइ बहु भौँति सिखाए ॥
 मेरे प्रान नाथ सुत दोऊ । तुम्ह मुनि पिता आन नहिं कोऊ

दो०—सौँपे भूप रिषिहि सुत बहुविधि देइ असीस ।

जननी भवन गए प्रभु चले नाइ पद सीस ॥२०८(क)॥

सो०—पुरुषसिंह दोउ बीर हरषि चले मुनि भय हरन ।

कृपासिंधु मतिधीर अखिल बिस्व कारन करन ॥२०८(ख)॥

अरुन नयन उर बाहु बिसाला । नील जलज तनु स्याम तमाला ॥
 कटि पट पीत कसेँ बर भाथा । रुचिर चाप सायक दुहुँ हाथा ॥
 स्याम गौर सुंदर दोउ भाई । बिस्वामित्र महानिधि पाई ॥
 प्रभु ब्रह्मन्य देव मैं जाना । मोहि निति पिता तजेउ भगवाना
 चले जात मुनि दीन्हि देखाई । सुनि ताड़का क्रोध करि धाई ॥
 एकहिं बान प्रान हरि लीन्हा । दीन जानि तेहि निज पद दीन्हा
 तब रिषि निज नाथहि जियँ चीन्ही । बिद्यानिधि कहँ बिद्या दीन्ही
 जाते लाग त छुधा पिपासा । अतुलित बल तनु तेज प्रकासा ॥

दो०—आयुध सर्व समर्पि कै प्रभु निज आश्रम आनि ।

कंद मूल फल भोजन दीन्ह भगति हित जानि ॥२०९॥

प्रात कहा मुनि सन रघुराई । निर्भय जग्य करहु तुम्ह जाई ॥
होम करन लागे मुनि झारी । आपु रहे मख कीं रखवारी ॥
सुनि मारीच निसाचर क्रोही । लै सहाय धावा मुनिद्रोही ॥
बिनु फर बान राम तेहि मारा । सत जोजन गा सागर पारा ॥
पावक सर सुबाहु पुनि मारा । अनुज निसाचर कटकु सँधारा ॥
मारि असुर द्विज निर्भयकारी । अस्तुति करहि देव मुनि झारी ॥
तहँ पुनि कलुक दिवस रघुराया । रहे कीन्हि बिप्रन्ह पर दाया ॥
भगति हेतु बहु कथा पुराना । कहे बिप्र जद्यपि प्रभु जाना ॥
तब मुनि सादर कहा बुझाई । चरित एक प्रभु देखिअ जाई ॥
धनुषजग्य सुनि रघुकुल नाथा । हरषि चले मुनिवर के साथ ॥
आश्रम एक दीख मग माहीं । खग मृग जीव जंतु तहँ नाहीं ॥
पूछा मुनिहि सिला प्रभु देखी । सकल कथा मुनि कहा बिसेषी ॥

दो०—गौतम नारि श्राप बस उपल देह धरि धीर ।

चरन कमल रज चाहति कृपा करहु रघुवीर ॥२१०॥

छं०—परसत पद पावन सोक नसावन प्रगट भई तपपुंज सही ।

देखत रघुनायक जनसुखदायक सनमुख होइ कर जोरि रही ॥

अति प्रेम अधीरा पुलक सरीरा मुख नहिं आवइ बचन कही ।

अतिसय बड़भागी चरनन्हि लागी जुगल नयन जलधार बही ॥

धीरजु मन कीन्हा प्रभु कहूँ चीन्हा रघुपति कृपाँ भगति पाई ।

अति निर्मल बानी अस्तुति ठानी ग्यानगम्य जय रघुराई ॥

मैं नारि अपावन प्रभु जग पावन रावन रिपु जन सुखदाई ।
 राजीव बिलोचन भव भय मोचन पाहि पाहि सरनहिं आई ॥
 मुनि श्राप जो दीन्हा अति भल कीन्हा परम अनुग्रह मैं माना ।
 देखेउँ भरि लोचन हरि भवमोचन इहइ लाभ संकर जाना ॥
 बिनती प्रभु मोरी मैं मति भोरी नाथ न मागउँ बर आना ।
 पद कमल परागा रस अनुरागा मम मन मधुप करै पाना ॥
 जेहिं पद सुरसरिता परम पुनीता प्रगट भई सिव सीस धरी ।
 सोई पद पंकज जेहि पूजत अज मम सिर धरेउ कृपाल हरी ॥
 एहि भाँति सिधारी गौतम नारी बार बार हरि चरन परी ।
 जो अति मन भावा सो बरु पावा गै पतिलोक अनंद भरी ॥

दो०—अस प्रभु दीनबंधु हरि कारन रहित दयाल ।

तुलसिदास सठे तेहि भजु छाड़ि कपट जंजाल ॥२११॥

मासपारायण, सातवाँ विश्राम

चले राम लछिमन मुनि संगी । गए जहाँ जग पावनि गंगा ॥
 गाधिसूनु सब कथा सुनाई । जेहि प्रकार सुरसरि महि आई ॥
 तब प्रभु रिषिन्ह समेत नहाए । विविध दान महिदेवन्हि पाए ॥
 हरषि चले मुनि बृंद सहाया । बेगि बिदेह नगर निअगया ॥
 पुर रम्यता राम जब देखी । हरषे अनुज समेत बिसेषी ॥
 बापीं कूप सरित सर नाना । सलिल सुधासम मनि सोपाना ॥
 गुंजत मंजु मत्त रस भृंगा । कूजत कल बहुवरन बिहंगा ॥
 बरन बरन बिकसे बनजाता । त्रिविध समीर सदा सुखदाता ॥

दो०—सुमन बाटिका बाग बन बिपुल बिहंग निवास ।

फूलत फलत सुपल्लवत सोहत पुर चहुँ पास ॥२१२॥

वनइ न बरनत नगर निकाई । जहाँ जाइ मन तहँई लोभाई ॥
 चारु बजारु बिचित्र अँवारी । मनिमय बिधि जनु स्वकर सँवारी
 धनिक वनिक बर धनद समाना । बैठे सकल वस्तु लै नाना ॥
 चौहट सुंदर गलीं सुहाई । संतत रहहि सुगंध सिंचाई ॥
 मंगलमय मंदिर सब केरें । चित्रित जनु रतिनाथ चितेरें ॥
 पुर नर नारि सुभग सुचि संता । धरमसील ग्यानी गुनवंता ॥
 अति अनूप जहँ जनक निवास । बिथकहि बिबुध बिलोकि बिलास
 होत चकित चित कोट बिलोकी । सकल भुवन सोभा जनु रोकी ॥

दो०—धवल धाम मानि पुरट पट सुघटित नाना भाँति ।

सिय निवास सुंदर सदन सोभा किमि कहि जाति ॥२१३॥

सुभग द्वार सब कुलिस कपाटा । भूप भीर नट मागध भाटा ॥
 बनी बिसाल बाजि गज साला । हय गय रथ संकुल सब काला ॥
 सूर सचिव सेनप बहुतेरे । नृप गृह सरिस सदन सब केरे ॥
 पुर बाहेर मर सरित समीपा । उतरे जहँ तहँ बिपुल महीपा ॥
 देखि अनूप एक अँवराई । सब सुपास सब भाँति सुहाई ॥
 कौसिक कहेउ मोर मनु माना । इहाँ रहिअ रघुबीर सुजाना ॥
 भलेहि नाथ कहि कृपा निकेता । उतरे तहँ मुनिबृंद समेता ॥
 बिस्वामित्र महामुनि आए । समाचार मिथिलापति पाए ॥

दो०—संग सचिव सुचि भूरि भट भूसुर वर गुर ग्याति ।

चले मिलन मुनिनायकहि मुदित राउ एहि भाँति ॥२१४॥

कीन्ह प्रनामु चरन धरि माथा । दीन्ह असीस मुदित मुनिनाथा ॥
 बिप्रबृंद सब सादर बंदे । जानि भाग्य बड़ राड अनंद ॥

कुसल प्रसन्न कहि बारहिं बारा । बिस्वामित्र नृपहि बैठारा ॥
 तेहि अवसर आए दोउ भाई । गए रहे देखन फुलवाई ॥
 स्याम गौर मृदु बयस किसोरा । लोचन सुखद बिस्वचित चोरा ॥
 उठे सकल जब रघुपति आए । बिस्वामित्र निकट बैठाए ॥
 भए सब सुखी देखि दोउ भ्राता । बारि बिलोचन पुलकित गाता ॥
 मूरति मधुर मनोहर देखी । भयउ बिदेहु बिदेहु बिसेषी ॥

दो०—प्रेम मगन मनु जानि नृपु करि बिवेकु धरि धीर ।

बोलेउ मुनि पद नाइ सिरु गदगद गिरा गभीर ॥२१५॥

कहहु नाथ सुंदर दोउ बालक । मुनिकुल तिलक कि नृपकुलपालक
 ब्रह्म जो निगम नेति कहि गावा । उभय वेष धरि की सोइ आवा ॥
 सहज बिरागरूप मनु मोरा । थकित होत जिमि चंद चकोरा ॥
 ताते प्रभु पूछउँ सतिभाऊ । कहहु नाथ जनि करहु दुराऊ ॥
 इन्हहि बिलोकत अति अनुरागा । बरबस ब्रह्मसुखहि मन त्यागा
 कह मुनि बिहसि कहेहु नृप नीका । बचन तुम्हार न होइ अलीका
 ए प्रिय सबहि जहाँ लागि प्राणी । मन मुसुकाहिं रामु सुनि बानी ॥
 रघुकुल मनि दसस्थ के जाए । मम हित लागि नरेस पठाए ॥

दो०—रामु लखनु दोउ बंधुवर रूप सील बल धाम ।

मख राखेउ सबु साखि जगु जिते असुर संग्राम ॥२१६॥

मुनि तव चरन देखि कह राऊ । कहि न सकउँ निज पुन्य प्रभाऊ
 सुंदर स्याम गौर दोउ भ्राता । आनँदहू के आनँद दाता ॥
 इन्ह कै प्रीति परसपर पावनि । कहि न जाइ मन भाव सुहावनि ॥
 सुनहु नाथ कह मुदित बिदेहु । ब्रह्म जीव इव सहज सनेहु ॥

पुनि पुनि प्रभुहि चितव नरनाहू । पुलक गात उर अधिक उछाहू ॥
मुनिहि प्रसंशि नाइ पद सीसू । चलेउ लवाइ नगर अवनीसू ॥
सुंदर सदन सुखद सब काला । तहाँ बासु लै दीन्ह भुआला ॥
करि पूजा सब बिधि सेवकाई । गयउ राउ गृह बिदा कराई ॥

दो०—रिषय संग रघुवंश मनि करि भोजनु विश्रामु ।

बैठे प्रभु आता सहित दिवसु रहा भरि जामु ॥२१७॥

लखन हृदयँ लालसा बिसेषी । जाइ जनकपुर आइअ देखी ॥
प्रभु भय बहुरि मुनिहि सकुचाहीं । प्रगट न कहहिं मनहिं मुसुकाहीं ॥
राम अनुज मन की गति जानी । भगत बछलता हियँ हुलसानी ॥
परम बिनीत सकुचि मुसुकाई । बोले गुर अनुसासन पाई ॥
नाथ लखनु पुरु देखन चहहीं । प्रभु सकोच डर प्रगट न कहहीं ॥
जौं गउर आयसु में पावौं । नगर देखाइ तुरत लै आवौं ॥
मुनि मुनीसु कह बचन सप्रीती । कसन राम तुम्ह राखहु नीती ॥
धरम सेतु पालक तुम्ह ताता । प्रेम बिबस सेवक सुख दाता ॥

दो०—जाइ देखि आवहु नगरु सुख निधान दोउ भाइ ।

करहु सुफल सब के नयन सुंदर बदन देखाइ ॥२१८॥

मुनि पद कमल बंदि दोउ आता । चले लोक लोचन सुख दाता ॥
बालक वृंद देखि अति सोभा । लगे संग लोचन मनु लोभा ॥
पांत बसन परिकर कटि भाथा । चारु चाप सर सोहत हाथा ॥
तन अनुहरत सुचंदन खोरी । स्यामल गौर मनोहर जोरी ॥
केहरि कंधर बाहु बिसाला । उर अति रुचिर नागमनि माला ॥
सुभग सोन सरसीरुह लोचन । बदन मयंक तापत्रय मोचन ॥

कानन्हि कनक फूल छबि देहीं । चितवत चितहि चोरि जनु लेहीं
चितवनि चारु भृकुटि बर बाँकी । तिलक रेख सोभा जनु चाँकी ॥

दो०—रुचिर चौतनीं सुभग सिर मेचक कुंचित केस ।

नख सिख सुंदर बंधु दोउ सोभा सकल सुदेस ॥२१९॥

देखन नगरु भूपसुत आए । समाचार पुरवासिन्ह पाए ॥
धाए धाम काम सब त्यागी । मनहुँ रंक निधि लूटन लागी ॥
निरखि सहज सुंदर दोउ भाई । होहिं सुखी लोचन फल पाई ॥
जुबतीं भवन झरोखन्हि लागीं । निरखहिं राम रूप अनुरागीं ॥
कहहिं परसपर बचन सप्रीती । सखि इन्ह कोटि काम छबि जीती
सुर नर असुर नाग मुनि माहीं । सोभा असि कहूँ सुनिअति नाहीं
बिष्णु चारि भुज बिधि मुख चारी । बिकट बेष मुख पंच पुरारी ॥
अपर देउ अस कोउ न आही । यह छबि सखी पटतरिअ जाही ॥

दो०—बय किसोर सुषमा सदन स्याम गौर सुख धाम ।

अंग अंग पर वारिअहिं कोटि कोटि सत काम ॥२२०॥

कहहु सखी अस को तनुधारी । जो न मोह यह रूप निहारी ॥
कोउ सप्रेम बोली मृदु बानी । जो मैं सुना सो सुनहु सयानी ॥
ए दोऊ दसरथ के ढोटा । बाल मरालन्हि के कल जोटा ॥
मुनि कौसिक मख के रखवारे । जिन्ह रनअजिर निसाचर मारे ॥
स्याम गात कल कंज बिलोचन । जो मारीच सुभुज मदु मोचन ॥
कौसल्या सुत सो सुख खानी । नामु रामु धनु सायक पानी ॥
गौर किसोर बेषु बर काछें । कर सर चाप राम के पाछें ॥
लछिमनु नामु राम लघु आता । सुनु सखि तासु सुमित्रा माता ॥

दो०—विप्र काजु करि बंधु दोउ मग मुनि बधू उधारि ।

आए देखन चाप मख सुनि हरषीं सब नारि ॥२२१॥

देखि राम छवि कोउ एक कहई । जोगु जानकिहि यह बरु अहई ॥
जौं सखि इन्हहि देख नरनाहू । पन परिहरि हठि करइ बिबाहू ॥
कोउ कह ए भूपति पहिचाने । मुनि समेत सादर सनमाने ॥
सखि परंतु पनु राउ न तजई । विधि बस हठि अबिबेकहि भजई
कोउ कह जौं भल अहइ बिधाता । सब कहैं सुनिअ उचित फलदाता
तौ जानकिहि मिलिहि बरु एहू । नाहिन आलि इहाँ संदेहू ॥
जौं विधि बस अस बनै सँजोगू । तौ कृतकृत्य होइ सब लोगू ॥
सखि हमरें आरति अति तातें । कबहुँक ए आवहिं एहि नातें ॥

दो०—नाहिं त हम कहूँ सुनहु सखि इन्ह कर दरसनु दूरि ।

यह संघटु तब होइ जब पुन्य पुराकृत भूरि ॥२२२॥

बोली अपर कहेहु सखि नीका । एहिं बिआह अति हित सबही का
कोउ कह संकर चाप कठोरा । ए स्यामल मृदुगात किसोरा ॥
सबु असमंजस अहइ सयानी । यह सुनि अपर कहइ मृदु बानी ॥
सखि इन्ह कहैं कोउ कोउ अस कहहीं । बड़ प्रभाउ देखत लघु अहहीं
परसि जासु पद पंकज धूरी । तरी अहल्या कृत अध भूरी ॥
सो कि रहिहि विनु सिव धनु तोरें । यह प्रतीति परिहरिअ न भोरें
जेहिं बिरंचि रचि सीय सँबारी । तेहिं स्यामल बरु रचेउ बिचारी ॥
तासु बचन सुनि सब हरषानीं । ऐसेइ होउ कहहिं मृदु बानीं ॥

दो०—हियँ हरषहिं बरषहिं सुमन सुमुखि सुलोचनि बृंद ।

जाहिं जहाँ जहँ बंधु दोउ तहँ तहँ परमानंद ॥२२३॥

पुर पूरव दिमि गे दोउ भाई । जहँ धनुमख हित भूमि बनाई ॥
 अति बिस्तार चारु गच ठागी । बिमल बेदिका रुचिर सँवारी ॥
 चहुँदिसि कंचन मंच बिसाला । रचे जहाँ बैठहिं महिपाला ॥
 तेहि पाछें समीप चहुँ पासा । अपर मंच मंडली बिलासा ॥
 कलुक ऊँचि सब भाँति सुहाई । बैठहिं नगर लोग जहँ जाई ॥
 तिन्ह के निकट बिसाल सुहाए । धवल धाम बहु बरन बनाए ॥
 जहँ बैठें देखहिं सब नारी । जथाजोगु निज कुल अनुहारी ॥
 पुर बालक कहि कहि मृदु बचना । सादर प्रभुहि देखावहिं रचना ॥

दो०—सब सिसु एहि मिस प्रेमबस परसि मनोहर गात ।

तन पुलकहिं अति हरषु हियँ देखि देखि दोउ भ्रात ॥२२४॥

सिसु सब राम प्रेम बस जाने । प्रीति समेत निकेत बखाने ॥
 निज निज रुचि सब लेहिं बोलाई । सहित सनेह जाहिं दाँउ भाई ॥
 राम देखावहिं अनुजहि रचना । कहि मृदु मधुर मनोहर बचना ॥
 लव निमेष महँ भुवन निकाया । रचइ जासु अनुसासन माया ॥
 भगति हेतु सोइ दीनदयाला । चितवत चकित धनुष मखसाला ॥
 कौतुक देखि चले गुरु पाहीं । जानि बिलंबु त्रास मन माहीं ॥
 जासु त्रास डर कहँ डर होई । भजन प्रभाउ देखावत सोई ॥
 कहि बातें मृदु मधुर सुहाई । किए बिदा बालक बरिआई ॥

दो०—सभय सप्रेम विनीत अति सकुच सहित दोउ भाइ ।

गुर पद पंकज नाइ सिर बैठे आयसु पाइ ॥२२५॥

निसि प्रबेस मुनि आयसु दीन्हा । सबहीं संध्याबंदनु कीन्हा ॥
 कहत कथा इतिहास पुरानी । रुचिर रजनि जुग जाम सिरानी ॥

मुनिबर सयन कीन्हि तब जाई । लगे चरन चापन दोउ भाई ॥
 जिन्ह के चरन सरोरुह लागी । करत बिबिध जप जोग बिरागी ॥
 तेइ दोउ बंधु प्रेम जनु जीते । गुर पद कमल पलोतत प्रीते ॥
 बार बार मुनि अग्या दीन्ही । रघुबर जाइ सयन तब कीन्ही ॥
 चापत चरन लखनु उर लाएँ । मभय सप्रेम परम सचु पाएँ ॥
 पुनि पुनि प्रभु कह सोबहु ताता । पौढ़े धरि उर पद जलजाता ॥
 दो०—उठे लखनु निसि विगत मुनि अरुनसिखा धुनि कान ।

गुर तें पाहलंहि जगतपति जागे रामु सुजान ॥२२६॥
 सकल सौच करि जाइ नहाए । नित्य निबाहि मुनिहि सिर नाए
 समय जानि गुर आयसु पाई । लेन प्रसून चले दोउ भाई ॥
 भूप बागु बर देखेउ जाई । जहँ बसंत गितु रही लोभाई ॥
 लागे बिटप मनोहर नाना । बग्न बरन बर बेलि बिताना ॥
 नव पल्लव फल सुमन सुहाए । निज संपति सुर रूख लजाए ॥
 चातक कोकिल कीर चकोरा । कूजत बिहग नटत कल मोरा ॥
 मध्य बाग सरु सोह सुहावा । मनि सोपान बिचित्र बनावा ॥
 बिमल सलिलु सरसिज बहुरंगा । जलखग कूजत गुंजत भृंगा ॥

दो०—बागु तड़ागु बिलोकि प्रभु हरषे बंधु समेत ।

परम रम्य आरामु यहु जां रामहि सुख देत ॥२२७॥

चहुँ दिसि चितइ पूँछि मालीगन । लगे लेन दल फूल मुदित मन ॥
 तेहि अवसर सीता तहँ आई । गिरिजा पूजन जननि पठाई ॥
 संग सखी सब सुभग सयानी । गावहिं गीत मनोहर बानी ॥
 सर समीप गिरिजा गृह सोहा । बरनि न जाइ देखि मनु मोहा ॥

मञ्जु करि सर सखिन्ह समेता । गई मुदित मन गौरि निकेता ॥
 पूजा कीन्हि अधिक अनुरागा । निज अनुरूप सुभग बरु मागा ॥
 एक सखी सिय संगु बिढाई । गई रही देखन फुलवाई ॥
 तेहिं दोउ बंधु बिलोके जाई । प्रेम बिबस सीता पहिं आई ॥

दो०—तासु दसा देखी सखिन्ह पुलक गात जलु नैन ।

कहु कारनु निज हरष कर पूछहिं सब मृदु बैन । २२८ ॥

देखन बागु कुअँर दुइ आए । बय किमोर सब भाँति सुहाए ॥
 स्याम गौर किमि कहौं बखानी । गिरा अनयन नयन बिनु बानी ॥
 सुनि हरषीं सब सखीं सयानी । सिय हियँ अति उतकंठा जानी ॥
 एक कहइ नृप सुत तेइ आली । सुने जे मुनि संग आए काली ॥
 जिन्ह निज रूप मोहनी डारी । कीन्हे खबस नगर नर नारी ॥
 बरनत छबि जहँ तहँ सब लोगू । अवसि देखिअहिं देखन जोगू ॥
 तासु बचन अति सियहि सोढाने । दरस लागि लोचन अकुलाने ॥
 चली अग्र करि प्रिय सखि सोई । प्रीति पुरातन लखइ न कोई ॥

दो०—सुमिरि सीय नारद बचन उपजी प्रीति पुनीत ।

चकित बिलोकैति सकल दिसि जनु सिसु मृगी समीत ॥ २२९ ॥

कंकन किंकिनि नूपुर धुनि सुनि । कहत लखन सन रामु हृदयँ गुनि
 मानहुँ मदन दुंदुभी दीन्ही । मनसा बिस्व विजय कहँ कीन्ही ॥
 अस कहि फिरि चितए तेहि ओरा । सिय मुख मसि भए नयन चकोरा
 भए बिलोचन चारु अचंचल । मनहुँ सकुचि निमित्त जे दिगंचल
 देखि सीय सोभा सुख पावा । हृदयँ सराहत बचनु न आवा ॥
 जनु बिरंचि सब निज निपुनाई । बिरचि बिस्व कहँ प्रगटि देखाई ॥

सुंदरता कहूँ सुंदर करई । छविगृहँ दीपसिखा जनु बरई ॥
सब उपमा कवि रहे जुठारी । केहिं पटतरौं बिदेहकुमारी ॥

दो०—सिय सोभा हियँ बरनि प्रभु आपनि दसा बिचारि ।

बोले सुचि मन अनुज सन बचन समय अनुहारि ॥२३०॥

तात जनकतनया यह सोई । धनुषजग्य जेहि कारन होई ॥
पूजन गौरि सखीं लै आई । करत प्रकासु फिरइ फुलवाई ॥
जासु विलोकि अलौकिक सोभा । सहज पुनीत मोर मनु छोभा ॥
सो सबु कारन जान बिधाता । फरकहिं सुभद अंग सुनु आता ॥
रघुबंसिन्ह कर सहज सुभाऊ । मनु कुपंथ पशु धरइ न काऊ ॥
मोहि अतिसय प्रतीति मन केरी । जेहिं सपनेहुँ परनारि न हेरी ॥
जिन्ह कै लहहिं न रिपु रन पीठी । नहिं पावहिं परतिय मनु डीठी ॥
मंगन लहहिं न जिन्ह कै नाहीं । ते नर बर थोरे जग माहीं ॥

दो०—करत बतकही अनुज सन मन सिय रूप लोभान ।

मुख सरोज मकरंद छवि करइ मधुप इव पान ॥२३१॥

चितवति चकित चहूँ दिसि सीता । कहँ गए नृप किसोर मनु चिंता
जहँ बिलोक मृग सावक नैनी । जनु तहँ बरिस कमल सित श्रेनी ॥
लता ओट तब सखिन्ह लखाए । स्यामल गौर किसोर सुहाए ॥
देखि रूप लोचन ललचाने । हरषे जनु निज निधि पहिचाने ॥
थके नयन रघुपति छवि देखें । पलकन्हिहुँ परिहरीं निमेषें ॥
अधिक सनेहँ देह मैं भोरी । सरद ससिहि जनु चितव चकोरी
लोचन मग रामहि उर आनी । दीन्हे पलक कपाट सयानी ॥
जब सिय सखिन्ह प्रेम बस जानी । कहि न सकहिं कछु मन सकुचानी ॥

दो०—लताभवन तें प्रगट भे तेहि अवसर दोउ भाइ ।

निकसे जनु जुग विमल बिधु जलद पटल बिलगाइ ॥२३२॥

सोभा सीवँ सुभग दोउ बीरा । नील पीत जलजाभ सरीरा ॥
 मोरपंख सिर सोहत नीके । गुच्छ बीच बिच कुसुम कली के ॥
 भाल तिलक भ्रमबिंदु सुहाए । श्रवन सुभग भूपन छाँव छाए ॥
 बिकट भृकुटि कच घूघरवारे । नव सरोज लोचन रतनारे ॥
 चारु चिबुक नासिका कपोला । हास बिलास लेत मनु मोला ॥
 मुखछबि कहि न जाइ मोहि पाहीं । जो बिलोकि बहु काम लजाहीं
 उर मनि माल कंबु कल गीवा । काम कलभ कर भुज बल सींवा ॥
 सुमन सभेत बाम कर दोना । सावँर कुअँर सखी सुठि लोना ॥

दो०—केहरि कटि पट पीत धर सुषमा सील निधान ।

देखि भानुकुल भूषनहि बिसरा सखिन्ह अपान ॥२३३॥

धरि धीगजु एक आलि सयानी । सीता सन बोली गहि पानी ॥
 बहुरि गौरि कर ध्यान करेहू । भूपकिसोर देखि किन लेहू ॥
 सकुचि सीयँ तब नयन उधारे । सनमुख दोउ रघुसिंध निहारे ॥
 नख मिख देखि रासु कै सोभा । सुमिरि पिता पनु मनु अति छोभा
 परबस सखिन्ह लखी जब सीता । भयउ गहरु सब कहहिं सभीता ॥
 पुनि आउव एहि वेरि आँ काली । अस कहि मन बिहसी एक आली
 गूढ़ गिग सुनि सिय सकुचानी । भयउ बिलंबु मातु भय मानी ॥
 धरि वडि धीर रामु उर आने । फिरी अपनपउ पितु बस जाने ॥

दो०—देखन मिस मृग बिहग तरु फिरइ बहोरि बहोरि ।

निरखि निरखि रघुबीर छबि बाढ़इ प्रीति न थोरि ॥२३४॥

जानि कठिन सिव चाप बिसूरति । चला राखि उर स्यामल मूरति ॥
 प्रभु जब जात जानकी जानी । सुख सनेह सोभा गुन खानी ॥
 परम प्रेम मय मृदु मसि कीन्ही । चारु चित्त भीतीं लिखि लीन्ही ॥
 गई भवानी भवन बहोरी । बंदि चरन बोली कर जोरी ॥
 जय जय गिरिबरराज किसोरी । जय महेस मुख चंद चकोरी ॥
 जय गजबदन षडानन माता । जगत जननि दामिनि दुति गाता
 नहिं तब आदि मध्य अवसाना । अमित प्रभाउ बेदु नहिं जाना ॥
 भव भव बिभव पराभव कारिनि । बिस्वबिमोहनि म्बबस बिहारिनि
 दो०—पतिदेवता सुतीय महुँ मातु प्रथम तब रेख ।

महिमा अमित न सकहिं कहि सहस सारदा सेप ॥ २३५ ॥

सेवत तोहि सुलभ फल चारी । बरदायनी पुरारि पिआरी ॥
 देवि पूजि पद कमल तुम्हारे । सुर नर मुनि सब होहिं सुखारे ॥
 मोर मनोरथु जानहु नोके । बसहु सदा उर पुर सबही के ॥
 कीन्हेउँ प्रगट न कारन तेहीं । अस कहि चरन गहे बैदेहीं ॥
 बिनय प्रेम बस भई भवानी । खसी माल मूरति मुसुकानी ॥
 सादर सियँ प्रसादु सिर धरेऊ । बोली गौरि हरषु हियँ भरेऊ ॥
 सुनु सिय सत्य असीस हमारी । पूजिहि मन कामना तुम्हारी ॥
 नागद बचन सदा सुचि साचा । सो वरु मिलिहि जाहिं मनु राचा ॥

छं०—मनु जाहिं राचेउ मिलिहि सो वरु महज सुंदर साँवरो ।

करुना निधान सुजान सीलु सनेहु जानत रावरो ॥

एहि माँति गौरि असीस सुनि सिय सहित हियँ हरषीं अली ।

तुलसी भवानिहि पूजि पुनिपुनि मुदित मन मंदिर चली ॥

सो०—जानि गौरि अनुकूल सिय हिय हरषु न जाइ कहि ।

मंजुल मंगल मूल बाम अंग फरकन लगे ॥ २३६ ॥

हृदयँ सराहत सीय लोनाई । गुर समीप गवने दोउ भाई ॥
 राम कहा सबु कौसिक पाहीं । सरल सुभाउ छुअत छल नाहीं ॥
 सुमन पाइ मुनि पूजा कीन्ही । पुनि असीस दुहु भाइन्ह दीन्ही ॥
 सुफल मनोरथ होहुँ तुम्हारे । रामु लखनु सुनि भए सुखारे ॥
 करि भोजनु मुनिवर बिग्यानी । लगे कहन कछु कथा पुरानी ॥
 बिगत दिवसु गुरु आयसु पाई । संध्या करन चले दोउ भाई ॥
 प्राची दिसि ससि उयउ सुहावा । सिय मुख सरिस देखि सुख पावा ॥
 बहुरि बिचारु कीन्ह मन माहीं । सीय बदन सम हिमकर नाहीं ॥

दो०—जनमु सिंधु पुनि बंधु बिषु दिन मलीन सकलंक ।

सिय मुख समता पाव किमि चंडु बापुरो रंक ॥ २३७ ॥

घटइ बड़इ विरहिनि दुखदाई । ग्रसइ राहु निज संधिहिं पाई ॥
 कोक सोकप्रद पंकज द्रोही । अवगुन बहुत चंद्रमा तोही ॥
 बैदेही मुख पटतर दीन्हे । होइ दोषु बड़ अनुचित कीन्हे ॥
 सिय मुख छबि बिधु व्याज बखानी । गुर पहिं चले निसा बड़ि जानी ॥
 करि मुनि चरन सरोज प्रनामा । आयसु पाइ कीन्ह विश्रामा ॥
 बिगत निसा रघुनायक जागे । बंधु बिलोकि कहन अस लागे ॥
 उयउ अरुन अवलोकहु ताता । पंकज कोक लोक सुखदाता ॥
 बोले लखनु जोरि जुग पानी । प्रभु प्रभाउ सूचक मृदु बानी ॥
 दो०—अरुनोदयँ सकुचे कुमुद उडगन जोति मलीन ।

जिमि तुम्हार आगमन सुनि भए नृपति बलहीन ॥ २३८ ॥

नृप सब नखत करहिं उजिआरी । टारि न सकहिं चाप तम भारी ॥
 कमल कोक मधुकर खग नाना । हरषे सकल निसा अबसाना ॥
 ऐसेहिं प्रभु सब भगत तुम्हारे । होइहहिं टूटें धनुष सुखारे ॥
 उयउ भानु बिनु श्रम तम नासा । दुरे नखत जग तेजु प्रकासा ॥
 रबि निज उदय व्याज रघुराया । प्रभु प्रतापु सब नृपन्ह दिखाया ॥
 तब भुज बल महिमा उदघाटी । प्रगटी धनु बिघटन परिपाटी ॥
 बंधु बचन सुनि प्रभु मुसुकाने । होइ सुचि सहज पुनीत नहाने ॥
 नित्यक्रिया करि गुरु पहिं आए । चरन सरोज सुभग सिर नाए ॥
 सतानंदु तब जनक बोलाए । कौसिक मुनि पहिं तुरत पठाए ॥
 जनक बिनय तिन्ह आइ सुनाई । हरषे बोलि लिए दोउ भाई ॥
 दो०—सतानंद पद बंदि प्रभु बैठे गुरु पहिं जाइ ।

चलहु तात मुनि कहेउ तब पठवा जनक बोलाइ ॥२३९॥

मासपारायण, आठवाँ विश्राम

नवाह्नपारायण, दूसरा विश्राम

सीय खयंबरु देखिअ जाई । ईसु काहि धौं देइ बड़ाई ॥
 लखन कहा जस भाजनु सोई । नाथ कृपा तब जापर होई ॥
 हरषे मुनि सब सुनिबर बानी । दीन्हि असीस सबहिं सुखु मानी ॥
 पुनि मुनिबृंद समेत कृपाला । देखन चले धनुषमख साला ॥
 रंगभूमि आए दोउ भाई । अमिसुधिसब पुरवासिन्ह पाई ॥
 चले सकल गृह काज बिसारी । बाल जुवान जरठ नर नारी ॥
 देखी जनक भीर मै भारी । सुचि सेवक सब लिए हँकारी ॥

तुरत सकल लोगन्ह पहिं जाहू । आसन उचित देहु सब काहू ॥

दो०—कहि मृदु बचन बिनीत तिन्ह बैठारे नर नारि ।

उत्तम मध्यम नीच लघु निज निज थल अनुहारि ॥२४०॥

राजकुअँर तेहि अवसर आए । मनहुँ मनोहरता तन छाए ॥
 गुन सागर नागर बर बीरा । सुंदर स्यामल गौर सरीरा ॥
 राज समाज चिराजत रूरे । उडगन महुँ जनु जुगबिधु पूरे ॥
 जिन्ह कें रही भावना जैसी । प्रभु मूरति तिन्ह देखी तैसी ॥
 देखहि रूप महा रनधीरा । मनहुँ बीर रसु धरें सरीरा ॥
 डरे कुटिल नृप प्रभुहि निहारी । मनहुँ भयानक मूरति भारी ॥
 रहे असुर छल छोनिष बेषा । तिन्ह प्रभु प्रगट काल सम देखा ॥
 पुरबासिन्ह देखे दोउ भाई । नरभूषन लोचन सुखदाई ॥

दो०—नारि बिलोकहिं हरषि हियँ निज निज रुचि अनुरूप ।

जनु सोहत सिंगार धरि मूरति परम अनूप ॥२४१॥

बिदुषन्ह प्रभु बिराटमय दीसा । बहु मुख कर पग लोचन सीसा ॥
 जनक जाति अवैलोकहिं कैसैं । सजन सगे प्रिय लागहिं जैसैं ॥
 सहित बिदेह बिलोकहिं रानी । सिसु सम प्रीति न जाति बखानी ॥
 जोगिन्ह परम तत्त्वमय भासा । सांत सुद्ध सम सहज प्रकासा ॥
 हरिभगतन्ह देखे दोउ भ्राता । इष्टदेव इव सब सुख दाता ॥
 रामहि चितव भायँ जेहि सीया । सो सनेहु सुखु नहिं कथनीया ॥
 उर अनुभवति न कहि सक सोऊ । कवन प्रकार कहै कबि कोऊ ॥
 एहि बिधि रहा जाहि जस भाऊ । तेहि तस देखेउ कोसलराऊ ॥

दो०—राजत राज समाज महुँ कोसलराज किसोर ।

सुंदर स्यामल गौर तन बिस्व बिलोचन चोर ॥२४२॥

सहज मनोहर मूरति दोऊ । कोटि काम उपमा लघु सोऊ ॥
सरद चंद निंदक मुख नीके । नीरज नयन भावते जी के ॥
चितवनि चारु मार मनु हरनी । भावति हृदय जाति नहिं बरनी ॥
कल कपोल श्रुति कुंडल लोला । चिबुक अधर सुंदर मृदु बोला ॥
कुमुदबंधु कर निंदक हाँसा । भृकुटी बिकट मनोहर नासा ॥
भाल बिसाल तिलक झलकाहीं । कच बिलोकि अलि अवलि लजाहीं
पीत चौतनीं सिरन्धि सुहाई । कुसुम कलीं बिच बीच बनाई ॥
रेखें रुचिर कंबु कल गीवाँ । जनु त्रिभुवन सुषमा की सीवाँ ॥

दो०—कुंजर मनि कंठा कलित उरन्धि तुलसिका माल ।

वृषभ कंध केहरि ठवनि बल निधि बाहु बिसाल ॥२४३॥

कटि तूनीर पीत पट बाँधें । कर सर धनुष वाम बर काँधें ॥
पीत जग्य उपवीत सुहाए । नख सिख मंजु महालबि छाए ॥
देखि लोग सब भए सुखारे । एकटक लोचन चलत न तारे ॥
हरषे जनकु देखि दोउ भाई । मुनि पद कमल गढे तब जाई ॥
करि बिनती निज कथा सुनाई । रंग अवनि सब मुनिहि देखाई ॥
जहँ जहँ जाहिं कुअँर बर दोऊ । तहँ तहँ चकित चितव सबु कोऊ
निज निज रुख रामहि सबु देखा । कोउ न जान कछु मरमु बिसेषा
भलि रचना मुनि नृप सन कहेऊ । राजाँ मुदित महासुख लहेऊ ॥

दो०—सब मंचन्ह तें मंचु एक सुंदर बिसद बिसाल ।

मुनि समेत दोउ बंधु तहँ बैठारे महिपाल ॥२४४॥

प्रभुहि देखि सब नृप हियँ हारे । जनु राकेस उदय भएँ तारे ॥
 असि प्रतीति सब के मन माहीं । राम चाप तोरब सक नाहीं ॥
 बिनु भंजेहुँ भव धनुषु बिसाला । मेलिहि सीय राम उर माला ॥
 अस बिचारि गवनहु घर भाई । जसु प्रतापु बलु तेजु गवाई ॥
 बिहसे अपर भूप सुनि बानी । जे अबिबेक अंध अभिमानी ॥
 तोरेहुँ धनुषु व्याहु अवगाहा । बिनु तोरें को कुअँरि बिआहा ॥
 एक बार कालउ किन होऊ । सिय हित समर जितब हम सोऊ ॥
 यह सुनि अवर महिप मुसुकाने । धरमसील हरिभगत सयाने ॥

सो०—सीय बिआहबि राम गरब दूरि करि नृपन्ह के ।

जीति को सक संग्राम दसरथ के रन बाँकुरे ॥२४५॥

व्यर्थ मरहु जनि गाल बजाई । मन मोदकन्हि कि भूख बुताई ॥
 सिख हमारि सुनि परम पुनीता । जगदंबा जानहु जियँ सीता ॥
 जगत पिता रघुपतिहि बिचारी । भरि लोचन छबि लेहु निहारी ॥
 सुंदर सुखद सकल गुन रासी । ए दोउ बंधु संभु उर बासी ॥
 सुधा समुद्र समीप बिहाई । मृगजलु निरखि मरहु कत धाई ॥
 करहु जाइ जा कहूँ जोइ भावा । हम तौ आजु जनम फलु पावा ॥
 अस कहि भले भ्रूप अनुरागे । रूप अनूप बिलोकन लागे ॥
 देखहिं सुर नभ चढ़े बिमाना । बरषहिं सुमन करहिं कल गाना ॥

दो०—जानि सुअवसर सीय तब पठई जनक बोलाइ ।

चतुर सखीं सुंदर सकल सादर चलीं लवाइ ॥२४६॥

सिय सोभा नहिं जाइ बखानी । जगदंबिका रूप गुन खानी ॥
 उपमा सकल मोहि लघु लागीं । प्राकृत नारि अंग अनुरागीं ॥

सिय बरनिअ तेइ उपमा देई । कुकबि कहाइ अजसु को लेई ॥
जौ पटतरिअ तीय सम सीया । जग असि जुबति कहाँ कमनीया ॥
गिरामुखर तन अरध भवानी । रति अति दुखित अतनु पति जानी
बिष बारुनी बंधु प्रिय जेही । कहिअ रमा सम किमि बैदेही ॥
जौ छबि सुधा पयोनिधि होई । परम रूपमय कच्छपु सोई ॥
सोभा रजु मंदरु सिंगारू । मथै पानि पंकज निज मारू ॥

दो०—एहि बिधि उपजै लच्छि जब सुंदरता सुख मूल ।

तदपि सकोच समेत कबि कहहिं सीय समतूल ॥२४७॥

चलीं संग लै सखीं सयानी । गावत गीत मनोहर बानी ॥
सोह नवल तनु सुंदर सारी । जगत जननि अतुलित छबि भारी
भूषन सकल सुदेस सुहाए । अंग अंग रचि सखिन्ह बनाए ॥
रंगभूमि जब सिय पगु धारी । देखि रूप मोहे नर नारी ॥
हरषि सुरन्ह दुदुभीं बजाई । बरषि प्रसन्न अपछरा गाई ॥
पानि सरोज सोह जयमाला । अवचट चितए सकल भुआला ॥
सीय चकित चित रामहि चाहा । भए मोहबस सब नर नाहा ॥
मुनि समीप देखे दोउ भाई । लगे ललकि लोचन निधि पाई ॥

दो०—गुरजन लाज समाजु बड़ देखि सीय सकुचानि ।

लागि बिलोकन सखिन्ह तन रघुबीरहि उर आनि ॥२४८॥

राम रूपु अरु सिय छबि देखें । नर नारिन्ह परिहरिं निमेषें ॥
सोचहिं सकल कहत सकुचाहीं । बिधि सन विनय करहिं मन माहीं
हरु बिधि बेगि जनक जड़ताई । मति हमारि असि देहि सुहाई ॥
बिनु बिचार पनु तजि नरनाहू । सीय राम कर करै बिबाहू ॥

जगु भल कहिहि भाव सब काहू । हठ कीन्हैं अंतहुँ उर दाहू ॥
 एहिँ लालसाँ मगन सब लोगू । बरू साँवरो जानकी जोगू ॥
 तब बंदीजन जनक बोलाए । बिरिदावली कहत चलि आए ॥
 कह नृपु जाइ कहहु पन मोरा । चले भाट हियँ हरषु न थोरा ॥

दो०—बोले बंदी वचन बर सुनहु सकल महिपाल ।

पन विदेह कर कहहिँ हम भुजा उठाइ बिसाल ॥२४९॥

नृप भुजबलु बिधु सिवधनु राहू । गरुअ कठोर विदित सब काहू ॥
 रावनु बानु महाभट भारे । देखि सरासन गवँहिँ सिधारे ॥
 सोइ पुरारि कोदंडु कठोरा । राज समाज आजु जोइ तोरा ॥
 त्रिभुवन जय भमेत बैदेही । बिनहिँ बिचार बरइ हठि तेही ॥
 सुनि पन मकल भूप अभिलाषे । भटमानी अतिसय मन माखे ॥
 परिकर बाँधि उठे अकुलाई । चले इष्टदेवन्ह सिर नाई ॥
 तमकि ताकि तकि सिवधनु धरहीं । उठइ न कोटि भाँति बलु करहीं ॥
 जिन्ह के कलु बिचारु मन माहीं । चाप समीप महीप न जाहीं ॥

दो०—तमकि धरहिँ धनु मूढ़ नृप उठइ न चलहिँ लजाइ ।

मनहुँ पाइ भूट बाहुबलु अधिकु अधिकु गरुआइ ॥२५०॥

भूप सहस दस एकहि बारा । लगे उठावन टरइ न टारा ॥
 डगइ न संभु सरासनु कैसैं । कामी वचन सती मनु जैसैं ॥
 सब नृप भए जोगु उपहासी । जैसैं बिनु बिराग संन्यासी ॥
 कीरति बिजय बीरता भारी । चले चाप कर बरबस हारी ॥
 श्रीहत भए हारि हियँ राजा । बैठे निज निज जाइ समाजा ॥
 नृपन्ह बिलोकि जनकु अकुलाने । बोले वचन रोष जनु साने ॥

दीप दीप के भूपति नाना । आए सुनि हम जो पनु ठाना ॥
देव दनुज धरि मनुज सरीरा । विपुल बीर आए रन धीरा ॥
दो०—कुअँरि मनोहर विजय बडि कीरति अति कमनीय ।

पावनिहार विरंचि जनु रचेउ न धनु दमनीय ॥२५१॥

कहहु काहि यहु लाभु न भावा । काहुँ न संकर चाप चढ़ावा ॥
रहउ चढ़ाउब तोरब भाई । तिलु भरि भूमि न सके छड़ाई ॥
अब जनि कोउ माखै भट मानी । बीर बिहीन मही मैं जानी ॥
तजहु आस निज निज गृह जाहू । लिखान बिधि बैदेहि बिबाहू ॥
सुकुतु जाइ जौ पनु परिहरऊँ । कुअँरि कुआरि रहउ का करऊँ ॥
जौ जनतेउँ बिनु भट भुबि भाई । तौ पनु करि होतेउँ न हँसाई ॥
जनक बचन सुनि सब नर नारी । देखि जानकिहि भए दुखारी ॥
माखे लखनु कुटिल भई भौहैं । रदपट फरकत नयन रिसौहैं ॥

दो०—कहि न सकत रघुबीर डर लगे बचन जनु बान ।

नाइ राम पद कमल सिरु बोले गिरा प्रमान ॥२५२॥

रघुबंसिन्ह महुँ जहँ कोउ होई । तेहिँ समाज अस कहइन कोई ॥
कही जनक जसि अनुचित बानी । विद्यमान रघुकुल मनि जानी ॥
सुनहु भानुकुल पंकज भानू । कहउँ सुभाउ न कछु अभिमानू ॥
जौ तुम्हारि अनुसासन पावौँ । कंदुक इव ब्रह्मांड उठावौँ ॥
काचे घट जिमि डारौँ फोरी । सकउँ मेरु मूलक जिमि तोरी ॥
तव प्रताप महिमा भगवाना । को बापुरो पिनाक पुराना ॥
नाथ जानि अस आयसु होऊ । कौतुक करौँ बिलोकिअ सोऊ ॥
कमल नाल जिमि चाप चढ़ावौँ । जोजन सत प्रमान लै धावौँ ॥

दो०—तोरौ छत्रक दंड जिमि तव प्रताप बल नाथ ।

जौ न करौ प्रभु पद सपथ कर न धरौ धनु भाथ ॥२५३॥

लखन सकोप बचन जे बोले । डगमगानि महि दिग्गज डोले ॥
सकल लोग सब भूप डेराने । सिय हियँ हरषु जनकु सकुचाने ॥
गुर रघुपति सब मुनि मन माहीं । मुदित भए पुनि पुनि पुलकाईं ॥
सयनहिं रघुपति लखनु नेवारे । प्रेम समेत निकट बैठारे ॥
बिस्वामित्र समय सुभ जानी । बोले अति सनेहमय बानी ॥
उठहु राम भंजहु भव चापा । भेटहु तात जनक परितापा ॥
सुनि गुरु बचन चरन सिरु नावा । हरषु बिषादु न कछु उर आवा ॥
ठाढ़े भए उठि सहज सुभाएँ । ठवनि जुबा मृगराजु लजाएँ ॥

दो०—उदित उदयगिरि मंच पर रघुवर बाल पतंग ।

बिकसे संत सरोज सब हरषे लोचन मृंग ॥२५४॥

नृपन्ह केरि आसा निसि नासी । बचन नखत अवली न प्रकासी ॥
मानी महिष कुमुद सकुचाने । कपटी भूप उलूक लुकाने ॥
भए बिसोक कोक मुनि देवा । बरिसहिं सुमन जनावहिं सेवा ॥
गुर पद बंदि सहिद्व अनुरागा । राम मुनिन्ह सन आयसु मागा ॥
सहजहिं चले सकल जग स्वामी । मत्त मंजु बर कुंजर गामी ॥
चलत राम सब पुर नर नारी । पुलक पूरि तन भए सुखारी ॥
बंदि पितर सुर सुकृत सँभारे । जौ कछु पुन्य प्रभाउ हमारे ॥
तौ सिवधनु मृनाल की नाई । तोरहुँ रामु गनेस गोसाई ॥

दो०—रामहि प्रेम समेत लखि सखिन्ह समीप बोलाइ ।

सीता मातु सनेह बस बचन कहइ बिलखाइ ॥२५५॥

सखि सब कौतुक देखनिहारे । जेउ कहावत हितू हमारे ॥
कोउ न बुझाइ कहइ गुर पाहीं । ए बालक असि हठ भलि नाहीं ॥
रावन बान छुआ नहिं चापा । हारे सकल भूप करि दापा ॥
सो धनु राजकुअँर कर देहीं । बाल मराल कि मंदर लेहीं ॥
भूप सयानप सकल सिरानी । सखि विधि गति कछु जाति न जानी ॥
बोली चतुर सखी मृदु बानी । तेजवंत लघु गनिअ न रानी ॥
कहँ कुंभज कहँ सिंधु अपारा । सोषेउ सुजसु सकल संसारा ॥
रबि मंडल देखत लघु लागा । उदयँ तासु तिष्ठवन तम भागा ॥

दो०—मंत्र परम लघु जासु बस विधि हरि हर सुर सर्व ।

महामत्त गजराज कहँ बस कर अंकुस खर्ब ॥२५६॥

काम कुसुम धनु सायक लीन्हे । सकल भुवन अपनै बस कीन्हे ॥
देवि तजिअ संसउ अस जानी । मंजव धनुषु राम सुनु रानी ॥
सखी बचन सुनि भै परतीती । मिटा बिषादु बड़ी अति प्रीती ॥
तब रामहि बिलोकि बैदेही । सभय हृदयँ बिनवति जेहि तेही ॥
मनहीं मन मनाव अकुलानी । होहु प्रसन्न महेस भवानी ॥
करहु सफल आपनि सेवकाई । करि हितु हरहु चाप गरुआई ॥
गननायक बरदायक देवा । आजु लगे कीन्हिउँ तुअ सेवा ॥
बार बार बिनती सुनि मोरी । करहु चाप गुरुता अति थोरी ॥
दो०—देखि देखि रघुबीर तन सुर मनाव धरि धीर ।

भरे बिलोचन प्रेम जल पुलकावली सरीर ॥२५७॥

नीकें निरखि नयन भरि सोभा । पितु पनु सुमिरि बहुरि मनु छोभा
अहह तात दारुनि हठ ठानी । समुझत नहिं कछु लाभ न हानी ॥

सचिव सभय सिख देइ न कोई । बुध समाज बड़ अनुचित होई ॥
 कहँ धनु कुलिसहु चाहि कठोरा । कहँ स्यामल मृदु गात किसोरा ॥
 बिधिकेहि भाँति धरौं उर धीरा । सिरस सुमन । बन बोधअ हीरा
 सकल सभा कै मति भै भोरी । अब मोहि संभु चाप गतितोरी ॥
 निज जड़ता लोगन्ह पर डारी । होहि हरुअ रघुपतिहि निहारी ॥
 अति परिताप सीय मन माहीं । लव निमेष जुग सय सम जाहीं ॥

दो०—प्रभुहि चितइ पुनि चितव महि राजत लोचन लोल ।

खेलत मनसिज मीन जुग जनु बिधु मंडल डोल ॥२५८॥

गिरा अलिनि मुख पंकज रोकी । प्रगट न लाज निसा अवलोकी ॥
 लोचन जलु रह लोचन कोना । जैसैं परम कृपन कर सोना ॥
 सकुची ब्याकुलता बड़ि जानी । धरि धीरजु प्रतीति उर आनी ॥
 तन मन बचन मोर पनु साचा । रघुपति पद सरोज चितु राचा ॥
 तौ भगवानु सकल उर बासी । करिहि मोहि रघुवर कै दासी ॥
 जेहि कै जेहि पर सत्य सनेहू । सो तेहि मिलइ न कछु संदेहू ॥
 प्रभु तन चितइ प्रेम तन ठाना । कृपानिधान राम सबु जाना ॥
 सियहि बिलोकि बकेउ धनु कैसैं । चितव गरुलघु ब्यालहि जैसैं

दो०—लखन लखेउ रघुवंसमनि ताकेउ हर कोदंडु ।

पुलकि गात बोले बचन चरन चापि ब्रह्मांडु ॥२५९॥

दिसि कुंजरहु कमठ अहि कोला । धरहु धरनि धरि धीर न डोला ॥
 रामु चहहि संकर धनु तोरा । होहु सजग सुनि आयसु मोरा ॥
 चाप समीप रामु जब आए । नर नारिन्ह सुर सुकृत मनाए ॥
 सब कर संसउ अरु अग्यानु । मंद महीपन्ह कर अभिमानु ॥

भृगुपति केरि गरब गरुआई । सुर मुनिबरन्ह केरि कदराई ॥
सिय कर सोचु जनक पछितावा । रानिन्ह कर दारुन दुख दावा ॥
संभुचाप बड़ बोहितु पाई । चढ़े जाइ सब संगु बनाई ॥
राम बाहुबल सिंधु अपारु । चहत पारु नहिं कोउ कड़हारु ॥

दो०—राम विलोके लोग सब चित्र लिखे से देखि ।

चितई सीय कृपायतन जानी बिकल बिसेषि ॥२६०॥

देखी बिपुल बिकल बैदेही । निमिष बिहात कलप सम तेही ॥
तृपित बारि बिनु जो तनु त्यागा । मुएँ करइ का सुधा तड़ागा ॥
का बरषा सब कृषी सुखानें । समय चुकें पुनि का पछितानें ॥
अस जियँ जानि जानकी देखी । प्रभु पुलके लखि प्रीति बिसेषी ॥
गुरहिं प्रनामु मनहिं मन कीन्हा । अति लाघवँ उठाइ धनु लीन्हा ॥
दमकेउ दामिनि जिमि जब लयऊ । पुनि नभ धनु मंडल सम भयऊ ॥
लेत चढ़ावत खँचत गाढ़ें । काहुँ न लखा देख सबु ठाढ़ें ॥
तेहि छन राम मध्य धनु तोरा । भरे भुवन धुनि घोर कठोरा ॥

छं०—भरे भुवन घोर कठोर रव रवि बाजि तजि मारगु चले ।

चिक्करहिं दिग्गज डोल महि अहि कोल कूरुम कलमले ॥

सुर असुर मुनि कर कान दीन्हें सकल बिकल बिचारहीं ।

कोदंड खंडेउ राम तुलसी जयति बचन उचारहीं ॥

सो०—संकर चापु जहाजु सागरु रघुबर बाहुबलु ।

बूड़ सो सकल समाजु चढ़ा जो प्रथमहिं मोह बस ॥२६१॥

प्रभु दोउ चापखंड महि डारे । देखि लोग सब भए सुखारे ॥
कौसिकरूप पयोनिधि पावन । प्रेम बारि अवगाहु सुहावन ॥

रामरूप राकेसु निहारी । बद्धत बीचि पुलकावलि भारी ॥
 बाजे नभ गहगहे निसाना । देवबधू नाचहिं करि गाना ॥
 ब्रह्मादिक सुर सिद्ध मुनीसा । प्रभुहि प्रसंसहिं देहिं असीसा ॥
 बरिसहिं सुमन रंग बहु माला । गावहिं किंनर गीत रसाला ॥
 रही भुवन भरि जय जय बानी । धनुषभंग धुनि जात न जानी ॥
 मुदित कहहिं जहँ तहँ नर नारी । भंजेउ राम संभुधनु भारी ॥

दो०—बंदी मागध सूतगन बिरुद बदहिं मतिधीर ।

करहिं निछावरि लोग सब हय गय धन मनि चीर ॥२६२॥

झाँझि मृदंग संख सहनाई । भेरि ढोल दुंदुभी सुहाई ॥
 बाजहिं बहु बाजने सुहाए । जहँ तहँ जुबतिन्ह मंगल गाए ॥
 सखिन्ह सहित हरषी आत रानी । सूखत धान परा जनु पानी ॥
 जनक लहेउ सुखु सोचु बिहाई । पैरत थकें थाह जनु पाई ॥
 श्रीहत भए भूप धनु टूटे । जैसैं दिवस दीप छबि छूटे ॥
 सीय सुखहि बरनिअ केहि भाँती । जनु चातकी पाइ जलु खाती ॥
 रामहि लखनु बिलोकत कैसैं । ससिहि चकोर किमोरकु जैसैं ॥
 सतानंद तब आयसु दीन्हा । सीताँ गमनु राम पहिं कीन्हा ॥

दो०—संग सखी सुंदर चतुर गावहिं मंगलचार ।

गवनी बाल मराल गति सुषमा अंग अपार ॥२६३॥

सखिन्ह मध्य सिय सोहति कैसैं । छबिगन मध्य महाछबि जैसैं ॥
 कर सरोज जयमाल सुहाई । बिख बिजय सोभा जेहिं छाई ॥
 तन सकोचु मन परम उडाहू । गूढ़ प्रेम लखि परइ न काहू ॥
 जाइ समीप राम छबि देखी । रहि जनु कुअँरि चित्र अवरेखी ॥

चतुर सखीं लखि कहा बुझाई । पहिरावहु जयमाल सुहाई ॥
 सुनत जुगल कर माल उठाई । प्रेम बिबस पहिराइ न जाई ॥
 सोहत जनु जुग जलज सनाला । समिहि सभीत देत जयमाला ॥
 गावहिं छवि अवलोकि सहेली । सियँ जयमाल राम उर मेली ॥

सो०—रघुबर उर जयमाल देखि देव बरिसहिं सुमन ।

सकुचे सकल भुआल जनु विलोकि रवि कुमुदगन ॥२६४॥

पुर अरु ब्योम बाजने बाजे । खल भए मलिन साधु सब राजे ॥
 सुर किंनर नर नाग मुनीसा । जय जय जय कहि देहिं असीसा ॥
 नाचहिं गावहिं बिबुध बधूटीं । बार बार कुसुमांजलि छूटीं ॥
 जहँ तहँ बिप्र बेद धुनि करहीं । बंदी बिरिदावलि उच्चरहीं ॥
 महि पाताल नाक जसु ब्यापा । राम बरी सिय भंजेउ चापा ॥
 करहिं आरती पुर नर नारी । देहिं निछावरि बित्त बिसारी ॥
 सोहति सीय राम कै जोरी । छवि सिंगारु बनहुँ एक ठोरी ॥
 सखीं कहहिं प्रभुपद गहु सीता । करति न चरन परस अति भीता ॥

दो०—गौतम तिय गति सुरति करि नहिं परसति पग पानि ।

मन बिहसे रघुवंसमनि प्रीति अलौकिक जानि ॥२६५॥

तब सिय देखि भूप अभिलाषे । कूर कपूत मूढ़ मन माखे ॥
 उठि उठि पहिरि सनाह अभागे । जहँ तहँ गाल बजावन लागे ॥
 लेहु छड़ाइ सोय कह कोऊ । धरि बाँधहु नृप बालक दोऊ ॥
 तोरें धनुषु चाड़ नहिं सगई । जीवत हमहि कुअँरि को बरई ॥
 जौं बिदेहु कछु करै सहाई । जीतहु समर सहित दोउ भाई ॥
 साधु भूप बोले सुनि बानी । राजसमाजहि लाज लजानी ॥

बलु प्रतापु बीरता बड़ाई । नाक पिनाकहि संग सिधाई ॥
सोइ सूरता कि अब कहूँ पाई । असि बुधितौ विधिमुहँ मसिलाई

दो०—देखहु रामहि नयन भरि तजि इरिया महु कोहु ।

लखन रोषु पावकु प्रबल जानि सलभ जनि होहु ॥२६६॥

बैनतेय बलि जिमि चह कागू । जिमि ससु चहै नाग अरि भागू ॥
जिमि चह कुसल अकारन कोही । सब संपदा चहै सिवद्रोही ॥
लोभी लोलुप कल कीरति चहई । अकलंकता कि कामी लहई ॥
हरि पद विमुख परम गति चाहा । तस तुम्हार लालचु नरनाहा ॥
कोलाहलु सुनि सीय सकानी । सखीं लवाइ गइ जहँ रानी ॥
रामु सुभायँ चले गुरु पाहीं । सिय सनेहु बरनत मन माहीं ॥
रानिन्ह सहित सोचबस सीया । अब धौं बिधिहि काह करनीया ॥
भूप बचन सुनि इत उत तकहीं । लखनु राम डर बोलि न सकहीं ॥

दो०—अरुन नयन भृकुटी कुटिल चितवत नृपन्ह सक्रोप ।

मनहुँ मत्त गजगन निरखि सिंघकिसोरहि चोप ॥२६७॥

स्वरभरु देखि बिक्कल पुर नारीं । सब मिलि देहिं महीपन्ह गारीं ॥
तेहिं अवसर सुनि सिवधनु भंगा । आयउ भृगुकुल कमल पतंगा ॥
देखि महीप सकल सकुचाने । बाज झपट जनु लवा लुकाने ॥
गौरि सरीर भूति भल भ्राजा । भाल बिसाल त्रिपुंड विराजा ॥
सीस जटा ससिबदनु सुहावा । रिस बस कलुक अरुन होइ आवा ॥
भृकुटी कुटिल नयन रिस राते । सहजहुँ चितवत मनहुँ रिसाते ॥
नृपभ कंध उर बाहु बिसाला । चारु जनेउ माल मृगछाला ॥

कटि मुनिबसन तून दुइ बाँधें । धनु सर कर कुठारु कल काँधें ॥

दो०—सांत बेषु करनी कठिन बरनि न जाइ सरूप ।

धरि मुनि तनु जनु बीर रसु आयउ जहँ सब भूप ॥२६८॥

देखत भृगुपति बेषु कराला । उठे सकल भय विकल भुआला ॥
पितु समेत कहि कहि निज नामा । लगे करन सब दंड प्रनामा ॥
जेहि सुभायँ चितवहिं हितु जानी । सो जानइ जनु आइ खुटानी ॥
जनक बहोरि आइ सिरु नावा । सीय बोलाइ प्रनामु करावा ॥
आसिप दीन्हि सखीं हरषानीं । निज समाज लँ गइ सयानीं ॥
बिस्वामित्रु मिले पुनि आई । पद सरोज मेले दोउ भाई ॥
रामु लखनु दसरथ के ढोटा । दीन्हि असीस देखि भल जोटा ॥
रामहि चितइ रहे थकिलोचन । रूप अपार मार मद मोचन ॥

दो०—बहुरि बिलोकि बिदेह सन कहहु काह अति भीर ।

पूँछत जानि अजान जिमि व्यापेउ कोपु सरीर ॥२६९॥

समाचार कहि जनक सुनाए । जेहि कारन महीप सब आए ॥
सुनत बचन फिरि अनत निहारे । देखे चापखंड महि डारे ॥
अति रिस बोले बचन कठोरा । कहु जइ जनक धनुष कै तोरा ॥
बेगि देखाउ मूढ़ न त आजू । उलटउँ महि जहँ लहितव राजू ॥
अति डरु उतरु देत नृपु नाहीं । कुटिल भूप हरषे मन माहीं ॥
सुर मुनि नाग नगर नर नारी । सोचहिं सकल त्रास उर भारी ॥
मन पछिताति सीय महतारी । बिधि अब सँवरी बात बिगारी ॥
भृगुपति कर सुभाउ सुनि सीता । अरध निमेष कलप सम बीता ॥

दो०—सभय बिलोके लोग सब जानि जानकी भीरु ।

हृदयँ न हरषु विषादु कछु बोले श्रीरघुबीरु ॥२७०॥

मासपारायण, नवाँ विश्राम

नाथ संभुधनु भंजनिहारा । होइहि केउ एक दास तुम्हारा ॥
 आयसु काह कहिअ किन मोही । सुनि रिसाइ बोले मुनि कोही ॥
 सेवकु सो जो करै सेवकाई । अरि करनी करि करिअ लराई ॥
 सुनहु राम जेहि सिवधनु तोरा । सहसबाहु सम सो रिपु मोरा ॥
 सो बिलगाउ बिहाइ समाजा । न त मारे जैहहि सब राजा ॥
 सुनि मुनि बचन लखन मुसुकाने । बोले परसुधरहि अपमाने ॥
 बहु धनुहीं तोरीं लरिकाई । कबहुँ न असि रिस कीन्हि गोसाई ॥
 एहि धनु पर ममता केहि हेतू । सुनि रिसाइ कह भृगुकुलकेतू ॥

दो०—रे नृप बालक काल बस बोलत तोहि न सँभार ।

धनुही सम तिपुरारि धनु बिदित सकल संसार ॥२७१॥

लखन कहा हँसि हमरें जाना । सुनहु देव सब धनुष समाना ॥
 का छति लाभु जून धनु तोरें । देखा राम नयन के भोरें ॥
 छुअत टूट रघुपतिहु न दोस्त्र । मुनि बिनु काज करिअ कत रोस्त्र ॥
 बोले चितइ परसु की ओग । रे सठ सुनेहि सुभाउ न मोग ॥
 बालकु बोलि बधउँ नहि तोही । केवल मुनि जड़ जानहि मोही ॥
 बाल ब्रह्मचारी अति कोही । बिस्व बिदित छत्रियकुल द्रोही ॥
 भुजबल भूमि भूप बिनु कीन्ही । विपुल बार महिदेवन्ह दीन्ही ॥
 सहसबाहु भुज छेदनिहारा । परसु बिलोकु महीपकुमारा ॥

दो०—मातु पितहि जनि सोचवस करसि महीसकिसोर ।

गर्भन्ह के अर्भक दलन परसु मोर अति घोर ॥२७२॥

बिहसि लखनु बोले मृदु बानी । अहो मुनीसु महा भटमानी ॥
पुनि पुनि मोहि देखाव कुठारू । चहत उड़ावन फूँकि पहारू ॥
इहाँ कुम्हड़बतिया कोउ नाहीं । जे तरजनी देखि मरि जाहीं ॥
देखि कुठारू सरासन बाना । मैकलु कहा सहित अभिमाना ॥
भृगुसुत समुझि जनेउ बिलोकी । जो कलु कहहु सहउँ रिस रोकी ॥
सुर महिसुर हरिजन अरु गाई । हमरें कुल इन्ह पर न सुराई ॥
बधे पापु अपकीरति हारें । मारतहूँ पा परिअ तुम्हारें ॥
कोटि कुलिस सम बचनु तुम्हारा । व्यर्थ धरहु धनु बान कुठारा ॥

दो०—जो बिलोकि अनुचित कहेउँ छमहु महामुनि धीर ।

सुनि सरोष भृगुबंसमनि बोले गिरा गभीर ॥२७३॥

कौंसिक सुनहु मंद यहु बालकु । कुटिल कालवस निज कुल घालकु ॥
भानु बंस राकेस कलंकू । निपट निरंकुस अबुध असंकू ॥
काल कवलु होइहि छन माहीं । कहउँ पुकारि खोरि मोहि नाहीं ॥
तुम्ह डटकहु जौं चहहु उबारा । कहि प्रतापु बलु रोषु हमारा ॥
लखन कहेउ मुनि सुजसु तुम्हारा । तुम्हहि अछत को बरनै पारा ॥
अपने मुँह तुम्ह आपनि करनी । बार अनेक भाँति बहु बरनी ॥
नहिँ संतोषु त पुनि कलु कहहू । जनि रिस रोकि दुसह दुख सहहू ॥
बीरव्रती तुम्ह धीर अछोभा । गारी देत न पावहु सोभा ॥

दो०—सूर समर करनी करहिं कहि न जनावहिं आपु ।

बिद्यमान रन पाइ रिपु कायर कथहिं प्रतापु ॥२७४॥

तुम्ह तौ कालु डाँक जनु लावा । बार बार मोहि लागि बोलावा ॥
 सुनत लखन के बचन कठोरा । परसु सुधारि धरेउ कर घोरा ॥
 अब जनि देइ दोसु मोहिलोगू । कटुबादी बालकु बध जोगू ॥
 बाल बिलोकि बहुत मैं बाँचा । अब यहु मरनिहार भा साँचा ॥
 कौसिक कहा छमिअ अपराधू । बाल दोष गुन गनहिं न साधू ॥
 खर कुठार मैं अकरुन कोही । आगें अपराधी गुरुद्रोही ॥
 उतर देत छोड़उँ बिनु मारें । केवल कौसिक सील तुम्हारें ॥
 न त एहि काटि कुठार कठोरें । गुरहि उरिन होतेउँ श्रम थोरें ॥

दो०—गाधिसूनु कह हृदयँ हँसि मुनिहि हरिअरइ सूझ ।

अयमय खाँड़ न उखमय अजहुँ न बूझ अबूझ ॥२७५॥

कहेउ लखन मुनि सीलु तुम्हारा । को नहिं जान बिदित संसारा ॥
 माता पितहि उरिन भए नीकें । गुररिनु रहा सोचु बड़ जीकें ॥
 सो जनु हमरेहि माथे काढ़ा । दिन चलि गए ब्याज बड़ बाढ़ा ॥
 अब आनिअ ब्यवहरिआ बोली । तुरत देउँ मैं थैली खोली ॥
 सुनि कटु बचन कुठार सुधारा । हाय हाय सब सभा पुकारा ॥
 भृगुवर परसु देखावहु मोही । बिप्र बिचारि बचउँ नृपद्रोही ॥
 मिले न कबहुँ सुभट रन गाढ़े । द्विज देवता घरहि के बाढ़े ॥
 अनुचित कहि सब लोग पुकारे । रघुपति सयनहिं लखनु नेवारे ॥

दो०—लखन उतर आहुति सरिस भृगुवर कोपु कसानु ।

बढ़त देखि जल सम बचन बोले रघुकुल भानु ॥२७६॥

नाथ करहु बालक पर छोहू । सूध दूधमुख करिअ न कोहू ॥
 जौ पै प्रभु प्रभाउ कछु जाना । तौ कि बराबरि करत अयाना ॥

जौं लरिका कलु अचगरि करहीं । गुर पितु मातु मोद मन भरहीं ।
करिअ कृपा सिसु सेवक जानी। तुम्ह सम सील धीर मुनि ग्यानी॥
राम बचन सुनि कलुक जुड़ाने । कहि कलु लखनु बहुरि मुसुकाने
हँसत देखि नख सिख रिस व्यापी । राम तोर भ्राता बड़ पापी ॥
गौर सरीर स्याम मन माहीं । कालकूटमुख पयमुख नाहीं ॥
सहज टेढ़ अनुहरइ न तोही । नीचु मीचु सम देख न मोही ॥
दो०—लखन कहेउ हँसि सुनहु मुनि क्रोधु पाप कर मूल ।

जेहि बस जन अनुचित करहिं चरहिं बिस्व प्रतिकूल ॥ २७७ ॥
मैं तुम्हार अनुचर मुनिराया । परिहरि कोपु करिअ अब दाया ॥
टूट चाप नहिं जुरिहि रिसाने । बैठिअ होइहिं पाय पिराने ॥
जौं अति प्रिय तौ करिअ उपाई । जोरिअ कोउ बड़ गुनी बोलाई ॥
बोलत लखनहिं जनकु डेराहीं । मष्ट करहु अनुचित भल नाहीं ॥
थर थर काँपहिं पुर नर नारी । छोट कुमार खोट बड़ भारी ॥
भृगुपति सुनि सुनि निर्भय बानी । रिस तन जरइ होइ बल हानी ॥
बोले रामहि देइ निहोरा । बचउँ बिचारि बंधु लघु तोरा ॥
मनु मलीन तनु सुंदर कैसें । बिष रस भरा कनक घटु जैसें ॥
दो०—सुनि लछिमन बिहसे बहुरि नयन तरेरे राम ।

गुर समीप गवने सकुचि परिहरि बानी बाम ॥ २७८ ॥
अति विनीत मृदु सीतल बानी । बोले रामु जोरि जुग पानी ॥
सुनहु नाथ तुम्ह सहज सुजाना । बालक बचनु करिअ नहिं काना ॥
बररै बालकु एक सुभाऊ । इन्हहि न संत बिदूषहिं काऊ ॥
तेहिं नाहीं कलु काज बिगारा । अपराधी मैं नाथ तुम्हारा ॥

कृपा कोपु बधु बँधव गोसाईं । मो पर करिअ दास की नाई ॥
 कहिअ बेगि जेहि बिधि रिस जाई । मुनिनायक सोइ करौं उपाई ॥
 कह मुनि राम जाइ रिस कैसें । अजहुँ अनुज तव चितव अनैसैं ॥
 एहि कें कंठ कुठारु न दीन्हा । तौ मैं काह कोपु करि कीन्हा ॥
 दो०—गर्भ स्रवहिं अवनिप रवनि सुनि कुठार गति घोर ।

परसु अछत देखउँ जिअत बैरी भूपकिसोर ॥ २७९ ॥

बहइ न हाथु दहइ रिस छाती । भा कुठारु कुंठित नृपघाती ॥
 भयउ वाम बिधि फिरेउ सुभाऊ । मोरे हृदयँ कृपा कसि काऊ ॥
 आजु दया दुखु दुसह सहावा । सुनि सौमित्रि बिहसि सिरु नावा
 बाउ कृपा मूरति अनुकूला । बोलत बचन झरत जनु फूला ॥
 जौं पै कृपाँ जरिहिं मुनि गाता । क्रोध भएँ तनु राख बिधाता ॥
 देखु जनक हठि बालकु एहू । कीन्ह चहत जड़ जमपुर गेहू ॥
 बेगि करहु किन आँखिन्ह ओटा । देखत छोट खोट नृप ढोटा ॥
 बिहसे लखनु कहा मन माहीं । मूढ़े आँखि कतहुँ कोउ नाहीं ॥
 दो०—परसुरामु तव राम प्रति बोले उर अति क्रोधु ।

संभु सरारुनु तोरि सठ करसि हमार प्रबोधु ॥ २८० ॥

बंधु कहइ कटु संमत तोरें । तू छल बिनय करसि कर जोरें ॥
 करु परितोषु मोर संग्रामा । नाहिं त छाड़ कहाउब रामा ॥
 छलु तजि करहि समरु सिवद्रोही । बंधु सहित न त मारउँ तोही ॥
 भगुपति बकहिं कुठार उठाएँ । मन मुसुकाहिं रामु सिर नाएँ ॥
 गुनह लखन कर हम पर रोषू । कतहुँ सुधाइहु ते बड़ दोषू ॥
 टेढ़ जानि सब बंदइ काहू । बक्र चंद्रमहि ग्रसइ न राहू ॥

राम कहेउ रिस तजिअ मुनीसा । कर कुठारु आगें यह सीसा ॥
जेहि रिस जाइ करिअ सोइ स्वामी । मोहि जानिअ आपन अनुगामी
दो०—प्रभुहि सेवकहि समरु कस तजहु बिप्रवर रोसु ।

बेषु बिलोकें कहेसि कछु बालकह नहिँ दोसु ॥ २८१ ॥

देखि कुठार बान धनु धारी । मै लरिकहि रिस बीरु बिचारी ॥
नासु जान पै तुम्हहि न चीन्हा । बंस सुभायँ उतरु तेहिँ दीन्हा ॥
जौ तुम्ह औतेहु मुनि की नाई । पद रज सिर सिसु धरत गोमाई ॥
छमहु चूक अनजानत केरी । चहिअ बिप्र उर कृपा घनेरी ॥
हमहि तुम्हहि सरिबरि कसि नाथा । कहहु न कहाँ चरन कहँ माथा ॥
राम मात्र लघु नाम हमारा । परसु सहित बड़ नाम तोहारा ॥
देव एकु गुनु धनुष हमारें । नव गुन परम पुनीत तुम्हारें ॥
सब प्रकार हम तुम्ह सन हारे । छमहु बिप्र अपराध हमारे ॥
दो०—बार बार मुनि बिप्र बर कहा राम सन राम ।

बोले भृगुपति सरुष हसि तहूँ बंधु सम बाम ॥ २८२ ॥
निपटहिँ द्विज करि जानहि मोही । मैँ जस बिप्र सुनावउँ तोही ॥
चाप स्रवा सर आहुति जानू । कोपु मोर अति घोर कसानू ॥
समिधिँ सेन चतुरंग सुढाई । महा महीष भए पसु आई ॥
मैँ एहिँ परसु काटि बलि दीन्हे । समर जग्य जप कोटिन्ह कीन्हे ॥
मोर प्रभाउ बिदित नहिँ तोरें । बोलसि निदरि बिप्र के भोरें ॥
मंजेउ चापु दापु बड़ बाढ़ा । अहमिति मनहुँ जीति जगु ठाढ़ा
राम कहा मुनि कहहु बिचारी । रिस अति बड़ि लघु चूक हमारी ॥
छुअतहिँ दूट पिनाक पुराना । मैँ केहि हेतु करौँ अभिमाना ॥

दो०—जौं हम निदरहिं बिप्र बदि सत्य सुनहु भृगुनाथ ।

तौ अस को जग सुभटु जेहि भय बस नावहिं माथ ॥ २८३ ॥

देव दनुज भूपति भट नाना । समबल अधिक होउ बलवाना ॥

जौं रन हमहि पचारै कोऊ । लरहिं सुखेन कालु किन होऊ ॥

छत्रि अतनु धरि समर सकाना । कुल कलंकु तेहि पावँर आना ॥

कहउँ सुभाउ न कुलहि प्रसंसी । कालहु डरहिं न रन रघुवंसी ॥

बिप्र बंस कै असि प्रभुताई । अभय होइ जो तुम्हहि डेराई ॥

सुनि मृदु गूढ़ बचन रघुपति के । उधरे पटल परसुधर मति के ॥

राम रमापति कर धनु लेहू । खैंचहु मिटै मोर संदेह ॥

देत चापु आपुहिं चलि गयऊ । परसुराम मन बिसमय भयऊ ॥

दो०—जाना राम प्रभाउ तब पुलक प्रफुलित गात ।

जोरि पानि बोले बचन हृदयँ न प्रेमु अमात ॥ २८४ ॥

जय रघुवंस बनज बन भानू । गहन दनुज कुल दहन कृसानू ॥

जय सुर बिप्र धेनु हितकारी । जय मद मोह कोह भ्रम हारी ॥

बिनय सील करुना गुन सागर । जयति बचन रचना अति नागर ॥

सेवक सुखद सुभग सब अंगा । जय सरीर छवि कोटि अनंगा ॥

करौं काह मुख एक प्रसंसा । जय महेस मन मानस हंसा ॥

अनुचित बहुत कहेउँ अग्याता । छमहु छमामंदिर दोउ आता ॥

कहि जय जय जय रघुकुलकेतू । भृगुपति गए बनहि तप हेतू ॥

अपभयँ कुटिल महीप डेराने । जहँ तहँ कायर गवँहि पराने ॥

दो०—देवन्ह दीन्हिं दुंदुभी प्रभु पर वरषहिं फूल ।

हरषे पुर नर नारि सब मिटी मोहमय सूल ॥ २८५ ॥

अति गहगहे नाजने बाजे । सबहिं मनोहर मंगल साजे ॥
 जूथ जूथ मिलि सुमुखि सुनयनीं । करहिं गान कल कोकिलबयनीं ॥
 सुखु बिदेह कर बरनि न जाई । जन्म दरिद्र मनहुं निधि पाई ॥
 बिगत त्रास भइ सीय सुखारी । जनु बिधु उदयँ चक्रोरकुमारी ॥
 जनक कीन्ह कौसिकहि प्रनामा ॥ प्रभु प्रसाद धनु भंजेउ रामा ॥
 मोहि कृतकृत्य कीन्ह दुहुं भाई । अब जो उचित सो कहि अगोसाई
 कह मुनि सुनु नरनाथ प्रबोना । रहा बिबाहु चाप आधीना ॥
 दूटतहीं धनु भयउ बिबाहु । सुर नर नाग बिदित सब काहु ॥

दो०—तदपि जाइ तुम्ह करहु अब जथा बंस व्यवहारु ।

बूझि विप्र कुलवृद्ध गुर वेद विदित आचारु ॥२८६॥

दूत अवधपुर पठवहु जाई । आनहिं नृपदसरथहिं बोलाई ॥
 मुदित राउ कहि भलेहिं कृपाला ॥ पठए दूत बोलि तेहि काला ॥
 बहुरि महाजन सकल बोलाए । आइ सबन्हि सादर सिर नाए ॥
 हाट बाट मंदिर सुरबासा । नगरु सँवारहु चारिहुँ पासा ॥
 हरषि चले निज निज गृह आए । पुनि परिचारक बोलि पठाए ॥
 रचहु बिचित्र बितान बनाई । सिर धरि बचन चले सचु पाई ॥
 पठए बोलि गुनी तिन्ह नाना । जे बितान बिधि कूसल सुजाना ॥
 विधिहि बंदि तिन्ह कीन्ह अरंभा । बिरचे कनक कदलि के खंभा ॥

दो०—हरित मनिन्ह के पत्र फल पदुम राग के फूल ।

रचना देखि बिचित्र अति मनु बिरंचि कर भूल ॥२८७॥

बेनु हरित मनिमय सब कीन्हे । सरल सपरब परहिं नहिं चीन्हे ॥
 कनक कलित अहिबेलि बनाई । लखि नहिं परइ सपरन सुहाई ॥

तेहि के रचि पचि बंध बनाए । बिच बिच मुकुता दाम सुहाए ॥
 मानिक मरकत कुलिस पिरोजा । चीरि कोरि पचि रचे सरोजा ॥
 किए भृंग बहुरंग बिहंगा । गुंजहि कूजहि पवन प्रसंगा ॥
 सुर प्रतिमा खंभन गढ़ि काढ़ी । मंगल द्रव्य लिए सब ठाढ़ी ॥
 चौकें भाँति अनेक पुराई । सिंधुर मनिमय सहज सुहाई ॥

दो०—सौरभ पल्लव सुभग सुठि किए नीलमनि कोरि ।

हेम बौर मरकत धवरि लसत पाटमय डोरि ॥२८८॥

रचे रुचिर बर बंदनिवारे । मनहुँ मनोभवँ फंद सँवारे ॥
 मंगल कलस अनेक बनाए । ध्वज पताक पट चमर सुहाए ॥
 दीप मनोहर मनिमय नाना । जाइ न बरनि बिचित्र विताना ॥
 जेहि मंडप दुलहिनि बैदेही । सो बरनै असि मति कबि केही ॥
 दूलहु रामु रूप गुन सागर । सो बितानु तिहुँ लोक उजागर ॥
 जनक भवन कै सोभा जैसी । गृह गृह प्रतिपुर देखिअ तैसी ॥
 जेहि तेरहुति तेहि समय निहारी । तेहि लघु लगहि भुवन दस चारी
 जो संपदा नीच गृह सोहा । सो बिलोकि सुरनायक मोहा ॥

दो०—बसइ नग्न जेहि लच्छि करि कपट नारि वर वेपु ।

तेहि पुर कै सोभा कहत सकुचहिँ सारद सेषु ॥२८९॥

पहुँचे दूत राम पुर पावन । हरषे नगर बिलोकि सुहावन ॥
 भूप द्वार तिन्ह खवरि जनार्ई । दसरथ नृपसुनि लिए बोलाई ॥
 करि प्रनामु तिन्ह पाती दीन्ही । मुदित महीप आपु उठि लीन्ही ॥
 बारि बिलोचन बाँचत पाती । पुलक गात आई भरि छाती ॥
 रामु लखनु उर कर बर चीठी । रहि गए कहत न खाटी मीठी ॥

पुनि धरि धीर पत्रिका बाँची । हरषी सभा बात सुनि साँची ॥
खेलत रहे तहाँ सुधि पाई । आए भरतु सहित हित भाई ॥
पूछत अति सनेहँ सकुचाई । तात कहाँ तें पाती आई ॥

दो०—कुसल प्रान प्रिय बंधु दोउ अहहिँ कहहु केहि देस ।

सुनि सनेह साने वचन वाची बहुरि नरेस ॥२९०॥

सुनि पाती पुलके दोउ भ्राता । अधिक सनेहु समात न गाता ॥
प्रीति पुनीत भरत कै देखी । सकल सभाँ सुखु लहेउ बिसेषी ॥
तब नृप दूत निकट बैठारे । मधुर मनोहर वचन उचारे ॥
मैआ कहहु कुसल दोउ वारे । तुम्ह नीकें निज नयन निहारे ॥
स्यामल गौर धरें धनु भाथा । वय किसोर कौसिक मुनि साथा ॥
पहिचानहु तुम्ह कहहु सुभाऊ । प्रेम बिबस पुनि पुनि कह राऊ ॥
जा दिन तें मुनि गए लवाई । तब तें आजु साँचि सुधि पाई ॥
कहहु विदेह कवन बिधि जाने । सुनि प्रिय वचन दूत मुसुकाने ॥

दो०—सुनहु महीपति मुकुट मनि तुम्ह सम धन्य न कोउ ।

रामु लखनु जिन्ह के तनय बिस्व बिभूषन दोउ ॥२९१॥

पूछन जोगु न तनय तुम्हारे । पुरुषसिंघ तिहु पुर उजिआरे ॥
जिन्ह के जस प्रताप कै आगे । समि मलीन रबि सीतल लागे ॥
तिन्ह कहँ कहिअ नाथ किमि चीन्हे । देखिअ रबि कि दीप कर लीन्हे
सीय स्वयंबर भूप अनेका । समिटे सुभट एक तें एका ॥
संभु सरासनु काहुँ न टारा । हारे सकल बीर बरिआरा ॥
तीनि लोक महँ जे भटमानी । सभ कै सकति संभु धनु भानी ॥
सकइ उठाइ सरासुर मेरू । सोउ हियँ हारि गयउ करि फेरू ॥

जेहि कौतुक सिव सैलु उठावा । सोउ तेहि सभाँ पराभउ पावा ॥

दो०—तहाँ राम रघुवंस मनि सुनिअ महा महिपाल ।

भंजेउ चाप प्रयास बिनु जिमि गज पंकज नाल ॥२९२॥

सुनि सरोष भृगुनायक आए । बहुत भाँति तिन्ह आँखि देखाए ॥
देखि राम बलु निज धनु दीन्ह ॥ करि बहु विनय गवनु बन कीन्ह ॥
राजन राम अतुलबल जैसैं । तेज निधान लखनु पुनि तैसैं ॥
कंपहिं भूप बिलोकत जाकैं । जिमि गज हरि किसोर के ताकैं ॥
देव देखि तव बालक दोऊ । अब न आँखि तर आवत कोऊ ॥
दूत बचन रचना प्रिय लागी । प्रेम प्रताप बीर रस पागी ॥
सभा समेत राउ अनुरागे । दूतन्ह देन निछावरि लागे ॥
कहि अनीति ते मूढ़हिं काना । धरमु बिचारि सबहिं सुखु माना ॥

दो०—तब उठि भूप बसिष्ट कहूँ दीन्ह पत्रिका जाइ ।

कथा सुनाई गुरहि सब सादर दूत बोलाइ ॥२९३॥

सुनि बोले गुर अति सुखु पाई । पुन्य पुरुष कहूँ महि सुख छाई ॥
जिमि सरिता सागर महूँ जाहीं । जद्यपि ताहि कामना नाहीं ॥
तिमि सुख संपति विनहिं बोलाएँ । धरमसील पहिं जाहिं सुभाएँ ॥
तुम्ह गुर विप्र धेनु सुर सेवी । तसि पुनीत कौसल्या देवी ॥
सुकृती तुम्ह समान जग माहीं । भयउ न है कोउ होनेउ नाहीं ॥
तुम्ह ते अधिक पुन्य बड़ काकैं । राजन राम सरिस सुत जाकैं ॥
बीर विनीत धरम ब्रत धारी । गुन सागर बर बालक चारी ॥
तुम्ह कहूँ सर्व काल कल्याणा । सजहु बरात बजाइ निसाना ॥

दो०—चलहु बेगि सुनि गुर बचन भलेहिं नाथ सिरु नाइ ।

भूपति गवने भवन तब दूतन्ह बासु देवाइ ॥ २९४ ॥
 राजा सबु रनिवास बोलाई । जनक पत्रिका बाचि सुनाई ॥
 सुनि संदेसु सकल हरषानी । अपर कथा सब भूप बखानी ॥
 प्रेम प्रफुल्लित राजहिं रानी । मनहुं सिखिनि सुनि बारिद बानी
 मुदित असीस देहिं गुर नारी । अति आनंद मगन महतारी ॥
 लेहिं परस्पर अति प्रिय पाती । हृदयँ लगाइ जुड़ावहिं छाती ॥
 राम लखन कै कीरति करनी । बारहिं बार भूप बर बरनी ॥
 मुनि प्रसादु कहि द्वार सिधाए । रानिन्ह तब महिदेव बोलाए ॥
 दिए दान आनंद समेता । चले बिप्रबर आसिष देता ॥

सो०—जाचक लिए हँकारि दीन्हि निछावरि कोटि बिधि ।

चिरु जीवहुं सुत चारि चक्रवर्ति दसरत्थ के ॥ २९५ ॥
 कहत चले पहिरें पट नाना । हरषि हने गहगहे निसाना ॥
 समाचार सब लोगन्ह पाए । लागे घर घर होन बधाए ॥
 भुवन चारि दस भरा उछाहू । जनकसुता रघुबीर बिआहू ॥
 सुनि सुभ कथा लोग अनुरागे । मग गृह गलीं सँवारन लागे ॥
 जद्यपि अवध सदैव सुहावनि । राम पुरी मंगलमय पावनि ॥
 तदपि प्रीति कै प्रीति सुहाई । मंगल रचना रची बनाई ॥
 ध्वज पताक पट चामर चारू । छावा परम बिचित्र बजारू ॥
 कनक कलस तोरन मनि जाला । हरद दूब दधि अच्छत माला ॥

दो०—मंगलमय निज निज भवन लोगन्ह रचे बनाइ ।

बीथी सींची चतुरसम चौकें चारु पुराइ ॥ २९६ ॥

जहँ तहँ जूथ जूथ मिलि भामिनि। सजि नव सप्त सकल दुति दामिनि
 बिधुबदनीं मृग सावक लोचनि । निज सरूप रति मानु बिमोचनि
 गावहिं मंगल मंजुल बानीं । सुनि कलरव कलकंठि लजानीं
 भूप भवन किमि जाइ बखाना । बिस्व बिमोहन रचेउ बिताना ॥
 मंगल द्रव्य मनोहर नाना । राजत बाजत बिपुल निसाना ॥
 कतहुँ बिरिद बंदी उच्चरहीं । कतहुँ बेद धुनि भूसुर करहीं ॥
 गावहिं सुंदरि मंगल गीता । लै लै नामु रामु अरु सीता ॥
 बहुत उछाहु भवनु अति थोरा । मानहुँ उमगि चला चहु ओरा ॥
 दो०—सोभा दसरथ भवन कइ को कवि बरनै पार ।

जहाँ सकल सुर सीस मनि राम लीन्ह अवतार ॥ २९७ ॥
 भूप भरत पुनि लिए बोलाई । हथ गय स्यंदन साजहु जाई ॥
 चलहु बेगि रघुबीर बराता । सुनत पुलकपूरे दोउ आता ॥
 भरत सकल साहनी बोलाए । आयसु दीन्ह मुदित उठि धाए ॥
 रचि रुचिजीन तुरग तिन्ह साजे । बरन बरन बर बाजि बिराजे ॥
 सुभग सकल सुठि चंचल करनी । अय इव जरत धरत पग धरनी ॥
 नाना जाति न जाहिं बखाने । निदरि पवनु जनु चहत उड़ाने ॥
 तिन्ह सब छयल भए असवारा । भरत सरिस बय राजकुमारा ॥
 सब सुंदर सब भूषन धारी । कर सर चाप तून कटि भारी ॥
 दो०—छरे छवीले छयल सब सूर सुजान नवीन ।

जुग पदचर असवार प्रति जे असिकला प्रवीन ॥ २९८ ॥
 बाँधे बिरद बीर रन गाढ़े । निकसि भए पुर बाहेर ठाढ़े ॥
 फेरहिं चतुर तुरग गति नाना । हरपहिं सुनि सुनि पनव निसाना ॥

रथ सारथिन्ह विचित्र बनाए । ध्वज पताक मनि भूषन लाए ॥
 चँवर चारु किंकिनि धुनि करहीं । भानु जान सोभा अपहरहीं ॥
 सावँकरन अगनित हय होते । ते तिन्ह रथन्ह सारथिन्ह जोते ॥
 सुंदर सकल अलंकृत सोहे । जिन्हहि बिलोकत मुनि मन मोहे
 जे जल चलहिं थलहि की नाई । टाप न बूढ़ बेग अधिकाई ॥
 अस्त्र सस्त्र सबु साजु बनाई । रथी सारथिन्ह लिए बोलाई ॥
 दो०—चढ़ि चढ़ि रथ याहेर नगर लागी जुरन बरात ।

होत सगुन सुंदर सबहि जो जेहि कारज जात ॥ २९९ ॥
 कलित करिबरन्हि परीं अँबारीं । कहिन जाहिं जेहि भाँति सँवारीं
 चले मत्त गज घंट विराजी । मनहुँ सुभग सावन घनराजी ॥
 बाहन अपर अनेक विधाना । सिबिका सुभग सुखासन जाना
 तिन्ह चढ़ि चले विप्रवर वृंदा । जनु तनु धरें सकल श्रुति छंदा ॥
 मागध सूत बंदि गुन गायक । चले जान चढ़ि जो जेहि लायक ॥
 वेसर ऊँट वृषभ बहु जाती । चले वस्तु भरि अगनित भाँती ॥
 कोटिन्ह काँवरि चले कहारा । विविध वस्तु को बरनै पारा ॥
 चले सकल सेवक समुदाई । निज निज साजु समाजु बनाई ॥
 दो०—सब कें उर निर्भर हरपु पूरित पुलक सरीर ।

कबहिं देखिवे नयन भरि रामु लखनु दोउ बीर ॥ ३०० ॥
 गरजहिं गज घंटा धुनि घोरा । रथ रव बाजि हिंस चहु ओरा ॥
 निदरि घनहि घुर्मरहिं निसाना । निज पराइ कछु सुनिअन काना
 महा भीर भूपति के द्वारें । रज होइ जाइ पषान पवारें ॥
 चढ़ी अटारिन्ह देखहिं नारीं । लिउँ आरती मंगल थारीं ॥

गावहिं गीत मनोहर नाना । अति आनंद न जाइ बखाना ॥
 तब सुमंत्र दुइ स्यंदन साजी । जोते रवि हय निंदक बाजी ॥
 दोउ रथ रुचिर भूप पहिं आने । नहिं सारद पहिं जाहिं बखाने ॥
 राज समाजु एक रथ साजा । दूसर तेज पुंज अति भ्राजा ॥

दो०—तेहिं रथ रुचिर बसिष्ठ कहूँ हरषि चढ़ाइ नरेसु ।

आपु चढ़ेउ स्यंदन सुमिरि हर गुर गौरि गनेसु ॥ ३०१ ॥

सहित बसिष्ठ सोह नृप कैसैं । सुर गुर मंग पुरंदर जैसैं ॥
 करिकुल रीति बेद बिधि राऊ । देखि सबहि सब भाँति बनाऊ ॥
 सुमिरि रामु गुर आयसु पाई । चले महीपति संख बजाई ॥
 हरषे बिबुध बिलोकि बराता । बरषहिं सुमन सुमंगल दाता ॥
 भयउ कोलाहल हय गय गाजे । ब्योम बरात बाजने बाजे ॥
 सुर नर नारि सुमंगल गाई । सरम राग बाजहिं सहनाई ॥
 घंट घंटी धुनि बरनि न जाहीं । सरव करहिं पाइक फहराहीं ॥
 करहिं बिदूषक कौतुक नाना । हास कुसल कल गान सुजाना ॥

दो०—तुरग नचावहिं कुअँर बर अकनि मृदंग निसान ।

नागर नट चित्पहिं चकित डगहिं न ताल बँधान ॥ ३०२ ॥

बनइ न बरनत बनी बराता । होहिं सगुन सुंदर सुभदाता ॥
 चारा चाषु बाम दिसि लेई । मनहुँ सकल मंगल कहि देई ॥
 दाहिन काग सुखेत सुहावा । नकुल दरसु सब काहूँ पावा ॥
 सानुकूल बह त्रिविध बयारी । सघट सबाल आव बर नारी ॥
 लोवा फिरि फिरि दरसु देखावा । सुरभी सनमुख सिसुहि पिआवा ॥
 मृगमाला फिरि दाहिनि आई । मंगल गन जनु दीन्हि देखाई ॥

छेमकरी कह छेम बिसेषी । स्यामा बाम सुतरु पर देखी ॥
सनमुख आयउ दधि अरु मीना । कर पुस्तक दुइ बिप्र प्रबीना ॥

दो०—मंगलमय कल्याणमय अभिमत फल दातार ।

जनु सब साचे होन हित भए सगुन एक बार ॥ ३०३ ॥
मंगल सगुन सुगम सब ताकें । सगुन ब्रह्म सुंदर सुत जाकें ॥
राम सरिस बरु दुलहिनि सीता । समधी दसगथु जनकु पुनीता ॥
सुनि अस व्याहु सगुन सब नाचे । अब कीन्हे बिरंचि हम साँचे ॥
एहि बिधि कीन्ह बरात पयाना । हय गय गाजहिं हने निसाना ॥
आवत जानि भानुकुल केतू । सरितन्हि जनक बँधाए सेतू ॥
बीच बीच बर बास बनाए । सुरपुर सरिस संपदा छाए ॥
असन सयन बर बसन सुहाए । पावहिं सब निज निज मन भाए ॥
नित नूतन सुख लखि अनुकूले । सकल बरातिन्ह मंदिर भूले ॥

दो०—आवत जानि बरात बर सुनि गहगहे निसान ।

सजि गज रथ पदचर तुरग लेन चले अगवान ॥ ३०४ ॥

मासपारायण, दसवाँ विश्राम

कनक कलस भरि कोपर थारा । भाजन ललित अनेक प्रकारा ॥
भरे सुधासम सब पकवाने । नाना भाँति न जाहिं बखाने ॥
फल अनेक बर बस्तु सुहाई । हरषि भेंट हित भूप पठाई ॥
भूषन बसन महामनि नाना । खग मृग हय गय बहुबिधि जाना ॥
मंगल सगुन सुगंध सुहाए । बहुत भाँति महिपाल पठाए ॥
दधि चिउरा उपहार अपारा । भरि भरि काँवरि चले कहारा ॥

अगवानन्ह जब दीखि बराता । उर आनंदु पुलक भर गाता ॥
देखि बनाव सहित अगवाना । मुदित बरातिन्ह हने निसाना ॥

दो०—हरषि परसपर मिलन हित कछुक चले बगमेल ।

जनु आनंद समुद्र दुइ मिलत बिहाइ सुबेल ॥ ३०५ ॥
बरषि सुमन सुर सुंदरि गावहिं । मुदित देव दुदुंभीं बजावहिं ॥
बस्तु सकल राखीं नृप आगें । बिनय कीन्हि तिन्ह अति अनुरागें
प्रेम समेत रायें सबु लीन्हा । भै बकसीस जाचकन्हि दीन्हा ॥
करि पूजा मान्यता बड़ाई । जनवासे कहूँ चले लवाई ॥
बसन बिचित्र पाँवड़े परहीं । देखि धनदु धन मदु परिहरहीं ॥
अति सुंदर दीन्हेउ जनवासा । जहँ सब कहूँ सब भाँति सुपासा ॥
जानी सियँ बरात पुर आई । कछु निज महिमा प्रगटि जनाई ॥
हृदयँ सुमिरि सब सिद्धि बोलाई । भूप पहुनई करन पठाई ॥

दो०—सिधि सब सिय आयसु अकनि गई जहाँ जनवास ।

लिऐँ संपदा सकल सुख सुरपुर भोग विलास ॥ ३०६ ॥
निज निज वास बिलोकि बराती । सुरसुख सकल सुलभ सब भाँती
बिभव भेद कछु कोउ न जाना । सकल जनक कर करहिं बखाना ॥
सिय महिमा रघुनायक जानी । हरषे हृदयँ हेतु पहिचानी ॥
पितु आगमनु सुनत दोउ भाई । हृदयँ न अति आनंदु अमाई ॥
सकुचन्ह कहि न सकत गुरु पाहीं । पितु दरसन लालचु मन माहीं ॥
बिस्वामित्र बिनय बड़ि देखी । उपजा उर संतोषु बिसेषी ॥
हरषि बंधु दोउ हृदयँ लगाए । पुलक अंग अंबक जल छाए ॥
चले जहाँ दसरथु जनवासे । मनहुँ सरोबर तकेउ पिआसे ॥

दो०—भूप बिलोके जबहिं मुनि आवत सुतन्ह समेत ।

उठे हरषि सुखसिंधु महुँ चले थाह सी लेत ॥ ३०७ ॥

मुनिहि दंडवत कीन्ह महीसा । बार बार पद रज धरि सीसा ॥
कौसिक राउ लिए उर लाई । कहि असीस पूछी कुसलाई ॥
पुनि दंडवत करत दोउ भाई । देखि नृपति उर सुखु न समाई ॥
सुत हियँ लाइ दुसह दुख मेटे । मृतक सरीर प्राण जनु भेंटे ॥
पुनि बसिष्ठ पद सिर तिन्ह नाए । प्रेम मुदित मुनिबर उर लाए ॥
बिप्र बृंद बंदे दुहुँ भाई । मनभावती असीसें पाई ॥
भरत सहानुज कीन्ह प्रनामा । लिए उठाइ लाइ उर रामा ॥
हरषे लखन देखि दोउ भ्राता । मिले प्रेम परिपूरित गाता ॥

दो०—पुरजन परिजन जातिजन जाचक मंत्री मीत ।

मिले जथाविधि सबहि प्रभु परम कृपाल बिनीत ॥ ३०८ ॥

रामहि देखि बरात जुड़ानी । प्रीति किरीति न जाति बखानी ॥
नृप समीप सोहहिं सुत चारी । जनु धन धरमादिक तनुधारी ॥
सुतन्ह समेत दसरथहि देखी । दित नगर नर नारिबिसेषी ॥
सुमन बरिसि सुर हनहिं निसाना । नाकनटीं नाचहिं करि गाना ॥
सतानंद अरु बिप्र सचिव गन । मागध स्रत बिदुष बंदीजन ॥
सहित बरात राउ सनमाना । आयसु मागि फिरे अगवाना ॥
प्रथम बरात लगन तें आई । तातें पुर प्रमोदु अधिकाई ॥
ब्रह्मानंदु लोग सब लहहीं । बढ़हुँ दिवस निसि बिधि सन कहहीं

दो०—रामु सीय सोभा अवधि सुकृत अवधि दोउ राज ।

जहँ तहँ पुरजन कहहिं अस मिलि नर नारि समाज ॥ ३०९ ॥

जनक सुकृत मूरति बैदेही । दसरथ सुकृत राम धरें देही ॥
 इन्ह सम काहुँ न सिव अवराधे । काहुँ न इन्ह समान फल लाधे ॥
 इन्ह सम कोउ न भयउ जग माहीं । है नहिं कतहुँ होनेउ नाहीं ॥
 हम सब सकल सुकृत कै रासी । भए जग जनमि जनकपुर बासी ॥
 जिन्ह जानकी रामछवि देखी । को सुकृती हम सरिस बिसेषी ॥
 पुनि देखब रघुबीर बिआहू । लेब भली विधि लोचन लाहू ॥
 कहहिं परसपर कोकिलबयनीं । एहि बिआहँ बड़ लाभ सुनयनीं ॥
 बड़ें भाग विधि बात बनाई । नयन अतिथि होइहहिं दोउ भाई ॥
 दो०—बारहिं बार सनेह बस जनक बोलाउब सीय ।

लेन आइहहिं बंधु दोउ कोटि काम कमनीय ॥ ३१० ॥
 बिबिध भाँति होइहि पहुनाई । प्रिय न काहि अस सासुर माई ॥
 तब तब राम लखनहि निहारी । होइहहिं सब पुर लोग सुखारी ॥
 सखि जस राम लखन कर जोटा । तैसेइ भूप संग दुइ ढोटा ॥
 स्याम गौर सब अंग सुहाए । ते सब कहहिं देखि जे आए ॥
 कहा एक मैं आजु निहारे । जनु बिरंचि निज हाथ सँवारे ॥
 भरतु रामही की अनुहारी । सहसा लखि न सकहिं नर नारी ॥
 लखनु सत्रुसदनु एकरूपा । नखसिख ते सब अंग अनूपा ॥
 मन भावहिं मुख बरनि न जाहीं । उपमा कहूँ त्रिभुवन को नाहीं ॥

छं०—उपमा न कोउ कह दास तुलसी कतहुँ कवि कोविद कहैं ।

बल विनय विद्या सील सोभा सिंधु इन्ह से एइ अहैं ॥

पुर नारि सकल पसारि अंचल बिधिहि बचन सुनावहीं ।

ब्याहिअहुँ चारिउ भाइ एहि पुर हम सुमंगल गावहीं ॥

सो०—कहहिं परस्पर नारि बारि बिलोचन पुलक तन ।

सखि सबु करब पुरारि पुन्य पयोनिधि भूप दोउ ॥३११॥
एहि बिधि सकल मनोरथ करहीं । आनंद उमगि उमगि उर भरहीं ॥
जे नृप सीय स्वयंवर आए । देखि बंधु सब तिन्ह सुख पाए ॥
कहत राम जसु बिसद बिसाला । निज निज भवन गए महिपाला ॥
गए बीति कछु दिन एहि भाँती । प्रमुदित पुरजन सकल बराती ॥
मंगल मूल लगन दिनु आवा । हिम रितु अगहनु मासु सुहावा ॥
ग्रह तिथि नखतु जोगु बर बारू । लगन सोधि बिधि कीन्ह विचारू ॥
पठै दीन्हि नारद सन सोई । गनी जनक के गन कन्ह जोई ॥
सुनी सकल लोगन्ह यह बाता । कहहिं जोतिषी आहिं विधाता ॥

दो०—धेनुधूरि बेला बिमल सकल सुमंगल मूल ।

बिप्रन्ह कहेउ विदेह सन जानि सगुन अनुकूल ॥३१२॥
उपरोहितहि कहेउ नरनाहा । अब बिलंब कर कारनु काहा ॥
सतानंद तब सचिव बोलाए । मंगल सकल साजि सब ल्याए ॥
संख निसान पनव बहु बाजे । मंगल कलस सगुन सुभ साजे ॥
सुभग सुआसिनि गावहिं गीता । करहिं बेद धुनि बिप्र पुनीता ॥
लेन चले सादर एहि भाँती । गए जहाँ जनवास बराती ॥
कोसलपति कर देखि समाजू । अति लघु लाग तिन्हहि सुरराजू ॥
भयउ समउ अब धारिअ पाऊ । यह सुनि परा निसानहिं घाऊ ॥
गुरहि पूछि करि कुल बिधि राजा । चले संग मुनि साधु समाजा ॥
दो०—भाग्य बिभव अवधेस कर देखि देव ब्रह्मादि ।

लगे सराहन सहस मुख जानि जनम निज बादि ॥३१३॥

सुरन्ह सुमंगल अवसरु जाना । बरषहिं सुमन बजाइ निसाना ॥
 सिव ब्रह्मादिक बिबुध बरूथा । चढ़े विमानन्हि नाना जूथा ॥
 प्रेम पुलक तन हृदयँ उछाहू । चले बिलोकन राम बिआहू ॥
 देखि जनकपुरु सुर अनुरागे । निज निज लोक सबहिं लघु लागे ॥
 चितवहिं चकित बिचित्र बिताना । रचना सकल अलौकिक नाना ॥
 नगर नारि नर रूप निधाना । सुघर सुधरम सुसील सुजाना ॥
 तिन्हहि देखि सब सुर सुरनारीं । भए नखत जनु बिधु उजिआरीं ॥
 बिधिहि भयउ आचरजु बिसेषी । निज करनी कछु कतहुँ न देखी ॥

दो०—सिवँ समुझाए देव सब जनि आचरज भुलाहु ।

हृदयँ बिचारहु धीर धरि सिय रघुबीर बिआहु ॥३१४॥

जिन्ह कर नामुलेत जग माहीं । सकल अमंगल मूल नसाहीं ॥
 करतल होहिं पदारथ चारी । तेइ सिय रामु कहेउ कामारी ॥
 एहि बिधि संभु सुरन्ह समुझावा । पुनि आगें बर बसह चलावा ॥
 देवन्ह देखे दसरथु जाता । महामोद मन पुलकित गाता ॥
 साधु समाज संग महिदेवा । जनु तनु धरें करहिं सुख सेवा ॥
 सोहत साथ सुभग सुत चारी । जनु अपबरग सकल तनु धारी ॥
 मरकत कनक वरन बर जोरी । देखि सुरन्ह भै प्रीति न थोरी ॥
 पुनि रामहि विलोकि हियँ हरषे । नृपहि सराहि सुमन तिन्ह बरषे ॥

दो०—राम रूपु नख सिख सुभग बारहिं बार निहारि ।

पुलक गात लोचन सजल उमा समेत पुरारि ॥३१५॥

केकि कंठ दुति स्यामल अंगा । तड़ित बिनिंदक बसन सुरंगा ॥
 व्याह बिभूषन बिबिध बनाए । मंगल सब सब भाँति सुहाए ॥

सरद बिमल बिधु बदन सुहावन । नयन नवल राजीव लजावन ॥
सकल अलौकिक सुंदरताई । कहि न जाइ मनहीं मन भाई ॥
बंधु मनोहर सोहहिं संगी । जात नचावत चपल तुरंगी ॥
राजकुअँर बर बाजि देखावहिं । बंस प्रसंसक बिरिद सुनावहिं ॥
जेहि तुरंग पर रामु विराजे । गति विलोकि खगनायकु लाजे ॥
कहि न जाइ सब भाँति सुहावा । बाजि बेषु जनु काम बनावा ॥

छं०—जनु बाजि बेषु बनाइ मनसिजु राम हित अति सोहई ।

आपनैं वय बल रूप गुन गति सकल भुवन विमोहई ॥

जगमगत जीनु जराव जोति सुमोति मनि मानिक लगे ।

किंकिनि ललाम लगामु ललित विलोकि सुर नर मुनि ठगे ॥

दो०—प्रभु मनसहिं लयलीन मनु चलत बाजि छवि पाव ।

भूषित उडगन तड़ित धनु जनु बर बरहि नचाव ॥३१६॥

जेहि बर बाजि रामु असवारा । तेहि सारदउ न बरनै पारा ॥
संकरु राम रूप अनुरागे । नयन पंचदस अति प्रिय लागे ॥
हरि हित सहित रामु जब जोहे । रमा समेत रमापति मोहे ॥
निरखि राम छवि विधि हरषाने । आठइ नयन जानि पछिताने ॥
सुर सेनप उर बहुत उछाहू । विधि ते डेवढ़ लोचन लाहू ॥
रामहि चितव सुरेस सुजाना । गौतम श्रापु परम हित माना ॥
देव सकल सुरपतिहि सिद्धाहीं । आजु पुरंदर सम कोउ नाहीं ॥
मुदित देवगन रामहि देखी । नृपसमाज दुहुँ हरषु बिसेषी ॥

छं०—अति हरषु राजसमाज दुहुँ दिसि दुंदुभीं बाजहिं धनी ।

वरषहिं सुमन सुर हरषि कहि जय जयति जय रघुकुलमनी ॥

एहि भौंति जानि वरात आवत बाजने बहु बाजहीं ।

रानी सुआसिनि बोलि परिछनि हेतु मंगल साजहीं ॥

दो०—सजि आरती अनेक बिधि मंगल सकल सँवारि ।

चलीं मुदित परिछनि करन गजगामिनि वर नारि ॥३१७॥

बिधुबदनीं सब सब मृगलोचनि । सब निज तन छबि रति मद्दु मोचनि
पहिरेँ बरन बरन बर चीरा । सकल बिभूषन सजें सरीरा ॥
सकल सुमंगल अंग बनाएँ । करहिँ गान कलकंठि लजाएँ ॥
कंकन किंकिनि नूपुर बाजहिँ । चालि बिलोकि काम गजलाजहिँ ॥
बाजहिँ बाजने बिबिध प्रकारा । नभ अरु नगर सुमंगलचारा ॥
सची सारदा रमा भवानी । जे सुरतिय सुचि सहज सयानी ॥
कपट नारि वर बेष बनाई । मिलीं सकल रनिवासहिँ जाई ॥
करहिँ गान कल मंगल बानी । हरष बिबस सब काहुँ न जानीं ॥

छं०—को जान केहि आनंद वस सब ब्रह्म वर परिछन चली ।

कल गान मधुर निसान वरषहिँ सुमन सुर सोभा भली ॥

आनंदकंदु बिलोकि दूलहु सकल हियँ हरषित भई ।

अंभोज अंवक अंव उमगि सुअंग पुलकावलि छई ॥

दो०—जो सुखु भा सिय मातु मन देखि राम वर वेपु ।

सो न सकहिँ कहि कलप सत सहस सारदा सेपु ॥३१८॥

नयन नीरु हटि मंगल जानी । परिछनि करहिँ मुदित मन रानी ॥
बेद बिहित अरु कुल आचारु । कीन्ह भली बिधि सब व्यवहारु ॥
पंच सवद धुनि मंगल गाना । पट पाँवड़े परहिँ बिधि नाना ॥
करि आरती अरघु तिन्ह दीन्हा ॥ राम गमनु मंडप तब कीन्हा ॥

दसरथु सहित समाज विराजे । बिभव बि ओकिलोकपति लाजे ॥
समयँ समयँ सुर वरपहिं फूला । मांति पढ़हिं महिसुर अनुकूला ॥
नभ अरु नगर कोलाहल हाँई । आपनि पर कछु सुनइ न कोई ॥
एहि बिधिरामु मंडपहिं आए । अरघु देइ आसन बैठाए ॥

छं०—बैठारि आसन आरती करि निरखि बरु सुख पावहीं ।
मनि बसन भूषन भूरि वारहिं नारि मंगल गावहीं ॥
ब्रह्मादि सुरवर बिप्र बेप बनाइ कौतुक देखहीं ।
अवलोकि रघुकुल कमल रबि छवि सुफल जीवन लेखहीं ॥

दो०—नाऊ बारी भाट नट राम निछावरि पाइ ।
मुदित असीसहिं नाइ सिर हरषु न हृदयँ समाइ ॥३१९॥

मिले जनकु दमरथु अति प्रीतीं । करि बैदिक लौकिक सब रीतीं ॥
मिलत महा दोउ राज विराजे । उपमा खोजि खांजिक बिलाजे ॥
लही न कतहुँ हारि हियँ मानी । इन्ह सम एइ उपमा उर आनी ॥
सामध देखि देव अनुरागे । सुमन वरषि जसु गावन लागे ॥
जगु बिरंचि उपजावा जब तें । देखे सुने व्याह बहु तब तें ॥
सकल भाँति समसाजु ममाजू । सम समग्री देखे हम आजू ॥
देव गिरा सुनि सुंदर साँची । प्रीति अलौकिक दृढ़ दिसि माची ॥
देत पाँवड़े अरघु सुहाए । सादर जनकु मंडपहिं ल्याए ॥

छं०—मंडपु विलोकि बिचित्र रचनौं रुचिरतौं मुनि मन हरे ।
निज पानि जनक सुजान सब कहूँ आनि सिंघासन धरे ॥
कुल इष्ट सरिस बसिष्ट पूजे बिनय करि आसिष लही ।
कौसिकहि पूजत परम प्रीति कि रीति तौ न परै कही ॥

दो०—वामदेव आदिक रिषय पूजे मुदित महीस ।

दिए दिव्य आसन सबहि सब सन लही असीस ॥३२०॥

बहुरि कीन्हि कोसलपति पूजा । जानि ईस सम भाउ न दूजा ॥
कीन्हि जोरि कर बिनय बढ़ाई । कहि निज भाग्य बिभव बहुताई ॥
पूजे भूपति मकल बराती । समधी सम सादर सब भाँती ॥
आसन उचित दिए सब काहू । कहौं काह मुख एक उछाहू ॥
सकल बरात जनक सनमानी । दान मान बिनती बर बानी ॥
बिधि हरि हरु दिसि पति दिनराऊ । जे जानहिं रघुबीर प्रभाऊ ॥
कपट बिप्र बर बेष बनाएँ । कौतुक देखहिं अति सचु पाएँ ॥
पूजे जनक देव सम जानें । दिए सुआसन बिनु पहिचानें ॥

छं०—पहिचान को केहि जान सबहि अपान सुधि भोरी भई ।

आनंदकंदु बिलोकि दूलहु उभय दिसि आनँदमई ॥

सुर लखे राम सुजान पूजे मानसिक आसन दए ।

अवलोकि सीलु सुभाउ प्रभु को विबुध मन प्रमुदित भए ॥

दो०—रामचंद्र मुख चंद्र छवि लोचन चारु चकोर ।

करत पून सादर सकल प्रेमु प्रमोदु न थोर ॥३२१॥

समउ बिलोकि बसिष्ठ बोलाए । सादर सतानंदु सुनि आए ॥
बेगि कुअँरि अब आनहु जाई । चले मुदित मुनि आयसु पाई ॥
रानी सुनि उपरोहित बानी । प्रमुदित सखिन्ह समेत सयानी ॥
बिप्र बधू कुलवृद्ध बोलाई । करि कुल रीति सुमंगल गाई ॥
नारि बेष जे सुर बर बामा । सकल सुभायँ सुंदरी स्यामा ॥
तिन्हहि देखि सुखु पावहिं नारीं । बिनु पहिचानि प्रानहु ते प्यारीं ॥

बार बार सनमानहिं रानी । उमा रमा सारद सम जानी ॥
सीय सँवारि समाजु बनाई । मुदित मंडपहिं चलीं लवाई ॥

छं०—चलि ल्याइ सीतहि सखीं सादर सजि सुमंगल भामिनी ।
नव सप्त साजें सुंदरीं सब मत्त कुंजर गामिनी ॥
कल गान सुनि मुनि ध्यान त्यागहिं काम कोकिल लाजहीं ।
मंजीर नूपुर कलित कंकन ताल गति बर बाजहीं ॥

दो०—सोहति बनिता बृंद महँ सहज सुहावनि सीय ।
छवि ललना गन मध्य जनु सुपमा तिय कमनीय ॥३२२॥

सिय सुंदरता बरनि न जाई । लघु मति बहुत मनोहरताई ॥
आवत दीखि बरातिन्ह सीता । रूप रासि सब भाँति पुनीता ॥
सबहि मनहिं मन किए प्रनामा । देखि राम भए पूरनकामा ॥
हरषे दसरथ सुतन्ह समेता । कहि न जाइ उर आनँदु जेता ॥
सुर प्रनामु करि बरिसहिं फूला । मुनि असीस धुनि मंगल मूला ॥
गान निसान कोलाइलु भारी । प्रेम प्रमोद मगन नर नारी ॥
एहि बिधि सीय मंडपहिं आई । प्रमुदित सांति पढ़हिं मुनिराई ॥
तेहि अवसर कर बिधि व्यवहारू । दुहुँ कुलगुर सब कीन्ह अचारू ॥

छं०—आचारु करि गुर गौरि गनपति मुदित बिप्र पुजावहीं ।
सुर प्रगटि पूजा लेहिं देहिं असीस अति सुख पावहीं ॥
मधुपर्क मंगल द्रव्य जो जेहि समय मुनि मन महँ चहैं ।
भरे कनक कोपर कलस सो तब लिएहिं परिचारक रहैं ॥ १ ॥
कुल रीति प्रीति समेत रवि कहि देत सब सादर कियो ।
एहि भाँति देव पुजाइ सीतहि सुभग सिंघासनु दियो ॥

सिय राम अवलोकनि परसपर प्रेमु काहु न लखि परै ।
मन बुद्धि बर बानी अगोचर प्रगट कबि कैसें करै ॥ २ ॥

दो०—होम समय तनु धरि अनलु अति सुख आहुति लेहिं ।
बिप्र बेप धरि वेद सब कहि बिबाह बिधि देहिं ॥ ३२३ ॥

जनक पाटमहिषी जग जानी । सीय मातु किमि जाइ बखानी ॥
सुजसु सुकृत सुख सुंदरताई । सब समेटि बिधि रची बनाई ॥
समउ जानि मुनिबरन्ह बोलाई । सुनत सुआसिनि सादर ल्याई ॥
जनक बाम दिसि सोह सुनयना । हिमगिरि संग बनी जनु मयना ॥
कनक कलस मनि कोपर रुरे । सुचि सुगंध मंगल जल पूरे ॥
निज कर मुदिन रायँ अरुरानी । धरे राम के आगें आनी ॥
पढ़हि वेद मुनि मंगल बानी । गगन सुमन झरि अवसरु जानी ॥
बरु बिलोकि दंपति अनुरागे । पाय पुनीत पखारन लागे ॥

छं०—लागे पखारन पाय पंकज प्रेम तन पुलकावली ।
नभ नगर गान निसान जय धुनि उमगि जनु चहुँ दिसि चली ॥
जे पद सरोज मनोज अरि उर सर सदैव बिराजहीं ।
जे सकृत श्रुमिरत विमलता मन सकल कलि मल भाजहीं ॥ १ ॥
जे परसि मुनिवनिता लही गति रही जो पातकमई ।
मकरंदु जिन्ह को संभु सिर सुचिता अवधि सुर बरनई ॥
करि मधुप मन मुनि जोगिजन जे सेइ अभिमत गति लहैं ।
ते पद पखारन भाग्य भाजनु जनकु जय जय सब कहैं ॥ २ ॥
बर कुअरि करतल जोरि साखोचारु दोउ कुलगुर करैं ।
भयो पानि गहनु बिलोकि बिधि सुर मनुज मुनि आनंद भरैं ॥

सुखमूल दुलहु देखि दंपति पुलक तन हुलस्यो हियो ।
 करि लोक बेद बिधानु कन्यादानु नृपभूषन कियो ॥ ३ ॥
 हिमवंत जिमि गिरिजा महेसहि हरिहि श्री सागर दई ।
 तिमि जनक रामहि सिय समरपी त्रिस्व कल कीरति नई ॥
 क्यों करै त्रिनय बिदेहु कियो बिदेहु मूरति सावँरी ।
 करि होमु बिषिवत गाँठि जोरी होन लागीं भावँरी ॥ ४ ॥

दो०—जय धुनि बंदी बेद धुनि मंगल गान निसान ।
 सुनि हरषहिं बरपहिं विबुध मुरतरु मुमन सुजान ॥ ३२४ ॥

कुअँरु कुअँरि कल भावँरि देहीं । नयन लाभु सब सादर लेहीं ॥
 जाइ न बरनि मनोहर जोरी । जो उपमा कछु कहैं सो थोरी ॥
 राम सीय सुंदर प्रतिछाहीं । जगमगात मनि खंभन माहीं ॥
 मनहुँ मदनरति धरि बहुरूप । देखत राम विआहु अनूपा ॥
 दरस लालसा सकुच न थोरी । प्रगटत दुरत बहोरि बहोरी ॥
 भए मगन सब देखनिहारे । जनक समान अपान बिसारे ॥
 प्रमुदित मुनिन्ह भावँरी फेरीं । नेग सहित सब रीति निबेरीं ॥
 राम सीय सिर सेंदुर देहीं । मोभा कहि न जातिविधिकेहीं ॥
 अरुन पराग जलजु भरि नीकें । ससिहि भृष अहिलोभ अमी कें ॥
 बहुरि बसिष्ठ दीन्हि अनुसासन । वरु दुलहिनि बैठे एक आसन ॥

छं०—बैठे बरासन रामु जानकि मुदित मन दसरथु भए ।
 तनु पुलक पुनि पुनि देखि अपनै सुकृत सुरतरु फल नए ॥
 भरि भुवन रहा उछाहु राम विबाहु भा सबहीं कहा ।
 केहि भाँति बरनि सिरात रसना एक यहु मंगलु महा ॥ १ ॥

तब जनक पाइ बसिष्ठ आयसु ब्याह साज सँवारि कै ।
 मांडवी श्रुतकीरति उरमिला कुअँरि लई हँकारि कै ॥
 कुसकेतु कन्या प्रथम जो गुन सील सुख सोभामई ।
 सब रीति प्रीति समेत करि सो ब्याहि नृप भरतहि दई ॥ २ ॥
 जानकी लघु भगिनी सकल सुंदरि सिरोमनि जानि कै ।
 सो तनय दीन्ही ब्याहि लखनहि सकल विधि सनमानि कै ॥
 जेहि नामु श्रुतकीरति सुलोचनि सुमुखि सब गुन आगरी ।
 सो दई रिपुसूदनहि भूपति रूप सील उजागरी ॥ ३ ॥
 अनुरूप वर दुलहिनि परस्पर लखि सकुच हियँ हरषहीं ।
 सब मुदित सुंदरता सराहहिँ सुमन सुरगन बरषहीं ॥
 सुंदरीं सुंदर बरन्ह सह सब एक मडप राजहीं ।
 जनु जीव उर चारिउ अवस्था विभुन सहित विराजहीं ॥ ४ ॥

दो०—मुदित अवधपति सकल सुत बधुन्ह समेत निहारि ।

जनु पाए महिपाल मनि कियन्ह सहित फल चारि ॥३२५॥

जसि रघुबीर ब्याह विधि वरनी । सकल कुअँर ब्याहे तेहिं करनी ॥
 कहि न जाइ कछु दाइज भूरी । रहा कनक मनि मंडपु पूरी ॥
 कंवल बसन विचित्र पटोरे । भाँति भाँति बहु मोल न थोरे ॥
 गज रथ तुरग दास अरु दासी । धेनु अलंकृत कामदुहा सी ॥
 वस्तु अनेक करिअ किमि लेखा कहि न जाइ जानहिं जिन्ह देखा ॥
 लोकपाल अवलोकि सिहाने । लीन्ह अवधपति सबु सुख माने ॥
 दीन्ह जाचकन्हि जो जेहि भावा । उवरा सो जनवासेहिं आवा ॥
 तब कर जोरि जनकु मृदु वानी । बोले सब बरात सनमानी ॥

छं०—सनमानि सकल बरात आदर दान बिनय बढ़ाइ कै ।
 प्रमुदित महा मुनि बृंद बंदे पूजि प्रेम लड़ाइ कै ॥
 सिरु नाइ देव मनाइ सब सन कहत कर संपुट किएँ ।
 सुर साधु चाहत भाउ सिंधु कि तोष जल अंजलि दिएँ ॥ १ ॥
 कर जोरि जनकु बहोरि बंधु समेत कोसलराय सों ।
 बोले मनोहर बयन सानि सनेह सील सुभाय सों ॥
 संबंध राजन रावरें हम बड़े अय सब विधि भए ।
 एहि राज साज समेत सेवक जानिबे त्रिनु गथ लए ॥ २ ॥
 ए दारिका परिचारिका करि पालिबीं करुना नई ।
 अपराधु छमिबो बोलि पठए बहुत हौं ढीठ्यो कई ॥
 पुनि भानुकुल भूषन सकल सनमान निधि समधी किए ।
 कहि जाति नहिं विनती परस्पर प्रेम परिपूरन हिए ॥ ३ ॥
 वृंदारका गन सुमन बरिसहिं राउ जनवासेहि चले ।
 दुंदुभी जय धुनि वेद धुनि नभ नगर कौतूहल भले ॥
 तब सखीं मंगल गान करत मुनीस आयसु पाइ कै ।
 दूलह दुलहिनिन्ह सहित सुंदरि चलीं कोहबर ल्याइ कै ॥ ४ ॥

दो०—पुनि पुनि रामहि चितव सिय सकुचति मनु सकुचै न ।
 हरत मनोहर मीन छवि प्रेम पिआसे नैन ॥ २२६ ॥

मासपारायण, ग्यारहवाँ विश्राम

स्याम सरीरु सुभायँ सुहावन । सोभा कोटि मनोज लजावन ॥
 जावक जुत पद कमल सुहाए । मुनि मन मधुप रहत जिन्ह छाए ॥
 पीत पुनीत मनोहर धांती । हरति बालरविदामिनि जोती ॥

कल किंकिनि कटि सूत्र मनोहर । बाहु बिसाल बिभूषन सुंदर ॥
 पीत जनेउ महाछवि देई । कर मुद्रिका चोरि चितु लेई ॥
 सोहत ब्याह साज सब साजे । उर आयत उर भूषन राजे ॥
 पिअर उपरना काखा सोती । दुहुँ आँचरन्हिलगे मनि मोती ॥
 नयन कमल कल कुंडल काना । बदनु सकल सौंदर्ज निधाना ॥
 सुंदर भृकुटि मनोहर नासा । भाल तिलक रुचिरता निवासा ॥
 सोहत मौरु मनोहर माथे । मंगलमय मुकुता मनि गाथे ॥

छं०—गाथे महामनि मौर मंजुल अंग सब चित चोरहीं ।
 पुर नारि सुर सुंदरीं बरहि बिलोकि सब तिन तोरहीं ॥
 मनि वसन भूषन वारि आरति करहिं मंगल गावहीं ।
 सुर सुमन बरिसहिं सूत मागध वंदि सुजमु सुनावहीं ॥ १ ॥
 कोहवरहिं आने कुअँर कुअँरि सुआसिनिन्ह सुख पाइ कै ।
 अति प्रीति लौकिक रीति लागीं करन मंगल गाइ कै ॥
 लहकौरि गोरि सिखाव रामहि सीय सन सारद कहैं ।
 रनिवासु हास बिद्यासरस बस जन्म को फलु सब लहैं ॥ २ ॥
 निज पानि मनि महुँ देखिअति मूरति सुरुपनिधान की ।
 चालति न भुषवल्ली बिलोकनि विरह भय बस जानकी ॥
 कौतुक विनोद प्रमोदु प्रेम न जाइ कहि जानाहिं अलीं ।
 वर कुअँरि मुंदर सकल सखीं लवाइ जनवासेहि चलीं ॥ ३ ॥
 तेहि समय मुनिअ असीस जहँ तहँ नगर नभ आनँदु महा ।
 चिरु जिअहुँ जोरीं चारु चारयो मुदित मन सबहीं कहा ॥
 योगींद्र सिद्ध मुनीस देव बिलोकि प्रभु दुंदुभि हनी ।
 चले हरपि वरपि प्रसून निज निज लोक जय जय जय भनी ॥ ४ ॥

दो०—सहित बधूटिन्ह कुअँर सब तब आए पितु पास ।

सोभा मंगल मोद भरि उमगेउ जनु जनवास ॥३२७॥

पुनि जेवनार भई बहु भाँती । पठए जनक बोलाइ बराती ॥
परत पाँवड़े बसन अनूपा । सुतन्ह समेत गवन कियो भूपा ॥
सादर सब के पाय पखारे । जथाजोगु पीढ़न्ह बैठारे ॥
धोए जनक अवधपति चरना । सीलु सनेहु जाइ नहिं बरना ॥
बहुरि राम पद पंकज धोए । जे हर हृदय कमल महुँ गोए ॥
तीनिउ भाइ राम सब जानी । धोए चरन जनक निज पानी ॥
आसन उचित सबहि नृप दीन्हे । बोलि सूपकारी सब लीन्हे ॥
सादर लगे परन पनवारे । कनक कील भनि पान सँवारे ॥

दो०—सूपोदन सुरभी सरपि सुंदर स्वादु पुनीत ।

छन महुँ सब के परुसि गे चतुर सुआर धिनीत ॥३२८॥

पंच कवल करि जेवन लागे । गारि गान सुनि अति अनुरागे ॥
भाँति अनेक परे पकवाने । सुधासरिस नहिं जाहिं बखाने ॥
परुसन लगे सुआर सुजाना । बिंजन बिबिध नाम को जाना ॥
चारि भाँति भोजन विधि गाई । एक एक विधि बरनि न जाई ॥
छरस रुचिर बिंजन बहु जाती । एक एक रस अगनित भाँती ॥
जेवँत देहिं मधुर धुनि गारी । लँ लँ नाम पुरुष अरु नारी ॥
समय सुहावनि गारि बिराजा । हँसत राउ सुनि सहित समाजा ॥
एहि विधि सबहीं भोजनु कीन्हा । आदर सहित आचमनु दीन्हा ॥

दो०—देइ पान पूजे जनक दसरथु सहित समाज ।

जनवासेहि गवने मुदित सकल भूप सिरताज ॥३२९॥

नित नूतन मंगल पुर माहीं । निमिष सरिस दिन जामिनि जाहीं
 बड़े भोर भूपति मनि जागे । जाचक गुन गन गावन लागे ॥
 देखि कुअर बर बधुन्ह समेता । किमि कहि जात मोदु मन जेता ॥
 प्रातक्रिया करि गे गुरु पाहीं । महाप्रमोदु प्रेसु मन माहीं ॥
 करि प्रनामु पूजा कर जोरी । बोले गिरा अमिअँ जनु बोरी ॥
 तुम्हरी कृपाँ सुनहु मुनिराजा । भयउँ आजु मैं पूरनकाजा ॥
 अब सब बिप्र बोलाइ गोसाईं । देहु धेनु सब भाँति बनाई ॥
 सुनि गुर करि महिपाल बड़ाई । पुनि पठए मुनि बृंद बोलाई ॥

दो०—बामदेउ अरु देवरिषि बालमीकि जाबालि ।

आए मुनिबर निकर तब कौसिकादि तपसालि ॥३३०॥

दंड प्रनाम सबहि नृप कीन्हे । पूजि सप्रेम बरासन दीन्हे ॥
 चारि लच्छ बर धेनु मगाईं । कामसुरभि सम सील सुहाई ॥
 सब बिधि सकल अलंकृत कीन्हों । मुदित महिप महिदेवन्ह दीन्हों
 करत बिनय बहु बिधि नरनाहू । लहेउँ आजु जग जीधन लाहू ॥
 पाइ असीस महीसु अनंदा । लिए बोलि पुनि जाचक बृंदा ॥
 कनक बसन मनिहय गय स्यंदन । दिए बूझि रुचि रबिकुल नंदन ॥
 चले पढ़त गावत गुन गाथा । जय जय जय दिनकर कुल नाथा
 एहि बिधि राम बिआह उछाहू । सकइ न बरनि सइस मुख जाहू ॥

दो०—बार बार कौसिक चरन सीसु नाइ कह राउ ।

यह सब सुखु मुनिराज तब कृपा कटाच्छ पसाउ ॥३३१॥

जनक सनेहु सीलु करतूती । नृपु सब भाँति सराह बिभूती ॥
 दिन उठि बिदा अवधपति मागा । राखहि जनकु सहित अनुरागा ॥

नित नूतन आदरु अधिकाई । दिन प्रति सहस भौंति पहुनाई ॥
नित नव नगर अनंद उछाहू । दसरथ गवनु सोहाइन काहू ॥
बहुत दिवस बीते एहि भाँती । जनु सनेह रजु बँधे बराती ॥
कौसिक सतानंद तब जाई । कहा बिदेह नृपहि समुझाई ॥
अब दसरथ कहँ आयसु देहू । जद्यपि छाड़ि न सकहु सनेहू ॥
भलेहिं नाथ कहि सचिव बोलाय । कहि जय जीव सीस तिन्ह नाए

दो०—अवधनाथु चाहत चलन भीतर करहु जनाउ ।

भए प्रेमबस सचिव सुनि विप्र सभासद राउ ॥३३२॥

पुरवासी सुनि चलिहि बराता । बृझत बिकल परस्पर बाता ॥
सत्य गवनु सुनि सब बिलखाने । मनहुँ साँझ सरसिज सकुचाने ॥
जहँ जहँ आवत वसे बराती । तहँ तहँ सिद्ध चला बहु भाँती ॥
बिबिध भाँति मेवा पकवाना । भोजन साजु न जाइ बखाना ॥
भरि भरि बसहँ अपार कहारा । पठई जनक अनेक सुसारा ॥
तुरग लाख रथ सहस पचीसा । सकल सँवारे नख अरु सीसा ॥
मत्त सहस दस सिंधुर साजे । जिन्हहि देखि दिसि कुंजर लाजे
कनक बसन मनि भरि भरि जाना । महिषीं धेनु बस्तु बिधि नाना ॥

दो०—दाइज अमित न सकिअ कहि दीन्ह बिदेहँ बहोरि ।

जो अवलोकत लोकपति लोक संपदा थोरि ॥३३३॥

सबु समाजु एहि भाँति बनाई । जनक अवधपुर दीन्ह पठाई ॥
चलिहि बरात सुनत सब रानीं । बिकल मीनगन जनु लघु पानीं ॥
पुनि पुनि सीय गोद करि लेहीं । देइ असीस सिखावनु देहीं ॥
होएहु संतत पियहि पिआरी । चिरु अहिबात असीस हमारी ॥

सासु ससुर गुर सेवा करेहू । पति रुख लखि आयसु अनुसरेहू ॥
 अति सनेह बस सखीं सयानी । नारि धरम सिखवहिं मृदु बानी ॥
 सादर सकल कुअँरि समुझाई । रानिन्ह बार बार उर लाई ॥
 बहुरि बहुरि भेटहिं महतारीं । कहहिं बिरंचि रचीं कत नारीं ॥

दो०—तेहि अवसर भाइन्ह सहित रामु भानु कुल केतु ।

चले जनक मंदिर मुदित बिदा करावन हेतु ॥३३४॥

चारिउ भाइ सुभायँ सुहाए । नगर नारि नर देखन धाए ॥
 कोउ कह चलन चहत हहिं आजू । कीन्ह बिदेह बिदा कर साजू ॥
 लेहु नयन भरि रूप निहारी । प्रिय पाहुने भूप सुत चारी ॥
 को जानै केहिं सुकृत सयानी । नयन अतिथि कीन्हे बिधि अनी
 मरनसीलु जिमि पाव पिऊषा । सुतरु लहै जनम कर भूखा ॥
 पाव नारकी हरिपदु जैसैं । इन्ह कर दरसनु हम कहँ तैसैं ॥
 निरखि राम सोभा उर धरहू । निज मन फनि मूरति मनि करहू ॥
 एहि बिधि सबहि नयन फलु देता । गए कुअँर सब राज निकेता ॥

दो०—रूप सिंधु सब बंधु लखि हरषि उठा रनिवासु ।

करहिं निछावरि आरती महा मुदित मन सासु ॥३३५॥

देखि राम छवि अति अनुरागीं । प्रेमबिबस पुनि पुनि पद लागीं ॥
 रही न लाज प्रीति उर छाई । सहज सनेहु वरनि किमि जाई ॥
 भाइन्ह सहित उबटि अन्हवाए । छरस असन अति हेतु जेवाँए ॥
 बोले रामु सुअवसरु जानी । सील सनेह सकुचमय बानी ॥
 राउ अवधपुर चहत सिधाए । बिदा होन हम इहाँ पठाए ॥
 मातु मुदित मन आयसु देहू । बालक जानि करब नित नेहू ॥

सुनत बचन बिलखेउ रनिवास । बोलि न सकहिं प्रेमबस सास ।
हृदयै लगाइ कुअँरि सब लीन्ही । पतिन्ह सौँधि बिनती अति कीन्ही

छं०—करि बिनय सिय रामहि समरपी जोरि कर पुनि पुनि कहै ।
बलि जाउँ तात सुजान तुम्ह कहूँ बिदित गति सब की अहे ॥
परिवार पुरजन मोहि राजहि प्रानप्रिय सिय जानिबी ।
तुलसीस सीलु सनेहु लखि निज किंकरी करि मानिबी ॥

सो०—तुम्ह परिपूरन काम जान सिरोमनि भावप्रिय ।
जन गुन गाहक राम दोष दलन करुनायतन ॥३३६॥

अस कहि रही चरन गहि रानी । प्रेम पंक जनु गिरा समानी ॥
सुनि सनेह सानी बर बानी । बहुबिधिरामसासु सनमानी ॥
राम बिदा मागत कर जोरी । कीन्ह प्रनासु बहोरि बहोरी ॥
पाइ असीस बहुरि सिरु नाई । भाइन्ह सहित चले रघुराई ॥
मंजु मधुर मूरति उर आनी । भई सनेह मिथिल सब रानी ॥
पुनि धीरजु धरि कुअँरि हँकारी । बार बार भेटहिं महतारी ॥
पहुँचावहिं फिरि मिलहिं बहोरी । बढी परस्पर प्रीति न थोरी ॥
पुनि पुनि मिलत सखिन्ह बिलगाई । बाल बच्छ जिमि धेनु लवाई ॥

दो०—प्रेमबिबस नर नारि सब सखिन्ह सहित रनिवासु ।
मानहुँ कीन्ह बिदेह पुर करुनाँ विरहँ निवासु ॥३३७॥

सुक सारिका जानकी ज्याए । कनक पिंजरन्ह राखि पढ़ाए ॥
व्याकुल कहहिं कहाँ बैदेही । सुनि धीरजु परिहरइ न केही ॥
भए बिकल खगमृग एहि भाँती । मनुज दसा कैसेँ कहि जानी ॥
बंधु समेत जनकु तब आए । प्रेम उमगि लोचन जल छाए ॥

सीय बिलोकि धीरता भागी । रहे कहावत परम बिरागी ॥
 लीन्हि रायँ उर लाइ जानकी । मिटो महामरजाद ग्यान की ॥
 समुझावत सब सचिव सयाने । कीन्ह बिचारु न अवसर जाने ॥
 बारहि बार सुता उर लाई । सजि सुंदर पालकीं मगाई ॥

दो०—प्रेमबिबस परिवारु सब जानि सुलगन नरेस ।

कुअँरि चढ़ाई पालकिन्ह सुमिरे सिद्धि गनेस ॥३३८॥

बहुविधि भूप सुता समुझाई । नारिधरमु कुलरीति सिखाई ॥
 दासीं दास दिए बहुतेरे । सुचि सेवक जे प्रिय सिय केरे ॥
 सीय चलत व्याकुल पुरबासी । होहिं सगुन सुभ मंगल रासी ॥
 भूसुर सचिव समेत समाजा । संग चले पहुँचावन राजा ॥
 समय बिलोकि बाजने बाजे । रथ गज बाजि बरातिन्ह साजे ॥
 दसरथ विप्र बोलि सब लीन्हे । दान मान परिपूरन कीन्हे ॥
 चरन सरोज धूरि धरि सीसा । मुदित महीपति पाइ असीसा ॥
 सुमिरि गजाननु कीन्ह पयाना । मंगलमूल सगुन भए नाना ॥

दो०—सुर प्रसून वरषहिं हरषि करहिं अपछरा गान ।

चले अवधपूति अवधपुर मुदित बजाइ निसान ॥३३९॥

नृप करि विनय महाजन फेरे । सादर सकल मागने टेरे ॥
 भूषन बसन बाजि गज दीन्हे । प्रेम पोषि ठाढ़े सब कीन्हे ॥
 बार बार बिरिदावलि भाषी । फिरे सकल रामहि उर राखी ॥
 बहुरि बहुरि कोसलपति कहहीं । जनकु प्रेमबधु फिरै न चहहीं ॥
 पुनि कह भूपति बचन सुहाए । फिरिअ महीस दूरि बड़ि आए ॥
 राउ बहोरि उतरि भए ठाढ़े । प्रेम प्रबाह बिलोचन बाढ़े ॥

तब विदेह बोले कर जोरी । बचन सनेह सुधाँ जनु बोरी ॥
करौं कवन बिधि बिनय बनाई । महाराज मोहि दीन्हि बड़ाई ॥
दो०—कोसलपति समधी सजन सनमाने सब भाँति ।

मिलनि परसपर बिनय अति प्रीति न हृदयँ समाति ॥३४०॥

मुनिमंडलिहि जनक सिरु नावा । आसिरबादु सबहि सन पावा ॥
सादर पुनि भेंटे जामाता । रूप सील गुन निधिसब भ्राता ॥
जोरि पंकरुह पानि सुहाए । बोले बचन प्रेम जनु जाए ॥
राम करौं केहि भाँति प्रसंसा । मुनि महेस मन मानस हंसा ॥
करहिं जोग जोगी जेहि लागी । कोहु मोहु ममता मदु त्यागी ॥
व्यापकु ब्रह्म अलखु अविनासी । चिदानंदु निरगुन गुनरासी ॥
मन समेत जेहि जान नबानी । तरकिन सकहिं सकल अनुमानी
महिमा निगमु नेति कहि कहई । जो तिहुँ काल एकरस रहई ॥

दो०—नयन बिषय मो कहूँ भयउ सो समस्त सुख मूल ।

सबइ लाभु जग जीव कहँ भएँ ईसु अनुकूल ॥३४१॥

सबहि भाँति मोहि दीन्हि बड़ाई । निज जन जानि लीन्ह अपनाई ॥
होहि सहस दस सारद सेवा । करहिं कलप कोटिक भरिलेखा ॥
मोर भाग्य राउर गुन गाथा । कहि न सिराहिं सुनहु रघुनाथा ॥
मैं कलु कहउँ एक बल मोरें । तुम्ह रीझहु सनेह सुठि थोरें ॥
बार बार मागउँ कर जोरें । मनु परिहरै चरन जनि भोरें ॥
सुनि बर बचन प्रेम जनु पोषे । पूरनकाम रामु परितोषे ॥
करि बर बिनय ससुर सनमाने । पितु कौसिक बसिष्ठ सम जाने ॥
बिनती बहुरि भरत सन कीन्ही । मिलि सप्रेम पुनि आसिष दीन्ही ॥

दो०—मिले लखन रिपुसूदनहि दीन्हि असीस महीस ।

भए परसपर प्रेमबस फिरि फिरि नावहि सीस ॥३४२॥

चार बार करि बिनय बड़ाई । रघुपति चले संग सब भाई ॥
जनक गहे कौसिक पद जाई । चरन रेनु सिर नयनन्ह लाई ॥
मुनु मुनीस बर दरसन तोरें । अगमुन कछु प्रतीति मन मोरें ॥
जो सुखु सुजसु लोकपति चहहीं । करत मनोरथ सकुचत अहहीं ॥
जो सुखु सुजसु सुलभ मोहि स्वामी । सब सिधि तव दरसन अनुगामी
कीन्हि बिनय पुनि पुनि सिरु नाई । फिरे महीसु आसिषा पाई ॥
चली बरात निसान बजाई । मुदित छोट बड़ सब समुदाई ॥
रामहि निरखि ग्राम नर नारी । पाइ नयन फलु हाँहि सुखारी ॥

दो०—बीच बीच बर बास करि मग लोगन्ह सुख देत ।

अवध समीप पुनीत दिन पहुँची आइ जनेत ॥३४३॥

हने निसान पनव बर बाजे । भेरि संख धुनि हय गय गाजे ॥
झाँझि विरव डिंडिमीं सुहाई । सरस राग बाजहिँ सहनाई ॥
पुरजन आवत अकनि बराता । मुदित सकल पुलकावलि गाता ॥
निज निज सुंदरु सदन सँवारे । हाट बाट चौहट पुर द्वारे ॥
गलीं सकल अरगजाँ सिँचाई । जहँ तहँ चौकें चारु पुराई ॥
बना बजारु न जाइ बखाना । तोरन केतु पताक बिताना ॥
सफल पूगफल कदलिरसाला । रोपे बकुल कदंब तमाला ॥
लगे सुभग तरु परसत धरनी । मनिमय आलवाल कल करनी ॥

दो०—बिबिध भाँति मंगल कलस गृह गृह रचे सँवारि ।

सुर ब्रह्मादि सिंहाहिँ सब रघुबर पुरी निहारि ॥३४४॥

भूप भवनु तेहि अवसर सोहा । रचना देखि मदन मनु मोहा ॥
 मंगल सगुन मनोहरताई । रिधि सिधिसुखसंपदा सुहाई ॥
 जनु उछाह सब सहज सुहाए । तनु भरि धरि दसरथ गृहँ छाए ॥
 देखन हेतु राम बैदेही । कहहु लालसा हांहि न केही ॥
 जूथ जूथ मिलि चलीं सुआसिनि । निज छबि निदरहिं मदन बिलासिनि
 सकल सुमंगल सजें आरती । गावहिं जनु बहु बेध भारती ॥
 भूपति भवन कोलाहलु होई । जाइ न बरनि समउ सुखु मोई ॥
 कौसल्यादि राम महतारीं । प्रेमबिबस तन दसा बिसारीं ॥

दो०—दिए दान विप्रन्ह बिपुल पूजि गनेस पुरारि ।

प्रमुदित परम दरिद्र जनु पाइ पदारथ चारि ॥३४५॥

मोद प्रमोद बिबस सब माता । चलहिं न चरन सिथिल भए गाता
 राम दरस हित अति अनुरागीं । परिछनि साजु सजन सब लागीं ॥
 बिबिध बिधान बाजने बाजे । मंगल मुदित सुमित्राँ साजे ॥
 हरद दूब दधि पल्लव फूला । पान पूगफल मंगल मूला ॥
 अच्छत अंकुर लोचन लाजा । मंजुल मंजरि तुलसि बिराजा ॥
 छुहे पुरट घट सहज सुहाए । मदन सकुन जनु नीड़ बनाए ॥
 सगुन सुगंध न जाहिं बखानी । मंगल सकल सजहिं सब रानी ॥
 रचीं आरतीं बहुत बिधाना । मुदित करहिं कल मंगल गाना ॥

दो०—कनक थार भरि मंगलन्हि कमल करन्हि लिऐँ मात ।

चलीं मुदित परिछनि करन पुलक पल्लवित गात ॥३४६॥

धूप धूम नभु मेचक भयऊ । सावन घन घमंडु जनु ठयऊ ॥
 गुरतरु सुमन माल सुर बरषहिं । मनहुँ बलाक अवलि मनु करषहिं ॥

मंजुल मनिमय बंदनिवारे । मनहुँ पाकरिपु चाप सँवारे ॥
 प्रगटहिं दुरहिं अटन्ह पर भामिनि । चारु चपल जनु दमकहिं दामिनि
 दुंदुभि धुनि घन गरजनि घोरा । जाचक चातक दादुर मोरा ॥
 सुर सुगंध सुचि बरषहिं बारी । सुखी सकल ससि पुर नर नारी ॥
 समउ जानि गुर आयसु दीन्हा । पुर प्रवेशुर घुकुल मनि कीन्हा ॥
 सुमिरि संभु गिरिजा गनराजा । मुदित महीपति सहित समाजा ॥

दो०—होहिं सगुन बरषहिं सुमन सुर दुंदुभी बजाइ ।

विवुध बधू नाचहिं मुदित मंजुल मंगल गाइ ॥३४७॥

मागध सूत बंदि नट नागर । गावहिं जसु तिहु लोक उजागर ॥
 जय धुनि बिमल बेद बर बानी । दस दिसि सुनि असुमंगल सानी ॥
 बिपुल बाजने बाजन लागे । नभ सुर नगर लोग अनुरागे ॥
 बने बराती बरनि न जाहीं । महा मुदित मन सुख न समाहीं ॥
 पुरबासिन्ह तव राय जोहारे । देखत रामहि भए सुखारे ॥
 करहिं निछावरि मनिगन चीरा । बारि बिलोचन पुलक सरीरा ॥
 आरति करहिं मुदित पुर नारी । हरषहिं निरखि कुअँर बर चारी ॥
 सिबिका सुभ्र्ग ओहार उधारी । देखि दुलहिनिन्ह होहिं सुखारी ॥

दो०—एहि विधि सबही देत सुखु आए राजदुआर ।

मुदित मातु परिछनि करहिं बधुन्ह समेत कुमार ॥३४८॥

करहिं आरती बारहिं बारा । प्रेम प्रमोदु कहै को पारा ॥
 भूषन मनि पट नाना जाती । करहिं निछावरि अगनित भाँती ॥
 बधुन्ह समेत देखि सुत चारी । परमानंद मगन महतारी ॥
 पुनि पुनि सीय राम छबि देखी । मुदित सफल जगजीवन लेखी ॥

सखीं सीय मुख पुनि पुनि चाही । गान करहिं निज सुकृत सराही ॥
 बरषहिं सुमन छनहिं छन देवा । नाचहिं गावहिं लावहिं सेवा ॥
 देखि मनोहर चारिउ जोरीं । सारद उपमा सकल ढँढोरीं ॥
 देत न बनहिं निपट लघु लागीं । एकटक रहीं रूप अनुरागीं ॥
 दो०—निगम नीति कुल रीति करि अरघ पाँवडें देत ।

बधुन्ह सहित सुन परिछि सब चलीं लवाइ निकेत ॥३४९॥

चारि सिंघासन सहज सुहाए । जनु मनोज निज हाथ बनाए ॥
 तिन्ह पर कुअँरि कुअँर बैठारे । सादर पाय पुनीत पखारे ॥
 धूप दीप नैबेद बेद विधि । पूजे बर दुलहिनि मंगलनिधि ॥
 बारहिं बार आरती करहीं । व्यजन चारु चामर सिर ढरहीं ॥
 बन्तु अनेक निछावरि होहीं । भरीं प्रमोद मातु सब सोहीं ॥
 पावा परम तत्व जनु जोगीं । अमृत लहेउ जनु संतत रोगीं ॥
 जनम रंक जनु पारस पावा । अंधहि लोचन लाभु सुहावा ॥
 मूक बदन जनु सारद छाई । मानहुँ समर सूर जय पाई ॥

दो०—एहि सुख ते सत कोटि गुन पावहिं मातु अनंद ।

भाइन्ह सहित बिआहि घर आए रघुकुलचंद ॥३५०(क)॥

लोक रीति जननीं करहिं बर दुलहिनि सकुचाहिं ।

मोदु बिनोदु बिलोकि बड़ रामु मनहिं मुसुकाहिं ॥३५०(ख)॥

देव पितर पूजे विधि नीकी । पूजीं सकल बासना जी की ॥
 सबहि बंदि मागहिं बरदाना । भाइन्ह सहित राम कल्याना ॥
 अंतरहित सुर आसिष देहीं । मुदित मातु अंचल भरि लेहीं ॥
 भूपति बोलि बराती लीन्हे । जान बसन मनि भूषनदीन्हे ॥

आयसु पाइ राखि उर रामहि । मुदित गए सब निज निज धामहि ॥
 पुर नर नारि सकल पहिराए । घर घर बाजन लगे बधाए ॥
 जाचक जन जाचहिं जोइ जोई । प्रमुदित राउ देहिं सोइ सोई ॥
 सेवक सकल बजनि आनाना । पूरन किए दान सनमाना ॥

दो०—देहिं असीस जोहारि सब गावहिं गुन गन गाथ ।

तब गुर भूसुर सहित गृहँ गवनु कीन्ह नरनाथ ॥३५१॥

जो बसिष्ट अनुसासन दीन्ही । लोक बेद बिधि सादर कीन्ही ॥
 भूसुर भीर देखि सब रानी । सादर उठीं भाग्य बड़ जानी ॥
 पाय पखारि सकल अन्हवाए । पूजि भली बिधि भूप जेवाँए ॥
 आदर दान प्रेम परितोषे । देत असीस चले मन तोषे ॥
 बहु बिधि कीन्हि गाधिसुत पूजा । नाथ मोहि सम धन्य न दूजा ॥
 कीन्हि प्रसंसा भूपति भूरी । रानिन्ह सहित लीन्हि पग धूरी ॥
 भीतर भवन दीन्ह बर बासू । मन जोगवत रह नृपुरनिवासू ॥
 पूजे गुर पद कमल बहोरी । कीन्हि बिनय उर प्रीति न थोरी ॥

दो०—बधुन्ह समेत कुमार सब रानिन्ह सहित महीसु ।

पुनि पुनि बंदत गुर चरन देत असीस मुनीसु ॥३५२॥

बिनय कीन्हि उर अति अनुरागें । सुत संपदा राखि सब आगें ॥
 नेगु मार्ग मुनिनायक लीन्हा । आसिरबादु बहुत बिधि दीन्हा ॥
 उर धरि रामहि सीय समेता । हरषि कीन्ह गुर गवनु निकेता ॥
 बिप्रबधू सब भूप बोलाई । चैल चारु भूषन पहिराई ॥
 बहुरि बोलाई सुआमिनि लीन्हीं । रुचि बिचारि पहिरावनि दीन्हीं ॥
 नेगी नेग जोग सब लेहीं । रुचि अनुरूप भूपमानि देहीं ॥

प्रिय पाहुने पूज्य जे जाने । भूपति भली भाँति सनमाने ॥
देव देखि रघुबीर बिबाह । बरषि प्रसन्न प्रसंसि उछाह ॥

दो०—चले निसान बजाइ सुर निज निज पुर सुख पाइ ।

कहत परसपर राम जसु प्रेम न हृदयँ समाइ ॥३५३॥

सब विधि सबहि समदि नरनाहू । रहा हृदयँ भरि पूरि उछाहू ॥
जहँ रनिवासु तहाँ पगु धारे । सहित बहूटिन्ह कुअँर निहारे ॥
लिए गोद करि मोद समेता । को कहि सकइ भयउ सुखु जेता ॥
बधू सप्रेम गोद बैठरीं । बार बार हियँ हरषि दुलारीं ॥
देखि समाजु मुदित रनिवासू । सब कें उर अनंद कियो बासू ॥
कहेउ भूप जिमि भयउ बिबाहू । सुनि सुनि हरषु होत सब काहू ॥
जनक राज गुन सीलु बड़ाई । प्रीति रीति संपदा सुहाई ॥
बहुविधि भूप भाट जिमि बरनी । रानीं सब प्रमुदित सुनि करनी ॥

दो०—सुतन्ह समेत नहाइ नृप बालि विप्र गुर ग्याति ।

भोजन कीन्ह अनेक विधि घरी पंच गइ राति ॥३५४॥

मंगरुगान करहिं बर भामिनि । मै सुखमूल मनोहर जामिनि ॥
अँचइ पान सब काहूँ पाए । स्रग सुगंध भूषित छबिछाए ॥
गमहि देखि रजायमु पाई । निज निज भवन चले सिर नाई ॥
प्रेमु प्रमोदु बिनोदु बड़ाई । समउ समाजु मनोहरताई ॥
कहिन सकहिं सत सारद सेख । बेद बिरंचि महेस गनेख ॥
सो मै कहौं कवन विधि बरनी । भूमिनागु सिर धरइ कि भरनी ॥
नृप सब भाँति सबहि सनमानी । कहि मृदु बचन बोलाई गनी ॥
बधू लरिकनीं पर घर आई । राखेहु नयन पलक की नाई ॥

दो०—लरिका श्रमित उनीद बस सयन करावहु जाइ ।

अस कहि गे विश्रामगृहँ राम चरन चितु लाइ ॥३५५॥

भूप बचन सुनि सहज सुहाए । जरित कनक मनि पलँग डमाए ॥
 सुभग सुरभि पय फेन समाना । कोमल कलित सुपेतीं नाना ॥
 उपबरहन बर बरनि न जाहीं । स्रग सुगंध मनि मंदिर माहीं ॥
 रतनदीप सुठि चारु चँदोवा । कहत न बनइ जान जेहिं जोवा ॥
 सेज रुचिर रचि रामु उठाए । प्रेम समेत पलँग पौढ़ाए ॥
 अग्या पुनि पुनि भाइन्ह दीन्ही । निज निज सेज सयन तिन्ह कीन्ही
 देखि स्याम मृदु मंजुल गाता । कहहिं सप्रेम बचन सब माता ॥
 मारग जात भयावनि भारी । केहि बिधि तात ताड़का मारी ॥

दो०—घोर निसाचर बिकट भट समर गनहिं नहिं काहु ।

मारे सहित सहाय किमि खल मारीच सुवाहु ॥३५६॥

मुनि प्रसाद बलि तात तुम्हारी । ईस अनेक करवरें टारी ॥
 मख रखवारी करि दुहुँ भाई । गुरु प्रसाद सब बिद्या पाई ॥
 मुनितिय तरी लगत पग धूरी । कीरति रही भुवन भरि पूरी ॥
 कमठ पीठि पबि कूट कठोरा । नृप समाज महँ सिव धनु तोरा ॥
 बिस्व बिजय जसु जानकि पाई । आए भवन व्याहि सब भाई ॥
 सकल अमानुष करम तुम्हारे । केवल कौसिक कृपाँ सुधारे ॥
 आजु सुफल जग जनमु हमारा । देखि तात बिधुवदन तुम्हाग ॥
 जे दिन गए तुम्हहि बिनु देखें । ते बिरंचि जनि पारहिं लेखें ॥

दो०—राम प्रतोषी मातु सब कहि विनीत बर वैन ।

सुमिरि संभु गुर विप्र पद किए नीदबस नैन ॥३५७॥

नीदउँ बदन सोह सुठि लोना । मनहुँ साँझ सरसीरुह सोना ॥
 घर घर करहिं जागरन नारीं । देहिं परसपर मंगल गारीं ॥
 पुरी बिराजति राजति रजनी । रानीं कहहिं बिलोकहु सजनी ॥
 सुंदर बधुन्ह सासु लै सोई । फनिकन्ह जनु सिरमनि उर गोई
 प्रात पुनीत काल प्रभु जागे । अरुनचूड़ बर बोलन लागे ॥
 बंदि मागधन्हि गुन गन गाए । पुरजन द्वार जोहारन आए ॥
 बंदि बिप्र सुर गुर पितु माता । पाइ असीस मुदित सब भ्राता ॥
 जननिन्ह सादर बदन निहारे । भूपति संग द्वार पशु धारे ॥

दो०—कीन्हि सौच सब सहज सुचि सरित पुनीत नहाइ ।

प्रातकिया करि तात पहिं आए चारिउ भाइ ॥३५८॥

नवाह्नपारायण, तीसरा विश्राम

भूप बिलोकि लिए उर लाई । बैठे हरषि रजायसु पाई ॥
 देखि रामु सब सभा जुड़ानी । लोचन लाभ अवधि अनुमानी ॥
 पुनि बसिष्ठु मुनि कौसिकु आए । सुभग आसनन्हि मुनि बैठाए ॥
 सुतन्ह समेत पूजि पद लागे । निरखि रामु दोउ गुर अनुरागे ॥
 कहहिं वसिष्ठु धरम इतिहासा । सुनहिं महीसु सहित रनिवासा ॥
 मुनि मन अगम गाधिसुत करनी । मुदित बसिष्ठ बिपुल बिधि वरनी
 बोले बामदेउ सब साँची । कीरति कलित लोक तिहुँ माची ॥
 सुनि आनंदु भयउ सब काहू । राम लखन उर अधिक उछाहू ॥

दो०—मंगल मोद उछाह नित जाहिं दिवस एहि भौंति ।

उमगी अवध अनंद भरि अधिक अधिक अधिकाति ॥३५९॥

सुदिन सोधि कल कंकन छोरे । मंगल मोद बिनोद न थोरे ॥
 नित नव सुखु सुर देखि सिहाहीं । अवध जन्म जाचहिं बिधि पाहीं
 बिस्वामित्रु चलन नित चहहीं । राम सप्रेम बिनय बसर रहहीं ॥
 दिन दिन सयगुन भूपति भाऊ । देखि सराह महामुनिराऊ ॥
 मागत बिदा राउ अनुरागे । सुतन्ह समेत ठाढ़ मे आगे ॥
 नाथ सकल संपदा तुम्हारी । मैं सेवक समेत सुत नारी ॥
 करब सदा लरिकन्ह पर छोहू । दरसन देत रहब मुनि मोहू ॥
 अस कहि राउ सहित सुत रानी । परेउ चरन मुख आव न बानी ॥
 दीन्हि असीस विप्र बहु भाँती । चले न प्रीति रीति कहि जाती ॥
 रामु सप्रेम संग सब भाई । आयसु पाइ फिरे पहुँचाई ॥

दो०—रामु रूपु भूपति भगति ब्याहु उछाहु अनंदु ।

जात सराहत मनहिं मन मुदित गाधिकुल चंदु ॥२६०॥

बामदेव रघुकुल गुर ग्यानी । बहुरि गाधिसुत कथा बखानी ॥
 सुनि मुनि सुजसु मनहिं मन राऊ । बरनत आपन पुन्य प्रभाऊ ॥
 बहुरे लोग रजायसु भयऊ । सुतन्ह समेत नृपति गृहँ गयऊ ॥
 जहँ तहँ राम ब्याहु सबु गावा । सुजसु पुनीत लोक तिहुँ छावा ॥
 आए ब्याहि रामु घर जब तैं । बसइ अनंद अवध सब तब तैं ॥
 प्रभु बिबाहँ जप भयउ उछाहू । सकहिं न बरनि गिरा अहिनाहू ॥
 कविकुल जीवनु पावन जानी । राम सीय जसु मंगल खानी ॥
 तेहि ते मैं कछु कहा बखानी । करन पुनीत हेतु निज बानी ॥

छं०—निज गिरा पावनि करन कारन राम जसु तुलसी कह्यो ।

रघुबीर चरित अपार बारिधि पारु कबि कौनै लह्यो ॥

उपवीत ब्याह उछाह मंगल सुनि जे सादर गावहीं ।

बैदेहि राम प्रसाद ते जन सर्वदा सुख पावहीं ॥

सो०—सिय रघुबीर बिबाहु जे सप्रेम गावहिं सुनहिं ।

तिन्ह कहँ सदा उछाहु मंगलायतन राम जसु ॥३६१॥

मासपारायण, बारहवाँ विश्राम

इति श्रीमद्रामचरितमानसे सकलकलिकलुषविध्वंसने

प्रथमः सोपानः समाप्तः ।

(बालकाण्ड समाप्त)



राम-भरत-मिलन



बरबस लिए उठाइ उर लाए कृपानिधान ।
भरत राम की मिलनि लखि विसरे सबहि अपान ॥

श्रीगणेशाय नमः

श्रीजानकीवल्लभो विजयते

श्रीरामचरितमानस

द्वितीय सोपान

(अयोध्याकाण्ड)

श्लोक

यस्याङ्गे च विभाति भूधरसुता देवापगा मस्तके
भाले बालविधुर्गले च गरलं यस्योरसि व्यालराट् ।
सोऽयं भूतिविभूषणः सुरवरः सर्वाधिपः सर्वदा
शर्वः सर्वगतः शिवः शशिनिभः श्रीशङ्करः पातु माम् ॥१॥
प्रसन्नतां या न गताभिषेकतस्तथा न मम्ले वनवासदुःखतः ।
मुखाम्बुजश्री रघुनन्दनस्य मे सदास्तु सा मञ्जुलमङ्गलप्रदा ॥२॥
नीलाम्बुजश्यामलकोमलाङ्गं सीतासमारोपितवामभागम् ।
पाणौ महासायकचारुचापं नमामि रामं रघुवंशनाथम् ॥३॥

दो०—श्रीगुरु चरन सरोज रज निज मनु मुकुरु सुधारि ।

बरनउँ रघुवर विमल जसु जो दायकु फल चारि ॥

जब तें रामु ब्याहि घर आए । नित नव मंगल मोद बधाए ॥
भुवन चारिदस भूधर भारी । सुकृत मेघ बरषहिं सुख बारी ॥

रिधि सिधि संपति नदीं सुहाई । उमगि अवध अबुधि कहूँ आई ॥
 मनिगन पुर नर नारि सुजाती । सुचि अमोल सुंदर सब भाँती ॥
 कहिन जाइ कछु नगर बिभूती । जनु एतनिअ बिरंचि करतूती ॥
 सब बिधिसब पुर लोग सुखारी । रामचंद मुख चंदु निहारी ॥
 मुदित मातु सब सखीं सहेली । फलित बिलोकि मनोरथ बेली ॥
 राम रूपु गुन सीलु सुभाऊ । प्रमुदित होइ देखि सुनिराऊ ॥
 दो०—सब के उर अभिलाषु अस कहहि मनाइ महेसु ।

आप अछत जुवराज पद रामहि देउ नरेसु ॥ १ ॥

एक समय सब सहित समाजा । राजसभाँ रघुराजु बिराजा ॥
 सकल सुकृत मूरति नरनाहू । राम सुजसु सुनि अतिहि उछाहू ॥
 नृप सब रहहि कृपा अभिलाषे । लोकप करहि प्रीतिरुख राखे ॥
 तिभुवन तीनि काल जग माहीं । भूरिभाग दसरथ सम नाहीं ॥
 मंगलमूल रामु सुत जासू । जो कछु कहिअथोर सबु तासू ॥
 रायँ सुभायँ मुकुरु कर लीन्हा । बदनु बिलोकि मुकुटु सम कीन्हा ॥
 श्रवन समीप भए सित केसा । मनहुँ जरठपनु अस उपदेसा ॥
 नृप जुवराजु राम कहूँ देहू । जीवन जनम लाहु किन लेहू ॥

दो०—यह बिचारु उर आनि नृप सुदिनु सुअवसरु पाइ ।

प्रेम पुलकि तन मुदित मन गुरहि सुनायउ जाइ ॥ २ ॥

कहइ भुआलु सुनिअ मुनिनायक । भए राम सब बिधि सब लायक ॥
 सेवक सचिव सकल पुरवासी । जे हमारे अरि मित्र उदासी ॥
 सबहि रामु प्रिय जेहि बिधि मोही । प्रभु असीस जनु तनु धरि सोही ॥
 बिप्र सहित परिवार गोसाई । करहि छोह सब रौरिहि नाई ॥

जे गुर चरन रेनु सिर धरहीं । ते जन सकल बिभव बस करहीं ॥
मोहि सम यहु अनुभयउ न दूजें । सबु पायउँ रज पावनि पूजें ॥
अब अभिलाषु एकु मन मोरें । पूजिहि नाथ अनुग्रह तोरें ॥
मुनि प्रसन्न लखि सहज सनेहू । कहेउ नरेस रजायसु देहू ॥

दो०—राजन राउर नामु जसु सब अभिमत दातार ।

फल अनुगामी महिप मनि मन अभिलाषु तुम्हार ॥ ३ ॥

सब बिधि गुरु प्रसन्न जियँ जानी । बोलेउ राउ रहँसि मृदु बानी ॥
नाथ रामु करिअहिं जुबराजू । कहिअ कृपा करि करिअ समाजू ॥
मोहि अछत यहु होइ उछाहू । लहहिं लोग सब लोचन लाहू ॥
प्रभु प्रसाद सिव सबइ निबाहीं । यह लालसा एक मन माहीं ॥
पुनि न सोचतनु रहउ कि जाऊ । जेहिं न होइ पाछें पछिताऊ ॥
मुनि मुनि दसरथ वचन सुहाए । मंगल मोद मूल मन भाए ॥
सुनु नृप जासु बिमुख पछिताहीं । जासु भजन बिनु जरनि न जाहीं ॥
भयउ तुम्हार तनय सोइ स्वामी । रामु पुनीत प्रेम अनुगामी ॥

दो०—बेगि बिलंबु न करिअ नृप साजिअ सबइ समाजु ।

सुदिन सुमंगलु तबहिं जव रामु होहिं जुबराजु ॥ ४ ॥

मुदित महीपति मंदिर आए । सेवक सचिव सुमंत्रु बोलाए ॥
कहि जय जीव सीस तिन्ह नाए । भूप सुमंगल वचन सुनाए ॥
जौं पाँचहि मत लागै नीका । करहु हरषि हियँ रामहि टीका ॥
मंत्री मुदित सुनत प्रिय बानी । अभिमत बिरवँ परेउ जनु पानी ॥
बिनती सचिव करहिं कर जोरी । जिअहु जगतपति बरिस करोरी ॥
जग मंगल भल काजु बिचारा । बेगिअ नाथ न लाइअ बारा ॥

नृपहि मोदु सुनि सचिव सुभाषा । बड़त बौंड़ जनु लही सुसाखा॥

दो०—कहेउ भूप मुनिराज कर जोइ जोइ आयसु होइ ।

राम राज अभिषेक हित बेगि करहु सोइ सोइ ॥ ५ ॥

हरषि मुनीस कहेउ मृदु बानी । आनहु सकल सुतीरथ पानी ॥
 औषध मूल फूल फल पाना । कहे नाम गनि मंगल नाना ॥
 चामर चरम बसन बहु भाँती । रोमपाट पट अगनित जाती ॥
 मनिगन मंगल बस्तु अनेका । जो जग जोगु भूप अभिषेका ॥
 बेद बिदित कहि सकल बिधाना । कहेउ रचहु पुर बिबिध बिताना ॥
 सफल रसाल पूगफल केरा । रोपहु बीथिन्ह पुर चहुँ फेग ॥
 रचहु मंजु मनि चौकें चारु । कहहु बनावन बेगि बजारु ॥
 पूजहु गनपति गुर कुल देवा । सब बिधि करहु भूमिसुर सेवा ॥

दो०—ध्वज पताक तोरन कलस सजहु तुरग रथ नाग ।

सिर धरि मुनिवर वचन सबु निज निज काजहि लाग ॥ ६ ॥

जो मुनीस जेहि आयसु दीन्हा । सो तेहि काजु प्रथम जनु कीन्हा ॥
 बिप्र साधु सुर पूजत राजा । करत राम हित मंगल काजा ॥
 सुनत राम अभिषेक सुहावा । बाज गहागह अवध बधावा ॥
 राम सीय तन सगुन जनाए । फरकहिं मंगल अंग सुहाए ॥
 पुलकि सप्रेम परसपर कहहीं । भरत आगमनु सूचक अहहीं ॥
 भए बहुत दिन अति अवसेगी । सगुन प्रतीति भेंट प्रिय केरी ॥
 भरत सरिस प्रियको जग माहीं । इहइ सगुन फल दूसर नाही ॥
 रामहि बंधु सोच दिन राती । अंडन्हि कमठ हृदउ जेहि भाँती ॥

दो०—एहि अवसर मंगल परम सुनि रहैसेउ रनिवासु ।

सोभत लखि बिधु बद्ध जनु बारिधि बीचि बिलासु ॥ ७ ॥

प्रथम जाइ जिन्ह बचन सुनाए । भूषन बसन भूरि तिन्ह पाए ॥
प्रेम पुलकि तन मन अनुरागी । मंगल कलस सजन सब लागी ॥
चौकें चारु सुमित्राँ पूरी । मनिमय बिबिध भाँति अतिरूरी
आनंद मगन राम महतारी । दिए दान बहु बिप्र हँकारी ॥
पूर्जी ग्रामदेवि सुर नागा । कहेउ बहोरि देन बलिभागा ॥
जेहि बिधि होइ राम कल्यानु । देहु दया करि सो बरदानु ॥
गावहिँ मंगल कोकिल बयनी । बिधुबदनी मृगसावकनयनी ॥

दो०—राम राज अभिषेकु सुनि हियँ हरषे नर नारि ।

लगे सुमंगल सजन सब बिधि अनुकूल विचारि ॥ ८ ॥

तब नरनाँह बसिष्ठु बोलाए । रामधाम सिख देन पठाए ॥
गुर आगमनु सुनत रघुनाथा । द्वार आइ पद नायउ माथा ॥
सादर अरघ देइ घर आने । सोरह भाँति पूजि सनमाने ॥
गहे चरन सिय सहित बहोरी । बोले रामु कमल कर जोरी ॥
सेवक सदन स्वामि आगमनु । मंगल मूल अमंगल दमनु ॥
तदपि उचित जनु बोलि सप्रीती । पठइअ काज नाथ असि नीती ॥
प्रभुता तजि प्रभु कीन्ह सनेहु । भयउ पुनीत आजु यहु गेहु ॥
आयसु होइ सो करै गोसाई । सेवक लहइ स्वामि सेवकाई ॥

दो०—सुनि सनेह साने बचन मुनि रघुवरहि प्रसंस ।

राम कस न तुम्ह कहहु अस हंस बंस अवतंस ॥ ९ ॥

बरनि राम गुन सील सुभाऊ । बोले प्रेम पुलकि मुनिराऊ ॥

भूप सजेउ अभिषेक समाजू । चाहत देन तुम्हहि जुबराजू ॥
 राम करहु सब संजम आजू । जौ बिधि कुसल निबाहै काजू ॥
 गुरु सिख देइ राय पहिं गयऊ । राम हृदयँ अस बिसमय भयऊ ॥
 जनमे एक संग सब भाई । भोजन सयन केलि लरिकाई ॥
 करनबेध उपबीत बिआहा । संग संग सब भए उछाहा ॥
 बिमल बंस यह अनुचित एकू । बंधु विहाइ बड़ेहि अभिषेकू ॥
 प्रभु सप्रेम पछितानि सुहाई । हरउ भगत मन कै कुटिलाई ॥

दो०—तेहि अवसर आए लखन मगन प्रेम आनंद ।

सनमाने प्रिय बचन कहि रघुकुल कैरव चंद ॥ १० ॥

बाजहिं बाजने बिबिध बिधाना । पुर प्रमोदु नहिं जाइ बखाना ॥
 भरत आगमनु सकल मनावहिं । आवहुँ बेगि नयन फलु पावहिं ॥
 हाट बाट घर गलीं अथाई । कहहिं परसपर लोग लोगाई ॥
 कालि लगन भलि केतिक बारा । पूजिहि बिधि अभिलाषु हमारा ॥
 कनक सिंघासन सीय समेता । बैठहिं रामु होइ चित चेता ॥
 सकल कहहिं कब होइहि काली । बिघन मनावहिं देव कुचाली ॥
 तिन्हहि सोहाइ न अवध बधावा । चोरहि चंदिनि राति न भावा ॥
 सारद बोलि बिनेष सुर करहीं । बारहिं बार पाय लै परहीं ॥

दो०—बिपति हमारि बिलोकि बड़ि मातु करिअ सोइ आजु ।

रामु जाहि बन राजु तजि होइ सकल सुरकाजु ॥ ११ ॥

सुनि सुर बिनय ठाढ़ि पछिताती । भइउँ सरोज बिपिन हिमराती ॥
 देख देव पुनि कहहिं निहोरी । मातु तोहि नहिं थोरिउ खोरी ॥
 बिसमय हरष रहित रघुराऊ । तुम्ह जानहु सब राम प्रभाऊ ॥

जीव करम बस मुख दुख भागी । जाइअ अवध देव हित लागी ॥
बार बार गइ चरन सँकोची । चली बिचारि बिबुध मति पोची
ऊँच निवासु नीचि करतूती । देखि न सकहिं पराइ बिभूती ॥
आगिल काजु बिचारि बहोरी । करिहहिं चाह कुसल कबि मोरी ॥
हरषि हृदयँ दसरथ पुर आई । जनु ग्रह दसा दुसह दुखदाई ॥

दो०—नामु मंथरा मंदमति चेरी कैकड़ केरि ।

अजस पेठारी ताहि करि गई गिरा मति फेरि ॥ १२ ॥

दीख मंथरा नगर वनावा । मंजुल मंगल वाज बधावा ॥
पूछेसि लोगन्ह काह उछाहू । राम तिलकुसुनि भा उर दाहू ॥
करइ बिचारु कुबुद्धि कुजाती । होइ अकाजु कवनि बिधि राती ॥
देखि लागि मधु कुटिल किराती । जिमि गवँ तकइ लेउँ केहि भाँती
भरत मातु पहिँ गइ बिलखानी । का अनमनि हसि कह हँसि रानी
ऊतरु देइ न लेइ उसास । नारि चरित करि ढारइ आँसू ॥
हँसि कह रानि गालु बड़ तोरें । दीन्ह लखन सिख अस मन मोरें
तबहुँ न बोल चेरि बड़ि पापिनि । छाड़इ स्वास कारि जनु साँपिनि ॥

दो०—सभय रानि कह कहसि किन कुसल रामु महिपालु ।

लखनु भरनु रिपुदमनु सुनि भा कुवरी उर सालु ॥ १३ ॥

कत सिख देइ हमहि कोउ माई । गालु करब केहि कर बलु पाई ॥
रामहि छाड़ि कुसल केहि आजू । जेहि जनेसु देइ जुवराजू ॥
भयउ कौसिलहि बिधि अति दाहिन । देखत गरब रहत उर नाहिन
देखहु कस न जाइ सब सोभा । जो अवलोकि मोर मनु छोभा ॥
पूतु बिदेस न सोचु तुम्हारें । जानति बहु बस नाहु हमारें ॥

नीद बहुत प्रिय सेज तुराई । लखहु न भूप कपट चतुराई ॥
 सुनि प्रिय वचन भलिन मनु जानी । झुकी रानि अब रह्य अरगानी ॥
 पुनि अस कवहुँ कहसि घरफोरी । तब धरि जीभ कढ़ावउँ तोरी ॥

दो०—काने खोरे कूबरे कुटिल कुचाली जानि ।

तिय बिसेपि पुनि चेरि कहि भरतमातु मुसुकानि ॥ १४ ॥

प्रियवादिनि सिख दीन्हिउँ तोही । सपनेहुँ तो पर कोपु न मोही ॥
 सुदिनु सुमंगल दायकु सोई । तोर कहा फुर जेहि दिन होई ॥
 जेठ स्वामि सेवक लघु भाई । यह दिनकर कुल रीति सुहाई ॥
 राम तिलकु जीं साँचेहुँ काली । देउँ मागु मन भावत आली ॥
 कौसल्या सम सब महतारी । रामहि सहज सुभायँ पिआरी ॥
 मो पर करहिं सनेहु बिसेपी । मैं करि प्रीति परीछा देखी ॥
 जौं बिधि जनमु देइ करि छोहू । होहुँ राम सिय पूत पुताहू ॥
 प्रान तें अबिक रामु प्रिय मोरें । तिन्ह कें तिलक छोभु कस तोरें ॥

दो०—भरत सपथ तोहि सत्य कहु परिहरि कपट दुराउ ।

हरप समय विसमउ करसि कारन मोहि सुनाउ ॥ १५ ॥

एकहिं बार आस सब पूजी । अब कछु कहव जीभ करि दूजी ॥
 फोरैं जोगु कपारु अभागा । भलेउ कहत दुख रउरेहि लागा ॥
 कहहिं झूठि फुरि बात बनाई । ते प्रिय तुम्हहि करुइ मैं माई ॥
 हमहुँ कहवि अव ठकुरसोहाती । नाहिं त मौन रहव दिनु राती ॥
 करि कुरूप बिधि परबस कीन्हा । बवा सो लुनि अलहिअ जो दीन्हा ॥
 कोउ नृप हाउ हमहि का हाना । चेरि छाड़ि अव हांन किरानी ॥
 जारैं जोगु सुभाउ हमारा । अनभल देखिन जाइ तुम्हारा ॥

तातें कछुक बात अनुसारी । छमिअ देबि बड़ि चूक हमारी ॥

दो०—गूढ़ कपट प्रिय वचन सुनि तीय अधरबुधि रानि ।

सुरमाया बस बैरिनिहि सुहृद जानि पतिआनि ॥ १६ ॥

सादर पुनि पुनि पूँछति ओही । सबरी गान मृगी जनु मोही ॥
तसि मति फिरी अहइ जसि भाबी । रहसी चेरि घात जनु फाबी ॥
तुम्ह पूँछहु मै कहत डेराऊँ । धरेहु मोर घरफोरी नाऊँ ॥
सजि प्रतीति बहुबिधि गढ़ि छोली । अवध साढ़साती तब बोली ॥
प्रिय सिय रामु कहा तुम्ह रानी । रामहि तुम्ह प्रिय सो फुरि बानी ॥
रहा प्रथम अब ते दिन बीते । समउ फिरें रिपु होहिं पिरीते ॥
भानु कमल कुल पोपनिहारा । बिनु जल जारि करइ सोइ छारा ॥
जरि तुम्हारि चह सवति उखारी । रूँधहु करि उपाउ बर बारी

दो०—तुम्हहि न सोचु सोहाग बल निज बस जानहु राउ ।

मन मलीन मुह मीठ नृपु राउर सरल सुभाउ ॥ १७ ॥

चतुर गँभीर राम महतारी । बीचु पाइ निज बात सँवारी ॥
पठए भरतु भूप ननिअउरें । राम मातु मत जानब रउरें ॥
सेवहिं सकल सवति मोहि नीकें । गरबित भरत मातु बल पीकें ॥
सालु तुम्हार कौंसिलहि माई । कपट चतुर नहिं होइ जनाई
राजहि तुम्ह पर प्रेसु बिसेयी । सवति सुभाउ सकइ नहिं देखी
रचि प्रपंचु भूपहि अपनाई । राम तिलक हित लगनधराई ॥
यह कुल उचित राम कहूँ टीका । सबहि सोहाइ मोहि सुठिनीका ॥
आगिलि बात समुझि डरु मोही । देउ दैउ फिरि सो फलु ओही ॥

दो०-रचि पचि कोटिक कुटिलपन कीन्हेंसि कपट प्रबोधु ।

कहिसि कथा सत सवति कै जेहि विधि बाढ़ बिरोधु ॥ १८ ॥

भावी बस प्रतीति उर आई । पूँछ रानि पुनि सपथ देवाई ॥
का पूँछहु तुम्ह अबहुँ न जाना । निज हित अनहित पसु पहिचाना
भयउ पाखु दिन सजत समाजू । तुम्ह पाई सुधि मोहि सन आजू ॥
खाइअ पहिरिअ राज तुम्हारे । सत्य कहें नाहिँ दोषु हमारे ॥
जाँ असत्य कछु कहब बनाई । तौ विधि देखि हमहि सजाई ॥
रामहि तिलक कालि जाँ भयऊ । तुम्ह कहुँ बिपति बीजु बिधि बयऊ
रेख खँचाइ कहउँ बलु भाषी । भामिनि भइहु दूध कइ माखी ॥
जाँ सुत सहित करहु सेवकाई । तौ घर रहहु न आन उपाई ॥

दो०-कद्रू विनतहि दीन्ह दुगु तुम्हहि कौंसिलाँ देव ।

भरतु बंदिगृह सेइहहिँ लखनु राम के नंच ॥ १९ ॥

कैकयसुता सुनत कटु बानी । कहि न सकइ कछु सहमि सुखानी
तन पसेउ कदली जिमि काँपी । कुबरीं दसन जीभ तब चाँपी ॥
कहि कहि कोटिक कपट कहानी । धीरजु धरहु प्रबोधिसि रानी ॥
फिरा करमु प्रिय लागि कुचाली । बकिहि सराहइ मानि मराली ॥
सुनु मंथरा बात फुरि तोरी । दहिनि आँखि नित फरकइ मोरी
दिन प्रति देखउँ राति कुसपने । कहउँ न तोहि मोह बस अपने ॥
काह करीं सखि सुख सुभाऊ । दाहिन वाम न जानउँ काऊ ॥

दो०-अपने चलत न आजु लगि अनभल काहुक कीन्ह ।

कैहिँ अघ एकहि बार मोहि दैअँ दुसह दुखु दीन्ह ॥ २० ॥

नैहर जनमु भरब बरु जाई । जिअत न करबि सवति सेवकाई ॥

अरि बस दैउ जिआवत जाही । मरनु नीक तेहि जीवन चाही ॥
दीन बचन कह बहुबिधि रानी । सुनि कुबरीं तियमाया ठानी ॥
अस कस कहहु मानि मन ऊना । सुख सोहागु तुम्ह कहूँ दिन दूना
जेहि राउर अति अनभल ताका । सोइ पाइहि यहु फलु परिपाका ॥
जब तें कुमत सुना मैँ स्वामिनि । भूख न बासर नीद न जामिनि ॥
पूँछेउँ गुनिन्ह रेख तिन्ह खाँची । भरत भुआल होहिं यह साँची ॥
भामिनि करहु त कहौं उपाऊ । है तुम्हरीं सेवा बस गाऊ ॥

दो०- परउँ कूप तुअ बचन पर सकउँ पूत पति त्यागि ।

कहसि मोर दुख देखि बड़ कस न करब हित लागि ॥२१॥

कुबरीं करि कबुली कैकेई । कपट छुरी उर पाहन टेई ॥
लगइ न रानि निकट दुखु कैसैं । चरइ हरित तिन वलिपमु जैसैं ॥
सुनत बान मृदु अंत कठोरी । देति मनहुँ मधु माहुर घोरी ॥
कहइ चेरि सुधि अहइ कि नाही । स्वामिनि कहिहु कथा मोहि पाहीं
दुइ वरदान भूप सन थाती । मागहु आजु जुड़ावहु छाती ॥
सुतहि राजु रामहि बनबास । देहु लेहु सब सबति हुलास ॥
भूपति राम सपथ जब करई । तब मागेहु जेहि बचनु न टरई ॥
होइ अकाजु आजु निसि बीतैं । बचनु मोर प्रिय मानेहु जीतैं ॥

दो०-बड़ कुघातु करि पातकिनि कहेसि कोपगृहँ जाहु ।

काजु सँवारेहु सजग सब सहसा जनि पतिआहु ॥२२॥

कुबरिहि रानि प्रानप्रिय जानी । बार बार बड़ि बुद्धि बखानी ॥
तोहि सम हित न मोर संसारा । बहे जात कइ भइसि अधारा ॥
जौं बिधि पुरब मनोरथु काली । करौं तोहि चख पूतरि आली ॥

बहुविधि चेरिहि आदरु देई । कोपभवन गवनी कैकई ॥
 बिपति बीजु बरपा रितु चेरी । भुईं भइ कुमति कैकई केरी ॥
 पाइ कपट जलु अंकुर जामा । बरदोउ दल दुख फल परिनामा ॥
 कोप समाजु साजि सबु सोई । राजु करत निज कुमति बिगोई ॥
 राउर नगर कोलाहलु होई । यह कुचालि कलु जान न कोई ॥

दो०—प्रमुदित पुर नर नारि सब सजहिं सुमंगलचार ।

एक प्रबिसहिं एक निर्गमहिं भीर भूप दरबार ॥२३॥

बाल सखा सुनि हियँ हरषाहीं । मिलि दस पाँच राम पहिं जाहीं ॥
 प्रभु आदरहिं प्रेसु पहिचानी । पूँछहिं कुसल खेम मृदु बानी ॥
 फिरहिं भवन प्रिय आयसु पाई । करत परसपर राम बड़ाई ॥
 को रघुबीर सरिस संसारा । सीलु सनेहु निबाहनिहारा ॥
 जेहिं जेहिं जोनि करम बस भ्रमहीं । तहँ तहँ ईसु देउ यह हमहीं ॥
 सेवक हम स्वामी सियनाहू । होउ नात यह ओर निबाहू ॥
 अम अभिलाषु नगर सब काहू । कैकयसुता हृदयँ अति दाहू ॥
 को न कुसंगति पाइ नसाई । रहइ न नीच मतेँ चतुराई ॥

दो०—साँझ समय^२ सानंद नृपु गयउ कैकई गेहँ ।

गवनु निठुरता निकट किय जनु धरि देह सनेहँ ॥२४॥

कोप भवन सुनि सकुचेउ राऊ । भय बस अगह्नुड परइ न पाऊ ॥
 सुरपति बसइ बाहँबल जाकें । नरपति सकल रहहिं रुख ताकें ॥
 सो सुनि तिय रिस गयउ सुखाई । देखहु काम प्रताप बड़ाई ॥
 खल कुलिस असि अँगवनिहारे । ते रतिनाथ सुमन सर मारे ॥
 सभय नरेसु प्रिया पहिं गयऊ । देखि दसा दुखु दारुन भयऊ ॥

भूमि सयन पटु मोट पुराना । दिए डारि तन भूषन नाना ॥
कुमतिहि कसि कुबेषता फाबी । अनअहिवातु सूच जनु भाबी ॥
जाइ निकट नृपु कह मृदु बानी । प्रानप्रिया केहि हेतु रिसानी ॥

छं०—केहि हेतु रानि रिसानि परसत पानि पतिहि नेवारई ।
मानहुँ सरोप भुअंग भामिनि विषम भौंति निहारई ॥
दोउ बासना रसना दसन वर मरम ठाहरु देखई ।
तुलसी नृपति भवतन्यता बस काम कौतुक लेखई ॥

सो०—बार बार कह राउ सुमुखि सुलोचनि पिकवचनि ।
कारन मोहि सुनाउ गजगामिनि निज कोप कर ॥२५॥

अनहित तोर प्रिया केई कीन्हा । केहि दुइ सिर केहि जमु चह लीन्हा
कहु केहि रंकहि करौं नरेख । कहु केहि नृपहि निकासौं देख ॥
सकउँ तोर अरि अमरउ मारी । काह कीट बपुरे नर नारी ॥
जानसि मोर सुभाउ बरोरु । मनु तव आनन चंद चकोरु ॥
प्रिया प्रान सुत सरबसु मोरें । परिजन प्रजा सकल बस तोरें ॥
जौं कलु कहौं कपटु करि तोही । भामिनि राम सपथ सत मोही ॥
बिहसि मागु मनभावति बाता । भूषन सजहि मनोहर गाता ॥
घरी कुघरी समुझि जियँ देखू । बेगि प्रिया परिहरहि कुबेषू ॥

दो०—यह सुनि मन गुनि सपथ बड़ि बिहसि उठी मतिमंद ।
भूषन सजति विलोकि मृगु मनहुँ किरातिनि फंद ॥२६॥

पुनि कह राउ सुहृद जियँ जानी । प्रेम पुलकि मृदु मंजुल बानी ॥
भामिनि भयउ तोर मनभावा । घर घर नगर अनंद बधावा ॥
रामहि देउँ कालि जुबराजू । सजहि सुलोचनि मंगल साजू ॥

दलकि उठेउ सुनि हृदउ कठोरु । जनु छुइ गयउ पाक बरतोरु ॥
 ऐसिउ पीर बिहसि तेहिं गोई । चोर नारि जिमि प्रगटि नरोई ॥
 लखहि न भूप कपट चतुराई । कोटि कुटिल मनि गुरु पढ़ाई ॥
 जद्यपि नीति निपुन नरनाहू । नारिचरित जलनिधि अवगाहू ॥
 कपट सनेहु बड़ाइ बशोरी । बोली बिहसि नयन मुहु मोरी ॥

दो०—मागु मागु पै कहहु पिय कबहुँ न देहु न लेहु ।

देन कहेहु बरदान दुइ तेउ पावत संदेहु ॥२७॥

जानेउँ मरमु राउ हँसि कहई । तुम्हहि कोहाब परमप्रिय अहई ॥
 थाती राखि न मागिहु काऊ । बिसरि गयउ मोहि भोर सुभाऊ ॥
 झूठेहुँ हमहिं दोषु जनि देहू । दुइ कै चारि मागि मकु लेहू ॥
 रघुकुल रीति मदा चलि आई । प्रान जाहुँ वरु वचनु न जाई ॥
 नहिं असत्य सम पातक पुंजा । गिरिसम होहिं कि कोटिक गुंजा ॥
 सत्यमूल सब सुकृत सुहाए । वेद पुरान विदित मनु गाए ॥
 तेहि पर राम सपथ करि आई । सुकृत सनेह अवधि रघुराई ॥
 बात दड़ाइ कुमति हँसि बोली । कुमत कुबिहग कुलह जनु खोली ॥

दो०—भूप मनोरथ सुभग वनु सुख सुविहंग समाजु ।

मिछिनि जिमि छाड़न चहति वचनु भयंकरु बाजु ॥२८॥

मासपारायण, तेरहवाँ विश्राम

सुनहु प्रानप्रिय भावत जी का । देहु एक बर भरतहि टीका ॥
 मागउँ दूमर बर कर जोरी । पुरवहु नाथ मनोरथ मोरी ॥
 तापस बेष बिसेषि उदासी । चौदह बरिस राम बनबासी ॥

सुनि मृदु बचन भूप हियँ सोकू । ससि कर लुअत बिकल जिमि कोकू
गयउ सहमि नहिँ कछु कहि आव। । जनु सचान बन झपटेउ लाया
बिचरन भयउ निपट नरपालू । दामिनि हनेउ मनहुँ तरु तालू ॥
माथें हाथ मूदि दोउ लोचन । तनु धरि सोचु लाग जनु मोचन ॥
मोर मनोरथु सुरतरु फूला । फरत करिनि जिमि हनेउ समूला ॥
अवध उजारि कीन्हि कैकेई । दीन्हिसि अचल विपति कै नेई ॥
दो०—कवने अवसर का भयउ गयउँ नारि विस्वास ।

जोग सिद्धि फल समय जिमि जतिहि अविद्या नास ॥ २९ ॥

एहि बिधि राउ मनहिँ मन झाँखा । देखि कुभाँति कुमति मन माखा
भरतु किराउर पूत नहोंही । आनेहु मोल बेसाहि कि मोही ॥
जो सुनि सरु अस लाग तुम्हारें । काहेन बोलहु बचनु सँभारें ॥
देहु उतरु अनु करहु कि नाहीं । सत्यसंध तुम्ह ग्युकुल माहीं ॥
देन कहेहु अब जनि वरु देह । तजहु सत्य जग अपजसु लेह ॥
सत्य सराहि कहेहु बरु देना । जानेहु लेइहि मागि चबेना ॥
सिबि दधीचि बलि जो कछु भाषा । तनु धनु तजेउ बचन पनु राखा
अति कटु बचन कहति कैकेई । मानहुँ लोन जरे पर देई ॥

दो०—धरम धुरंधर धीर धरि नयन उधारे रायें ।

सिरु धुनि लीन्हि उसास असि मारेसि मोहि कुठायँ ॥ ३० ॥

आगें दीखि जरत रिस भारी । मनहुँ रोष तरवारि उधारी ॥
मूठि कुबुद्धि धार निटुराई । धरी कूबरीं सान बनाई ॥
लखी महीप कराल कठोरा । सत्य कि जीवनु लेइहि मोरा ॥
बोले राउ कठिन करि छाती । बानी सबिनय तासु सोहाती ॥

प्रिया बचन कस कहसि कुभाँती । भीर प्रतीति प्रीति करि हाँती ॥
मोरें भरतु रामु दुइ आँखी । सत्य कहउँ करि संकरु साखी ॥
अवसि दूतु मैं पठइव प्राता । ऐहहिँ बेगि सुनत दोउ भ्राता ॥
सुदिन सोधिस बु साजु सजाई । देउँ भरत कहूँ राजु बजाई ॥

दो०—लोभु न रामहि राजु कर बहुत भरत पर प्रीति ।

मैं बड़ छोट विचारि जियँ करत रहेउँ नृपनीति ॥ ३१ ॥

राम सपथ सत कहउँ सुभाऊ । राममातु कछु कहेउ न काऊ ॥
मैं सबु कोन्ह तोहि बिनु पूछें । तेहि तें परेउ मनोरथु छूछें ॥
रिस परिहरु अब मंगल साजू । कछु दिन गएँ भरत जुबराजू ॥
एकहि वात मोहि दुखु लागा । बर दूसर असमंजस मागा ॥
अजहूँ हृदउ जरत तेहि आँचा । रिस परिहास कि साँचेहुँ साँचा ॥
कहु तजि रोषु राम अपराधू । सबु कोउ कहइ रामु सुठि साधू ॥
तुहुँ सराहसि करसि सनेहू । अब सुनि मोहि भयउ संदेहू ॥
जासु सुभाउ अरिहि अनुकूला । सो किमि करिहि मातु प्रतिकूला ॥

दो०—प्रिया हास रिस परिहरहि मागु विचारि विवेकु ।

जहिँ देखौँ अब नयन भरि भरत राज अभिषेकु ॥ ३२ ॥

जिए मीन बरु बारि बिहीना । मनि बिनु फनिकु जिए दुख दीना ॥
कहउँ सुभाउ न छलु मन माहीं । जीवनु मोर राम बिनु नाहीं ॥
समुझि देखु जियँ प्रिया प्रसीना । जीवनु राम दरस आधीना ॥
सुनि मृदु बचन कुमति अति जरई । मनहुँ अनल आहुति घृत परई ॥
कहइ करहु किन कोटि उपाया । इहाँ न लागिहि राउरि माया ॥
देहु किलेहु अजसु करि नाहीं । मोहि न बहुत प्रपंच सोहाहीं ॥

रामु साधु तुम्ह साधु सयाने । राममातु भलि मव पहिचाने ॥
जस कौसिलाँ मोर भल ताका । तस फलु उन्हहि देउँ करि साका ॥

दो०—होत प्रातु मुनिबेष धरि जौं न रामु वन जाहिं ।

मोर मरनु राउर अजस नृप समुझिअ मन माहिं ॥ ३३ ॥

अस कहि कुटिल भई उठि ठाढ़ी । मानहुँ रोष तरंगिनि वाढ़ी ॥
पाप पहार प्रगट भइ सोई । भरी क्रोध जल जाइ न जोई ॥
दोउ बर कूल कठिन हठ धारा । भवैर कूबरी बचन प्रचारा ॥
दाहत भूपरूप तरु मूला । चली बिपति बारिधि अनुकूला ॥
लखी नरेस बात फुरि साँची । तिय मिस मीचु सीस पर नाची ॥
गहि पद विनय कीन्ह वैठारी । जनि दिनकर कुल होसि कुठारी ॥
मागु माथ अवहीँ देउँ तोही । राम बिरहँ जनि मारमि मोही ॥
राखु राम कहँ जेहि तेहि भाँती । नाहिं त जरिहि जनम भरि छाती ॥

दो०—देखी व्याधि असाध नृप परेउ धरनि धुनि माथ ।

कहत परम आरत बचन राम राम रघुनाथ ॥ ३४ ॥

व्याकुल राउसिथिल सब गाता । करिनि कलपतरु मनहुँ निपाता ॥
कंठु सुख मुख आव न बानी । जनु पाठीनु दीन बिनु पानी ॥
पुनि कह कटु कठोर कैकेई । मनहुँ घाय महुँ माहुर देई ॥
जौं अंतहुँ अस करतबु रहेऊ । मागु मागु तुम्ह केहिं बल कहेऊ ॥
दुइ कि होइ एक समय भुआला । हँसब ठठाइ फुलाउब गाला ॥
दानि कहाउब अरु कृपनाई । होइ कि खेम कुसल रौताई ॥
छाड़हु बचनु कि धीरजु धरहू । जनि अबला जिमि करुना करहू ॥
तनु तिय तनय धामु धनु धरनी । सत्यसंध कहँ वन सम बरनी ॥

दो०—मरम वचन सुनि राउ कह कहु कछु दोषु न तोर ।

लागेउ तोहि पिसाच जिमि कालु कहावत मोर ॥ ३५ ॥

चहत न भात भूपतहि भोरें । बिधि बस कुमति वसी जिय तोरें ॥
 सो सबु मोर पाप परिनामू । भयउ कुठाहर जेहि बिधि बामू ॥
 सुवस बसिहि फिरि अवध सुहाई । सब गुन धाम राम प्रभुताई ॥
 करिहहि भाइ सकल सेवकाई । होइहि तिहुँ पुर राम बड़ाई ॥
 तोर कलंकु मोर पछिताऊ । मुएहुँ न मिटिहि न जाइहि काऊ ॥
 अब तोहि नीक लाग करु सोई । लोचन ओट बैठु मुहु गोई ॥
 जब लगि जिऔ कहउँ कर जोरी । तब लगि जनि कछु कहसि बहोरी
 फिरि पछितैहसि अंत अभागी । मारसि गाइ नहारु लागी ॥

दो०—परेउ राउ कहि कोटि बिधि काहे करमि निदानु ।

कपट मयानि न कहत कछु जागनि मनहुँ मयानु ॥ ३६ ॥

राम राम रट विकल भुआल । जनु बिनु पंख बिहंग बेहाल ॥
 हृदय मनाव भोरु जनि होई । रामहि जाइ कहै जनि कोई ॥
 उदउ करहु जनि रबिरघुकुल गुर । अवध विलोकि सूल होइहि उर ॥
 भूप प्रीति कैकैइ कठिनाई । उभय अवधि बिधिरची बनाई ॥
 विलपत नृपहि भयउ भिनुसारा । बीना बेनु संख धुनि द्वारा ॥
 पढ़हि भाट गुन गावहि गायक । सुनत नृपहि जनु लागहि सायक ॥
 मंगल सकल सोदाहि न कैमै । सहगामिनिहि बिभूषन जैमै ॥
 तेहि निमि नीद परी नहि काहू । राम दरस लालसा उछाहू ॥

दो०—द्वार भीर सेवक सचिव कहहि उदित रवि देखि ।

जागेउ अजहुँ न अवधपति कारनु कवनु बिसेषि ॥ ३७ ॥

पछिले पहर भूपु नित जागा । आजु हमहि बड़ अचरजु लागा ॥
जाहु सुमंत्र जगावहु जाई । कीजिअ काजु रजायसु पाई ॥
गए सुमंत्रु तव राउर माहीं । देखि भयावन जात डेराहीं ॥
धाइ खाइ जनु जाइ न हेरा । मानहुँ विरति बिपाद वसेरा ॥
पूछे कोउ न ऊतरु देई । गए जेहि भवन भूप कैकेई ॥
कहि जय जीव बैठ सिरु नाई । देखि भूप गति गयउ सुखाई ॥
सोच बिकल बिबरन महि परेऊ । मानहु कमल मृतु परिहरेऊ ॥
सचिउ मभीत मकइ नहि पूँछी । बोली असुभ भरी सुभ छूछी ॥

दो०—परी न राजहि नीद निसि हेतु जान जगदीसु ।

रामु रामु रटि भोरु किय कहइ न मरमु महीसु ॥ ३८ ॥

आनहु रामहि बेगि बोलाई । समाचार तव पूँछेहु आई ॥
चलेउ सुमंत्रु राय रुख जानी । लखी कुवालि कीन्ह कलुरानी ॥
सोच बिकल मग परइन पाऊ । रामहि बोलि कहिहि का राऊ ॥
उर धरि धीरजु गयउ दुआरें । पूँछहि सकल देखि मनु मारें ॥
समाधानु करि मो सबही का । गयउ जहाँ दिनकर कुल टीका ॥
राम सुमंत्रहि आवत देखा । आदरु कीन्ह पिता सम लेखा ॥
निरखि बदन कहि भूपरजाई । रघुकुलदीपहि चलेउ लेवाई ॥
रामु कुभाँति सचिव संग जाहीं । देखि लोग जहँ तहँ बिलखाहीं ॥

दो०—जाइ दीख रघुवंसमनि नरपति निपट कुसाजु ।

सहमि परेउ लखि सिंघिनिहि मनहुँ वृद्ध गजराजु ॥ ३९ ॥

सुखाहि अधर जरइ सबु अंगू । मनहुँ दीन मनिहीन भुअंगू ॥
सरुष समीप दीखि कैकेई । मानहुँ मीच घरीं गनि लेई ॥

करुनामय मृदु राम सुभाऊ । प्रथम दीख दुखु सुना न काऊ ॥
 तदपि धीर धरि समउ बिचारी । पूँछी मधुर बचन महतारी ॥
 मोहि कहु मातु तात दुख कारन । करिअ जतन जेहि होइ निवारन ॥
 सुनहु राम सबु कारनु एहू । राजहि तुम्ह पर बहुत सनेहू ॥
 देन कहेन्हि मोहि दुइ बरदाना । मागेउँ जो कछु मोहि सोहाना ॥
 सो सुनि भयउ भूप उर सोचू । छाड़ि न सकहिं तुम्हार सँकोचू ॥

दो०—सुत सनेहु इत बचनु उत संकट परेउ नरेसु ।

सकहु त आयसु धरहु सिर मेटहु कठिन कलेसु ॥ ४० ॥

निधरक बैठि कहइ कहु बानी । सुनत कठिनता अति अकुलानी ॥
 जीभ कमान बचन सर नाना । मनहुँ महिप मृदु लच्छ समाना ॥
 जनु कठोरपन धरें सरीरू । सिखइ धनुषबिद्या बर वीरू ॥
 सबु प्रसंगु रघुपतिहि सुनाई । बैठि मनहुँ तनु धरि निटुराई ॥
 मन मुमुकाइ भानुकुल भानू । राम सहज आनंद निधानू ॥
 बोले बचन विगत सब दूषन । मृदु मंजुल जनु वाग बिभूषन ॥
 सुनु जननी सोइ सुतु बड़ भागी । जो पितु मातु बचन अनुरागी ॥
 तनय मातु पितु तोषनिहारा । दुर्लभ जननि सकल संपारा ॥

दो०—मुनिगन मिलनु विसेपि बन सबहि भौंति हित मोर ।

तेहि महँ पितु आयसु बहुरि संमत जननी तोर ॥ ४१ ॥

भरतु प्रानप्रिय पावहिं राजू । बिधि सब बिधि मोहि सनमुख आजू ॥
 जौं न जाउँ बन ऐसेहु काजा । प्रथम गनिअ मोहि मूढ़ समाजा ॥
 सेवहिं अरँडु कलपतरु त्यागी । परिहरि अमृत लेहिं बिषु मागी ॥
 तेउ न पाइ अस समउ चुकाहीं । देखु बिचारि मातु मन माहीं ॥

अब एक दुखु मोहि बिसेषी । निपट बिकल नरनायकु देखी ॥
थोरिहिं बात पितहि दुख भारी । होति प्रतीति न मोहि महतारी ॥
राउ धीर गुन उदधि अगाधू । भा मोहि तें कछु बड़ अपराधू ॥
जातें मोहि न कहत कछु राऊ । मोरि सपथ तोहि कहु सतिभाऊ ॥

दो०—सहज सरल रघुवर वचन कुमति कुटिल करि जान ।

चलइ जोंक जल वक्रगति जद्यपि सलिल समान ॥ ४२ ॥

रहसी रानि राम रुख पाई । बोली कपट सनेहु जनार्द्र ॥
सपथ तुम्हार भरत कै आना । हेतु न दूसर में कछु जाना ॥
तुम्ह अपराध जोगु नहिं ताता । जननी जनक बंधु सुखदाता ॥
राम सत्य सबु जो कछु कहहू । तुम्ह पितु मातु बचन रत अहहू ॥
पितहि बुझाइ कहहू बलि सोई । चौथेंपन जेहिं अजसु न होई ॥
तुम्ह सम सुअन सुकृत जेहिं दीन्है । उचित न तासु निरादरु कीन्है
लागहिं कुमुद बचन सुभ कैसे । मगहँ गयादिक तीरथ जैसे ॥
रामहि मातु बचन सब भाए । जिमि सुरसरि गत सलिल सुहाए

दो०—गइ मुरुछा रामहि सुमिरि नृप फिरि करवट लीन्ह ।

सचिव राम आगमन कहि विनय समय सम कीन्ह ॥ ४३ ॥

अवनिप अकनि रामपगु धारे । धरि धीरजु तब नयन उधारे ॥
सचिव सँभारि राउ बैठारे । चरन परत नृप रामु निहारे ॥
लिए सनेह बिकल उर लाई । गै मनि मनहुँ फनिक फिरि पाई ॥
रामहि चितइ रहेउ नरनाहू । चला बिलोचन बारि प्रबाहू ॥
सोक बिबस कछु कहै न पारा । हृदयँ लगावत बारहिं वारा ॥
बिधिहि मनाव राउ मन माहीं । जेहिं रघुनाथ न कानन जाहीं ॥

सुभिरि महेमहि कहइ निहोरी । विनती सुनहु सदासिव मोरी ॥
आसुतोष तुम्ह अवठर दानी । आरति हरहु दीन जनु जानी ॥

दो०—तुम्ह प्रेरक सब के हृदयँ सो मति रामहि देहु ।

बचनु मोर तजि रहहिँ घर परिहारि सीलु सनेहु ॥ ४४ ॥

अजसु होउ जग सुजसु नसाऊ । नरक परौं बरु सुरपुरु जाऊ ॥
सब दुख दुसह सहावहु मोही । लोचन ओट रामु जनि होंही ॥
अस मन गुनइराउ नहिँ बोला । पीयर पात सरिस मनु डोला ॥
रघुपति पितहि प्रेमवस जानी । पुनि कछु कहिहि मातु अनुमानी
देस काल अवसर अनुसारी । बोले बचन विनीत बिचारी ॥
तात कहउँ कछु करउँ ढिठाई । अनुचितु छमव जानि लरिकाई ॥
अति लघु बात लागि दुखु पाव । काहुँ न मोहि कहि प्रथम जनावा
देखि गोसाईँहि पूँछिउँ माता । सुनि प्रसंगु भए सीतल गाता ॥

दो०—मंगल समय सनेह वस सोच परिहरिअ तात ।

आयसु देइअ हरपि हियँ कहि पुलके प्रभु गात ॥ ४५ ॥

धन्य जनमु जगतीतल तासू । पितहि प्रमोदु चरित सुनि जासू
चारि पदारथ करतल ताकें । प्रिय पितु मातु प्रान सम जाकें ॥
आयसु पालि जनम फलु पाई । ऐहउँ बेगिहिँ होउ रजाई ॥
विदा मातु मन आवउँ मागी । चलिहउँ बनहि बहुरि पग लागी
अस कहि राम गवनु तब कीन्हा । भूप सोक बस उतर न दीन्हा ॥
नगर व्यापि गइ बात सुतीछी । छुअत चढ़ी जनु सब तन बीछी ॥
सुनि भए विकल सकल नरनारी । बेलि बिटप जिमि देखि दवारी ॥
जो जहँ सुनइ धुनइ सिरु सोई । बड़ बिषादु नहिँ धीरजु होई ॥

दो०—मुख सुखाहि लोचन स्रवहि सोकु न हृदयँ समाइ ।

मनहुँ करुन रस कटकई उतरी अवध बजाइ ॥ ४६ ॥

मिलेहि माझ बिधि बात बेगारी । जहँ तहँ देहि कैकइहि गारी ॥
एहि पापिनिहि बूझि का परेऊ । छाइ भवन पर पावकु धरेऊ ॥
निज कर नयन काढ़ि चह दीखा । डारि सुधा बिषु चाहत चीखा ॥
कुटिल कठोर कुबुद्धि अभागी । भइ रघुवंस बेनु बन आगी ॥
पालव बैठि पेड़ एहिं काटा । सुख महुँ सोक ठाढ़ धरि ठाटा ॥
सदा राघु एहि प्रान समाना । कारन कवन कुटिलपनु ठाना ॥
सत्य कहहिं कबि नारि सुभाऊ । सब बिधि अगहु अगाध दुराऊ ॥
निज प्रतिबिंबु बरुकु गहि जाई । जानि न जाइ नारि गति भाई ॥

दो०—काह न पावकु जारि सक का न समुद्र समाइ ।

का न करै अबला प्रबल केहि जग कालु न खाइ ॥ ४७ ॥

का सुनाइ बिधि काह सुनावा । का देखाइ चह काह देखावा ॥
एक कहहिं भल भूप न कीन्हा । बरु बिचारि नहिं कुमतिहि दीन्हा
जो हठि भयउ सकल दुख भाजनु । अबला बिबस ग्यानु गुनु गा जनु
एक धरम परमिति पहिचाने । नृपहि दोसु नहिं देहिं सयाने ॥
सिबि दधीचि हरिचंद कहानी । एक एक सन कहहिं बखानी ॥
एक भरत कर संमत कहहीं । एक उदास भायँ सुनि रहहीं ॥
कान मूदि कर रद गहि जीहा । एक कहहिं यह बात अलीहा ॥
सुकृत जाहिं अस कहत तुम्हारे । राघु भरत कहूँ प्रानपिआरे ॥

दो०—चंदु चवै बरु अनल कन सुधा होइ विपतूल ।

सपनेहुँ कबहुँ न करहिं किछु भरतु राम प्रतिकूल ॥ ४८ ॥

एक बिधातहि दूषनु देहीं । सुधा देखाइ दीन्ह बिषु जेहीं ॥
 खरमरु नगर सोचु सब काहू । दुसह दाहु उर मिटा उछाहू ॥
 बिप्रबधू कुलमान्य जठेरी । जे प्रिय परम कैकई केरी ॥
 लगीं देन सिख सीलु सराही । बचन बानसम लागहिं ताही ॥
 भरतु न मोहि प्रिय राम समाना । सदा कहहु यहु सबु जगु जाना ॥
 करहु राम पर सहज सनेहू । केहिं अपराध आजु बनु देहू ॥
 कबहुँ न कियहु सवति आरेख । प्रीति प्रतीति जान सबु देख ॥
 कौसल्याँ अब काह बिगारा । तुम्ह जेहि लागि बज्र पुरपारा ॥

दो०—सीय कि पिय सँगु परिहरिहि लखनु कि रहिहहि धाम ।

राजु कि भूँजव भरत पुर नृपु कि जिइहि बिनु राम ॥ ४९ ॥

अस बिचारि उर छाड़हु कोहू । सोक कलंक कोठि जनि होहू ॥
 भरतहि अवसि देहु जुबराजू । कानन काह राम कर काजू ॥
 नाहिन रामु राज के भूखे । धरम धुरीन विषय रस रूखे ॥
 गुर गृह बमहुँ रामु तजि गेहू । नृप सन अस बरु दूसर लेहू ॥
 जौं नहिं लगिहहु कहें हमारे । नहिं लागिहि कछु हाथ तुम्हारे ॥
 जौं परिहास कीन्हि कछु होई । तौं कहि प्रगट जनावहु सोई ॥
 राम सरिम सुत कानन जोगू । काह कहिहि सुनि तुम्ह कहूँ लोगू ॥
 उठहु बेगि सोइ करहु उपाई । जेहि विधि सोकु कलंकु नमाई ॥

छं०—जेहि भौंति सोकु कलंकु जाइ उपाय करि कुल पालही ।

हाठि फेरु रामहि जात बन जनि बात दूसरि चालही ॥

जिमि भानु बिनु दिनु प्रान बिनु तनु चंद बिनु जिमि जामिनी;

तिमि अवध तुलसीदास प्रभु बिनु समुझि धौं जियँ भामिनी ॥

सो०—सखिन्ह सिखावनु दीन्ह सुनत मधुर परिनाम हित ।

तेईं कछु कान न कीन्ह कुटिल प्रबोधी कूबरी ॥ ५० ॥

उतरु न देह दुसह रिस रूखी । मृगिन्ह चितव जनु बाधिनि भूखी
ब्याधि असाधि जानि तिन्ह त्यागी । चलीं कहत मतिमंद अभागी
राजु करत यह दैअं बिगोई । कीन्हेसि अस जस करइन कोई॥
एहि बिधि बिलपहिं पुर नर नारीं । देहिं कुचालिहि कोटिक गारीं॥
जरहिं विषम जर लेहिं उसासा । कवनि गम बिनु जीवन आसा ॥
बिपुल बियोग प्रजा अकुलानी । जनु जलचर गन सूखत पानी ॥
अति विपाद बस लोग लोगार्ह । गम् भातु पहिं रामु गोसार्ह ॥
मुख प्रसन्न चित चौगुन चाऊ । मिटा सोचु जनि राखै राऊ ॥

दो०—नव गयंदु रघुवीर मनु राजु अलान समान ।

छूट जानि बन गवनु सुनि उर अनंदु अधिकान ॥ ५१ ॥

रघुकुलतिलक जोरि दोउ हाथा । मुदित मातु पद नायउ माथा ॥
दीन्हि असीस लाइ उर लीन्हे । भूपन बसन निछावरि कीन्हे ॥
बार बार मुख चुंबति माता । नयन नेह जल पुलकित गाता॥
गोद राखि पुनि हृदयें लगाए । स्रवत प्रेमरस पयद सुहाए ॥
प्रेमु प्रमोदु न कछु कहि जाई । रंक धनद पदबी जनु पाई ॥
सादर सुंदर बदन निहारी । बाली मधुर बचन महतारी ॥
कहहु तात जननी बलिहारी । कबहिं लगन मुद मंगलकारी ॥
सुकृत सील सुख सीवैं सुहाई । जनम लाभ कइ अवधि अघाई ॥

दो०—जेहि चाहत नर नारि सव अति आरत एहि भौंति ।

जिमि चातक चातकि तृषित वृष्टि सरद रितु स्वाति ॥ ५२ ॥

तात जाउँ बलि बेगि नहाहू । जो मन भाव मधुर कलु खाहू ॥
 पितु समीप तब जाएहु मैआ । भइ बड़ि बार जाइ बलि मैआ ॥
 मातु बचन सुनि अति अनुकूल । जनु सनेह सुरतरु के फूल ॥
 सुख मकरंद भरे श्रियमूला । निरखि राम मनु भवैरु न भूला ॥
 धरम धुरीन धरम गति जानी । कहेउ मातु सन अति मृदु बानी ॥
 पिताँ दीन्ह मोहि कानन राजू । जहँ सब भाँति मोर बड़ काजू ॥
 आयसु देहि मुदित मन माता । जेहिँ मुद मंगल कानन जाता ॥
 जनि सनेह बस डरपसि भोरें । आनँदु अंब अनुग्रह तोरें ॥

दो०—वरष चारिदस बिपिन बसि करि पितु बचन प्रमान ।

आइ पाय पुनि देखिहउँ मनु जनि करसि मलान ॥ ५३ ॥

बचन विनीत मधुर रघुबर के । सर सम लगे मातु उर करके ॥
 सहमि सुख सुनि सीतलि बानी । जिमि जवास परें पावस पानी ॥
 कहि न जाइ कलु हृदय बिपादू । मनहुँ मृगी सुनि केहरि नादू ॥
 नयन सजल तन थर थर काँपी । माजहि खाइ मीन जनु मापी ॥
 धरि भीरजु सुत वदनु निहारी । गदगद बचन कहति महतारी ॥
 तात पितहि तुम्हूँ प्रानपिआरे । देखि मुदित नित चरित तुम्हारे ॥
 राजु देन कहँ सुभ दिन साधा । कहेउ जान बन केहिँ अपराधा ॥
 ताव सुनावहु मोहि निदानू । को दिनकर कुल भयउ कृसानू ॥

दो०—निरखि राम रुख सचिव सुत कारनु कहेउ वृझाइ ।

सुनि प्रसंगु रहि मूक जिमि दसा वरनि नहिँ जाइ ॥ ५४ ॥

राखि न सकइ न कहि सक जाहू । दुहँ भाँति उर दारुन दाहू ॥
 लिखत सुधाकर गा लिखि राहू । बिधि गति वाम सदा सब काहू ॥

धरम सनेह उभयँ मति घेरी । भइ गति साँप छुछुंदरि केरी ॥
 राखउँ सुतहि करउँ अनुरोधू । धरमु जाइ अरु बंधु बिरोधू ॥
 कहउँ जान बन ताँ वडि हानी । संकट सोच बिचम भइ रानी ॥
 बहुरि समुझि तिय धरमु सयानी । रामु भरतु दोउ सुत सम जानी ॥
 सरल सुभाउ राम महतारी । बोली बचन धीर धरि भारी ॥
 तात जाउँ बलि कीन्हेहु नीका । पितु आयसु सब धरमक ग्रीका ॥

दो०—राजु देन कहि दीन्ह वनु मोहि न सो दुख लेसु ।

तुम्ह बिनु भरतहि भूपतिहि प्रजहि प्रचंड कलेसु ॥ ५५ ॥

जौं केवल पितु आयसु ताता । तौं जनि जाहु जानि बडि माता ॥
 जौं पितु मातु कहेउ बन जाना । तौं कानन सत अवध समाना ॥
 पितु बनदेव मातु बनदेवी । खग मृग चरन सरोरुह सेवी ॥
 अंतहुँ उचित नृपहि बनवासू । वय बिलोकि हियँ होइ हराँसू ॥
 बड़भागी वनु अवध अभागी । जोरघुवंस तिलक तुम्ह त्यागी ॥
 जौं सुत कहौं संग मोहि लेहू । तुम्हरे हृदयँ होइ संदेह ॥
 पूत परम प्रिय तुम्ह सबही के । प्रान प्रान के जीवन जी के ॥
 ते तुम्ह कहहु मातु बन जाऊँ । मै सुनि बचन बैठि पछिताऊँ ॥

दो०—यह बिचारि नहिं करउँ हठ झूठ सनेहु बड़ाइ ।

मानि मातु कर नात बलि सुरति विसरि जनि जाइ ॥ ५६ ॥

देव पितर सब तुम्हहि गोसाईं । राखहुँ पलक नयन की नाई ॥
 अवधि अंनु प्रिय परिजन मीना । तुम्ह करुनाकर धरम घुरीना ॥
 अस बिचारि सोइ करहु उपाई । सबहि जिअत जेहि भेंटहु आई ॥
 जाहु सुखेन बनहि बलि जाऊँ । करि अनाथ जन परिजन गाऊँ ॥

सब कर आजु सुकृत फल बीता । भयउ कराल कालु बिपरीता॥
 बहु विधि बिलपि चरन लपटानी । परम अभागिनि आपुहि जानी॥
 दारुन दुसह दाहु उर व्यापा । वरनि न जाहि बिलाप कलापा॥
 राम उठाइ मातु उर लाई । कहि मृदु बचन बहुरि समुझाई॥

दो०—समाचार तेहि समय सुनि सीय उठी अकुलाइ ।

जाइ सासु पद कमल जुग बंदि बैटि सिरु नाइ ॥ ५७ ॥

दीन्हि असीस सासु मृदु बानी । अति सुकुमारि देखि अकुलानी॥
 बैठि नमितमुख सोचति सीता । रूप रामि पति प्रेम पुनीता ॥
 चलन चहत बन जीवननाथू । केहि सुकृती सन होइहि साथू ॥
 कीतनु प्रान कि केवल प्राना । विधि करतबु कलु जाइ न जाना॥
 चारु चरन नख लेखति धरनी । नूपुर मुखर मधुर कवि वरनी॥
 मनहुँ प्रेम बस चिन्ती करहीं । हमहि सीध पद जनि परिहरहीं॥
 मंजु विलोचन मोचति वारी । बोली देखि गम महतारी ॥
 तात सुनहु सिय अति सुकुमारी । सास ससुर परिजनहि पिआरी॥

दो०—पिता जनक भूपाल मनि समुर भानुकुल भानु ।

पति रबिकुल कैरव विपिन विधु गुन रूप निधानु ॥ ५८ ॥

मैं पुनि पुत्रबधू प्रिय पाई । रूप रामि गुन सील सुहाई ॥
 नयन पुतरि करि प्रीति बढ़ाई । राखेउँ प्रान जानकिहिं लाई ॥
 कलपबेलि जिमि बहु विधि लाली । सींचि सनेह मलिल प्रतिपाली
 फूलत फलत भयउ विधि बामा । जानि न जाइ काह परिनामा ॥
 पलंग पीठ तजि गोद हिंडोरा । सियँ न दीन्ह पगु अवनि कठोरा
 जिअन मूरि जिमि जोगवत रहऊँ । दीप बाति नहिं टारन कहऊँ॥

सोइ सिय चलन चहति बन साथा । आयसु काह होइ रघुनाथा ॥
चंद किरन रस रसिक चकोरी । रबि रुख नयन सकइ किमि जोरी

दो०—करि केहरि निसिचर चरहिं दुष्ट जंतु बन भूरि ।

विष बाटिकाँ कि सोह सुत सुभग सजीवनि मूरि ॥ ५९ ॥

बन हित कोल किरात किसोरी । रचीं बिरंचि बिषय सुख भोरी ॥
पाहन कृमि जिमि कठिन गुभाऊ । तिन्हहि कलेसु न कानन काऊ ॥
कै तापस तिय कानन जोगू । जिन्ह तप हेतु तजा सब भोगू ॥
सिय बन बसिहि तात केहि भाँती । चित्रलिखित कपि देखि डेराती
सुरसर सुभग बनज बन चारी । डावर जोगु कि हंसकुमारी ॥
अम बिचारि जस आयसु होई । मैं सिख देउँ जानकिहि सोई ॥
जाँ सिय भवन रहै कह अंबा । मोहि कहँ होइ बहुत अवलंबा ॥
सुनि रघुबीर मातु प्रिय बानी । सील सनेह सुधाँ जनु सानी ॥

दो०—कहि प्रिय वचन विवेकमय कीन्हि मातु परितोष ।

लगे प्रबोधन जानकिहि प्रगटि विपिन गुन दोष ॥ ६० ॥

मासपारायण, चौदहवाँ विश्राम

मातु समीप कहत सकुचाहीं । बोले समउ समुझि मन माहीं ॥
राजकुमारि सिखावनु सुनहू । आन भाँति जियँ जनि कछु गुनहू
आपन मोर नीक जाँ चहहू । वचनु हमार मानि गृह रहहू ॥
आयसु मोर सासु सेवकाई । सब बिधि भामिनि भवन भलाई ॥
एहि ते अधिक धरम नहिं दूजा । सादर सासु ससुर पद पूजा ॥
जब जब मातु करिहि सुधि मोरी । होइहि प्रेम बिकल मति भोरी ॥

तब तब तुम्ह कहि कथा पुरानी । सुंदरि समुझाएहु मृदु बानी ॥
कहउँ सुभायँ सपथ सत मोही । सुमुखि मातु हित राखउँ तोही ॥

दो०—गुर श्रुति संमत धरम फलु पाइअ बिनहिं कलेस ।

हठ बस सब संकट सहे गालव नहुष नरेस ॥ ६१ ॥

मैं पुनि करि प्रवान पितु बानी । बेगि फिरब सुनु सुमुखि सयानी
दिवस जात नहिं लागिहि बारा । सुंदरि सिखवनु सुनहु हमारा ॥
जौं हठ करहु प्रेम बस बामा । तौ तुम्ह दुखु पाउब परिनामा ॥
काननु कठिन भयंकरो भारी । घोर घामु हिम बारि बयारी ॥
कुस कंटक मग काँकर नाना । चलब पयादेहिं बिनु पदत्राना ॥
चरन कमल मृदु मंजु तुम्हारे । मारग अगम भूमि धर भारे ॥
कंदर खोह नदीं नद नारे । अगम अगाध न जाहिं निहारे ॥
भालु बाघ बृक केहरि नागा । करहिं नाद सुनि धीरजु भागा ॥

दो०—भूमि सयन बलकल बसन असनु कंद फल मूल ।

ते कि सदा सब दिन मिलहिं सबुइ समय अनुकूल ॥ ६२ ॥

नर अहार रजनीचर चरहीं । कपट वेष बिधि कोटिक करहीं ॥
लागइ अति पहारे कर पानी । बिपिन बिपति नहिं जाइ बखानी ॥
ब्याल कराल बिहग बन घोरा । निसिचर निकर नारि नर चोरा ॥
डरपहिं धीर गहन सुधि आएँ । मृगलोचनि तुम्ह भीरु सुभाएँ ॥
हंसगवनि तुम्ह नहिं बन जोगू । सुनि अपजसु मोहि देइहि लोगू ॥
मानस सलिल सुधाँ प्रतिपाली । जिअइ कि लवन पयोधि मराली ॥
नव रसाल बन विहरन सीला । सोह कि कोकिल बिपिन करीला ॥
रहहु भवन अस हृदयँ बिचारी । चंदबदनि दुखु कानन भारी ॥

दो०—सहज सुहृद गुर स्वामि सिख जो न करइ सिर मानि ।

सो पछिताइ अघाइ उर अवसि होइ हित हानि ॥ ६३ ॥
 सुनि मृदु बचन मनोहर पिय के । लोचन ललित भरे जल सिय के ॥
 सीतल सिख दाहक भइ कैसें । चकइहि सरद चंद निसि जैसें ॥
 उतरु न आव बिकल बैदेही । तजन चहत सुचि स्वामि सनेही ॥
 बरबस रोकि बिलोचन बारी । धरि धीरजु उर अवनि कुमारी ॥
 लागि सासु पग कह कर जोरी । छमबि देवि बड़ि अबिनय मोरी ॥
 दीन्हि प्रानपति मोहि सिख सोई । जेहि बिधि मोर परम हित होई ॥
 मैं पुनि समुझि दीखि मन माहीं । पिय बियोग सम दुखु जग नाहीं
 दो०—प्राननाथ करुनायतन सुंदर सुखद सुजान ।

तुम्ह बिनु रघुकुल कुमुद विधु सुरपुर नरक समान ॥ ६४ ॥
 मातु पिता भगिनी प्रिय भाई । प्रिय परिवारु सुहृद समुदाई ॥
 सासु ससुर गुर सजन सहाई । सुत सुंदर सुसील सुखदाई ॥
 जहँ लगि नाथ नेह अरु नाते । पिय बिनु तियहि तरनिहु ते ताते
 तनु धनु धाम धरनि पुर राजू । पति बिहीन सबु सोक समाजू ॥
 भोग रोगसम भूषन भारू । जम जातना सरिस संसारू ॥
 प्राननाथ तुम्ह बिनु जग माहीं । मो कहूँ सुखद कतहुँ कलु नाहीं ॥
 जिय बिनु देह नदी बिनु बारी । तैसिअ नाथ पुरुष बिनु नारी ॥
 नाथ सकल सुख साथ तुम्हारे । सरद बिमल विधु बदन निहारें ॥

दो०—खग मृग परिजन नगरु बन बलकल बिमल दुकूल ।

नाथ साथ सुरसदन सम परनसाल सुख मूल ॥ ६५ ॥

बनदेवी बनदेव उदारा । करिहहिं सासु ससुर सम सारा

कुस किसलय साथरी सुहाई । प्रभु संग मंजु मनोज तुराई ॥
 कंद मूल फल अमिअ अहारू । अवध सौध सत सरिस पहारू ॥
 छिनु छिनु प्रभु पद कमल बिलोकी । रहिहउँ मुदित दिवस जिमि कोकी
 बन दुख नाथ कहे बहुतेरे । भय विपाद परिताप घनेरे ॥
 प्रभु बियांग लवलेस समाना । सब मिलिहोहिं न कृपानिधाना
 अस जियँ जानि सुजान सिरोमनि । लेइअ संग मोहि छाड़िअ जनि
 विनती बहुत करौं का स्वामी । करुनामय उर अंतरजामी ॥

दो०—राखिअ अवध जो अवधि लगि रहत न जनिअहि प्रान ।

दीनबंधु सुंदर सुखद सोल सनेह निधान ॥ ६६ ॥

मोहि मग चलत न होइहि हारी । छिनु छिनु चरन सरोज निहारी ॥
 सबहि भाँति पिय सेवा करिहौं । मारग जनित सकल श्रम हरिहौं ॥
 पाय पखारि बैठि तरु छाहीं । करिहउँ बाउ मुदित मन माहीं ॥
 श्रम कन सहित स्याम तन देखें । कहँ दुख समउ प्रानपति पेखें ॥
 सम महि तुन तरुपल्लव डासी । पाय पलोटिहि सब निसि दासी ॥
 बार बार मृदु मूरति जोही । लागिहि तात बयारि न मोही ॥
 को प्रभु संग मोहि चितवनिहारा । सिंघबधुहि जिमि ससक सिआरा
 मैं सुकुमारि नाथ बन जोगू । तुम्हहि उचित तप मो कहूँ भोगू
 दो०—ऐसेउ बचन कठोर सुनि जौं न हृदउ विलगान ।

तौ प्रभु विषम वियोग दुख सहिहहि पावँर प्रान ॥ ६७ ॥

अस कहि सीय बिकल भइ भारी । बचन बियांगु न सकी सँभारी ॥
 देखि दसा रघुपति जियँ जाना । हठि राखें नहिं राखिहि प्राना ॥
 कहेउ कृपाल भानुकुलनाथा । परिहरि सोचु चलहु बन साथा ॥

नहिं विपाद कर अवसरु आजू । बेगि करहु बन गवन समाजू ॥
कहि प्रिय वचन प्रिया समुझाई । लगे मातु पद आसिष पाई ॥
बेगि प्रजा दुख भेटव आई । जननी निठुर विमरि जनि जाई ॥
फिरिहि दसा विधि बहुरि कि मोरी देखिहुँ नयन मनोद्वर जोरी ॥
सुदिन सुधरी तात कब होइहि । जननी जिअत बदन बिधु जोइहि ॥

दो०—बहुरि वच्छ कहि लातु कहि रघुपति रघुवर तात ।

कचहि बोलाइ लगाइ हियँ हरषि निरखिहुँ गात ॥ ६८ ॥

लखि सनेह कातरि महतारी । बचनु न आव विकल भइ भारी ॥
राम प्रबोधु कीन्ह विधि नाना । समउ सनेहु न जाइ बखाना ॥
तब जानकी सासु पग लागी । मुनिअ माय मैं परम अभागी ॥
सेवा समय दैअँ वनु दीन्ह । मोर मनोरथु सफल न कीन्हा ॥
तजब छोभु जनि छाड़िअ छोह । करमु कठिन कलु दोसु न मोह ॥
मुनि मिय वचन सासु अकुलानी । दमा कवनि बिधि कहाँ बखानी ॥
बारहि बार लाइ उर लोन्ही । धरि धोरजु सिख आसिष दीन्ही ॥
अचल हाउ अहिवातु तुम्हारा । जब लगि गंग जमुन जल धारा ॥

दो०—सीतहि सासु असोस सिख दीन्हि अनेक प्रकार ।

चली नाइ पद पदुम सिरु अति हित बारहिं बार ॥ ६९ ॥

समाचार जब लल्लिमन पाए । व्याकुल बिलख बदन उठि धाए ॥
कंप पुलक तन नयन सनीरा । गहं चरन अति प्रेम अधीरा ॥
कहि न सकत कलु चितवत ठाढ़े । मानु दीन जनु जल तैं काढ़े ॥
सोचु हृदयँ बिधि का होनिहारा । सबु सुखु सुकृतु सिरान हमारा ॥
मोकहुँ काह कहब रघुनाथा । रखिहहि भवन कि लेहहि साथ ॥

राम बिलोकि बंधु कर जोरें । देह गेह सब सन वृनु तोरें ॥
बोले बचनु राम नय नागर । सील सनेह सरल सुख सागर ॥
तात प्रेम बस जनि कदराहू । समुझि हृदयँ परिनाम उछाहू ॥

दो०—मातु पिता गुरु स्वामि सिख सिर धरि करहिं सुभायँ ।

लहेउ लाभु तिन्ह जनम कर नतरु जनमु जग जायँ ॥ ७० ॥

अस जियँ जानि सुनहु सिख भाई । करहु मातु पितु पद सेवकाई ॥
भवन भरतु रिपुसदनु नाहीं । राउ बृद्ध मम दुखु मन माहीं ॥
मैं बन जाउँ तुम्हहि लेइ साथा । होइ सबहि विधि अवध अनाथा ॥
गुरु पितु मातु प्रजा परिवारू । सब कहूँ परइ दुसह दुख भारू ॥
रहहु करहु सब कर परितोषू । नतरु तात होइहि बड़ दोषू ॥
जासु राज प्रिय प्रजा दुखारी । सो नृपु अवसि नरक अधिकारी ॥
रहहु तात असि नीति विचारी । सुनत लखनु भए ब्याकुल भारी ॥
सिअरें बचन सुखि गए कैसेँ । परसत तुहिन तामरसु जैसेँ ॥

दो०—उतरु न आवत प्रेम बस गहे चरन अकुलाइ ।

नाथ दासु मैं स्वामि तुम्ह तजहु त काह बसाइ ॥ ७१ ॥

दीन्हि मोहि सिख नीकि गोसाई । लागि अगम अपनी कदराई ॥
नरबर धीर धरम धुर धारी । निगम नीति कहूँ ते अधिकारी ॥
मैं सिसु प्रभु सनेहँ प्रतिपाला । मंदरु मेरु कि लेहिं मराला ॥
गुर पितु मातु न जानउँ काहू । कहउँ सुभाउ नाथ पतिआहू ॥
जहँ लगि जगत सनेह सगाई । प्रीति प्रतीति निगम निजु गाई ॥
मोरें सबइ एक तुम्ह स्वामी । दीनबंधु उर अंतरजामी ॥
धरम नीति उपदेसिअ ताही । कीरति भूति सुगति प्रिय जाही ॥

मन क्रम बचन चरन रत होई । कृपासिंधु परिहरिअ कि सोई ॥

दो०—करुनासिंधु सुबंधु के सुनि मृदु वचन विनीत ।

समुझाए उर लाइ प्रभु जानि सनेहँ सभीत ॥ ७२ ॥

मागहु विदा मातु सन जाई । आवहु बेगि चलहु बन भाई ॥
मुदित भए सुनि रघुवर बानी । भयउ लाभ बड़ गइ बड़ि हानी ॥
हरपित हृदयँ मातु पहिँ आए । मनहुँ अंध फिरि लोचन पाए ॥
जाइ जननि पग नायउ माथा । मनु रघुनंदन जानकि साथा ॥
पूँछे मातु मलिन मन देखी । लखन कही सब कथा विसेषी ॥
गई सहमि सुनि बचन कठोरा । मृगी देखि दव जनु चहु ओरा ॥
लखन लखेउ भा अनरथ आजू । एहिँ सनेह बस करब अकाजू ॥
मागत बिदा सभय सकुचार्हीं । जाइ संग बिधि कहिहि कि नार्हीं ॥

दो०—समुझि सुमित्राँ राम सिय रूप सुसीतु सुभाउ ।

नृप सनेहु लखि धुनेउ सिरु पापिनि दीन्ह कुदाउ ॥ ७३ ॥

धीरजु धरेउ कुअवसर जानी । सहज सुहृद बोली मृदु बानी ॥
तात तुम्हारि मातु बैदेही । पिता रामु सब भाँति सनेही ॥
अवध तहाँ जहँ राम निवास । तहँई दिवसु जहँ मानु प्रकास ॥
जौँ पै सीय रामु बन जाहीं । अवधतुम्हार काजु कछु नार्हीं ॥
गुर पितु मातु बंधु सुर साई । सेइअहिँ सकल प्रान की नाई ॥
रामु प्रानप्रिय जीवन जी के । स्वारथ रहित सखा सबही के ॥
पूजनीय प्रिय परम जहाँ तैं । सब मानिअहिँ राम के नातैं ॥
अस जियँ जानि संग बन जाहू । लेहु तात जग जीवन लाहू ॥

दो०—भूरि भाग भाजनु भयहु मोहि समेत बलि जाउँ ।

जौ तुम्हरे मन छाड़ि छलु कीन्ह राम पद ठाउँ ॥ ७४ ॥

पुत्रवती जुवती जग सोई । रघुपति भगतु जासु सुतु होई ॥
नतरु बाँझ भलि बादि बिआनी । राम बिमुख सुत तेहित जानी ॥
तुम्हरेहिं भाग रामु बन जाहीं । दूसर हेतु तात कलु नाहीं ॥
सकल सुकृत कर बड़ फलु एहू । राम सीय पद सहज सनेहू ॥
रागु रोषु इरिषा मदु मोहू । जनि सपनेहुँ इन्ह के बस होहू ॥
सकल प्रकार बिकार बिहाई । मन क्रम बचन करेहु सेवकाई ॥
तुम्ह कहूँ बन सब भाँति सुरासू । संग पितु मातु रामु भिय जासू ॥
जेहिं न रामु बन लहहिं कलेसू । सुत सोइ करेहु इहइ उपदेसू ॥

छं०—उपदेसु यहु जेहिं तात तुम्हरे राम सिय सुख पावहीं ।

पितु मातु प्रिय परिवार पुर सुख सुरति बन बिसरावहीं ॥

नुलसी प्रभुहि भिख देइ आयसु दीन्ह पुनि आसिष दई ।

रति होउ अविरल अमल सिय रनु वीर पद नित नित नई ॥

म्यो०—मातु चरन सिरु नाइ चले तुरत संकित हृदयें ।

बागुर विषम तोराइ मनहुँ भाग मृगु भाग बस ॥ ७५ ॥

गए लखनु जहँ जानकिनाथू । भे मन मुदित पाइ प्रिय साथू ॥
वंदि राम सिय चरन सुहाए । चले संग नृप मंदिर आए ॥
कहहिं परसपर पुर नर नागी । भलि बनाइ विधि बात बिगारी ॥
तन कस मन दुखु बदन मलीने । बिकल मनहुँ माखी मधु छीने ॥
कर मीजहिं सिरु धुनि पछिताहीं । जनु विनु पंख बिहग अकुलाहीं ॥
भइ बड़ि भीर भूप दरबारा । बरनि न जाइ बिषादु अपारा ॥

सचिवँ उठाइ राउ बैठारे । कहि प्रिय बचन रामु पगु धारे ॥
सिय समेत दोउ तनय निहारी । व्याकुल भयउ भूमिपति भारी ॥

दो०—सीय सहित सुत सुभग दोउ देखि देखि अकुलाइ ।

बारहिं बार सनेह बस राउ लेइ उर लाइ ॥ ७६ ॥

सकइ न बोलि बिकल नरनाहू । सोक जनित उर दारुन दाहू ॥
नाइ सीसु पद अति अनुरागा । उठि रघुबीर बिदा तब मागा ॥
पितु असीस आयसु मोहि दीजै । हरष समय विसमउ कत कीजै ॥
तात किएँ प्रिय प्रेम प्रमादू । जसु जग जाइ होइ अपबादू ॥
मुनि सनेह बस उठि नरनाहाँ । बैठारे रघुपति गहि बाहाँ ॥
सुनहु तात तुम्ह कहूँ मुनि कहहीं । रामु चराचर नायक अहहीं ॥
सुभ अरु अमुभ करम अनुहारी । ईसु देइ फलु हृदयँ बिचारी ॥
करइ जो करम पाव फल सोई । निगम नीति असि कह सबु कोई ॥

दो०—औरु करै अपराधु कोउ और पाव फल भोगु ।

अति विचित्र भगवंत गति को जग जानै जोगु ॥ ७७ ॥

रायँ राम राखन हित लागी । बहुत उपाय किए छलु त्यागी ॥
लखी राम रुख रहत न जाने । धरम धुरंधर धीर सयाने ॥
तब नृप सीय लाइ उर लीन्ही । अति हित बहुत भाँति सिख दीन्ही
कहि बन के दुख दुसह सुनाए । मासु ससुर पितु सुख समुझाए ॥
सिय मनु राम चरन अनुरागा । घरु न सुगमु बनु बिपमु न लागा ॥
औरउ सबहिं सीय समुझाई । कहि कहि बिपिन बिपति अधिकाई
सचिव नारि गुर नारि सयानी । सहित सनेह कहहिं मृदु बानी ॥
तुम्ह कहूँ तौ न दीन्ह बनवासू । करहु जो कहहिं ससुर गुर सासू ॥

दो०—सिख सीतलि हित मधुर मृदु सुनि सीतहि न सोहानि ।

सरद चंद चंदिनि लगत जनु चकई अकुलानि ॥ ७८ ॥

सीय सकुच वस उतरु न देई । सो सुनि तमकि उठी कैकई ॥
 मुनि पट भूषन भाजन आनी । आगे धरि बोली मृदु बानी ॥
 नृपहि प्रानप्रिय तुम्ह रघुबीरा । सील सनेह न छाड़िहि भीरा ॥
 सुकृत सुजसु परलोकु नसाऊ । तुम्हहि जान बन कहिहि न काऊ ॥
 अस बिचारि सोइ करहु जो भावा । राम जननि सिख सुनि सुख पावा ॥
 भूपहि बचन बान सम लागे । करहि न प्रान पयान अभागे ॥
 लोग बिकल मुहछित नरनाहू । काह करिअ कछु स्रझ न काहू ॥
 रामु तुरत मुनि बेषु बनाई । चले जनक जननिहि सिरु नाई ॥

दो०—सजि बन साजु समाजु सवु बनिता बंधु समेत ।

बंदि बिप्र गुर चरन प्रभु चले करि सबहि अचेत ॥ ७९ ॥

निकसि बसिष्ठ द्वार भए ठाढ़े । देखे लोग बिरह दव दाढ़े ॥
 कहिप्रिय बचन सकल समुझाए । बिप्र बृंद रघुबीर बोलाए ॥
 गुर सन कहि बरपासन दीन्हे । आदर दान बिनय बस कीन्हे ॥
 जाचक दान मान संतोषे । मीत पुनीत प्रेम परितोषे ॥
 दासी दास बोलाइ वहोरी । गुरहि सौंपि बोले कर जोरी ॥
 सब कै सार सँभार गोसाईं । करबि जनक जननी की नाई ॥
 बारहि बार जोरि जुग पानी । कहत रामु सब सन मृदु बानी ॥
 सोइ सब भाँति मोर हितकारी । जेहि तैं रहै भुआल सुखारी ॥

दो०—मातु सकल मोरे विरहैं जेहि न होहि दुख दीन ।

सोइ उपाउ तुम्ह करेहु सब पुर जन परम प्रबीन ॥ ८० ॥

एहि विधि राम सबहि समुझावा । गुर पद पदुम हरषि सिरु नावा ॥
गनपति गौरि गिरीसु मनाई । चले असीस पाइ रघुराई ॥
राम चलत अति भयउ बिषाद । सुनि न जाइ पुर आरत नाद ॥
कुसगुन लंक अवध अति सोकू । हरष बिषाद बिबस सुरलोकू ॥
गइ मुरुछा तब भूपति जागे । बोलि सुमंत्रु कहन अस लागे ॥
रामु चले बन प्रान न जाहीं । केहि सुख लागि रहत तन माहीं ॥
एहि तें कवन व्यथा बलवाना । जो दुखु पाइ तजहिं तनु प्राना ॥
पुनि धरि धीर कहइ नरनाहू । लै रथु संग सखा तुम्ह जाहू ॥

दो०—सुठि सुकुमार कुमार दोउ जनकसुता सुकुमारि

रथ चढ़ाइ देखराइ बनु फिरेहु गएँ दिन चारि ॥ ८१ ॥

जौ नहिं फिरिहिं धीर दोउ भाई । सत्यसंध दृढ़व्रत रघुराई ॥
तौ तुम्ह बिनय करेहु कर जोरी । फेरिअ प्रभु मिथिलेम किमोरी ॥
जब सिय कानन देखि डेराई । कहेहु मोरि सिख अवसरु पाई ॥
सासु मसुर अम कहेउ सँदेसू । पुत्रि फिरिअ बन बहुत कलेसू ॥
पितुगृह कबहुँ कवहुँ ससुरारी । रहेहु जहाँ रुचि होइ तुम्हागी ॥
एहि विधि करेहु उपाय कदंबा । फिरइ त होइ प्रान अलंबा ॥
नाहिं त मोर मरनु परिनामा । कछु न बमाइ भएँ विधि बामा ॥
अस कहि मुरुछि परा महि राऊ । रामु लखनु सिय आनि देखाऊ ॥

दो०—पाइ रजायसु नाइ सिरु रथु अति बेग बनाइ ।

गयउ जहाँ बाहेर नगर सीय सहित दोउ भाइ ॥ ८२ ॥

तब सुमंत्र नृप बचन सुनाए । करि बिनती रथ रामु चढ़ाए ॥
चढ़ि रथ सीय सहित दोउ भाई । चले हृदयँ अवधहि सिरु नाई ॥

चलत रामु लखि अवध अनाथा । बिकल लोग सब लागे साथी ॥
 कृपासिंधु बहुविधि समुझावहिं । फिरहिं प्रेम बस पुनि फिरि आवहिं
 लागति अवध भयावनि भारी । मानहुँ कालराति अँधिअरी ॥
 घोर जंतु सम पुर नर नारी । डरपहिं एकहि एक निहारी ॥
 घर मसान परिजन जनु भूता । सुत हित मीत मनहुँ जमदूता ॥
 बागन्ह चिटप बेलि कुम्हिलाहीं । सरित सरोवर देखिन जाहीं ॥

दो०—हय गय कोटिन्ह केलि मृग पुरपसु चातक मोर ।

पिक रथांग सुक सारिका सारस हंस चकोर ॥ ८३ ॥

राम बियोग बिकल सब ठाढ़े । जहँ तहँ मनहुँ चित्र लिखि काढ़े ॥
 नगरु सफल बनु गद्दवर भारी । खग मृग बिपुल सकल नर नारी ॥
 विधि कैकई किरातिनि कीन्ही । जेहिं दव दुसह दसहुँ दिसि दीन्ही
 सहि न सके रघुवर बिरहागी । चले लोग सब व्याकुल भागी ॥
 सबहिं बिचारु कीन्ह मन माहीं । राम लखन सिय बिनु सुखु नाहीं ॥
 जहाँ रामु तहँ सबुइ समाजू । बिनु रघुबीर अवध नहिं काजू ॥
 चले साथ अस मंत्रु दढ़ाई । सुर दुर्लभ सुख सदन बिहाई ॥
 राम चरन पंकजु प्रिय जिन्हही । बिषय भोग बस करहिं कि तिन्हही

दो०—बालक बृद्ध बिहाइ गृहँ लगे लोग सब साथ ।

तमसा तीर निवासु किय प्रथम दिवस रघुनाथ ॥ ८४ ॥

रघुपति प्रजा प्रेम बस देखी । मदय हृदयँ दृगु भयउ बिसेषी ॥
 करुनामय रघुनाथ गाँसाई । बेगि पाइअहिं पीर पराई ॥
 कहि मप्रेम मृदु बचन सुहाए । बहुविधि राम लोग समुझाए ॥
 किए धरम उपदेस घनेरे । लोग प्रेम बस फिरहिं न फेरे ॥

सीलु सनेहु छाड़ि नहिं जाई । असमंजस बस मे रघुराई ॥
लोग सोग श्रम बस गए सोई । कलुक देवमायाँ मति मोई ॥
जबहिं जाम जुग जामिनि बीती । राम सचिव सन कहेउ सप्रीती ॥
खोज मारि रथु हाँकहु ताता । आन उपायँ बनिहि नहिं बाता ॥

दो०—राम लखन सिय जान चदि संभु चरन सिरु नाइ ।

सचिवँ चलायउ तुरत रथु इत उत खोज दुराइ ॥ ८५ ॥

जागे सकल लोग भएँ भोरू । गे रघुनाथ भयउ अति सोरू ॥
रथ कर खोज कतहुँ नहिं पावहिं । राम राम कहि चहुँ दिसि धावहिं ॥
मनहुँ बारिनिधि बूढ़ जहाजू । भयउ बिकल वड़ बनिक समाजू ॥
एकहि एक देहिं उपदेख । तजे राम हम जानि कलेख ॥
निंदहिं आपु सराहहिं मीना । धिग जीवनु रघुबीर बिहीना ॥
जौँ पै प्रिय बियोगु बिधि कीन्हा । तौ कस मरनु न मागें दीन्हा ॥
एहि बिधि करत प्रलाप कलापा । आए अवध भरे परितापा ॥
बिषम बियोगु न जाइ बखाना । अवधि आस सब राखहिं प्राना ॥

दो०—राम दरस हित नेम ब्रत लगे करन नर नारि ।

मनहुँ कोक कोकी कमल दीन बिहीन तमारि ॥ ८६ ॥

सीता सचिव सहित दोउ भाई । सृंगवेरपुर पहुँचे जाई ॥
उतरे राम देवसरि देखी । कीन्ह दंडवत हरषु बिसेषी ॥
लखन सचिवँ सियँ किए प्रनामा । सबहि सहित सुखु पायउ रामा ॥
गंग सकल मुद मंगल मूला । सब सुख करनि हरनि सब सल्ला ॥
कहि कहि कोटिक कथा प्रसंगा । रामु बिलोकहि गंग तरंगा ॥
सचिवहि अनुजहि प्रियहि सुनाई । बिबुध नदी महिमा अधिकारि ॥

मज्जनु कीन्ह पंथ श्रम गयऊ । सुचि जलु पिअत मुदित मन भयऊ
सुमिरत जाहि मिटइ श्रम भारू । तेहि श्रम यह लौकिक व्यवहारू ॥

दो०—सुद्ध सच्चिदानंदमय कंद भानुकुल केतु ।

चरित करत नर अनुहरत संसृति सागर सेतु ॥ ८७ ॥

यह सुधि गुहँ निषाद जब पाई । मुदित लिए प्रिय बंधु बोलाई ॥
लिए फल मूल भेंट भरि भारा । मिलन चलेउ हियँ हरषु अपारा ॥
करि दंडवत भेंट धरि आगें । प्रभुहि बिलोकत अति अनुरागें ॥
सहज सनह बिबस रघुराई । पूँछी कुसल निकट बैठाई ॥
नाथ कुमल पद पंकज देखें । भयउँ भागभाजन जन लेखें ॥
देव धरनि धनु धामु तुम्हारा । मैं जनु नीचु सहित परिवारा ॥
कृपा करिअ पुग्धारिअ पाऊ । थापिय जनु सबु लोगु सिहाऊ ॥
कहेहु सत्य सबु सखा सुजाना । मोहि दीन्ह पितु आयसु आना ॥

दो०—वरष चारिदस बासु वन मुनि ब्रत वेषु अहारु ।

ग्राम बासु नहि उचित सुनि गुहहि भयउ दुखु भारू ॥ ८८ ॥

राम लखन सिय रूप निहारी । कहहि सप्रेम ग्राम नर नारी ॥
ते पितु मातु कहहु सैखि कैसे । जिन्ह पठए बन बालक ऐसे ॥
एक कहहिं भल भूपति कीन्हा । लोयन लाहु हमहि बिधि दीन्हा ॥
तब निषादपति उर अनुमाना । तरु सिंसुपा मनोहर जाना ॥
लै रघुनाथहि ठाउँ देखावा । कहेउ राम सब भाँति सुहावा ॥
पुरजन करि जोहारु घर आए । रघुवर संध्या करन सिधाए ॥
गुहँ सँवारि साँथरी डसाई । कुस किसलयमय मृदुल सुहाई ॥
सुचि फल मूल मधुर मृदु जानी । दोना भरि भरि राखेसि पानी ॥

दो०—सिय सुमंत्र आता सहित कंद मूल फल खाइ ।

सयन कीन्ह रघुवंसमनि पाय पलोटत भाइ ॥ ८९ ॥

उठे लखनु प्रभु सोवत जानी । कहि सचिवहि सोवन मृदु बानी ॥
कछुक दूरिसजि बान सरासन । जागन लगे बैठि बीरासन ॥
गुहँ बोलाइ पाहरू प्रतीती । ठावँ ठावँ राखे अति प्रीती ॥
आपु लखन पहिँ बैठेउ जाई । कटि भाथी सर चाप चढ़ाई ॥
सोवत प्रभुहि निहारि निषादू । भयउ प्रेम बस हृदयँ विषादू ॥
तनु पुलकित जलु लोचन बहई । वचन सप्रेम लखन सन कहई ॥
भूपति भवन सुभायँ सुहावा । सुरपति सदनु न पटतर पावा ॥
मनिमय रचित चारु चौबारे । जनु रतिपति निज हाथ सँवारे ॥

दो०—सुचि सुबिचित्र सुभोगमय सुमन सुगंध सुवास ।

पलँग मंजु मनिदीप जहँ सब विधि सकल सुपास ॥ ९० ॥

बिबिध बसन उपधान तुराई । छीर फेन मृदु बिमद सुहाई ॥
तहँ सिय रामु सयन निसि करहीं । निज छबि रति मनोज मदु हरहीं ॥
ते सिय रामु साथरीं सोए । श्रमित बसन बिनु जाहिं न जोए ॥
मातु पिता परिजन पुरबासी । सखा सुसील दास अरु दासी ॥
जोगवहिं जिन्हहि प्रान की नाई । महि सोवत तेइ राम गांसाई ॥
पिता जनक जग बिदित प्रभाऊ । ससुर सुरेस सखा रघुराऊ ॥
रामचंदु पति सो बैदेही । सोवत महि बिधि बामन केही ॥
सिय रघुबीर कि कानन जोगू । करम प्रधान सत्य कह लागू ॥

दो०—कैकयनंदिनि मंदमति कठिन कुटिलपनु कीन्ह ।

जेहिं रघुनंदन जानकिहि सुख अवसर दुख दीन्ह ॥ ९१ ॥

भइ दिनकर कुल बिटप कुठारी । कुमति कीन्ह सब बिख दुखारी॥
 भयउ बिषादु निषादहि भारी । राम सीय महि सयन निहारी॥
 बोले लखन मधुर मृदु बानी । ग्यान बिराग भगति रस सानी॥
 काहुन कोउ सुख दुख कर दाता । निज कृत करम भोग सबु आता॥
 जोग वियोग भोग भल मंदा । हित अनहित मध्यम भ्रम फंदा॥
 जनमु मरनु जहँ लगि जग जालू । संपति बिपति करमु अरु कालू॥
 धरनि धामु धनु पुर परिवारू । सरगुनरकु जहँ लगि व्यवहारू॥
 देखिअ सुनिअ गुनिअ मन माहीं । मोह मूल परमारथु नाहीं ॥

दो०—सपनें होइ भिखारि नृपु रंकु नाकपति होइ ।

जागें लाभु न हानि कछु तिमि प्रपंच जियँ जोइ ॥ ९२ ॥

अस बिचारि नहिं कीजिअ रोसू । काहुहि बादि न देइअ दोसू॥
 मोह निसाँ सबु सोवनिहारा । देखिअ सपन अनेक प्रकारा॥
 एहिं जग जामिनि जागहिं जोगी । परमारथी प्रपंच बियोगी ॥
 जानिअ तबहिं जीव जग जागा । जब सब बिषय बिलास बिरागा॥
 होइ बिबेकु मोह भ्रम भागा । तबरघुनाथ चरन अनुरागा ॥
 सखा परम परमारथु एहू । मन क्रम बचन राम पद नेहू ॥
 राम ब्रह्म परमारथ रूपा । अबिगत अलख अनादि अनूपा॥
 सकल बिकार रहित गतभेदा । कहि नित नेति निरूपहिं बेदा॥

दो०—भगत भूमि भूसुर सुरभि सुर हित लागि कृपाल ।

करत चरित धरि मनुज तनु सुनत मिटहिं जग जाल ॥ ९३ ॥

भासपारायण, पन्द्रहवाँ विश्राम

सखा समुझि अस परिहरि मोह । सिय रघुबीर चरन रत होह ॥
 कहत राम गुन भा भिनुसारा । जागे जग मंगल सुखदारा ॥
 सकल सौच करि राम नहावा । सुचि सुजान बट छीर मगावा ॥
 अनुज सहित सिर जटा बनाए । देखि सुमंत्र नयन जल छाए ॥
 हृदयँ दाहु अति बदन मलीना । कह कर जोरि बचन अति दीना ॥
 नाथ कहेउ अस कोसलनाथा । लै रथु जाहु राम केँ साथी ॥
 बनू देखाइ सुरसरि अन्हवाई । आनेहु फेरि बेगि दोउ भाई ॥
 लखनु रामु सिय आनेहु फेरी । संसय सकल सँकोच निबेरी ॥

दो०—नृप अस कहेउ गोसाईँ जस कहइ करौँ बलि सोइ ।

करि विनती पायन्ह परेउ दीन्ह बाल जिमि रोइ ॥ ९४ ॥

तात कृपा करि कीजिअ सोई । जातैं अवध अनाथ न होई ॥
 मंत्रिहि राम उठाइ प्रबोधा । तात धरम मतु तुम्ह सबु सोधा ॥
 सिबि दधीच हरिचंद नरेसा । सहे धरम हित कोटि कलेसा ॥
 रंतिदेव बलि भूप सुजाना । धरमु धरेउ सहि संकट नाना ॥
 धरमु न दूसर सत्य समाना । आगम निगम पुरान बखाना ॥
 मैँ सोइ धरमु सुलभ करि पावा । तजैं तिहँ पुर अपजसु छावा ॥
 संभावित कहँ अपजस लाहू । मरन कोटि सम दारुन दाहू ॥
 तुम्ह सन तात बहुत का कहँ । दिहँ उतरु फिरि पातकु लहँ ॥

दो०—पितु पद गहि कहि कोटि नति विनय करब कर जोरि ।

चिंता कबनिहु बात कै तात करिअ जनि मोरि ॥ ९५ ॥

तुम्ह पुनि पितु सम अति हित मोरें । विनती करउँ तात कर जोरें ॥
 सब विधि सोइ करतन्य तुम्हारें । दुख न पाव पितु सोच हमारें ॥

सुनि रघुनाथ सचिव संबादू । भयउ सपरिजन बिकल निषादू॥
 पुनि कछु लखन कही कटु बानी । प्रभु बरजे बड़ अनुचित जानी॥
 सकुचिराम निज सपथ देवाई । लखन सँदेसु कहिअ जनि जाई॥
 कह सुमंत्रु पुनि भूप सँदेसु । सहिन सकहिहिय सिध बिपिन कलेसु
 जेहि बिधि अवध आव फिरि सीया । सोइ रघुबरहि तुम्हहि करनीया
 नतरु निपट अवलंब बिहीना । मैं न जिअब जिमि जल बिनु मीना

दो०—मइके ससुरे सकल सुख जबहिं जहाँ मनु मान ।

तहँ तब रहिहि सुखेन सिय जब लगि बिपति बिहान ॥ ९६ ॥

बिनती भूप कीन्ह जेहि भाँती । आरति प्रीति न सो कहि जाती ॥
 पितु मँदेसु सुनि कृपानिधाना । सियहि दीन्ह सिख कोटि बिधाना
 सासु ससुर गुर प्रिय परिवारू । फिरहु त सब कर मिटै खभारू ॥
 सुनि पति बचन कहति बैदेही । सुनहु प्रानपति परम सनेही ॥
 प्रभु करुनामय परम बिबेकी । तनु तजि रहति छाँह किमि छेकी॥
 प्रभा जाइ कहँ भानु बिहाई । कहँ चंद्रिका चंदु तजि जाई ॥
 पतिहि प्रेममय बिनय सुनाई । कहति सचिव सन गिरा सुहाई॥
 तुम्ह पितु ससुर सूरिस हितकारी । उतरु देउँ फिरि अनुचित भारी

दो०—आरति वस सनमुख भइउँ बिलगु न मानव तात ।

आरजसुत पद कमल बिनु बादि जहाँ लगि नात ॥ ९७ ॥

पितु बैभव विलास मैं डीठा । नृप मनि मुकुट मिलित पद पीठा
 सुखनिधान अस पितु गृह मोरें । पिय बिहीन मन भाव न भोरें॥
 ससुर चक्रवइ कोसलराऊ । भुवन चारिदस प्रगट प्रभाऊ ॥
 आंगें होइ जेहि सुरपति लेई । अरध सिंघासन आसनु देई ॥

ससुर एतादृश अवध निवास । प्रिय परिवार मातुसम सास्र ॥
बिनु रघुपति पद पदुम परागा । मोहि केउ सपनेहुँ सुखद न लागा ॥
अगम पंथ बनभूमि पहारा । करि केहरि सर सरित अपारा ॥
कोल किरात कुरंग बिहंगा । मोहि सब सुखद प्रानपति संग्गा ॥

दो०—सासु ससुर सन मोरि हूँति विनय करबि परि पायँ ।

मोर सोचु जनि करिअ कछु मैं बन सुखी सुभायँ ॥ ९८ ॥

प्राननाथ प्रिय देवर साथ । बीर धुरीन धरें धनु भाथा ॥
नहिं मग श्रमु भ्रमु दुखमन मोरें । मोहि लगि सोचु करिअ जनि भोरें ॥
सुनि सुमंत्रु सिय सीतलि बानी । भयउ बिकल जनु फनि मनि हानी ॥
नयन खल्ल नहिं सुनइ न काना । कहि न सकइ कछु अति अकुलाना ॥
राम प्रबोधु कीन्ह बहु भाँती । तदपि होति नहिं सीतलि छाती ॥
जतन अनेक साथ हित कीन्हे । उचित उतर रघुनंदन दीन्हे ॥
मेटि जाइ नहिं राम रजाई । कठिन करम गति कछु न बसाई ॥
राम लखन सिय पद सिरु नाई । फिरेउ बनिक जिमि मूर गवाई ॥

दो०—रथु हाँकेउ हय राम तन हेरि हेरि हिहिनाहिं ।

देखि निषाद बिषादबस धुनहिं सीस पछिताहिं ॥ ९९ ॥

जासु बियोग बिकल पसु ऐमें । प्रजा मातु पितु जिइहहिं कैसैं ॥
बरबस राम सुमंत्रु पठाए । सुरसरि तीर आपु तब आए ॥
मागी नाव न केवटु आना । कहइ तुम्हार मरसु मैं जाना ॥
चरन कमल रज कहूँ सबु कहई । मानुष करनि मूरि कछु अहई ॥
छुअत सिला भइ नारि सुहाई । पाहन तें न काठ कठिनाई ॥
तरनिउ मृनि घरिनी होइ जाई । बाट परइ मोरि नाव उढ़ाई ॥

एहिं प्रतिपालउँ सभु परिवारू । नहिं जानउँ कछु अउर कबारू ॥
जौं प्रभु पार अबसि गा चहहू । मोहि पद पदुम पखारन कहहू ॥

छं०—पद कमल धोइ चढ़ाइ नाव न नाथ उतराई चहौं ।

मोहि राम राउरि आन दसरथ सपथ सब साची कहौं ॥

बरु तीर मारहुँ लखनु पै जब लगि न पाय पखारिहौं ।

तब लगि न तुलसीदास नाथ कृपाल पारु उतारिहौं ॥

सो०—सुनि केवट के बैन प्रेम लपेटे अटपटे ।

बिहसे करुनाएन चितइ जानकी लखन तन ॥१००॥

कृपासिंधु बोले मुसुकाई । सोइ करु जेहिं तब नाव न जाई ॥

बेगि आनु जल पाय पखारू । होत बिलंबु उतारहि पारू ॥

जासु नाम सुमिरत एक बारा । उतरहिं नर भव सिंधु अपारा ॥

सोइ कृपालु केवटहि निहोरा । जेहिं जगु किय तिहु पगहु ते थोरा

पद नख निरखि देवसरि हरषो । सुनि प्रभु बचन मोहँ मति करषी ॥

केवट राम रजायसु पावा । पानि कठवता भरि लेइ आवा ॥

अति आनंद उमगि अनुरागा । चरन सरोज पखारन लागा ॥

बरषि सुमन सुर सकल सिहाहीं । एहि सम पुन्य पुंज कोउ नाही ॥

दो०—पद पखारि जलु पान करि आपु सहित परिवार ।

पितर पारु करि प्रभुहि पुनि मुदित गयउ लेइ पार ॥१०१॥

उतरि ठाढ़ भए सुरसरि रेता । सीय रामु गुह लखन समेता ॥

केवट उतरि दंडवत कीन्हा । प्रभुहि सकुच एहि नहिं कछु दीन्हा ॥

पिय हिय की सिय जाननिहारी । मनि मुदरी मन मुदित उतारी ॥

कहेउ कृपाल लेहि उतराई । केवट चरन गहे अकुलाई ॥

नाथ आजु मैं काह न पावा । मिटे दोष दुख दारिद दावा ॥
बहुत काल मैं कीन्हि मजूरी । आजु दीन्हि विधि बनि भलि भूरी ॥
अब कछु नाथ न चाहिअ मोरें । दीनदयाल अनुग्रह तोरें ॥
फिरती बार मोहि जो देवा । सो प्रसादु मैं सिर धरि लेवा ॥

दो०—बहुत कीन्ह प्रभु लखन सियँ नहिँ कछु केवटु लेइ ।

विदा कीन्ह करुनायतन भगति विमल वरु देइ ॥१०२॥

तब मज्जनु करि रघुकुलनाथा । पूजि पारथिव नायउ माथा ॥
सियँ सुरसरिहि कहेउ कर जोरी । मातु मनोरथ पुरउबि मोरी ॥
पति देवर सँग कुसल बहोरी । आइ करौं जेहिँ पूजा तोरी ॥
सुनि सिय बिनय प्रेम रस सानी । भइ तब विमल बारिबर बानी ॥
सुनु रघुबीर प्रिया बैदेही । तव प्रभाउ जग बिदित न केही ॥
लोकप होहिँ बिलोकत तोरें । तोहि सेवहिँ सब सिधिकर जोरें ॥
तुम्ह जो हमहि बड़ि बिनय सुनाई । कृपा कीन्हि मोहि दीन्हि बढ़ाई
तदपि देबि मैं देबि असीसा । सफल होन हित निज बागीसा ॥

दो०—प्राणनाथ देवर सहित कुसल कोसला आइ ।

पूजिहि सब मनकामना सुजसु रहिहि जग छडि ॥१०३॥

गंग बचन सुनि मंगल मूला । मुदित सीय सुरसरि अनुकूला ॥
तब प्रभु गुहहि कहेउ घर जाहू । सुनत सुख मुख भा उर दाहू ॥
दीन बचन गुह कह कर जोरी । बिनय सुनहु रघुकुल मनि मोरी ॥
नाथ साथ रहि पंथु देखाई । करि दिन चारि चरन सेवकाई ॥
जेहिँ बन जाइ रहब रघुराई । परनकुटी मैं करबि सुहाई ॥
तब मोहि कहँ जसि देव रजाई । सोइ करिहउँ रघुबीर दोहाई ॥

सहज सनेह राम लखि तास्र । संग लीन्ह गुह हृदयँ हुलास्र ॥
पुनि गुहँ ग्याति बोलि सब लीन्हे । करि परितोषु बिदा तब कीन्हे ॥

दो०—तब गनपति सिव सुमिरि प्रभु नाइ सुरसरिहि माथ ।

सखा अनुज सिय सहित बन गवनु कीन्ह रघुनाथ ॥१०४॥

तेहि दिन भयउ बिटप तर बास्र । लखन सखाँ सब कीन्ह सुपास्र ॥
प्रात प्रातकृत करि रघुराई । तीरथराजु दीख प्रभु जाई ॥
सचिव सत्य श्रद्धा प्रिय नारी । माधव सरिस मीतु हितकारी ॥
चारि पदारथ भरा भँडारू । पुन्य प्रदेश देस अति चारू ॥
छेत्रु अगम गढ़ु गाढ़ सुहावा । सपनेहुँ नहिं प्रतिपच्छिन्ह पावा ॥
सेन सकल तीरथ बर बीरा । कलुष अनीक दलन रनधीरा ॥
संगमु सिंहासनु सुठि सोहा । छत्रु अखयबटु मुनि मनु मोहा ॥
चवँर जमुन अरु गंग तरंगा । देखि होहिं दुख दारिद भंगा ॥

दो०—सेवहिं सुकृती साधु सुचि पावहिं सब मनकाम ।

बंदी वेद पुरान गन कहहिं विमल गुन ग्राम ॥१०५॥

को कहि सकइ प्रयाग प्रभाऊ । कलुष पुंज कुंजर मृगराऊ ॥
अस तीरथपति देखि सुहावा । सुख सागर रघुबर सुखु पावा ॥
कहि सिय लखनहि सखहि सुनाई । श्रीमुख तीरथराज बड़ाई ॥
करि प्रनामु देखत बन बागा । कहत महातम अति अनुरागा ॥
एहि बिधि आइ बिलोकी बेनी । सुमिरत सकल सुमंगल देनी ॥
मुदित नहाइ कीन्हि सिव सेवा । पूजि जथाबिधि तीरथ देवा ॥
तब प्रभु भरद्वाज पहिं आए । करत दंडवत मुनि उर लाए ॥
मुनि मन मोद न कलु कहि जाई । ब्रह्मानंद रासि जनु पाई ॥

दो०—दीन्हि असीस मुनीस उर अति अनंदु अस जानि ।

लोचन गोचर सुकृत फल मनहुँ किए बिधि आनि ॥ १०६ ॥

कुसल प्रसन्न करि आसन दीन्हे । पूजि प्रेम परिपूरन कीन्हे ॥
कंद मूल फल अंकुर नीके । दिए आनि मुनि मनहुँ अमी के ॥
सीय लखन जन सहित सुहाए । अति रुचि राम मूल फल खाए ॥
भए बिगतश्रम राम सुखारे । भरद्वाज मृदु बचन उचारे ॥
आजु सुफल तपु तीरथ त्यागू । आजु सुफल जप जोग बिरागू ॥
सफल सकल सुभ साधन साजू । राम तुम्हहि अवलोकत आजू ॥
लाभ अवधि सुख अवधि न दूजी । तुम्हरेँ दरस आस सब पूजी ॥
अब करि कृपा देहु बर एहू । निज पद सरसिज सहज सनेहू ॥

दो०—करम बचन मन छाड़ि छलु जब लागि जनु न तुम्हार ।

तब लागि सुखु सपनेहुँ नहीं किऐँ कोटि उपचार ॥ १०७ ॥

मुनि मुनि बचन राम सकुचाने । भाव भगति आनंद अघाने ॥
तब रघुबीर मुनि सजसु सुहावा । कोटि भाँति कहि सबहि सुनावा
सो बड़ सो सब गुन गन गेहू । जेहि मुनीस तुम्ह आदर देहू ॥
मुनि रघुबीर परसपर नवहीं । बचन अगोचर सुख अनुभवहीं ॥
यह सुधि पाइ प्रयाग निवासी । बटु तापस मुनि सिद्ध उदासी ॥
भरद्वाज आश्रम सब आए । देखन दसरथ सुअन सुहाए ॥
राम प्रनाम कीन्ह सब काहू । मुदित भए लहिलोयन लाहू ॥
देहिँ असीस परम सुखु पाई । फिरे सगहत सुंदरताई ॥

दो०—राम कीन्ह विश्राम निसि प्रात प्रयाग नहाइ ।

चले सहित सिय लखन जन मुदित मुनिहि सिरु नाइ ॥ १०८ ॥

राम सप्रेम कहेउ मुनि पाहीं । नाथ कहिअ हम केहि मग जाहीं॥
 मुनि मन बिहसि राम सन कहहीं। सुगम सकल मग तुम्ह कहूँ अहहीं
 साथ लागि मुनि सिष्य बोलाए । सुनि मन मुदित पचासक आए॥
 सबन्हि राम पर प्रेम अपारा । सकल कहहिं मगु दीख हमारा॥
 मुनि बटु चारि संग तब दीन्हे । जिन्ह बहु जनम सुकृत सब कीन्हे
 करि प्रनामु रिषि आयसु पाई । प्रमुदित हृदयँ चले रघुराई ॥
 ग्राम निकट जब निकसहिं जाई । देखहिं दरसु नारि नर धाई ॥
 होहिं सनाथ जनम फलु पाई । फिरहिं दुखित मनु संग पठाई ॥

दो०—विदा किए बटु बिनय करि फिरे पाइ मन काम ।

उतरि नहाए जमुन जल जो सरीर सम स्याम ॥ १०९ ॥

सुनत तीरबासी नर नारी । धाए निज निज काज बिसारी ॥
 लखन राम सिय सुंदरताई । देखि करहिं निज भाग्य बढ़ाई ॥
 अति लालसा बसहिं मन माहीं । नाउँ गाउँ बूझत सकुचाहीं ॥
 जे तिन्ह महुँ बय बिरिध सयाने । तिन्ह करि जुगुति रामु पहिचाने॥
 सकल कथा तिन्ह सबहि सुनाई । बनहि चले पितु आयसु पाई ॥
 सुनि सबिषाद सकल पछिताहीं । रानी रायँ कीन्ह भल नाहीं ॥
 तेहि अवसर एक तापसु आवा । तेजपुंज लघुबयम सुहावा ॥
 कबि अलखित गति बेषु बिरागी । मन क्रम बचन राम अनुरागी॥

दो०—सजल नयन तन पुलकि निज इष्टदेउ पहिचानि ।

परेउ दंड जिमि धरनितल दसा न जाइ बखानि ॥ ११० ॥

राम सप्रेम पुलकि उर लावा । परम रंक जनु पारसु पावा ॥
 मनहुँ प्रेमु परमारथु दोऊ ! मिलत धरें तन कह सबु कोऊ॥

बहुरि लखन पायन्ह सोइ लागा । लीन्ह उठाइ उमगि अनुरागा ॥
 पुनि सिय चरन धूरि धरि सीसा । जननि जानि मिसु दीन्हि असीसा
 कीन्ह निषाद दंडवत तेही । मिलेउ मुदित लखि राम सनेही ॥
 पिअत नयन पुट रूपु पियूषा । मुदित सुअमनु पाइ जिमि भूखा
 ते पितु मातु कहहु सखि कैसे । जिन्ह पठए बन बालक ऐसे ॥
 राम लखन सिय रूपु निहारी । होहि सनेह विकल नर नारी ॥

दो०—तब रघुवीर अनेक विधि सखहि सिखावनु दीन्ह ।

राम रजायसु सीस धरि भवन गवनु तेई कीन्ह ॥ १११ ॥

पुनि भियँ राम लखन कर जोरी । जमुनहि कीन्ह प्रनामु बहोरी ॥
 चले ससीय मुदित दोउ भाई । रबितनुजा कह करत बड़ाई ॥
 पथिक अनेक मिलहि मग जाता । कहहि सप्रेम देखि दोउ आता ॥
 राज लखन सब अंग तुम्हारें । देखि सोचु अति हृदय हमारें ॥
 मारग चलहु पयादेहि पाएँ । ज्योतिषु झूठ हमारें भाएँ ॥
 अगमु पंथु गिरि कानन भारी । तेहि महँ साथ नारि सुकुमारी ॥
 करि केहरि बन जाइ न जोई । हम सँग चलहि जो आयसु होई ॥
 जाब जहाँ लगि तहँ पहुँचाई । फिरब बहोरि तुम्हहि सिरु नाई ॥

दो०—एहि विधि पूँछहि प्रेम बस पुलक गात जलु नैन ।

कृपासिंधु फेरहि तिन्हहि कहि विनीत मृदु बैन ॥ ११२ ॥

जे पुर गाँव बमहि मग माहीं । तिन्हहि नाग सुर नगर सिहाहीं ॥
 केहि सुकृतीं केहि घरीं बसाए । धन्य पुन्यमय परम सुहाए ॥
 जहँ जहँ राम चरन चलि जाहीं । तिन्ह ममान अमरावति नाहीं ॥
 पुन्यपुंज मग निकट निवासी । तिन्हहि सराहहि सुरपुरवासी ॥

जे भरि नयन बिलोकहिं रामहि । सीता लखन सहित घनस्थामहि ॥
 जे सर सरित राम अवगाहहिं । तिन्हहि देव सर सरित सराहहिं ॥
 जेहि तरु तर प्रभु बैठहिं जाई । करहिं कलपतरु तासु बड़ाई ॥
 परसि राम पद पदुम परागा । मानति भूमि भूरि निज भागा ॥
 दो०—छाँह करहिं घन बिबुधगन बरषहिं सुमन सिहाहिं ।

देखत गिरि बन बिहग मृग रामु चले मग जाहिं ॥ ११३ ॥

सीता लखन सहित रघुराई । गाँव निकट जब निकसहिं जाई ॥
 सुनि सब बाल बृद्ध नर नारी । चलहिं तुरत गृहकाजु बिसारी ॥
 राम लखन मिय रूप निहारी । पाइ नयनफलु होहिं सुखारी ॥
 सजल बिलोचन पुलक सरीरा । सब भए मगन देखि दोउ बीरा ॥
 बरनि न जाइ दमा तिन्ह केरी । लहि जनुरंकन्ह सुरमनि ढेरी ॥
 एकन्ह एक बोलि सिख देहीं । लोचन लाहु लेहु छन एहीं ॥
 रामहि देखि एक अनुरागे । चितवत चले जाहिं संग लागे ॥
 एक नयन मग छवि उर आनी । होहिं सिथिल तन मन बर बानी ॥

दो०—एक देखि बट छाँह भलि डासि मृदुल तन पात ।

कहहिं गवाँइअ छिनुकु श्रमु गवनब अबहिं कि प्रात ॥ ११४ ॥

एक कलस भरि आनहिं पानी । अँचइअ नाथ कहहिं मृदु बानी ॥
 सुनि प्रिय बचन प्रीति अति देखी । राम कृपाल सुसील बिसेषी ॥
 जानी श्रमित सीय मन माहीं । घरिक बिलंबु कीन्ह बट छाहीं ॥
 मुदित नारि नर देखहिं मोभा । रूप अनूप नयन मनु लोभा ॥
 एकटक सब सोढहिं चहुँ ओरा । रामचंद्र मुख चंद चकोरा ॥
 तरुन तमाल बरन तनु सोहा । देखत कोटिमदन मनु मोहा ॥

दामिनि बरन लखन सुठि नीके । नख सिख सुभग भावते जीके ॥
मुनिपट कटिन्ह कर्षे तूनीरा । सोहहिं कर कमलनि धनु तीरा ॥

दो०—जटा मुकुट सीसनि सुभग उर भुज नयन विसाल ।

सरद परब बिधु बदन बर लसत स्वेद कन जाल ॥११५॥

बरनि न जाइ मनोहर जोरी । सोभा बहुत थोरि मति मोरी ॥
राम लखन सिय सुंदरताई । सब चितवहिं चित मन मति लाई
थके नारि नर प्रेम पिआसे । मनहुँ मृगी मृग देखि दिआसे ॥
सीय समीप ग्रामतिथ जाहीं । पूँछत अति सनेहँ सकुचाहीं ॥
बार बार सब लागहिं पाएँ । कहहिं बचन मृदु सरल सुभाएँ ॥
राजकुमारि विनय हम करहीं । तिय सुभायँ कछु पूँछत डरहीं ॥
स्वामिनि अविनय छमबि हमारी । बिलगु न मानब जानि गवाँरी ॥
राजकुअँर दोउ सहज सलोने । इन्ह तेंलही दुति मरकत सोने ॥

दो०—स्यामल गौर किसोर बर सुंदर सुपमा ऐन ।

सरद सर्वरीनाथ मुखु सरद सरोरुह नैन ॥११६॥

मासपारायण, सोलहवाँ विश्राम

नवाह्नपारायण, चौथा विश्राम

कोटि मनोज लजावनिहारे । सुमुखि कहहु को आहिं तुम्हारे ॥
सुनि सनेहमय मंजुल बानी । सकुची सिय मन महुँ मुसुकानी ॥
तिन्हहि बिलोकि बिलोकति धरनी । दुहुँ सकोच सकुचति बरबरनी
सकुचि सप्रेम बाल मृग नयनी । बोली मधुर बचन पिकवयनी ॥
सहज सुभाय सुभग तन गोरे । नागु लखनु लघु देवर मोरे ॥

बहुरि बदनु बिधु अंचल ढाँकी । पिय तन चितइ भौंह करि बाँकी ॥
 खंजन मंजु तिरीछे नयननि । निज पति कहेउ तिन्हहि सियँ सयननि
 भई मुदित सब ग्रामबधूटीं । रंकन्ह राय रासि जनु लूटीं ॥
 दो०—अति सप्रेम सिय पायँ परि बहुबिधि देहिं असीस ।

सदा सोहागिनि होहु तुम्ह जब लगि महि अहि सीस ॥११७॥

पारबती सम पतिप्रिय होहू । देबि न हम पर छाड़व छोहू ॥
 पुनि पुनि बिनय करिअ कर जोरी । जौँ एहि मारग फिरिअ बहोरी ॥
 दरसन देब जानि निज दासी । लखीं सीयँ सब प्रेम पिआसी ॥
 मधुर बचन कहि कहि परितोषीं । जनु कुमुदिनीं कौमुदीं पोषीं ॥
 तबहिं लखन रघुबर रुख जानी । पूछेउ मगु लोगन्हि मृदु बानी ॥
 सुनत नारि नर भए दुखारी । पुलकित गात बिलोचन बारी ॥
 मिठा मोदु मन भए मलीने । बिधि निधि दीन्ह लेत जनु छीने
 समुझि करमगति धीरजु कीन्हा ॥ सोधि सुगम भगु तिन्ह कहि दीन्हा
 दो०—लखन जानकी सहित तब गवनु कीन्ह रघुनाथ ।

फेरे सब प्रिय वचन कहि लिए लाइ मन साथ ॥११८॥

फिरत नारि नर अति पछिताहीं । दैअहि दोषु देहिं मन माहीं ॥
 सहित बिषाद परसपर कहहीं । बिधि करतब उलटे सब अहहीं ॥
 निपट निरंकुस निठुर निसंकू । जेहिं सप्ति कोन्ह सरुज सकलंकू
 रुख कलपतरु सागरु खारा । तेहिं पठए बन राजकुमारा ॥
 जौँ पै इन्हहि दीन्ह बनवास । कीन्ह बादि बिधि भोग बिलास ॥
 ए बिचरहि मग बिनु पदत्राना । रचे बादि बिधि बाहन नाना ॥
 ए महि परहिं डासि कुसपाता । सुभग सेज कत सृजत बिधाता ॥

तरुवर बास इन्हहि विधि दीन्हा । धवलधाम रचि रचि श्रमु कीन्हा ।

दो०—जौ ए मुनि पट घर जटिल सुंदर सुठि सुकुमार ।

बिबिध भाँति भूषन बसन बादि किए करतार ॥११९॥

जौ ए कंद मूल फल खाहीं । बादि सुधादि असन जग माहीं ॥
एक कहहिं ए सहज सुहाए । आपु प्रगट भए विधि न बनाए ॥
जहँ लगि बेद कही विधि करनी । श्रवन नयन मन गोचर बरनी ॥
देखहु खोजि भुअन दस चारी । कहँ अस पुरुष कहाँ असि नारी ॥
इन्हहि देखि विधि मनु अनुरागा । पटतर जोग बनावै लागा ॥
कीन्ह बहुत श्रम ऐक न आए । तेहिं इरिषा बन आनि दुराए ॥
एक कहहिं हम बहुत न जानहिं । आपुहि परम धन्य करि मानहिं ॥
ते पुनि पुन्यपुंज हम लेखे । जे देखहिं देखिहहिं जिन्ह देखे ॥

दो०—एहि विधि कहि कहि बचन प्रिय लेहिं नयन भरि नीर ।

किमि चलिहहिं मारग अगम सुठि सुकुमार सरीर ॥१२०॥

नारि सनेह बिकल बस होहीं । चकई साँझ समय जनु सोहीं ॥
मृदु पद कमल कठिन मगु जानी । गहबरी हृदयँ कहहिं बर बानी ॥
परसत मृदुल चरन अरुनारे । सकुचति महि जिमि हृदय हमारे ॥
जौ जगदीस इन्हहि बनु दीन्हा । कस न सुमनमय मारगु कीन्हा ॥
जौ मागा पाइअ विधि पाहीं । ए रखिअहिं सखि आँखिन्ह माहीं ॥
जे नर नारि न अवसर आए । तिन्ह मिय रामु न देखन पाए ॥
सुनि सुरुषु बूझिं अकुलाई । अब लगि गए कहाँ लगि भाई ॥
समरथ धाइ बिलांकहिं जाई । प्रमुदित फिरहिं जनमफलु पाई ॥

दो०—अबला बालक वृद्ध जन कर मीजहि पछिताहि ।

होहि प्रेमवस लोग इमि रामु जहाँ जहँ जाहि ॥१२१॥
गावँ गावँ अस होइ अनंद । देखि भानुकुल कैरव चंद ॥
जे कछु समाचार सुनि पावहि । ते नृप रानिहि दोसु लगावहि ॥
कहहि एक अति भल नरनाहू । दीन्ह हमहि जोइ लोचन लाहू ॥
कहहि परसपर लोग लोगार्ह । बातें सरल सनेह सुहाई ॥
ते पितु मातु धन्य जिन्ह जाए । धन्य सो नगरु जहाँ तें आए ॥
धन्य सो देसु सैलु बन गाऊँ । जहँ जहँ जाहि धन्य सोइ ठाऊँ ॥
सुखु पायउ विरंचिरचि तेही । ए जेहि के सब भाँति सनेही ॥
राम लखन पथि कथा सुहाई । रही सकल मग कानन छाई ॥

दो०—एहि विधि रघुकुल कमल रवि मग लोगन्ह सुख देत ।

जाहि चले देखत बिपिन सिय सौमित्रि समेत ॥१२२॥
आगेँ रामु लखनु बने पाछें । तापस बेष बिराजत काछें ॥
उभय बीच सिय सोहति कैसैं । ब्रह्म जीव बिच माया जैसैं ॥
बहुरि कहउँ छबि जमि मन बसई । जनु मधु मदन मध्यरति लसई ॥
उपमा बहुरि कहउँ जियँ जोही । जनु बुध बिधु बिच रोहिनि सोही ॥
प्रभु पद रेख बीच बिच सीता । धरति चरन मग चलति सभीता ॥
सीय राम पद अंक बराएँ । लखन चलहि मगु दाहिन लाएँ ॥
राम लखन सिय प्रीति सुहाई । बचन अगोचर किमि कहि जाई ॥
खग मृग मगन देखि छबि होहीं । लिए चोरि चित राम बटोहीं ॥

दो०—जिन्ह जिन्ह देखे पथिक प्रिय सिय समेत दोउ भाइ ।

भव मगु अगमु अनंदु तेइ बिनु श्रम रहे सिराइ ॥१२३॥

अजहुँ जासु उर सपनेहुँ काऊ । बसहुँ लखनु सिय रामु बटाऊ ॥
राम धाम पथ पाइहि सोई । जो पथ पाव कबहुँ मुनि कोई ॥
तब रघुबीर श्रमित सिय जानी । देखि निकट बटु सीतल पानी ॥
तहँ बसि कंद मूल फल खाई । प्रात नहाइ चले रघुराई ॥
देखत बन सर सैल सुहाए । बालमीकि आश्रम प्रभु आए ॥
राम दीख मुनि बासु सुहावन । सुंदर गिरि काननु जलु पावन ॥
सरनि सरोज बिटप बन फूले । गुंजत मंजु मधुप रस भूले ॥
खग मृग बिपुल कोलाहल करहीं । बिरहित बैर मुदित मन चरहीं ॥

दो०—सुचि सुंदर आश्रमु निरखि हरषे राजिवनेन ।

मुनि रघुवर आगमनु मुनि आगे आयउ लेन ॥१२४॥

मुनि कहूँ राम दंडवत कीन्हा । आसिरबादु बिप्रवर दीन्हा ॥
देखि राम छबि नयन जुड़ाने । करि सनमानु आश्रमहिं आने ॥
मुनिबर अतिथि प्रानप्रिय पाए । कंद मूल फल मधुर मगाए ॥
सिय सौमित्रि राम फल खाए । तब मुनि आश्रम दिए सुहाए ॥
बालमीकि मन आनँदु भारी । मंगल मूरति नयन निहारी ॥
तब कर कमल जोरि रघुराई । बोले बचन श्रवन सुखदाई ॥
तुम्ह त्रिकाल दरसी मुनिनाथा । बिस्व बदर जिमि तुम्हरे हाथा ॥
अम कहि प्रभु सब कथा बखानी । जेहि जेहि भाँति दीन्ह बनु रानी ॥

दो०—तात बचन पुनि मातु हित भाइ भरत अस राउ ।

मो कहूँ दरस तुम्हार प्रभु सबु मम पुन्य प्रभाउ ॥१२५॥

देखि पाय मुनिराय तुम्हारे । भए सुकृत सब सुफल हमारे ॥
अब जहँ राउर आयसु होई । मुनि उदबेगु न पावै कोई ॥

मुनि तापस जिन्ह तैं दुखु लहहीं । ते नरेस बिनु पावक दहहीं ॥
 मंगल मूल बिप्र परितोषू । दहइ कोटि कुल भूसुर रोषू ॥
 अस जियँ जानि कहिअ सोइ ठाऊँ । सिय सौमित्रि सहित जहँ जाऊँ ॥
 तहँ रचि रुचिर परन तृन साला । बासु करौं कछु काल कृपाला ॥
 सहज सरल मुनि रघुवर बानी । साधु साधु बोले मुनि ग्यानी ॥
 कस न कहहु अस रघुकुल केतू । तुम्ह पालक संतत श्रुति सेतू ॥

छं०—श्रुति सेतु पालक राम तुम्ह जगदीस माया जानकी ।
 जो सृजति जगु पालति हरति रुख पाइ कृपानिधान की ॥
 जो सहससीसु अहीसु महिधरु लखनु सचराचर धनी ।
 सुर काज धरि नरराज तनु चले दलन खल निसिचर अनी ॥

सो०—राम सरूप तुम्हार बचन अगोचर बुद्धिपर ।
 अविगत अकथ अपार नेति नेति नित निगम कह ॥१२६॥

जगु पेखन तुम्ह देखनिहारे । बिधि हरि संभु नचावनिहारे ॥
 तेउ न जानहि मरमु तुम्हारा । औरु तुम्हहि को जाननिहारा ॥
 सोइ जानइ जेहि देहु जनाई । जानत तुम्हहि तुम्हइ होइ जाई ॥
 तुम्हरिहि कृपाँ तुम्हहि रघुनंदन । जानहि भगत भगत उरचंदन ॥
 विदानंदमय देह तुम्हारी । बिगत बिकार जान अधिकारी ॥
 नर तनु धरेहु संत सुर काजा । कहहु कहु जस प्राकृत राजा ॥
 राम देखि मुनि चरित तुम्हारे । जइ मोहिहि बुध हाँहि सुखारे ॥
 तुम्ह जो कहहु करहु सबु साँचा । जस काछिअ तस चाहिअ नाचा ॥

दो०—पूँछहु भोहि कि रहौं कहँ मैं पूँछत सकुचाउँ ।
 जहँ न होहु तहँ देहु कहि तुम्हहि देखावौं ठाउँ ॥१२७॥

सुनि सुनि बचन प्रेम रस साने । सकुचि राम मन महुँ सुसुकाने ॥
 बालमीकि हँसि कहहि बहोरी । बानी मधुर अभिअ रस बोरी ॥
 सुनहु राम अब कहउँ निकेता । जहाँ बसहु सिय लखन समेता ॥
 जिन्ह के श्रवन समुद्र समाना । कथा तुम्हारि सुभग सरि नाना ॥
 भरहि निरंतर होहि न पूरे । तिन्ह के हिय तुम्ह कहूँ गृह रूरे ॥
 लोचन चातक जिन्ह करि राखे । रहहि दरस जलधर अभिलाषे ॥
 निदरहि सरित सिंधु सर भारी । रूप बिंदु जल होहि सुखागी ॥
 तिन्ह के हृदय सदन सुखदायक । बसहु बंधु सिय सह रघुनायक ॥

दो०—जसु तुम्हार मानस विमल हंसिनि जीहा जासु ।

मुक्ताहल गुन गन चुनइ राम बसहु हियँ तासु ॥१२८॥

प्रभु प्रसाद सुचि सुभग सुबासा । सादर जासु लहइ नित नासा ॥
 तुम्हहि निबेदित भोजन करहीं । प्रभु प्रसाद पट भूषन धरहीं ॥
 सीस नवहिँ सुर गुरु द्विज देखी । प्रीति सहित करि बिनय बिसेषी
 कर नित करहिँ राम पद पूजा । राम भरोस हृदयँ नहिँ दूजा ॥
 चरन राम तीरथ चलि जाहीं । राम बसहु तिन्ह के मन माहीं ॥
 मंत्रराजु नित जपहिँ तुम्हारा । पूजहिँ तुम्हहि सहित परिवारा ॥
 तरपन होम करहिँ विधि नाना । विप्र जेवाँइ देहिँ बहु दाना ॥
 तुम्ह तें अधिक गुरहि जियँ जानी । सकल भायँ सेवहिँ सनमानी ॥

दो०—सबु करि मागहिँ एक फलु राम चरन रति होउ ।

तिन्ह के मन मंदिर बसहु सिय रघुनंदन दोउ ॥१२९॥

काम कोह मद मान न मोहा । लोभ न लोभन राग न द्रोहा ॥
 जिन्ह के कपट दंभ नहिँ माया । तिन्ह के हृदय बमहु रघुराया ॥

सब के प्रिय सब के हितकारी । दुख सुख सरिस प्रसंसा गारी ॥
 कहहिं सत्य प्रिय बचन बिचारी । जागत सोवत सरन तुम्हारी ॥
 तुम्हहि छाड़ि गति दूसरि नाहीं । राम बसहु तिन्ह के मन माहीं ॥
 जननी सम जानहिं परनारी । धनु पराव बिष तें बिष भारी ॥
 जे हरषहिं पर संपति देखी । दुखित होहिं पर बिपति बिसेषी ॥
 जिन्हहि राम तुम्ह प्रान पिआरे । तिन्ह के मन सुभ सदन तुम्हारे ॥

दो०—स्वामि सखा पितु मातु गुर जिन्ह के सब तुम्ह तात ।

मन मंदिर तिन्ह कें बसहु सीय सहित दोउ आत ॥१३०॥

अवगुन तजि सब के गुन गहहीं । बिप्र घेनु हित संकट सहहीं ॥
 नीति निपुन जिन्ह कह जग लीका । घर तुम्हार तिन्ह कर मनु नीका ॥
 गुन तुम्हार समझइ निज दोसा । जेहि सब भाँति तुम्हार भरोसा ॥
 राम भगत प्रिय लागहिं जेही । तेहि उर बसहु सहित बैदेही ॥
 जाति पाँति धनु धरमु बड़ाई । प्रिय परिवार सदन सुखदाई ॥
 सब तजि तुम्हहि रहइ उर लाई । तेहि के हृदयँ रहहु रघुराई ॥
 सरगु नरकु अपबगु समाना । जहँ तहँ देख धरें धनु बाना ॥
 करम बचन मन राउर चेरा । राम करहु तेहि कें उर डेरा ॥

दो०—जाहि न चाहिअ कबहुँ कछु तुम्ह सन सहज सनेहु ।

बसहु निरंतर तासु मन सो राउर निज गेहु ॥१३१॥

एहि विधि मुनिवर भवन देखिए । बचन सप्रेम राम मन भाए ॥
 कह मुनि मुनहु भानुकुलनायक । आश्रम कहउँ समय सुखदायक ॥
 चित्रकूट गिरि करहु निवास । तहँ तुम्हार सब भाँति सुपास ॥
 सैलु सुहावन कानन चारु । करि केहरि मृग बिहग बिहारु ॥

नदी पुनीत पुरान बखानी । अत्रिप्रिया निज तपबल आनी ॥
सुरसरि धार नाउँ मंदाकिनि । जो सब पातक पोतक डाकिनि ॥
अत्रि आदि मुनिबर बहु बसहीं । करहिं जोग जप तप तन कसहीं ॥
चलहु सफलश्रम सब कर करहु । राम देहु गौरव गिरिवरहु ॥

दो०—चित्रकूट महिमा अमित कही महामुनि गाइ ।

आइ नहाए सरित बर सिय समेत दोउ भाइ ॥ १३२ ॥

रघुबर कहेउ लखन भल घाटू । करहु कतहुँ अब ठाहर ठाटू ॥
लखन दीख पय उतर करारा । चहुँ दिसि फिरेउ धनुष जिमि नारा ॥
नदी पनच सर सम दम दाना । सकल कलुष करि साउज नाना ॥
चित्रकूट जनु अचल अहेरी । चुकइ न घात मार मुठभेरी ॥
अस कहि लखन ठाउँ देखरावा । थलु बिलोकि रघुबर सुख पावा ॥
रमेउ राम मनु देवन्ह जाना । चले सहित सुर थपति प्रधाना ॥
कोल किरात बेष सब आए । रचे परन तन सदन सुहाए ॥
बरनि न जाहिं मंजु दुइ साला । एक ललित लघु एक बिसाला ॥

दो०—लखन जानकीं सहित प्रभु राजत रुचिर निकेत ।

सोह मदन मुनि बेष जनु रति रितुराज समेत ॥ १३३ ॥

मासपारायण, सत्रहवाँ विश्राम

अमर नाग किंनर दिसिपाला । चित्रकूट आए तेहि काला ॥
राम प्रनामु कीन्ह सब काहू । मृदित देव लहि लोचन लाहू ॥
बरषि सुमन कह देव समाजू । नाथ सनाथ भए हम आजू ॥
करि बिनती दुख दुसह सुनाए । हरषित निज निज सदन सिधाए ॥

चित्रकूट रघुनंदनु छाए । समाचार सुनि सुनि मुनि आए ॥
 आवत देखि मुदित मुनिबृन्दा । कीन्ह दंडवत रघुकुल चंदा ॥
 मुनि रघुवरहि लाइ उर लेहीं । सुफल होन हित आसिष देहीं ॥
 सिय सौमित्रि राम छबि देखहिं । साधन सकल सफल करि लेखहिं

दो०—जथाजोग सनमानि प्रभु बिदा किए मुनिवृन्द ।

करहिं जोग जप जाग तप निज आश्रमन्हि सुछंद ॥ १३४ ॥

यह सुधि कोल किरातन्ह पाई । हरषे जनु नव निधि घर आई ॥
 कंद मूल फल भरि भरि दोना । चले रंक जनु लूटन सोना ॥
 तिन्ह महँ जिन्ह देखे दोउ भ्राता । अपर तिन्हहि पूछहिं मगु जाता
 कहत सुनत रघुबीर निकाई । आइ सबहिं देखे रघुराई ॥
 करहिं जाहारु मेंट धरि आगे । प्रभुहि बिशोकहिं अति अनुरागे
 चित्र लिखे जनु जहँ तहँ ठाढ़े । पुलक सरीर नयन जल बाढ़े ॥
 राम सनेह मगन सब जाने । कहि प्रिय वचन सकल सनमाने ॥
 प्रभुहि जोहारि बहोरि बहोरी । वचन विनीत कहहिं कर जोरी ॥

दो०—अब हम नाथ सनाथ सब भए देखि प्रभु पाय ।

भाग हमोरें आगमनु राउर कोसलराय ॥ १३५ ॥

धन्य भूमि बन पंथ पहारा । जहँ तहँ नाथ पाउ तुम्ह धारा ॥
 धन्य बिहग मृग कानन चारी । सफल जनम भए तुम्हहि निहारी ॥
 हम सब धन्य सहित परिवारा । दीख दरसु भरि नयन म्हारा ॥
 कीन्ह बासु भल ठाउँ विचारी । इहाँ सकल रितु रहब सुखारी ॥
 हम सब भाँति करब सेवकाई । करि केहरि अहि बाध बराई ॥
 बन बेहड़ गिरि कंदर खोहा । सब हमार प्रभु पग पग जोहा ॥

तहँ तहँ तुम्हहि अहेर खेलाउब । सर निरझर जल ठाउँ देखाउब ॥
हम सेवक परिवार समेता । नाथ न सकुचब आयसु देता ॥

दो०—बेद बचन मुनि मन अगम ते प्रभु करुना ऐन ।

बचन किरातन्ह के सुनत जिमि पितु बालक बैन ॥ १३६ ॥

रामहि केवल प्रेमु पिआरा । जानि लेउ जो जाननिहारा ॥
राम सकल बनचर तब तोषे । कहि मृदु बचन प्रेम परिपोषे ॥
बिदा किए सिर नाइ सिधाए । प्रभु गुन कहत सुनत घर आए ॥
एहि बिधि सिय समेत दोउ भाई । बपहिं बिपिन सुर मुनि सुखदाई
जब तें आइ रहे रघुनायकु । तब तें भयउ बनु मंगलदायकु ॥
फूलहिं फलहिं बिटप बिधि नाना । मंजु बलित बर बेलि बिताना ॥
सुरतरु मरिस सुभायँ सुहाए । मनहु बिबुध बन परिहरि आए ॥
गुंज मंजुतर मधुकर श्रेणी । त्रिविध बयारि बहइ सुख देनी ॥

दो०—नीलकंठ कलकंठ सुक चातक चक्र चकोर ।

भाँति भाँति बोलहिं विहग श्रवन सुखद चित चोर ॥ १३७ ॥

करि केहरि कपि कोल कुरंगा । बिगतबैर बिचरहिं सब संगी ॥
फिरत अहेर राम छबि देखी । होहिं मुदित मृगबृंद बिसेषी ॥
बिबुध बिपिन जहँ लगि जग माहीं । देखि रामबनु सकल सिहाहीं
सुरसरि सरसइ दिनकर कन्या । मेकलसुता गोदावरि धन्या ॥
सब सर सिंधु नदीं नद नाना । मंदाकिनि कर करहिं बखाना ॥
उदय अस्त गिरि अरु कैलास । मंदर मेरु सकल सुरबास ॥
सैल हिमाचल आदिक जेते । चित्रकूट जसु गावहिं तेते ॥
बिंधि मुदित मन सुखु न समार्ई । श्रम बिनु बिपुल बढ़ाई पाई ॥

दो०—चित्रकूट के बिहग मृग बेलि बिटप तृन जाति ।

पुन्य पुंज सब धन्य अस कहहि देव दिन राति ॥ १३८ ॥

नयनवंत रघुबरहि बिलोकी । पाइ जनम फल होहि बिसोकी ॥
परसि चरन रज अचर सुखारी । भए परम पद के अधिकारी ॥
सो बनू सैलु सुभायँ सुहावन । मंगलमय अति पावन पावन ॥
महिमा कहिअ कवनि बिधि तासू । सुखसागर जहँ कीन्ह निवासू ॥
पय पयोधि तजि अवध बिहाई । जहँ सिय लखनु रामुरहे आई ॥
कहि न सकहि सुषमा जसि कानन । जौ सत सहस होहि सहसानन ॥
सो मैं बरनि कहौ बिधि केहीं । डावर कमठ कि मंदर लेहीं ॥
सेवहि लखनु करम मन बानी । जाइ न सीलु सनेहु बवानी ॥

दो०—छिनु छिनु लखि सिय राम पद जानि आपु पर नेहु ।

करत न सपनेहुँ लखनु चितु बंधु मातु पितु गेहु ॥ १३९ ॥

राम संग सिय रहति सुखारी । पुर परिजन गृह सुरति बिसारी ॥
छिनु छिनु पिय बिधु बदन नु निहारी । प्रभुदित मनहुँ चकोरकुमारी ॥
नाह नेहु नित बढ़त बिलोकी । हरषित रहति दिवस जिमि कोकी ॥
सिय मनु राम चरन अनुरागा । अवध सहस सम बन प्रिय लागा ॥
परनकुटी प्रिय प्रियतम संगी । प्रिय परिवारु कुरंग बिहंगा ॥
सासु ससुर सम मुनितिय मुनिबर । असनु अमिअ सम कंद मूल फर ॥
नाथ साथ साँथरी सुहाई । मयन सयन सय सम सुखदाई ॥
लोकप होहि बिलोकत जासू । तेहि कि मोहि सक बिषय बिलासू ॥

दो०—सुमिरत रामहि तजहि जन तृन सम बिषय बिलासु ।

रामप्रिया जग जननि सिय कछु न आचरजु तासु ॥ १४० ॥

सीय लखन जेहि बिधि सुखु लहहीं। सोइ रघुनाथ करहिं सोइ कहहीं
कहहिं पुरातन कथा कहानी। सुनहिं लखनु सिय अति सुखु मानी
जब जब रामु अवध सुधि करहीं। तब तब बारि बिलोचन भरहीं ॥
सुमिरि मातु पितु परिजन भाई। भरत सनेहु सीलु सेवकाई ॥
कृपासिंधु प्रभु होहिं दुखारी। धीरजु धरहिं कुसमउ बिचारी ॥
लखि सिय लखनु बिकल होइ जाहीं। जिमि पुरुषहि अनुसर परिछाहीं
प्रिया बंधु गति लखिरघुनंदनु। धीर कृपाल भगत उर चंदनु ॥
लगे कहन कलु कथा पुनीता। सुनि सुखु लहहिं लखनु अरु सीता

दो०—रामु लखन सीता सहित सोहत परन निकेत ।

जिमि बासव बस अमरपुर सची जयंत समेत ॥१४१॥

जोगवहिं प्रभु सिय लखनहि कैसें। पलक बिलोचन गोलक जैसें ॥
सेवहिं लखनु सीय रघुबीरहि। जिमि अविबेकी पुरुष सरीरहि ॥
एहि बिधि प्रभु बन बसहिं सुखारी। खग मृग सुर तापम हितकारी
कहेउँ राम बन गवनु सुहावा। सुनहु सुमंत्र अवध जिमि आवा ॥
फिरेउ निषादु प्रभुहि पहुँचाई। सचिव सहित रथ देखेसि आई ॥
मंत्री बिकल बिलोकि निषादू। कहिन जाइ जस भयउ बिषादू ॥
राम राम सिय लखन पुकारी। परेउ धरनितल ब्याकुल भारी ॥
देखि दखिन दिसि हय हिहिनाहीं। जनु बिनु पंख बिहग अकुलाहीं

दो०—नहिं तृन चरहिं न पिअहिं जलु मोचहिं लोचन बारि ।

ब्याकुल भए निषाद सब रघुवर बाजि निहारि ॥१४२॥

धरि धीरजु तब कहइ निषादू। अब सुमंत्र परिहरहु बिषादू ॥
तुम्ह पंडित परमारथ ग्याता। धरहु धीर लखि बिमुख बिधाता ॥

विविधिका कहि कहि मृदु बानी । रथ बैठारेउ बरबस आनी ॥
 सोक सिथिल रथु सकइ न हाँकी । रघुबर बिरह पीर उर बाँकी ॥
 चरफराहि मग चलहि न घोरे । बन मृग मनहु आनि रथ जोरे ॥
 अदुकि परहि फिरि हेरहि पीछे । राम बियोगि बिकल दुख तीछे ॥
 जो कह राम लखनु बैदेही । हिंकरि हिंकरि हित हेरहि तेही ॥
 बाजि बिरह गति कहि किमि जाती । बिनु मन फनिक बिकल जेहि भौंती ॥

दो०—भयउ निषादु विषादवस देखत सचिव तुरंग ।

बोलि सुसेवक चारि तब दिए सारथी संग ॥१४३॥

गुह सारथिहि फिरेउ पहुँचाई । बिरहु विषादु बरनि नहि जाई ॥
 चले अवध लेइ रथहि निषादा । होहि छनहि छन मगन विषादा ॥
 सोच सुमंत्र बिकल दुख दीना । धिग जीवन रघुबीर बिहीना ॥
 रहिहि न अंतहुँ अधम सरीरु । जसु न लहेउ बिछुरत रघुबीरु ॥
 भए अजस अघ भाजन प्राना । कवन हेतु नहिं करत पयाना ॥
 अहह मंद मनु अवसर चूका । अजहुँ न हृदय होत दुइ टूका ॥
 मीजि हाथ सिरु धुनि पछिताई । मनहुँ कृपन धन रासि गवाई ॥
 बिरिद बाँधि बर बीरु कहाई । चलेउ समर जनु सुभट पराई ॥

दो०—विप्र विवेकी वेदविद संमत साधु सुजाति ।

जिमि घोखे मदपान कर सचिव सोच तेहि भौंति ॥१४४॥

जिमि कुलीन तिय साधु सयानी । पतिदेवता करम मन बानी ॥
 रहै करम बस परिहरि नाहू । सचिव हृदयँतिमि दारुन दाहू ॥
 लोचन सजल डीठि भइ थोरी । सुनइ न श्रवन बिकल मति भोरी ॥
 सुखहिं अधर लागि मुहँ लाटी । जिउ न जाइ उर अवधि कपाटी ॥

बिबरन भयउ न जाइ निहारी । मारेसि मनहुँ पिता महतारी ॥
हानि गलानि बिपुल मन व्यापी । जमपुर पंथ सोच जिमि पापी ॥
बचनु न आव हृदयँ पछिताई । अवध काह मैं देखब जाई ॥
राम रहित रथ देखिहि जोई । सकुचिहि मोहि बिलोकत सोई ॥

दो०—घाइ पूँछिहहिं मोहि जब विकल नगर नर नारि ।

उतरु देब मैं सबहि तब हृदयँ बज्रु बैठारि ॥१४५॥

पुछिहहिं दीन दुखित सब माता । कहब काह मैं तिन्हहि बिधाता ॥
पूछिहि जबहि लखन महतारी । कहिहउँ कवन सँदेस सुखारी ॥
राम जननि जब आइहि धाई । सुमिरि बन्धु जिमि धेनु लवाई ॥
पूँछत उतरु देब मैं तेही । गे बनु राम लखनु बँदेही ॥
जोइ पूछिहि तेहि उतरु देवा । जाइ अवध अब यहु सुखु लेबा ॥
पूँछिहि जबहिं राउ दुख दीना । जिवनु जासु रघुनाथ अधीना ॥
देहउँ उतरु कौनु मुहु लाई । आयउँ कुसल कुअँर पहुँचाई ॥
सुनत लखन सिय राम सँदेस । तन जिमितनु परिहरिहि नरेस ॥

दो०—हृदउ न बिदरेउ पंक जिमि बिछुरत प्रीतमु नीरु ।

जानत हौं मोहि दीन्ह बिधि यहु जातना सरीरु ॥१४६॥

एहि बिधि करत पंथ पछितावा । तमसातीर तुरत रथु आवा ॥
बिदा किए करि बिनय निषादा । फिरे पायँ परि बिकल बिषादा ॥
पैठत नगर सचिव सकुचाई । जनु मारेसि गुर बाँभन गाई ॥
बैठि बिटप तर दिवसु गवाँवा । साँझ समय तब अवसरु पावा ॥
अवध प्रबेसु कीन्ह अँधिआरें । पैठ भवन रथु राखि दुआरें ॥
जिन्ह जिन्ह समाचार सुनि पाए । भूप द्वार रथु देखन आए ॥

रथु पहिचानि बिकल लखि धोरे । गरहिं गात जिमि आतप ओरे ॥
नगर नारि नर ब्याकुल कैसें । निषटत नीर मीनगन जैसें ॥

दो०—सचिव आगमनु सुनत सबु बिकल भयउ रनिवासु ।

भवनु भयंकलु लाग तेहि मानहुं प्रेत निवासु ॥१४७॥

अति आरति सब पूछहिं रानी । उतरु न आव बिकल भइ बानी ॥
सुनइ न भवन नयन नहिं सूझा । कहहु कहां नृपु तेहि तेहि बूझा ॥
दासिन्ह दीख सचिव बिकलाई । कौसल्या गृहं गई लवाई ॥
जाइ सुमंत्र दीख कस राजा । अमिअरहित जनु चंदु बिराजा ॥
आसन सयन बिभूषन हीना । परेउ भूमितल निपट मलीना ॥
लेइ उसासु सोच एहि भाँती । सुरपुर तें जनु खंसेउ जजाती ॥
लेत सोच भरि छिनु छिनु छाती । जनु जरि पंख परेउ संपाती ॥
राम राम कह राम सनेही । पुनि कह राम लखन बैदेही ॥

दो०—देखि सचिवैं जय जीव कहि कीन्हेउ दंड प्रनामु ।

सुनत उठेउ ब्याकुल नृपति कहु सुमंत्र कहैं रामु ॥१४८॥

भूप सुमंत्रु लीन्ह उर लाई । बूड़त कछु अधार जनु पाई ॥
सहित सनेह निकट बैठारी । पूँछत राउ नयन भरि बारी ॥
राम कुसल कहु सखा सनेही । कहैं रघुनाथु लखनु बैदेही ॥
आने फेरि कि बनहि सिधाए । सुनत सचिव लोचन जल छाए ॥
सोक बिकल पुनि पूँछ नरेख । कहु सिय राम लखन संदेख ॥
राम रूप गुन सील सुभाऊ । सुमिरि सुमिरि उर सोचत राऊ ॥
राउ सुनाइ दीन्ह बनबाख । सुनि मन भयउ न हरषु हरौख ॥
सो सुत बिलुरत गएन प्राना । को पापी बड़ मोहि समाना ॥

दो०—सखा रामु सिय लखनु जहँ तहाँ मोहि पहुँचाउ ।

नाहिँ त चाहत चलन अब प्रान कहउँ सतिभाउ ॥१४९॥

पुनि पुनि पूँछत मंत्रिहि राऊ । प्रियतम सुअन सँदेस सुनाऊ ॥
करहि सखा सोइ बेगि उपाऊ । रामु लखनु सिय नयन देखाऊ ॥
सचिव धीर धरि कह मृदु बानी । महाराज तुम्ह पंडित ग्यानी ॥
बीर सुधीर धुरंधर देवा । साधु समाजु सदा तुम्ह सेवा ॥
जनम मरन सब दुख सुख भोगा । हानि लाभु प्रिय मिलन बियोगा
काल करम बस होहिँ गोसाईँ । बरबस राति दिवस की नाई ॥
सुख हरषहिँ जड़ दुख बिलखाहीं । दोउ सम धीर धरहिँ मन माहीं ॥
धीरज धरहु बिबेकु बिचारी । छाड़िअ सोच सकल हितकारी ॥

दो०—प्रथम बासु तमसा भयउ दूसर सुरसरि तीर ।

न्हाइ रहे जलपानु करि मिय समेत दोउ बीर ॥१५०॥

केवट कीन्हि बहुत सेवकाई । सो जामिनि सिंगरौर गवाँई ॥
होत प्रात बट छीरु मगावा । जटा मुकुट निज सीस बनावा ॥
राम सखाँ तब नाव मगाई । प्रिया चढ़ाइ चढ़े रघुराई ॥
लखन बान धनु धरे बनाई । आपु चढ़े प्रभु आयसु पाई ॥
बिकल बिलोकि मोहिरघुबीरा । बोले मधुर बचन धरि धीरा ॥
तात प्रनाम तात सन कहेहू । बार बार पद पंकज गहेहू ॥
करबि पायँ परि बिनय बहोरी । तात करिअ जनि चिंता मोरी ॥
बन मग मंगल कुसल हमारें । कृपा अनुग्रह पुन्य तुम्हारें ॥

छं०—तुम्हरें अनुग्रह तात कानन जात सब सुख पाइहौं ।

प्रतिपालि आयसु कुसल देखन पाय पुनि फिरि आइहौं ॥

जननीं सकल परितोषि परि परि पायँ करि बिनती घनी ।

तुलसी करेहु सोइ जतनु जेहिँ कुसली रहहिँ कोसलघनी ॥

सो०—गुर सन कहब सँदेसु बार बार पद पदुम गहि ।

करब सोइ उपदेसु जेहिँ न सोच मोहि अवधपति ॥१५१॥

पुरजन परिजन सकल निहोरी । तात सुनाएहु बिनती मोरी ॥

सोइ सब भाँति मोर हितकारी । जातें रह नरनाहु सुखारी ॥

कहब सँदेसु भरत के आएँ । नीति न तजिअ राजपदु पाएँ ॥

पालेहु प्रजहि करममन बानी । सेएहु मातु सकल समजानी ॥

ओर निबाहेहु भायप भाई । करि पितु मातु सुजन सेवकाई ॥

तात भाँति तेहि राखब राऊ । सोच मोर जेहिँ करै न काऊ ॥

लखन कहे कछु बचन कठोरा । बरजि राम पुनि मोहि निहोरा ॥

बार बार निज सपथ देवाई । कहबिन तात लखन लरिकाई ॥

दो०—कहि प्रनामु कछु कहन लिय सिय भइ सिथिल सनेह ।

थकित बचन लोचन सजल पुलक पल्लवित देह ॥१५२॥

तेहि अवसर रघुबर रुख पाई । केवट पारहि नाव चलाई ॥

रघुकुलांतलक चैले एहि भाँती । देखउँ ठाढ़ कुलिस धरि छाती ॥

मैं आपन किमि कहाँ कलेसू । जिअत फिरैउँ लेइ राम सँदेसू ॥

अस कहि सचिव बचन रहि गयऊ । हानि गलानि सोचबस भयऊ ॥

सूत बचन सुनतहिँ नरनाहु । परेउ धरनि उर दारुन दाहू ॥

तलफत बिषम मोह मन मापा । माजा मनहुँ मीन कहूँ व्यापा ॥

करि बिलाप सब रोवहिँ रानी । महा बिपति किमि जाइ बखानी ॥

सुनि बिलाप दुखहू दुखु लागा । धीरजहू कर धीरजु भागा ॥

दो०—भयउ कोलाहलु अवध अति सुनि नृप राउर सोरु ।

बिपुल बिहग बन परेउ निसि मानहुँ कुलिस कठोरु ॥१५३॥

प्राण कंठगत भयउ भुआलू । मनि बिहीन जनु ब्याकुल ब्यालू
इंद्री सकल बिकल भई भारी । जनु सर सरसिज बनु बिनु बारी ॥
कौसल्याँ नृपु दीख मलाना । रबिकुल रबि अँथयउ जियँ जाना
उर धरि धीर राम महतारी । बोली बचन समय अनुसारी ॥
नाथ समुझि मन करिअ बिचारू । राम बियोग पयोधि अपारू ॥
करनधार तुम्ह अवध जहाजू । चढ़ेउ सकल प्रिय पथिक समाजू
धीरजु धरिअ त पाइअ पारू । नाहिँ त बूढ़िहि सबु परिवारू ॥
जौँ जियँ धरिअ बिनय पिय मोरी । रामु लखनु सियमिलहिँ बहोरी

दो०—प्रिया बचन मृदु सुनत नृपु चितयउ आँखि उघारि ।

तलफत मीन मलीन जनु सींचत सीतल बारि ॥१५४॥

धरि धीरजु उठि बैठ भुआलू । कहू सुमंत्र कहँ राम कृपालू ॥
कहाँ लखनु कहँ रामु सनेही । कहँ प्रिय पुत्रबधू बैदेही ॥
बिलपत राउ बिकल बहु भाँती । भइ जुग सरिस सिराति न राती ॥
तापस अंध साप सुधि आई । कौसल्यहि सब कथा सुनाई ॥
भयउ बिकल बरनत इतिहासा । राम रहित धिग जीवन आसा ॥
सो तनु राखि करब मै काहा । जेहि न प्रेम पनु मोर निबाहा ॥
हा रघुनंदन प्राण पिरीते ! तुम्ह बिनु जितत बहुत दिन बीते
हा जानकी लखन हा रघुबर । हा पितु हित चित चातक जलधर

दो०—राम राम कहि राम कहि राम राम कहि राम ।

तनु परिहरि रघुबर बिरहँ राउ गयउ सुरधाम ॥१५५॥

जिअन मरन फलु दसरथ पावा । अंड अनेक अमल जसु छावा ॥
 जिअत राम बिधु बदन नु निहारा । राम बिरह करि मरनु सँवारा ॥
 सोक बिकल सब रोवहि रानी । रूप सीलु बलु तेजु बखानी ॥
 करहि बिलाप अनेक प्रकारा । परहि भूमितल बागहि बारा ॥
 बिलपहि बिकल दास अरु दासी । घर घर रुदनु करहि पुरबासी ॥
 अँथयउ आजु भानुकुल भानू । धरम अवधि गुन रूप निधानू ॥
 गारी सकल कैकइहि देहीं । नयन बिहीन कीन्ह जग जेहीं ॥
 एहि बिधि बिलपत रैनि बिहानी । आए सकल महामुनि ग्यानी ॥

दो०—तब बसिष्ठ मुनि समय सम कहि अनेक इतिहास ।

सोक नेवारेउ सबहि कर निज विग्यान प्रकास ॥१५६॥

तेल नावँ भरि नृप तनु राखा । दूत बोलाइ बहुरि अस भाषा ॥
 धावहु बेगि भरत पहि जाहू । नृप सुधि कतहुँ कइहु जनि काहू
 एतनेइ कहेहु भरत सन जाई । गुर बोलाइ पठयउ दोउ भाई ॥
 सुनि मुनि आयसु धावन धाए । चले बेग बर बाजि लजाए ॥
 अनरथु अवध अरंभेउ जब तें । कुसगुन होहि भरत कहूँ तब तें ॥
 देखहि राति भयानक सपना । जागि करहि कटु कोटि कलपना
 विप्र जेवाँइ देहि दिन दाना । सिव अभिषेक करहि बिधि नाना
 मागहि हृदयँ महेस मनाई । कुसल मातु पितु परिजन भाई ॥

दो०—एहि बिधि सोचत भरत मन धावन पहुँचे आइ ।

गुर अनुसासन श्रवन सुनि चले गनेसु मनाइ ॥१५७॥

चले समीर बेग हय हाँके । नाघत सरित सैल बन बाँके ॥
 हृदयँ सोचु बड़ कछु न सोहाई । अस जानहि जियँ जाउँ उड़ाई ॥

एक निमेष बरष सम जाई । एहि बिधि भरत नगर निअराई॥
असगुन होहि नगर पैठारा । रटहि कुभाँति कुखेत करारा ॥
खर सिआर बोलहि प्रतिकूला । सुनि सुनि होइ भरत मन खूला ॥
भीहत सरसरिता बन बागा । नगरु बिसेषि भयावनु लागा ॥
खग मृग हय गय जाहि न जोए । राम बियोग कुरोग बिगोए ॥
नगर नारि नर निपट दुखारी । मनहुँ सबन्हि सब संपति हारी ॥

दो०—पुरजन मिलहि न कहहि कछु गवँहि जोहारहि जाहि ।

भरत कुसल पूँछि न सकहि भय बिषाद मन माहि ॥१५८॥

हाट बाट नहि जाइ निहारी । जनु पुर दहँ दिसि लागि दवारी ॥
आवत सुत सुनि कैकयनंदिनि । हरषी रबिकुल जलरुह चंदिनि ॥
सजि आरती मुदित उठि धाई । द्वारेहि भेंटि भवन लेइ आई ॥
भरत दुखित परिवारु निहारा । मानहुँ तुहिन बनज बनु मारा ॥
कैकेई हरषित एहि भाँती । मनहुँ मुदित दव लाइ किराती ॥
सुतहि ससोच देखि मनु मारें । पूँछति नैहर कुसल हमारें ॥
सकल कुमल कहि भरत सुनाई । पूँछी निज कुल कुसल भलाई ॥
कहु कहँ तात कहाँ सब माता । कहँ सिय राम लखन प्रिय आता ॥

दो०—सुनि सुत बचन सनेहमय कपट नीर भरि नैन ।

भरत श्रवन मन सूल सम पापिनि बोली बैन ॥१५९॥

तात बात मैं सकल सँवारी । मै मंथरा सहाय बिचारी ॥
कलुक काज बिधि बीच बिगारेउ । भूपति सुरपति पुर पशु धारेउ ॥
सुनत भरतु भए बिबस बिषादा । जनु सहमेउ करि केहरि नादा ॥
तात तात हा तात पुकारी । परे भूमितल ब्याकुल भारी ॥

चलत न देखन पायउँ तोही । तात न रामहि सौँपेहु मोही ॥
 बहुरि धीर धरि उठे सँभारी । कहु पितु मरन हेतु महतारी ॥
 सुनि सुत बचन कहति कैकेई । मरसु पाँछि जनु माहुर देई ॥
 आदिहु तैं सब आपनि करनी । कुटिल कठोर मुदित मन बरनी ॥

दो०—भरतहि विसरेउ पितु मरन सुनत राम बन गौनु ।

हेतु अपनपउ जानि जियँ थकित रहे धरि मौनु ॥१६०॥

बिकल बिलोकि सुतहि समुझावति । मनहुँ जरे पर लोनु लगावति
 तात राउ नहिँ सोचै जोगू । बिदइ सुकृत जमु कीन्हैउ भोगू ॥
 जीवत सकल जनम फल पाए । अंत अमरपति सदन सिधाए ॥
 अम अनुमानि सोच पहिंहरू । सहित सभाज रा न पुर करू ॥
 सुनि सुठि सहमेउ राजकुमारू । पाकें छत जनु लाग अँगारू ॥
 धीरज धरि भरि लेहिँ उभासा । पापिनि मचहि भाँति कुरु नामा ॥
 जौँ पै कुरुचि रही अति तोही । जनमत काहे न मारे माही ॥
 पेड़ काटि तैं पालउ सीँवा । मान जिअन निति चारि उलाचा ॥

दो०—हंसबंसु दसगु जनकु राम लखन से भाइ ।

जननी तूँ जननी भई बिधि सन कछु न बनाइ ॥१६१॥

जब तैं कुमति कुमत जियँ ठयऊ । खंडखंड हाँइ हृदउ न गयऊ ॥
 बर मागत मन भइ नाहं पोंग । गरिन जीह मुहँ मरेउ न काग ॥
 भूपँ प्रतीति तोरि किमि कीन्ही । मरन काल बिधि मातं हरि लांन्ही
 बिधिहुँ न नारि हृदय गात जानी । सकरु कपट अथ अगुन खानी
 सरल सुसील धरम रत राऊ । सो किमि जानै तीय सुभाऊ ॥
 अस को जाँव जंतु जग माहा । जेहि रघुनाथ प्रानप्रिय नाहा ॥

मे अति अहित रामु तेउ तोही । कोतू अहमि सत्य कहू मोही ॥
जो हसि सो हसि मुहँ मसि लाई । आँखि आँट उठि बैठहि जाई ॥

दो०—राम विरोधी हृदय तें प्रगट कीन्ह विधि मोहि ।

मो समान को पातकी बादि कहउँ कछु तोहि ॥१६२॥

सुनि सत्रुघुन मातु कुटिलाई । जगहिं गात रिस कछु न बसाई ॥
तेहि अवसर कुबरी तहँ आई । वसन बिभूषन बिबिध बनाई ॥
लखि रिस भरेउ लखन लघु भाई । बरत अनल घृत आहुति पाई ॥
हुमगि लात तकि कूबर मारा । परि मुह भर मदि कगत पुकारा ॥
कूबर टूटेउ फूट कपारू । दलित दसन मुख रुधिर प्रचारू ॥
आह दइअ मैं काह नसावा । करत नीक फलु अनइम पावा ॥
सुनि रिपुहन लखि नख सिख । खोटी लगे घसीटन धरि धरि झोंटी
भरत दयानिधि दीन्ह छड़ाई । कौमल्या पहिं गे दोउ भाई ॥

दो०—मलिन बसन विवरन विकल क्रम सरीर दुख भार ।

कनक कलप वर बेलि बन मानहुँ हनी तुसार ॥१६३॥

भरतहि देखि मातु उठि धाई । मुरुछित अवनि परी झहँ आई ॥
देखत भरतु विकल भए भागी । पर चरन तन दसा बिसारी ॥
मातु तात कहँ देहि देखाई । कहँ मिय रामु लखनु दोउ भाई ॥
कैकई कत जन भी जग माझा । जाँ जनमि त भइ काहे न बाँझा ॥
कुल कुलकु जेहिं जनमेउ माही । अप जम भाजन प्रियजन द्रोही ॥
को निभुवन मोहि सगिम अभागी । गति अमि तोरि मातु जेहि लागी
पितु सुरपुर बन रघुबर कंतू । मैं केवल सब अनरथ हेतू ॥
धिग मोहि भयउँ बेनु बन आगी । दुसह दाह दुख दूषन भागी ॥

दो०—मातु भरत के बचन मृदु सुनि पुनि उठी सँभारि ।

लिए उठाइ लगाइ उर लोचन मोचति बारि ॥१६४॥

सरल सुभाय मायँ हियँ लाए । अति हित मनहुँ राम फिरि आए
भेंटेउ बहुरि लखन लघु भाई । सोकु सनेहु न हृदयँ समाई ॥
देखि सुभाउ कहत सबु कोई । राम मातु अस काहे न होई ॥
माताँ भरतु गोद बैठारे । आँसु पोंछि मृदु बचन उचारे ॥
अजहुँ बच्छ बलिधीरज धरहू । कुसमउ समुझि सोक परिहरहू ॥
जनि मानहु हियँहानि गलानी । काल करम गति अघटित जानी
काहुहि दोसु देहु जनि ताता । भा मोहि सब विधि बाम विधाता
जो एतेहुँ दुख मोहि जिआवा । अजहुँ को जानइ कातेहि भावा ॥

दो०—पितु आयस भूषन बसन तात तजे रघुबीर ।

बिसमउ हरषु न हृदयँ कछु पहिरे बलकल चीर ॥१६५॥

मुख प्रसन्न मन रंग न रोषू । सब कर सब विधि करि परितोषू ॥
चले बिपिन सुनि सिय सँग लागी । रहइ न राम चरन अनुरागी ॥
सुनतहिँ लखनु चले उठि साथा । रहहिँ न जतन किए रघुनाथा ॥
तब रघुपति सबझी सिरु नाई । चले संग सिय अरु लघु भाई ॥
रामुलखनु मिय बनहि सिधाए । गइउँ न संग न प्रान पठाए ॥
यहु सबु भा इन्ह आँखिन्ह आगें । तउ न तजातनु जीव अभागें ॥
मोहि न लाज निज नेहु निहारी । राम सरिस सुत मैं महतारी ॥
जिए मरै भल भूपति जाना । मोर हृदय सत कुलिस समाना ॥

दो०—कौसल्या के बचन सुनि भरत सहित रनिवास ।

ब्याकुल बिलपत राजगृह मानहुँ सोक नेवासु ॥१६६॥

बिलपहि बिकल भरत दोउ भाई । कौसल्याँ लिए हृदयँ लगाई ॥
भाँति अनेक भरत समुझाए । कहि बिबेकमय बचन सुनाए ॥
भरतहुँ मातु सकल समुझाई । कहि पुरान श्रुति कथा सुहाई ॥
छल बिहीन सुचि सरल सुबानी । बोले भरत जोरि जुग पानी ॥
जे अघ मातु पिता सुत मारें । गाइ गोठ मडिसुर पुर जारें ॥
जे अघ तिय बालक बध कीन्हें । मीत महीपति माहुर दीन्हें ॥
जे पातक उपपातक अहहीं । करम बचन मन भव कबि कहहीं ॥
ते पातक मोहि होहुँ बिधाता । जौँ यहु होइ मोर मत माता ॥

दो०—जे परिहरि हरि हर चरन भजहिं भूतगन घोर ।

तेहि कइ गति मोहि देउ विधि जौँ जननी मत मोर ॥१६७॥

बेचहिं बेदु धरमु दुहि लेहीं । पिसुन पराय पाप कहि देहीं ॥
कपटी कुटिल कलहप्रिय क्रोधी । बेद बिदूषक बिस्व बिरोधी ॥
लोभी लंपट लोलुपचारा । जे ताकहिं परधनु परदारा ॥
पावौंमें तिन्ह कै गति घोरा । जौँ जननी यहु संमत मोरा ॥
जे नहिं साधुसंग अनुरागे । परमारथ पथ बिमुख अभागे ॥
जे न भजहिं हरि नरतनु पाई । जिन्हहि न हरिहर सुजसु सोहाई
तजि श्रुतिपंथु बाम पथ चलहीं । बंचक बिरचि बेष जगु छलहीं ॥
तिन्ह कै गति मोहि संकर देऊ । जननी जौँ यहु जानौं भेऊ ॥

दो०—मातु भरत के बचन सुनि साँचे सरल सुभायँ ।

कहति राम प्रिय तात तुम्ह सदा बचन मन कायँ ॥१६८॥

राम प्रानहु तें प्रान तुम्हारे । तुम्ह रघुपतिहि प्रानहु तें प्यारे ॥
बिघु बिष चवै सबै हिम आगी । होइ बारिचर बारि बिरागी ॥

भएँ ग्यानु बरु मिटै न मोहू । तुम्ह रामहि प्रतिकूल न होहू ॥
 मत तुम्हार यहु जो जग कहहीं । सो सपनेहुँ सुख सुगति न लहहीं
 अस कहि मातु भरतु हियँ लाए । थन पय स्रवहि नयन जल छाए ॥
 करत बिलाप बहुत यहि भाँती । बैठेहि बीति गई सब राती ॥
 बामदेउ बसिष्ठ तब आए । सचिव महाजन सकल बोलाए ॥
 मुनि बहु भाँति भरत उपदेसे । कहि परमारथ बचन सुदंसे ॥

दो०—तात हृदयँ धीरजु धरहु करहु जो अवसर आजु ।

उठे भरत गुर बचन सुनि करन कहेउ सबु साजु ॥ १६९ ॥

नृपतनु बेद विदित अन्हवावा । परम विचित्र विमानु बनावा ॥
 गहि पद भरत मातु सब राखी । रहीं रानि दरसन अभिलाषी ॥
 चंदन अगर भार बहु आए । अमित अनेक सुगंध सुहाए ॥
 सगजु तीर रचि चिता बनाई जनु सुरपुर सोपान सुहाई ॥
 एहि विधि दाह क्रिया सब कीन्हा । विधिवत न्हाइ तिलांजुलि दीन्ही
 सोधि सुमृति सब बेद पुराना । कीन्ह भरत दसगात विधाना ॥
 जहँ त्रम मुनिबर आयसु दीन्हा । तहँ तम सहस भाँति सबु कीन्हा
 भए विमुद्र दिए सब दाना । धेनु बाजि गज बाहन नाना ॥

दो०—सिंघासन भूपन बसन अब धरनि धन धाम ।

दिए भरत लहि भूमिसुर मे परिपूरन काम ॥ १७० ॥

पितु द्वित भरत कीन्ह जसि करनी । सां मुख लाख जाइ नहिं बरनी
 सुदिनु माधि मुनिबर तब आए । सचिव महाजन सकल बोलाए ॥
 बैठे गजसभाँ सब जाई । पठए बोलि भरत दोउ भाई ॥
 भरतु बसिष्ठ निकट बैठारे । नीति धरममय बचन उचारे ॥

प्रथम कथा सब मुनिवर बरनी । कैकई कुटिल कीन्हि जसि करनी
भूप धरमव्रतु सत्य सराहा । जेहिं तनु परिहरि प्रेमु निवाहा ॥
कहत राम गुन सील सुभाऊ । सजल नयन पुलकेउ मुनिराऊ ॥
बहुरि लखन सिय प्रीति बखानी । सोक सनेह मगन मुनि ग्यानी

दो०—सुनहु भरत भावी प्रबल बिलखि कहेउ मुनिनाथ ।

हानि लाभु जीवनु मरनु जसु अपजसु विधि हाथ ॥१७१॥

अस बिचारि केहि देइअ दोस । ब्यरथ काहि परकीजिअ रोस ॥
तात बिचारु करहु मन माहीं । सोच जोगु दसरथु नृपु नाहीं ॥
सोचिअ बिप्र जो बेद बिहीना । तजि निज धरमु बिषय लयलीना
सोचिअ नृपति जो नीति न जाना । जेहि न प्रजा प्रिय प्रान समाना
सोचिअ बयसु कृपन धनवानू । जा न अतिथि सिव भगति सुजानू
सोचिअ सुदु बिप्र अवमानी । मुखर मानप्रिय ग्यान गुमानी ॥
सोचिअ पुनि पति बंचक नारी । कुटिल कलहप्रिय इच्छाचारी ॥
सोचिअ बटु निज व्रतु परिहरई । जो नहिं गुर आयसु अनुसरई ॥

दो०—सोचिअ गृही जो मोहबस करइ करम पथ त्याग ।

सोचिअ जती प्रपंच रत बिगत बिबेक बिराग ॥१७२॥

बैखानम सोइ सोचै जोगू । तपु बिहाइ जेहि भावइ भोगू ॥
सोचिअ पिसुन अकारन क्रोधी । जननि जनक गुर बंधु विरोधी ॥
सब बिधि सोचिअ पर अपकारी । निज तनु पोषक निगदय भारी ॥
सोचनीय सबहीं बिधि साई । जो न छाड़ि छलु हरि जन होई ॥
सोचनीय नहिं कोमलराऊ । भुवन चारिदस प्रगट प्रभाऊ ॥
भयउ न अहइ न अब हानिहारा । भूप भरत जस पिता तुम्हारा ॥

बिधि हरि हरु सुरपति दिसिनाथा । बरनहिं सब दसरथ गुन गाथा ॥

दो०—कहहु तात केहि भौंति कोउ करिहि बड़ाई तासु ।

राम लखन तुम्ह सत्रुहन सरिस सुअन सुचि जासु ॥१७३॥

सब प्रकार भूपति बड़भागी । बादि बिषादु करिअ तेहि लागी ॥
 यहु सुनि समुझि सोचु परिहरहू । सिर धरि राज रजायसु करहू ॥
 रायँ राजपदु तुम्ह कहँ दीन्हा । पिता बचनु फुर चाहिअ कीन्हा ॥
 तजेरामु जेहि बचनहि लागी । तनु परिहरेउ राम बिरहागी ॥
 नृपहि बचन प्रिय नहिं प्रिय प्राना । करहु तात पितु बचन प्रवाना
 करहु सीस धरि भूप रजाई । हइ तुम्ह कहँ सब भौंति भलाई ॥
 परसुराम पितु अग्या राखी । मारी मातु लोक सब साखी ॥
 तनय जजातिहि जौबनु दयऊ । पितु अग्याँ अघ अजसु न भयऊ ॥

दो०—अनुचित उचित विचारु तजि जे पालहिं पितु बैन ।

ते भाजन सुख सुजस के बसहिं अमरपति ऐन ॥१७४॥

अवसि नरेस बचन फुर करहू । पालहु प्रजा सोकु परिहरहू ॥
 सुरपुर नृपु पाइहि परितोषू । तुम्ह कहँ सुकृत सुजसु नहिं दोषू
 बेद विदित संमत सबही का । जेहि पितु देइ सो पावइ टीका ॥
 करहु राजु परिहरहु गलानी । मानहु मोर बचन हित जानी ॥
 सुनि सुखु लहब राम बैदेहीं । अनुचित कहब न पंडित केहीं ॥
 कौसल्यादि सकल महतारीं । तेउ प्रजा सुख होहिं सुखारीं ॥
 परम तुम्हार राम कर जानिहि । सो सब बिधि तुम्ह सन भल मानिहि
 सौपेहु राजु राम के आएँ । सेवा करेहु सनेह सुहाएँ ॥

दो०—कीजिअ गुर आयसु अवसि कहहि सचिव कर जोरि ।

रघुपति आएँ उचित जस तस तब करब बहोरि ॥ १७५ ॥

कौसल्या धरि धीरजु कहई । पूत पथ्य गुर आयसु अहई ॥
सो आदरिअ करिअ हित मानी । तजिअ बिषादु काल गति जानी ॥
बन रघुपति सुरपति नरनाहू । तुम्ह एहि भाँति तात कदराहू ॥
परिजन प्रजा सचिव सब अंबा । तुम्हही सुत सब कहँ अवलंबा ॥
लखि बिधि बाम कालु कठिनाई । धीरजु धरहु मातु बलि जाई ॥
सिर धरि गुर आयसु अनुसरहू । प्रजा पालि परिजन दुखु हरहू ॥
गुर के बचन सचिव अभिनंदनु । सुने भरत हिय हित जनु चंदनु ॥
सुनी बहोरि मातु मृदु बानी । सील सनेह सरल रस सानी ॥

छं०—सानी सरल रस मातु बानी सुनि भरतु व्याकुल भए ।

लोचन सरोरुह स्रवत सींचत बिरह उर अंकुर नए ॥

सो दसा देखत समय तेहि विसरी सबहि सुधि देह की ।

तुलसी सराहत सकल सादर सीवँ सहज सनेह की ॥

सो०—भरतु कमल कर जोरि धीर धुरंधर धीर धरि ।

बचन अमिअँ जनु बोरि देत उचित उत्तर सबहि ॥ १७६ ॥

मासपारायण, अठारहवाँ विश्राम

मोहि उपदेसु दीन्ह गुर नीका । प्रजा सचिव संमत सबही का ॥
मातु उचित धरि आयसु दीन्हा । अवसि सीस धरि चाहउँ कीन्हा ॥
गुर पितु मातु स्वामि हित बानी । सुनि मन मुदित करिअ भलि जानी
उचित कि अनुचित किऐँ बिचारू । धरमु जाइ सिर पातक भारू ॥
तुम्ह तौ देहु सरल सिख सोई । जो आचरत मोर भल होई ॥

जद्यपि यह समुझत हउँ नीकें । तदपि होत परितोषु न जीकें ॥
अब तुम्ह बिनय मोरि सुनि लेहू । मोहि अनुहरत सिखावनु देहू ॥
ऊतरु देउँ छमच अपराधू । दुखित दोष गुन गनहिं न साधू ॥

दो०—पितु सुरपुर सिय रामु बन करन कहहु मोहि राजु ।

एहि तें जानहु मोर हित कै आपन बड़ काजु ॥ १७७ ॥

हित हमार सियपति सेवकाई । सो हरि लीन्ह मातु कुटिलाई ॥
मैं अनुमानि दीख मन माहीं । आन उपायँ मोर हित नाहीं ॥
सोक समाजु गजु केहि लेखें । लखन राम सिय बिनु पद देखें ॥
बादि बसन बिनु भूषन भारू । बादि बिरति बिनु ब्रह्मबिचारू ॥
सरुज सगीर बादि बहु भोगा । बिनु हरि भगति जायँ जप जोगा ॥
जायँ जीव बिनु देह सुहाई । बादि मोर सबु बिनु रघुगई ॥
जाउँ राम पहिँ आयसु देहू । एकहिँ आँक मोर हित एहू ॥
मोहि नृप करि भल आपन चहहू । सोउ सनेह जड़ता बस कहहू ॥

दो०—कैकेई सुअ कुटिलमति राम विमुख गतलाज ।

तुम्ह चाहत सुखु मोहबस मोहि से अधम कें राज ॥ १७८ ॥

कहउँ साँचु सब सुनि पतिआहू । चाहिअ धरमसील नरनाहू ॥
मोहि राजु हठि देखहु जवहीं । रसा रमातल जाइहि तबहीं ॥
माहि समान को पापनिवासू । जेहि लगि सीय राम बनबासू ॥
रायँ राम कहूँ काननु दीन्हा । बिछुगत गमनु अमरपुर कीन्हा ॥
मैं सठु सब अनरथ कर हेतू । बैठ बात सब सुनउँ सचेतू ॥
बिनु रघुबीर बिलोकि अबासू । रहे प्रान सहि जग उपहासू ॥
राम पुनीत विषय रस रूखे । लोलुप भूमि भोग के भूखे ॥

कहँ लगि कहौँ हृदय कठिनाई । निदरि कुलिसु जेहिँ लही बड़ाई ॥

दो०—कारन तें कारजु कठिन होइ दोसु नहिँ मोर ।

कुलिस अस्थि तें उपल तें लोह कराल कठोर ॥ १७९ ॥

कैकई भव तनु अनुरागे । पावँर प्राण अघाइ अभागे ॥
जौँ प्रिय बिरहँ प्राण प्रिय लागे । देखव सुनव बहुत अब आगे ॥
लखन राम सिय कहँ बनु दीन्हा । पठइ अमरपुर पति हित कीन्हा
लीन्ह बिधवपन अपजसु आपू । दीन्हेउ प्रजहि सोकु संतापू ॥
मोहि दीन्ह सुख सुजसु सुराजू । कीन्ह कैकई सब कर काजू ॥
एहि तें मोर काह अब नीका । तेहि पर देन कहहु तुम्ह टीका ॥
कैकई जठर जनमि जग माहीं । यह मोहि कहँ कछु अनुचित नाहीं
मोरि बात सब बिधिहिँ बनाई । प्रजा पाँच कत करहु सहाई ॥

दो०—ग्रह ग्रहीत पुनि बात बस तेहि पुनि बीछी मार ।

तेहि पिआइअ बारुनी कहहु काह उपचार ॥ १८० ॥

कैकई सुअन जोगु जग जोई । चतुर बिरंचि दीन्ह मोहि सोई ॥
दसरथ तनय राम लघु भाई । दीन्ह मोहि बिधिबादि बड़ाई ॥
तुम्ह सब कहहु कढ़ावन टीका । राय रजायसु सब कहँ नीका ॥
उतरु देउँ केहि बिधि केहि केही । कहहु सुखेन जथा रुचि जेही ॥
मोहि कुमातु समेत बिहाई । कहहु कहिहि के कीन्ह भलाई ॥
मो बिनु को सचराचर माहीं । जेहि सिय रामु प्राणप्रिय नाहीं ॥
परम हानि सब कहँ बड़ लाहू । अदिनु मोर नहिँ दूषन काहू ॥
संसय सील प्रेम बस अहहू । सबुइ उचित सब जो कछु कहहु ॥

दो०—राम मातु सुठि सरलचित मो पर प्रेमु बिसेषि ।

कहइ सुभाय सनेह बस मोरि दीनता देखि ॥ १८१ ॥

गुर बिबेक सागर जगु जाना । जिन्हहि बिख करबदर समाना ॥
मो कहँ तिलक साज सज सोऊ । भएँ बिधि बिमुख बिमुख सबु कोऊ
परिहरि रामु सीय जग माहीं । कोउन कहिहि मोर मत नाहीं ॥
सो मैं सुनब सहब सुखु मानी । अंतहुँ कीच तहाँ जहँ पानी ॥
डरुन मोहि जग कहिहि कि पोचू । परलोकहु कर नाहिन सोचू ॥
एकइ उर बस दुसह दवारी । मोहि लगि भे सिय रामु दुखारी ॥
जीवन लाहु लखन भल पावा । सबु तजि राम चरन मनु लावा ॥
मोर जनम रघुबर बन लागी । झूठ काह पछिताउँ अभागी ॥

दो०—आपनि दारुन दीनता कहउँ सबहि सिरु नाइ ।

देखे बिनु रघुनाथ पद जिय कै जरनि न जाइ ॥ १८२ ॥

आन उपाउ मोहि नहिं सूझा । को जिय कै रघुबर बिनु बूझा ॥
एकहिं आँक इहइ मन माहीं । प्रातकाल चलिहउँ प्रभु पाहीं ॥
जद्यपि मैं अनभल अपराधी । भै मोहि कारन सकल उपाधी ॥
तदपि सरन सन्मुख मोहि देखी । छमि सब करिहहिं कृपा बिसेषी ॥
सील सकुच सुठि सरल सुभाऊ । कृपा सनेह सदन रघुराऊ ॥
अग्रिहुक अनभल कीन्ह न रामा । मैं सिसु सेवक जद्यपि बामा ॥
तुम्ह पै पाँच मोर भल मानी । आयसु आसिष देहु सुबानी ॥
जेहिं सुनि बिनय मोहि जनु जानी । आवहिं बहुरि रामुर जधानी ॥

दो०—जद्यपि जनमु कुमातु तैं मैं सतु सदा सदोस ।

आपन जानि न त्यागिहहिं मोहि रघुबीर भरोस ॥ १८३ ॥

भरत बचन सब कहँ प्रिय लागे । राम सनेह सुधाँ जनु पागे ॥
लोग बियोग बिषम बिष दागे । मंत्र सबीज सुनत जनु जागे ॥
मातु सचिव गुर पुर नर नारी । सकल सनेहँ बिकल भए भारी ॥
भरतहि कहहिं सराहि सराही । राम प्रेम मूरति तनु आही ॥
तात भरत अस काहे न कहहू । प्रान समान राम प्रिय अहहू ॥
जो पावँरु अपनी जड़ताई । तुम्हहि सुगाइ मातु कुटिलाई ॥
सो सठु कोटिक पुरुष समेता । बसिहि कलप सत नरक निकेता ॥
अहि अघ अवगुन नहिं मनि गहई । हरइ गरल दुख दारिद दहई ॥

दो०—अवसि चलिअ वन रामु जहँ भरत मंत्रु भल कीन्ह ।

सोक सिंधु बूडत सबहि तुम्ह अवलंबनु दीन्ह ॥१८४॥

भा सब कें मन मोदु न थोरा । जनु घन युनि सुनि चातक मोरा ॥
चलत प्रात लख निरनउ नीके । भरतु प्रानप्रिय भे सबही के ॥
मुनिहि बंदि भरतहि सिरु नाई । चले सकल घर बिदा कराई ॥
धन्य भरत जीवनु जग माहीं । सीलु सनेहु सराहत जाहीं ॥
कहहिं परसपर भा बड़ काजू । सकल चलै कर साजहिं साजू ॥
जेहि राखहिं रहू घर रखवारी । सो जानइ जनु गरदनि मारी ॥
कोउ कह रहन कहिअ नहिं काहू । को न चढ़इ जग जीवन लाहू ॥

दो०—जरउ सो संपति सदन सुख सुहृद मातु पितु भाइ ।

सनमुख होत जो राम पद करै न सहस सहाइ ॥१८५॥

घर घर साजहिं बाहन नाना । हरषु हृदयँ परभात पयाना ॥
भरत जाइ घर कीन्ह बिचारू । नगरु बाजि गज भवन भँडारू ॥
संपति सब रघुपति कै आही । जौं बिनु जतन चलौं तजि ताही ॥

तौ परिनाम न मोरि भलाई । पाप सिरोमनि साईं दोहाई ॥
 करइ स्वामि हित सेवकु सोई । दूषन कोटि देइ किन कोई ॥
 अस विचारि सुचि सेवक बोले । जे सपनेहुँ निज धरम न डोले ॥
 कहि सबु मरमु धरमु भल भाषा । जो जेहिलायक सो तेहिं राखा ॥
 करि सबु जतनु राखि रखवारे । राम मातु पहिं भरतु सिधारे ॥
 दो०—आरत जननी जानि सब भरत सनेह सुजान ।

कहेउ वनावन पालकीं सजन सुखासन जान ॥१८६॥

चक्र चक्रि जिमि पुरनर नारी । चहत प्रात उर आरत भारी ॥
 जागत सब निसि भयउ बिहाना । भरत बालाए सचिव सुजाना ॥
 कहेउ लेहु सबु तिलक समाजू । बनहिं देव मुनि रामहि राजू ॥
 बेगि चलहु मुनि सचिव जोहारे । तुरत तुरग रथ नाग सँवारे ॥
 अरुंधती अरु अगिनि समाऊ । रथ चढ़ि चले प्रथम मुनिराऊ ॥
 बिप्र बृंद चढ़ि बाहन नाना । चले सकल तप तेज निधाना ॥
 नगर लोग सब सजि सजि जाना । चित्रकूट कहँ कीन्ह पयाना ॥
 सिबिका सुभगन जाहिं बखानी । चढ़ि चढ़ि चलत भई सब रानी ॥
 दो०—सौंपि नगर सुचि सेवकनि सादर सकल चलाइ ।

मुमिरि राम सिय चरन तव चले भरत दोउ भाइ ॥१८७॥

राम दरस बस सब नर नारी । जनु करि करिनि चले तकि बारी
 बन सिय रामु समुझि मन माहीं । सानुज भरत पयादेहिं जाहीं ॥
 देखि मनेहु लोग अनुरागे । उतरि चले हय गय रथ त्यागे ॥
 जाइ समीप राखि निज डोली । राम मातु मृदु बानी बोली ॥
 तात चढ़हु रथ बलि महतारी । होइहि प्रिय परिवारु दुखारी ॥

तुम्हरेँ चलत चलिहि सबु लोगू । सकल सोक कृस नहिँ मग जोगू
सिर धरि बचन चरन सिरु नाई । रथ चढ़ि चलत भए दोउ भाई ॥
तमसा प्रथम दिवस करि बास । दूसर गोमति तीर निवास ॥

दो०—पय अहार फल असन एक निसि भोजन एक लोग ।

करत राम हित नेम व्रत परिहरि भूपन भोग ॥१८८॥

सई तीर बसि चले विहाने । सुंगबेरपुर सब निअराने ॥
समाचार सब सुने निषादा । हृदयँ विचार करइ सविषादा ॥
कारन कवन भरतु बन जाहीं । है कलु कपट भाउ मन माहीं ॥
जौँ पै जियँ न होति कुटिलाई । तौ कत लीन्ह संग कटकाई ॥
जानहिँ सानुज रामहि मारी । करउँ अकंटक राजु सुखारी ॥
भरत न राजनीति उर आनी । तब कलंकु अब जीवन हानी ॥
सकल सुरासुर जुरहिँ जुझारा । रामहि समर न जीतनिहारा ॥
का आचरजु भरतु अस करहीं । नहिँ विष बेलि अमिअ फल फरहीं ॥

दो०—अस विचारि गुहँ ग्याति सन कहेउ सजग सब होहु ।

हथवाँसहु चोरहु तरनि कीजिअ घाटारोहु ॥१८९॥

होहु सँजोइल रोकहु घाटा । ठाटहु सकल मरै के ठाटा ॥
सनमुख लोह भरत सन लेऊँ । जिअत न सुरसरि उत्तरन देऊँ ॥
समर मरनु पुनि सुरसरि तीरा । राम काजु छनभंगु सरीरा ॥
भरत भाइ नृपु मै जन नीचू । बड़ें भाग असि पाइअ मीचू ॥
स्वामि काज करिहउँ रन रारी । जस धवलिहउँ भुवन दस चारी ॥
तजउँ प्रान रघुनाथ निहोरें । दुहँ हाथ मुद मोदक मोरें ॥
साधु समाज न जाकर लेखा । राम भगत महुँ जासुन रेखा ॥

जायँ ज़िअत जग सो महि भारू । जननी जौवन बिटप कुठारू ॥

दो०—बिगत विषाद निषादपति सबहि बड़ाइ उछाहु ।

सुमिरि राम मागेउ तुरत तरकस धनुष सनाहु ॥१९०॥

बेगहु भाइहु सजहु सँजोऊ । सुनि रजाइ कदराइन कोऊ ॥
भलेहिं नाथ सब कहहिं सहरषा । एकहिं एक बढ़ावइ करषा ॥
चले निषाद जोहारि जोहारी । सूर सकल रन रूचइ रारी ॥
सुमिरि रामपद पंकज पनहीं । भार्थी बाँधि चढ़ाइन्हि धनहीं ॥
अँगरी पहिरि कूँड़ि सिर धरहीं । फरसा बाँस सेल सम करहीं ॥
एक कुसल अति ओढ़न खाँड़े । कूदहिं गगन मनहुँ छिति छाँड़े ॥
निज निज साजु समाजु बनाई । गुह राउतहि जोहारे जाई ॥
देखि सुभट सब लायक जाने । लै लै नाम सकल सनमाने ॥

दो०—भाइहु लावहु धोख जनि आजु काज वड़ मोहि ।

सुनि सरांप बोले सुभट वीर अधीर न होहि ॥१९१॥

राम प्रताप नाथ बल तोरे । करहिं कटकु विनु भट विनु घोरे ॥
जीवत पाउ नै पाछें धरहीं । रुंड मुंडमय मेदिनि करहीं ॥
दीख निषादनाथ भल टोल् । कहेउ बजाउ जुझाऊ ढोल् ॥
एतना कहत छींक भइ बाँए । कहेउ सगुनिअन्ह खेत सुहाए ॥
बूढ़ु एकु कह सगुन बिचारी । भरतहि मिलिअ न होइहि रारी ॥
रामहि भग्तु मनावन जाहीं । सगुन कहइ अस बिग्रहु नाहीं ॥
सुनि गुह कहइ नीक कह बूढ़ा । सहसा करि पछिताहिं बिमूढ़ा ॥
भरत सुभाउँ सीलु बिनु बूझें । बड़ि हित हानि जानि बिनु जूझें ॥

दो०—गहहु घाट भट समिटि सब लेउँ मरम मिलि जाइ ।

बूझि मित्र अरि मध्य गति तस तब करिहउँ आइ ॥१९२॥

लखब सनेहु सुभायँ सुहाएँ । बैरु प्रीति नहिं दुरईं दुराएँ ॥
अस कहि भेंट सँजोवन लागे । कंद मूल फल खग मृग मागे ॥
मीन पीन पाठीन पुराने । भरिभरि भार कहारन्ह आने ॥
मिलन साजु सजि मिलन सिधाए । मंगल मूल सगुन सुभ पाए ॥
देखि दूरि तें कहि निज नामू । कीन्ह मुनीसहि दंड प्रनामू ॥
जानि रामप्रिय दीन्हि असीसा । भरतहि कहेउ बुझाइ मुनीसा ॥
राम सखा सुनि संदनु त्यागा । चले उतरि उमगत अनुरागा ॥
गाउँ जाति गुहँ नाउँ सुनाई । कीन्ह जोहारु माथ महि लाई ॥

दो०—करत दंडवत देखि तेहि भरत लीन्ह उर लाइ ।

मनहुँ लखन सन भेंट भइ प्रेमु न हृदयँ समाइ ॥१९३॥

भेंटत भरतु ताहि अति प्रीती । लोग सिहाहिं प्रेम कै रीती ॥
धन्य धन्य धुनि मंगल मूला । सुरसराहि तेहि बरिसहिं फूला ॥
लोक बेद सब भाँतिहिं नीचा । जासु छाँह छुइ लेइअ सींचा ॥
तेहि भरि अंक राम लघु भ्राता । मिलत पुलक परिपूरित गाता ॥
राम राम कहि जे जमुहाहीं । तिन्हहिन पाप पुंज समुहाहीं ॥
यह तौ राम लाइ उर लीन्हा । कुल समेत जगु पावन कीन्हा ॥
करमनास जल सुरसरि परई । तेहि को कहहु सीस नहिं धरई ॥
उलटा नामु जपत जगु जाना । बालमीकि भए ब्रह्म समाना ॥

दो०—स्वयच सबर खस जमन जड़ पावँर कोल किरात ।

रामु कहत पावन परम होत भुवन बिख्यात ॥१९४॥

नहिं अचिरिजु जुग जुग चलि आई । केहि न दीन्हि रघुबीर बड़ाई ॥
 राम नाम महिमा सुर कहहीं । सुनि सुनि अवध लोग सुख लहहीं ॥
 रामसखहि मिलि भरत सप्रेमा । पूँछी कुसल सुमंगल खेमा ॥
 देखि भरत कर सीलु सनेहू । भा निषाद तेहि समय बिदेहू ॥
 सकुच सनेहु मोदु मन बाढ़ा । भरतहि चितवत एकटक ठाढ़ा ॥
 धरि धीरजु पद बंदि बहोरी । बिनय सप्रेम करत कर जोरी ॥
 कुसल मूल पद पंकज पेखी । मै तिहुँ काल कुसल निज लेखी ॥
 अब प्रभु परम अनुग्रह तोरें । सहित कोटि कुल मंगल मोरें ॥
 दो०—समुझि मोरि करतूति कुलु प्रभु महिमा जियँ जोइ ।

जो न भजइ रघुबीर पद जग बिधि बंचित सोइ ॥१९५॥
 कपटी कायर कुमति कुजाती । लोक बेद बाहेर सब भाँती ॥
 राप कीन्ह आपन जवही तें । भयउँ भुवन भूपन तबही तें ॥
 देखि प्रीति सुनि बिनय सुहाई । मिलेउ बहोरि भरत लघु भाई ॥
 कहि निषाद निज नाम सुबानी । सादर सकल जोहारि रानी ॥
 जानि लखन सम देहिं असीसा । जिअहु सुखी सय लाख बरीसा ॥
 निरखि निषादु नगर नर नारी । भए सुखी जनु लखनु निहारी ॥
 कहहिं लहेउ एहिं जीवन लाहू । भेंटै रामभद्र भरि बाहू ॥
 सुनि निषादु निज भाग बड़ाई । प्रमुदित मन लइ चलेउ लेवाई ॥
 दो०—सनकारे सेवक सकल चले स्वामि रुख पाइ ।

घर तरु तर सर बाग बन बास बनाएन्हि जाइ ॥१९६॥
 सुंगबेरपुर भरत दीख जब । भे सनेहँ सब अंग सिथिल तब ॥
 सोहत दिहँ निषादहि लागू । जनु तनु धरें बिनय अनुरागू ॥

एहि विधि भरत सेनु सबुसंगा । दीखि जाइ जग पावनि गंगा॥
 रामघाट कहँ कीन्ह प्रनामू । भा मनु मगनु मिलेजनु रामू॥
 करहिं प्रनाम नगर नर नारी । मुदित ब्रह्ममय बारि निहारी ॥
 करि मज्जनु मागहिं कर जोरी । रामचंद्र पद प्रीति न थोरी ॥
 भरत कहेउ सुरसरि तव रेनू । सकल सुखद सेवक सुरधेनू ॥
 जोरि पानि बर मागउँ एहू । सीय राम पद सहज सनेहू ॥
 दो०—एहि विधि मज्जनु भरतु करि गुर अनुसासन पाइ ।

मातु नहानी जानि सब डेरा चले लवाइ ॥१९७॥
 जहँ तहँ लोगन्ह डेरा कीन्हा । भरत सोधु सबही कर लीन्हा॥
 सुर सेवा करि आयसु पाई । राम मातु पहिं गे दोउ भाई॥
 चरन चाँपि कहि कहि मृदु बानी । जननी सकल भरत सनमानी ॥
 भाइहि सौँपि मातु सेवकाई । आपु निषादहि लीन्ह बोलाई॥
 चले सखा कर सों कर जोरें । सिथिल मरीरु सनेह न थोरें ॥
 पूछत सखहि सो ठाउँ देखाऊ । नेकु नयन मन जरनि जुड़ाऊ॥
 जहँसिय रामु लखनु निसि सोए । कहत भरे जल लोचन कोए॥
 भरत बचन सुनि भयउ बिषादू । तुरत तहाँ लइ गयउ निषादू॥
 दो०—जहँ सिंसुपा पुनीत तर रघुवर किय विश्रामु ।

अति सनेहँ सादर भरत कीन्हेउ दंड प्रनाम ॥१९८॥
 कुस साँथरी निहारि सुहाई । कीन्ह प्रनाम प्रदच्छिन जाई॥
 चरन रेख रज आँखिन्ह लाई । वनइन कहत प्रीति अधिकाई॥
 कनक बिंदु दुइ चारिक देखे । राखे सीस सीय सम लेखे ॥
 सजल बिलोचन हृदयँ गलानी । कहत सखा सन बचन सुबानी॥

श्रीहत सीय बिरहँ दुतिहीना । जथा अवध नर नारि बिलीना॥
 पिता जनक देउँ पटतर केही । करतल भोगु जोगु जग जेही॥
 समुर भानुकुल भानु भुआलू । जेहि मिहात अमरावति पालू॥
 प्राननाथु रघुनाथ गोसाई । जो बड़ होत सो राम बड़ाई ॥

दो०—पति देवता सुतीय मनि सीय साँथरी देखि ।

विहरत हृदउ न हहरि हर पवि तें कठिन बिसेषि ॥१९९॥
 लालन जोगु ललन लघु लोने । मे न भाइ अस अहहि नहोने॥
 पुरजन प्रिय पितु मातु दुलारे । सिय रघुबीरहि प्रानपिआरे ॥
 मृदू मूरति सुकुमार सुभाऊ । तात बाउ तन लाग न काऊ ॥
 ते बन सहहि बिपति सब भाँती । निदरे कोटि कुलिस एहिं छाती॥
 राम जनमि जगु कीन्ह उजागर । रूप सील सुख सब गुन सागर॥
 पुरजन परिजन गुर पितु माता । राम सुभाउ सबहि सुखदाता ॥
 बैरिउ राम बड़ाई करहीं । बोलनि मिलनि बिनय मन हरहीं॥
 सारद कोटि कोटि सत सेवा । करि न सकहिं प्रभु गुन गन लेखा

दो०—सुखस्वरूप रघुवंसमनि मंगल मोद निधान ।

ते सोवत कुम डसि महि बिधि गति अति बलवान ॥२००॥

राम सुना दुखु कान न काऊ । जीवन तरु जिमि जोगवइ राऊ॥
 पलक नयन फनि मनि जेहि भाँती । जोगवहिं जननि सकल दिन राती॥
 ते अव फिरत बिपिन पद चारी । कंद मूल फल फूल अहारी ॥
 धिग कैरई अमंगल मूला । भइसि प्रान प्रियतम प्रतिकूला॥
 मै धिग धिग अब उदधि अभागी । सबु उतपातु भयउ जेहि लागी॥
 कुल कलंकु करि सृजेउ बिधाताँ । साई दोह मोहि कीन्ह कुमाताँ ॥

सुनि सप्रेम समुझाव निषाद । नाथ करिअ कत बादि बिषाद ॥
राम तुम्हहि प्रिय तुम्ह प्रिय रामहि । यह निरजोसु दोसु बिधि बामहि

छं०—बिधि बाम की करनी कठिन जेहिं मातु कीन्ही बावरी ।

तेहि राति पुनि पुनि करहिं प्रभु सादर सरहना रावरी ॥

तुलसी न तुम्ह सो राम प्रीतमु कहतु हौं सौहैं किं ॥

परिनाम मंगल जानि अपने आनिए धीरजु हिं ॥

सो०—अंतरजामी रामु सकुच सप्रेम कृपायतन ।

चलिअ करिअ विश्रामु यह विचारि दृढ़ आनि मन ॥ २०१ ॥

सखा बचन सुनि उर धरि धीरा । बास चले सुमिरत रघुबीरा ॥

यह सुधि पाइ नगर नर नारी । चले बिलोकन आरत भारी ॥

परदखिना करि करहिं प्रनामा । देहिं कैकइहि खोरि निकामा ॥

भरि भरि बारि बिलोचन लेहीं । बाम बिधातहि दूषन देहीं ॥

एक सराहहिं भरत सनेहू । कोउ कह नृपति निबाहेउ नेहू ॥

निंदहिं आपु सराहि निषादहि । को कहि सकइ बिमोह बिषादहि ॥

एहि बिधि राति लोगु सबु जागा । भा भिनुसार गुदारा लागा ॥

गुरहि सुनावैं चढ़ाइ सुहाई । नई नाव सब मातु चढ़ाई ॥

दंड चारि महँ भा सबु पारा । उतरि भरत तब सबहि सँभारा ॥

दो०—प्रातक्रिया करि मातु पद बंदि गुरहि सिरु नाइ ।

आगें किए निषाद गन दीन्हेउ कटकु चलाइ ॥ २०२ ॥

क्रियउ निषादनाथु अगुआई । मातु पालकीं सकल चलाई ॥

साथ बोलाइ भाइ लघु दीन्हा । बिप्रन्ह सहित गवनु गुर कीन्हा ॥

आपु सुरसरिहि कीन्ह प्रनामू । सुमिरे लखन सहित सिय रामू ॥

गवने भरत पयादेहिं पाए । कोतल संग जाहिं डोरिआए ॥
 कहहिं सुसेवक बारहिं बारा । होइअ नाथ अख असवारा ॥
 रामु पयादेहि पायँ सिधाए । हम कहँरथ गज बाजि बनाए ॥
 सिर भर जाउँ उचित अस मोरा । सब तें सेवक धरमु कठोरा ॥
 देखि भरत गति सुनि मृदु बानी । सब सेवक गन गरहिं गलानी ॥

दो०—भरत तीसरे पहर कहँ कीन्ह प्रवेसु प्रयाग ।

कहत राम सिय राम सिय उमगि उमगि अनुराग ॥ २०३ ॥

झलका झलकत पायन्ह कैसें । पंकज कोस ओस कन जैसें ॥
 भरत पयादेहिं आए आजू । भयउ दुखित सुनि सकल समाजू ॥
 खबरि लीन्ह सब लोग नहाए । कीन्ह प्रनामु त्रिवेनिहि आए ॥
 सबिधि मितासित नीर नहाने । दिए दान महिसुर सनमाने ॥
 देखत स्यामल धवल हलोरे । पुलकि मरीर भरत कर जोरे ॥
 सकल काम प्रद तीरथराऊ । बेद विदित जग प्रगट प्रभाऊ ॥
 मागउँ भीख त्यागि निज धरमू । आरत काह न करइ कुकरमू ॥
 अस जियँ जानि सुजान सुदानी । सफल करहिं जग जाचक बानी ॥

दो०—अरथ न धरम न काम रुचि गति न चहउँ निरवान ।

जनम जनम रति राम पद यह बरदानु न आन ॥ २०४ ॥

जानहुँ रामु कुटिल करि मोही । लोग कहउ गुर साहिब द्रोही ॥
 सीता राम चरन रति मोरें । अनुदिन बढ़उ अनुग्रह तोरें ॥
 जलदु जनम भरि सुरति बिसारउ । जाचत जलु पवि पाहन ढारउ ॥
 चातकुरटनि घटें घटि जाई । बढें प्रेम्मु सब भौँति भलाई ॥
 कनकहिं बान चढ़इ जिमि दाहें । तिमि प्रियतम पद नेम निबाहें ॥

भरत बचन सुनि माझ त्रिवेनी । भइ मृदु बानि सुमंगल देनी ॥
तात भरत तुम्ह सब बिधि साधू । राम चरन अनुराग अगाधू ॥
बादि गलानि करहु मन माहीं । तुम्ह सम रामहि कोउ प्रिय नार्हीं
दो०—तनु पुलकेउ हियँ हरषु सुनि बेनि वचन अनुकूल ।

भरत धन्य कहि धन्य सुर हरपित वरषहि फूल ॥ २०५ ॥

प्रसुदित तीरथराज निवासी । बैखानस बडु गृही उदासी ॥
कहहि परसपर मिलि दस पाँचा । भरत सनेहु सीलु सुचि साँचा ॥
सुनत राम गुन ग्राम सुहाए । भरद्वाज मुनिवर पहि आए ॥
दंड प्रनाम्य करत मुनि देखे । मूर्तिमंत भाग्य निज लेखे ॥
धाइ उठाइ लाइ उर लीन्हे । दीन्हि असीस कृतारथ कीन्हे ॥
आसनु दीन्ह नाइ सिरु बैठे । चहत सकुच गृहँ जनु भजि पैंठे ॥
मुनि पूँख ब कलु यह बड़ सोचू । बोले रिपि लखि सीलु सँकोचू ॥
सुनहु भरत हम सब सुधि पाई । बिधि करतब पर किलु न बसाई ॥
दो०—तुम्ह गलानि जियँ जनि करहु समुझि मातु करतूति ।

तात कैकइहि दोसु नहिँ गई गिरा मति धूति ॥ २०६ ॥

यहउ कहत भल कहिहि न कोऊ । लोकु बेदु बुध संमत दोऊ ॥
तात तुम्हार बिमल जसु गाई । पाइहि लोकउ बेदु बड़ाई ॥
लोक बेद संमत सबु कहई । जेहि पितु देइ राजु सो लहई ॥
राउ सत्यव्रत तुम्हहि बोलाई । देत राजु सुखु धरमु बड़ाई ॥
राम गवनु बन अनरथ मूला । जो सुनि सकल बिस्व भइ मूला ॥
सो भावी बस रानि अयानी । करि कुचालि अंतहुँ पछितानी ॥
तहँउ तुम्हार अलप अपराधू । कहै सो अधम अयान असाधू ॥

करतेहु राजु त तुम्हहि न दोष । रामहि होत सुनत संतोष ॥

दो०—अब अति कीन्हेहु भरत भल तुम्हहि उचित मत एहु ।

सकल सुमंगल मूल जग रघुवर चरन सनेहु ॥ २०७ ॥

सो तुम्हार धनु जीवनु प्राना । भूरिभाग को तुम्हहि समाना ॥
 यह तुम्हार आचरजु न ताता । दसरथ सुअन राम प्रिय भ्राता ॥
 सुनहु भरत रघुवर मन माहीं । पेम पात्रु तुम्ह सम कोउ नाहीं ॥
 लखन राम सीतहि अति प्रीती । निसि सब तुम्हहि सराहत बीती ॥
 जाना मरसु नहात प्रयागा । मगन होहिं तुम्हरेँ अनुरागा ॥
 तुम्ह पर अस सनेहु रघुवर केँ । सुख जीवन जग जस जड़ नर केँ
 यह न अधिक रघुवीर बड़ाई । प्रनत कुटुंब पाल रघुराई ॥
 तुम्ह तौ भरत मोर मत एहु । धरेँ देह जनु राम सनेहु ॥

दो०—तुम्ह कहँ भरत कलंक यह हम सब कहँ उपदेसु ।

राम भगति रस सिद्धि हित भा यह समउ गनेसु ॥ २०८ ॥

नव बिधु बिमल तात जसु तोरा । रघुवर किंकर कुमुद चकोरा ॥
 उदित सदा अँथईहि कबहुँ ना । घटिहि न जग नभ दिन दिन दूना
 कोक तिलोक प्रीति अति करिही । प्रभु प्रताप रवि छबिहि न हरिही
 निसि दिन सुखद सदा सब काहु । प्रसिहि न कैकइ करतबु राहु ॥
 पूरन राम सुपेम पियूषा । गुर अवमान दोष नहिँ दूषा ॥
 राम भगत अब अमिअँ अघाहँ । कीन्हेहु सुलभ सुधा बसुधाहँ ॥
 भूप भगीरथ सुरसरि आनी । सुमिरत सकल सुमंगल खानी ॥
 दसरथ गुनगन बरनि न जाहीं । अधिकु कहा जेहि सम जग नाहीं

दो०—जासु सनेह सकीच बस राम प्रगट भए आइ ।

जे हर हिय नयननि कबहुँ निरखे नहीं अघाइ ॥२०९॥

कीरति बिधुतुम्ह कीन्ह अनूपा । जहँ बस राम पेम मृगरूपा ॥
तात गलानि करहु जियँ जाएँ । डरहु दरिद्रहि पारसु पाएँ ॥
सुनहु भरत हम झूठ न कहहीं । उदासीन तापस बन रहहीं ॥
सब साधन कर सुफल सुहावा । लखन राम सिय दरसन पावा ॥
तेहि फल कर फलु दरम तुम्हारा । सहित पयाग सुभाग हमारा ॥
भरत धन्य तुम्ह जसु जगु जयऊ । कहि अस पेम मगन मुनि भयऊ
सुनि मुनि बचन सभासद हरषे । साधु सराहि सुमनसुर वरषे ॥
धन्य धन्य धुनि गगन पयागा । सुनि सुनि भरतु मगन अनुरागा

दो०—पुलक गात हियँ रामु सिय सजल सरोरुह नैन ।

करि प्रनामु मुनि मंडलिहि बाले गदगद येन ॥२१०॥

मुनि समाजु अरु तीरथराजू । साँचिहुँ सपथ अघाइ अकाजू ॥
एहि थल जौं किलु कहि अवनाई । एहि सम अधिक न अघ अधमाई
तुम्ह सर्वग्य कहउँ सतिभाऊ । उर अंतरजामी रघुराऊ ॥
मोहि न मातु करतब कर सोचू । नहिँ दुखु जियँ जगु जानिहि पोचू
नाहिन डरु बिगरिहि परलोकू । पितहु मरन कर मोहि न सोकू ॥
सुकृत सुजस भरि भुअन सुहाए । लछिमन राम सरिस सुत पाए ॥
राम बिरहँ तजि तनु छनभंगू । भूप सोच कर कवन प्रसंगू ॥
राम लखन सिय बिनु पग पनहीं । करि मुनि बेष फिरहिँ बन बनहीं

दो०—अजिन बसन फल असन महि सयन डसि कुस पात ।

बसि तरु तर नित सहत हिम आतप बरषा बात ॥२११॥

एहि दुख दाहँ दहइ दिन छाती । भूख न बासर नीद न राती ॥
 एहि कुरोग कर औषधु नहीं । सोधेउँ सकल बिख मन माहीं ॥
 मातु कुमत बढ़ई अघमूला । तेहिं हमार हित कीन्ह बैसूला ॥
 कलि कुकाठ कर कीन्ह कुजंत्रू । गाड़ि अवधि पढ़ि कठिन कुमंत्रू ॥
 मोहि लगि यहु कुठाटु तेहिं ठाटा । घालेसि सब जगु बारह बाटा ॥
 मिटइ कुजोगु राम फिरि आएँ । बसइ अवध नहिं आन उपाएँ ॥
 भरत बचन सुनि मुनि सुखु पाई । सबहिं कीन्हि बहु भाँति बड़ाई ॥
 तात करहु जनि सोचु बिसेषी । सब दुखु मिटिहि राम पग देखी ॥

दो०—करि प्रबोधु मुनिवर कहेउ अतिथि पेमप्रिय होहु ।

कंद मूल फल फूल हम देहिं लेहु करि छोहु ॥२१२॥

सुनि मुनि बचन भरत हियँ सोचू । भयउ कुअवसर कठिन सँकोचू ॥
 जानि गरुड गुर गिरा बहोरी । चरन बंदि बोले कर जोरी ॥
 सिर धरि आयसु करिअ तुम्हारा । परम धरम यहु नाथ हमारा ॥
 भरत बचन मुनिवर मन भाए । सुचि सेवक सिप निकट बोलाए ॥
 चाहिअ कीन्हि भरत पहुनाई । कंद मूल फल आनहु जाई ॥
 भलेहिं नाथ कहि तिन्ह सिर नाए । प्रमुदित निज निज काज सिधाए ॥
 मुनिहि सोच पाहुन बड़ नेवता । तसि पूजा चाहिअ जस देवता ॥
 सुनि रिधि सिधि अनिमादिक आई । आयसु होइ सो करहिं गोसाईं ॥

दो०—राम बिरह व्याकुल भरतु सानुज सहित समाज ।

पहुनाई करि हरहु श्रम कहा मुदित मुनिराज ॥२१३॥

रिधि सिद्धि सिर धरि मुनिवर बानी । बड़ भागिनि आपुहि अनुमानी ॥
 कहहिं परसपर सिधि समुदाई । अतुलित अतिथि राम लघु भाई ॥

मुनि पद बंदि करिअ सोइ आजू । होइ सुखी सब राज समाजू ॥
अस कहि रचेउ रुचिर गृह नाना । जेहि बिलोकि बिलखाहिं बिमाना
भोग बिभूति भूरि भरि राखे । देखत जिन्हहि अमर अभिलाषे ॥
दासीं दास साजु सब लीन्हें । जोगवत रहहिं मनहि मनु दीन्हें ॥
सब समाजु सजि सिधि पल माहीं । जे सुख सुरपुर सपनेहुं नाहीं ॥
प्रथमहिं बास दिए सब केही । सुंदर सुखद जथा रुचि जेही ॥

दो०—बहुरि सपरिजन भरत कहूँ रिपि अस आयसु दीन्ह ।

बिधि बिसमय दायकु बिभव मुनिवर तपवल कीन्ह ॥२१४॥

मुनि प्रभाउ जब भरत बिलोका । सब लघु लगे लोकपति लोका ॥
सुख समाजु नहिं जाइ बखानी । देखत विरति बिसारहिं ग्यानी ॥
आसन सयन सुबसन बिताना । बन बाटिका बिहग मृग नाना ॥
सुरभि फूल फल अभिअ समाना । विमल जलासय विविध विधाना
असन पान सुचि अमिअ अमी से । देखि लोग सकुचात जमी से ॥
सुर सुरभी सुरतरु सबही कें । लखि अभिलाषु सुरेस सची कें ॥
रितु बसंत बह त्रिविध बयारी । सब कहूँ सुलभ पदारथ चारी ॥
स्रक चंदन बनितादिक भोगा । देखि हरष बिसमय बस लोगा ॥

दो०—संपति चकई भरतु चक मुनि आयस खेलवार ।

तेहि निसि आश्रम पिंजराँ राखे भा भिनुसार ॥२१५॥

मासपारायण, उन्नीसवाँ विश्राम

कीन्ह निमज्जनु तीरथराजा । नाइ मुनिहि सिर सहित समाजा ॥
रिपि आयसु असीस सिर राखी । करि दंडवत बिनय बहु भाषी ॥

पथ गति कुसल साथ सब लीन्हें । चले चित्रकूटहिं चितु दीन्हें ॥
 रामसखा कर दीन्हें लागू । चलत देह धरि जनु अनुरागू ॥
 नहिं पद त्रान सीस नहिं छाया । पेसु नेसु ब्रतु धरसु अमाया ॥
 लखन राम सिय पंथ कहानी । पूँछत सखहि कहत मृदु बानी ॥
 राम बास थल बिटप बिलोकें । उर अनुराग रहत नहिं रोकें ॥
 देखि दसा सुर बरिसहिं फूला । भइ मृदु महि मगु मंगल मूला ॥

दो०—किँ जाहिं छाया जलद सुखद बहइ वर वात ।

तस मगु भयउ न राम कहँ जस भा भरतहि जात ॥२१६॥

जड़ चेतन मग जीव घनेरे । जे चितए प्रभु जिन्ह प्रभु हेरे ॥
 ते सब भए परम पद जोगू । भरत दरस मेटा भव रोगू ॥
 यह बड़ि बात भरत कइ नाहीं । सुमिरत जिनहि रामु मन माहीं ॥
 बारक राम कहत जग जेऊ । होत तरन तारन नर तेऊ ॥
 भरतु राम प्रिय पुनि लघु आतां । कस न होइ मगु मंगलदाता ॥
 सिद्ध साधु मुनिबर अस कहहीं । भरतहि निरखि हरषु हियँ लहहीं ॥
 देखि प्रभाउ सुरेसहि सोचू । जगु भल भलेहि पोच कहूँ पोचू ॥
 गुर सन कहेउ करिअ प्रभु सोई । रामहि भरतहि भेट न होई ॥

दो०—रामु सँकोची प्रेम बस भरत सपेम पयोधि ।

बनी बात बेगरन चहति करिअ जतनु छलु सोधि ॥२१७॥

बचन सुनत सुरगुरु मुसुकाने । सहसनयन बिनु लोचन जाने ॥
 मायापति सेवक सन माया । करइ त उलटि परइ सुरराया ॥
 तब किल्लु क्रीन्ह राम रुख जानी । अब कुचालि करि होइहि हानी ॥
 सुनु सुरेस रघुनाथ सुभाऊ । निज अपराध रिसाहिं न काऊ ॥

जो अपराधु भगत कर करई । राम रोष पावक सो जरई ॥
लोकहुँ बेद विदित इतिहासा । यह महिमा जानहिँ दुरबासा ॥
भरत सरिस को राम सनेही । जगु जप राम रामु जप जेही ॥

दो०—मनहुँ न आनिअ अमरपति रघुवर भगत अकाजु ।

अजसु लोक परलोक दुख दिन दिन सोक समाजु ॥२१८॥

सुनु सुरेस उपदेसु हमारा । रामहिँ सेवकु परम पिआरा ॥
मानत सुखु सेवक सेवकाई । सेवक बैर बैरु अधिकाई ॥
जद्यपि सम नहिँ राग न रोषू । गहहिँ न पाप पूनु गुन दोषू ॥
करम प्रधान विस्व करि राखा । जो जस करइ मो तस फलु चाखा ॥
तदपि करहिँ सम विषम बिहारा । भगत अभगत हृदय अनुसार ॥
अगुन अलेप अमान एकरस । रामु सगुन भए भगत पेम बस ॥
राम सदा सेवक रुचि राखी । बेद पुरान साधु सुर साखी ॥
अस जियँ जानि तजहु कुटिलाई । करहु भरत पद प्रीति सुहाई ॥

दो०—राम भगत परहित निरत पर दुख दुखी दयाल ।

भगत सिरोमनि भरत तैं जनि डरपहु सुरपाल ॥२१९॥

सत्यसंध प्रभु सुर हितकारी । भरत राम आयस अनुमारी ॥
स्वारथ बिबस बिकल तुम्ह होहू । भरत दोसु नहिँ राउर मोहू ॥
सुनि सुरवर सुरगुर बर बानो । भा प्रमोदु मन मिटी गगानी ॥
वरषि प्रसन्न हरषि सुरराऊ । लगे सराहन भरत सुभाऊ ॥
एहि बिधि भरत चले मग जाहीं । दसा देखि मुनि सिद्ध सिद्धाहीं ॥
जबहिँ रामु कहि लेहिँ उमासा । उमगत पेसु मनहुँ चहु पासा ॥
द्रवहिँ बचन सुनि कुलिष पषाना । पुरजन पेसु न जाइ बखाना ॥

बीच बास करि जमुनहिं आए । निरख नीरु लोचन जल छाए॥

दो०—रघुवर बरन बिलोकि वर बारि समेत समाज ।

होत मगन बारिधि विरह चढ़े विवेक जहाज॥२२०॥

जमुन तीर तेहि दिन करि बास । भयउ समय सम सबहि सुपास॥
रातिहिं घाट घाट की तरनी । आई अगनित जाहिं न बरनी ॥
प्रात पार भए एकहि खेवाँ । तांषे रामसखा की सेवाँ॥
चले नहाइ नदिहि सिर नाई । साथ निषादनाथ दोउ भाई॥
आगें मुनिवर बाहन आछें । राजसमाज जाइ सबु पाछें ॥
तेहि पाछें दोउ बंधु पयादें । भूषन बसन बेष सुठि सादें॥
सेवक सुहृद सचिवसुत साथी । सुमिरत लखनु सीयरघुनाथ॥
जहँ जहँ राम बास विश्रामा । तहँ तहँ करहिं सप्रेम प्रनामा॥

दो०—मगवासी नर नारि सुनि धाम काम तजि धाइ ।

देखि सरूप सनेह सब मुदित जनम फलु पाइ॥२२१॥

कहहिं सपेम एक एक पाहीं । राम लखनु सखि होहिं कि नाही॥
बय बपु बरन रूंपु सोइ आली । सीलु सनेहु सरिस सम चाली॥
बेषु न सो सखि सीय न संगी । आगें अनी चली चतुरंगी ॥
नहिं प्रसन्न मुख मानस खेदा । सखि संदेहु होइ एहिं भेदा ॥
तासु तरक तियगन मन मानी । कहहिं सकल तेहि सम न सयानी
तेहि सराहि बानी फुरि पूजी । बोली मधुर वचन तिय दूजी॥
कहि सपेम सब कथाप्रसंगू । जेहि बिधि राम राजरस भंगू ॥
भरतहि बहुरि सराहन लागी । सील सनेह सुभाय सुभागी ॥

दो०—चलत पयादें खात फल पिता दीन्ह तजि राजु ।

जात मनावन रघुबरहि भरत सरिस को आजु ॥२२२॥

भायप भगति भरत आचरनू । कहत सुनत दुख दूषन हगनू ।
जो किल्लु कहब थोर सखि सोई । राम बंधु अस काहे न होई ॥
हम सब सानुज भरतहि देखें । भइन्ह धन्य जुबती जन लेखें ॥
सुनि गुन देखि दस। पछिताहीं । कैकइ जननि जोगु सुतु नाहीं ॥
कोउ कह दूषनु रानिहि नाहिन । बिधि सबु कीन्ह हमहि जो दाहिन
कहँ हम लोक बेद बिधि हीनी । लघु तिय कुल करतूति मलीनी ॥
बसहि कुदेस कुगाँव कुबामा । कहँ यह दरसु पुन्य परिनामा ॥
अस अनंदु। अचिरिजु प्रति ग्रामा । जनु मरुभूमि कलपतरु जामा ॥

दो०—भरत दरसु देखत खुलेउ मग लोगन्ह कर भागु ।

अनु सिघलवासिन्ह भयउ बिधि बस सुलभ प्रयागु ॥२२३॥

निज गुन सहित राम गुन गाथा । सुनत जाहिं सुमिरतरघुनाथा ॥
तीरथ मुनि आश्रम सुरधामा । निरखि निमज्जहिं करहिं प्रनामा ॥
मनहीं मन मागहिं बरु एहू । सीय राम पद पदुम सनेहू ॥
मिलहिं किरात कोल बनबासी । बैखानस बटु जती उदासी ॥
करि प्रनाम्य पूँछहिं जेहि तेही । केहि बन लखनु रामु बँदेही ॥
ते प्रभु समाचार सब कहहीं । भरतहि देखि जनम फलुलहहीं ॥
जे जन कहहिं कुसल हम देखे । ते प्रिय राम लखन सम लेखे ॥
एहि बिधि बूझत सबहि सुबानी । सुनत राम बनबास कहानी ॥

दो०—तेहि बासर बसि प्रातही चले सुमिरि रघुनाथ ।

राम दरस की लालसा भरत सरिस सब साथ ॥२२४॥

मंगल सगुन होहिं सब काहू । फरकहिं सुखद बिलोचन बाहू ॥
 भरतहि सहित समाज उछाहू । मिलिहहिं रामु मिटिहि दुख दाहू
 करत मनोरथ जस जियँ जाके । जाहिं सनेह सुगँ सब छाके ॥
 सिथिल अंग पग मग डगि डोलहिं । बिहवल बचन पेम बस बोलहिं
 रामसखाँ तेहि समय देखावा । सैल सिरोमनि सहज सुहावा ॥
 जासु समीप सरित पय तीरा । सीय समेत बमहिं दोउ बीरा ॥
 देखि करहिं सब दंड प्रनामा । कहि जय जानकि जीवन रामा ॥
 प्रेम मगन अस राजसमाजू । जनु फिरि अवध चले रघुराजू ॥

दो०—भरत प्रेमु तेहि समय जस तस कहि सकइ न सेषु ।

कविहि अगम जिमि ब्रह्मसुख अह मम मलिन जनेषु ॥२२५॥

सकल सनेह सिथिल रघुवर कें । गए कोस दुइ दिनकर ढरकें ॥
 जलु थलु देखि बसे निसि बीतें । कीन्ह गवन रघुनाथ प्रीति ॥
 उहाँ रामु रजनी अवसेषा । जागे सीयँ सपन अस देखा ॥
 सहित समाज भरत जनु आए । नाथ बियोग ताप तन ताए ॥
 सकल मलिन मन दीन दुग्वारी । देखीं सासु आन अनुहारी ॥
 सुनि सिय सपन भूरे जल लोचन । भए सोचबस सोच बिमोचन ॥
 लखन सपन यह नीक न होई । कठिन कुचाह सुनाइहि कोई ॥
 अस कहि बंधु समेत नहाने । पूजि पुरारि साधु सनमाने ॥

छं०—सनमानि सुर मुनि बंदि बैठे उतर दिसि देखत भए ।

नभ धूरि खग मृग भूरि भागे बिकल प्रभु आश्रम गए ॥

तुलसी उठे अवलोकि कारनु काह चित सचकित रहे ।

सब समाचार किरात कोलन्हि आइ तेहि अवसर कहे ॥

सो०—सुनत सुमंगल बैन मन प्रमोद तन पुलक भर ।

सरद सरोरुह नैन तुलसी भरे सनेह जल ॥२२६॥

बहुरि सोचबस मे सियरवनू । कारन कवन भरत आगवनू ॥
एक आइ अस कहा बहोरी । सेन संग चतुरंग न थोरी ॥
सो सुनि रामहि भा अति सोचू । इत पितु बच इत बंधु सकोचू ॥
भरत सुभाउ समुझि मन माहीं । प्रभु चित हित थिति पावत नाहीं
समाधान तब भा यह जाने । भरतु कहे महुँ साधु सयाने ॥
लखन लखेउ प्रभु हृदयँ खभारू । कहत समय सम नीति बिचारू ॥
बिनु पूछे कलु कहउँ गोमाई । सेवकु समयँ न ढीठ ढिठाई ॥
तुम्ह सर्वग्य सिरोमनि स्वामी । आपनिसमुझि कहउँ अनुगामी ॥

दो०—नाथ सुहृद सुठि सरल चित सील सनेह निधान ।

सब पर प्रीति प्रतीति जियँ जानिअ आपु समान ॥२२७॥

बिषई जीव पाइ प्रभुताई । मृढ़ मोह बस होहि जनाई ॥
भरतु नीति रत साधु सुजाना । प्रभु पद प्रेमु सकल जगु जाना ॥
तेऊ आजु राम पदु पाई । चले धरम मरजाद मेटाई ॥
कुटिल कुबंधु कुअवसरु ताकी । जानि राम बनबास एकाकी ॥
करि कुमंत्रु मन साजि समाजू । आए करै अकंटक राजू ॥
कोटि प्रकार कलपि कुटिलाई । आए दल बटोरि दोउ भाई ॥
जौं जियँहोति न कपट कुचाली । केहि सोहाति रथ बाजि गजाली ॥
भरतहि दोसु देइ को जाएँ । जग बौराइ राज पदु पाएँ ॥

दो०—ससि गुर तिय गामी नघुषु चढ़ेउ भूमिसुर जान ।

लोक बेद तें बिमुख भा अधम न बेन समान ॥२२८॥

सहसबाहु सुरनाथु त्रिसंकू । केहि न राजमद दीन्ह कलंकू ॥
 भरत कीन्ह यह उचित उपाऊ । रिपु रिनरंच न राखब काऊ ॥
 एक कीन्हि नहिं भरत भलाई । निदरे रामु जानि असहाई ॥
 समुझि परिहि सोउ आजु बिसेषी । समर सरोष राम मुखु पेखी ॥
 एतना कहत नीति रस भूला । रन रस बिटपु पुलक मिस फूला ॥
 प्रभु पद बंदि सीस रज राखी । बोले सत्य सहज बलु भाषी ॥
 अनुचित नाथ न मानब मोरा । भरत हमहि उपचार न थोरा ॥
 कहँ लगि सहिअ रहिअ मनु मारें । नाथ साथ धनु हाथ हमारें ॥

दो०—छत्रि जाति रघुकुल जनमु राम अनुग जगु जान ।

लातहुँ मारें चढ़ति सिर नीच को धूरि समान ॥२२९॥

उठि कर जोरि रजायसु मागा । मनहुँ बीर रस सोवत जागा ॥
 बाँधि जटा मिर कसि कटि भाथा । साजि सरामनु सायकु हाथा ॥
 आजु राम सेवक जसु लेऊँ । भरतहि समर सिखावन दऊँ ॥
 राम निरादर कर फलु पाई । सांवहुँ समर सेज दोउ भाई ॥
 आई बना भल सकल समाजू । प्रगट करउँ रिस पाछिल आजू ॥
 जिमि करि निकर दलइ मृगराजू । लेइ लपेटि लवा जमि बाजू ॥
 तैसेहिं भरतहि सेन समेता । सानुज निदरि निपातउँ खेता ॥
 जौ सहाय कर संकरु आई । तौ मारउँ रन राम दोहाई ॥

दो०—अति सरोष माखे लखनु लखि सुनि सपथ प्रवान ।

सभय लोक सब लोकपति चाहत भभरि भगान ॥२३०॥

जगु भय मृगन गगन भइ बानी । लखन बाहुबलु बिपुल बखानी ॥
 तात प्रताप प्रभाउ तुम्हारा । को कहि सकइ को जाननिहारा ॥

अनुचित उचित काजु किछु होऊ । समुझि करिअ मल कह सबु कोऊ॥
सहसा करि पाछें पछिताहीं । कहहिं बेद बुध ते बुध नाहीं ॥
सुनिसुर बचन लखन सकुचाने । राम सीयँ सादर सनमाने ॥
कही तात तुम्ह नीति सुहाई । सब तें कठिन राजमदु भाई ॥
जो अचवँत नृप मातहिं तेई । नाहिन साधुमभा जेहिं सेई ॥
सुनहु लखन मल भरत सरीसा ! बिधि प्रपंच महुँ सुना न दीसा॥
दो०—भरतहि होइ न राजमदु बिधि हरि हर पद पाइ ।

कबहुँ कि काँजी सीकरनि छीरसिंधु बिनसाइ ॥२३१॥
तिमिरु तरुन तरनिहि मकु गिलई । गगनु मगन मकु मेघहिं मिलई ॥
गोपद जल बूढ़हिं घटजोनी । सहज छमा बरु छाड़ै छांनी ॥
मसक फूँक मकु मेरु उड़ाई । होइ न नृपमदु भरतहि भाई ॥
लखन तुम्हाग मपथ पितु आना । सुचि सुबंधु नहिं भरत समाना॥
सगुनु खीरु अवगुन जलु ताता । मिलइ रचइ परपंचु निधाता ॥
भरतु हंस रत्नवंम तड़ागा । जनमि कीन्ह गुन दोष विभागा ॥
गहि गुन रथ तजि अवगुन बारी निज जम जगत कीन्ह उजिआरी
कहत भरत गुन सीलु सुभाऊ । पेम पयोधि मगन रघुराऊ ॥
दो०—सुनि रघुवर बानी विबुध देखि भरत पर हेतु ।

सकल सराहत राम सो प्रभु को कृपानिकेतु ॥२३२॥

जौ न होत जग जनम भरत को । सकल धरम धुर धग्नि भरत को॥
कबि कुल प्रगम भरत गुन गाथा । को जानइ तुम्ह बिनु रघुनाथा॥
लखन राम सियँ सुनि सुग बानी । अति सुखु लहे उ न आइ बखानी
इहाँ भरतु सब सहित सहाए । मंदाकिनी पुनीत नहाए ॥

सरित समीप राखि सब लोग । मागि मातु गुर सचिव नियोगा ॥
चले भरतु जहँ सिय रघुराई । साथ निषादनाथु लघु भाई ॥
समुझि मातु कगतब सकुचाहीं । करत कुतरक कोटि मन माहीं ॥
रामु लखनु सिय सुनि मम नाऊँ । उठि जनि अनत जाहिं तजि ठाऊँ ॥

दो०—मातु मतं महँ मानि मोहि जो कष्ट करहिं सो थोर ।

अथ अवगुन छमि आदरहिं समुझि आपनी ओर ॥२३३॥

जौं परिहरहिं मलिन मनुजानी । जौं सनमानहिं सेवकु मानी ॥
मोरें सरन रामहि की पनही । राम सुखामि दोसु सब जनही ॥
जग जस भाजन चातक मीना । नेम पेम निज निपुन नबीना ॥
अस मन गुनत चले मग जाता । सकुच सनेहँ सिथिल सब गाता ॥
फेरति मनहुँ मातु कृत खोरी । चलत भगति बल धीरज धोरी ॥
जब समुझत रघुनाथ सुभाऊ । तब पथ परत उताइल पाऊ ॥
भरत दसा तेहि अवसर कैसी । जल प्रवाहँ जल अलि गति जैसी ॥
देखि भरत कर सोचु सनेह । भा निषाद तेहि समयँ विदेह ॥

दो०—लगें होन मंगल सगुन मुनि गुनि कहत निषादु ।

मिटिहि मैचु होइहि हगपु पुनि परिनाम विषादु ॥२३४॥

सेवक बचन सत्य सब जाने । आश्रम निकट जाइ निअराने ॥
भरत दीख बन सैल समाजू । मुदित छुधित जनु पाइ सुनाजू ॥
ईति भीति जनु प्रजा दुखारी । त्रिबिध ताप पीड़ित ग्रह मारी ॥
जाइ सुगज सुदेस सुखारी । होहि भरत गति तेहि अनुहारी ॥
राम बास बन संपति भ्राजा । सुखी प्रजा जनु पाइ सुराजा ॥
सचिव विरागु बिबेकु नरेसू । बिपिन सुहावन पावन देसू ॥

भट जम नियम सैल रजधानी । सांति सुमति सुचि सुंदर रानी ॥
सकल अंग संपन्न सुराऊ । राम चरन आश्रित चित चाऊ ॥

दो०—जीति मोह महिपालु दल सहित विवेक भुआलु ।

करत अकंटक राजु पुरेँ सुख संपदा मुकालु ॥ २३५ ॥

वन प्रदेश मुनि वास घनेरे । जनु पुर नगर गाउँ गन खेरे ॥
बिपुल विचित्र बिहग मृग नाना । प्रजा समाजु न जाइ बखाना ॥
खगहा करि हरि बाघ बराहा । देखि महिष बृष साजु सराहा ॥
बयरु बिहाइ चरहिं एक संगी । जहँ तहँ मनहुँ सेन चतुरंगी ॥
झरना झरहिं मत्त गज गाजहिं । मनहुँ निसान बिबिधि बिधि बाजहिं
चक चकोर चातक सुक पिक गन । कूजत मंजु मराल मुदित मन ॥
अलिगन गावत नाचत मोरा । जनु सुराज मंगल चहु ओरा ॥
बेलि बिटप तन सफल सफूला । सब समाजु मुद मंगल मूला ॥

दो०—राम सैल सोभा निरखि भरत हृदयँ अति पेमु ।

नापम तप फलु पाइ जिमि सुखी सिरानें नेमु ॥ २३६ ॥

मासपारायण, बीसवाँ विश्राम

नवाह्नपारायण, पाँचवाँ विश्राम

तब केवट ऊँचें चढ़ि धाई । कहेउ भरत सन भुजा उठाई ॥
नाथ देखिअहिं बिटप बिसाला । पाकरि जंबु रसाल तमाला ॥
जिन्ह तरुबरन्ह मध्य बटु मोहा । मंजु बिसाल देखि मनु मोहा ॥
नील सघन पल्लव फल लाला । अघिरल छाहँ सुखद सब काला ॥
मानहुँ तिमिर अरुनमय रासी । बिरची बिधि सँकेलि सुषमा सी ॥

ए तरु सरित समीप गोसाँई । रघुवर परनकुटी जहँ छाई ॥
तुलसी तरुवर बिबिध सुहाए । कहूँ कहूँ सियँ कहूँ लखन लगाए
बट छायाँ बेदिका बनाई । सियँ निज पानि सरोज सुहाई ॥

दो०—जहाँ बैठि मुनिगन सहित नित सिय रामु सुजान ।

सुनहिँ कथा इतिहास सब आगम निगम पुरान ॥ २३७ ॥

सखा बचन मुनि बिटप निहारी । उमगे भरत बिलोचन बागी ॥
करत प्रनाम चले दोउ भाई । कहत प्रीति सारद सकुचाई ॥
हरषहिँ निरखि राम पद अंका । मानहुँ पारसु पायउ रंका ॥
रज सिरधरि हियँ नयनन्हि लावहिँ । रघुवर मिलन सरिस सुख पावहिँ
देखि भरत गति अकथ अतीवा । प्रेम मगन मृग खग जड़ जीवा ॥
सखहि सनेह बिबस मग भूला । कहि सुपंथ सुर बरषहिँ फूला ॥
निरखि सिद्ध साधक अनुरागे । सहज सनेहु सराहन लागे ॥
होत न भूतल भाउ भरत को । अचर सचर चर अचर करत को ॥

दो०—पेम अमिअ मंदरु बिरहु भरतु पयोधि गँभीर ।

मथि प्रगटेउ सुर साधु हित कृपासिंधु रघुवीर ॥ २३८ ॥

सखा समेत मनोहर जोटा । लखेउ न लखन सघन बन ओटा ॥
भरत दीख प्रभु आश्रमु पावन । मकरु सुमंगल मदनु सुदावन ॥
करत प्रवेस मिटे दुख दावा । जनु जोगी परमारथु पावा ॥
देखे भरत लखन प्रभु आगे । पूँछे बचन कहत अनुरागे ॥
सीस जटा कटि मुनि पट बाँधे । तून कसैं कर सरु धनु काँधे ॥
बेदी पर मुनि साधु समाजू । सीथ सहित गजत रघुगजू ॥
बलकल बसन जटिल तनु स्वामा । जनु मुनिबेष कीन्ह रति कामा ॥

कर कमलनि धनु सायकु फेरत । जिय की जरनि हरत हँसि हेरत ॥

दो०—लसत मंजु मुनि मंडली मध्य सीय रघुचंदु ।

ग्यान सभाँ जनु तनु धरें भगति सच्चिदानंदु ॥ २३९ ॥

सानुज सखा सपेत मगन मन । बिसरे हरष सोक सुख दुख गन ॥
पाहि नाथ कहि पाहि गोसाईं । भूतल परे लकुट की नाई ॥
बचन सपेम लखन पहिचाने । करत प्रनामु भरत जियँ जाने ॥
बंधु सनेह सरस एहि ओरा । उत साहिब सेवा बस जोरा ॥
मिलि न जाइ नहिं गुदरत बनई । सुकवि लखन मन की गति भनई ॥
रहे राखि सेवा पर भारू । चढ़ी चंग जनु खैच खेलारू ॥
कहत सप्रेम नाइ महि माथा । भरत प्रनाम करत रघुनाथा ॥
उठे रामु सुनि पेम अधीरा । कहूँ पट कहूँ निषंग धनु तीरा ॥

दो०—बरबस िए उठाइ उर लाए कृपानिधान ।

भरत राम की मिलनि लखि बिसरे सबहि अपान ॥ २४० ॥

मिलनि प्रीति किमि जाइ बग्वानी । कबिकुल अगम करम मन बानी
परम पेम पूरन दोउ भाई । मन बुधि चित अहमिति बिमगई ॥
कहहु सुपेम प्रगट को करई । केहि छाया कबि मति अनुसरई ॥
कबिहि अरथ आखर बलु साँचा । अनुहरि ताल गतिहि नदु नाचा
अगम सनेह भरत रघुबर को । जहँ न जाइ मनु बिधि हरि हर को
सो मैं कुमति कहौं केहि भाँती । बाज सुराग कि गाँडर ताँती ॥
मिलनि बिलांकि भरत रघुबर की । सुरगन मभय धकधकी धरकी ॥
समझाए सुरगुरु जड़ जागे । बरषि प्रखन प्रसंसन लागे ॥

दो०—मिलि सपेम रिपुसूदनहि केवटु भेंटैउ राम ।

भूनि भायँ भेंटै भरत लछिमन करत प्रनाम ॥ २४१ ॥

भेंटैउ लखन ललकि लघु भाई । बहुरि निषादु लीन्ह उर लाई ॥
 पुनि मुनिगन द्रहुँ भाइन्ह बंदे । अभिमत आसिष पाइ अनंदे ॥
 सानुज भगत उमगि अनुरागा । धरि सिर सिय पद पदुम परागा
 पुनि पुनि करत प्रनाम उठाए । सिर कर कमल परसि बैठाए ॥
 सीयँ असीस दीन्ह मन माहीं । मगन सनेहँ देह सुधि नाहीं ॥
 सब बिधि सानुकूल लखि सीता । भे निसोच उर अपडर बीता ॥
 कोउ किछु कहइ न कोउ किछु पूँछा ॥ प्रेम भरा मन निज गति छूँछा ॥
 तेहि अवसर केवटु धीरजु धरि । जोरि पानि बिनवत प्रनामु करि ॥

दो०—नाथ साथ मुनिनाथ के मातु सकल पुर लोग ।

सेवक सेनप सचिव सब आए बिकल बियोग ॥ २४२ ॥

सीलसिंधु सुनि गुर आगवन् । सिय समीप राखे रिपुदवन् ॥
 चले मवेग रामु तेहि काला । धीर धरम धुर दीनदयाला ॥
 गुरहि देखि सानुज अनुरागे । दंड प्रनाम कगन प्रभु लागे ॥
 मुनिवर धाइ लिए उर लाई । प्रेम उमगि भेंटै दोउ भाई ॥
 प्रेम पुलकि केवट कहि नामू । कीन्ह दूरि तें दंड प्रनामू ॥
 रामसखा रिषि बरबस भेंटै । जनु महि लुठत सनेह समेटै ॥
 रघुपति भगति सुमंगल मूला । नभ सराहिसुर बरिसहिं फूला ॥
 एहि मम निपट नीच कोउ नाहीं । बड़ बसिष्ठ सम को जग माहीं ॥

दो०—जहि लखि लखनहुँ तें अधिक मिले मुदित मुनिराउ ।

... सो सीतापति भजन को प्रगट प्रताप प्रभाउ ॥ २४३ ॥

आरत लोग राम सबु जाना । करुनाकर सुजान भगवाना ॥
जो जेहि भायँ रहा अभिलाषी । तेहि तेहि कै तसि तसि रुख राखी
सानुज मिलि पल महँ सब काहू । कोन्ह दूरि दुखु दारुन दाहू ॥
यह बड़ि बात राम कै नाही । जिमि घट कोटि एकर बिछाहीं ॥
मिलि केवटहि उमगि अनुरागा । पुरजन सकल सराहहि भागा ॥
देखीं राम दुखित महतारी । जनु सुबेलि अवलीं हिम मारीं ॥
प्रथम राम भेंटी कै कैई । सरल सुभायँ भगति मति भेई ॥
पग परि कीन्ह प्रबोधु बहोरी । काल करम बिधि सिर धरि खोरी

दो०—भेंटीं रघुवर मातु सब करि प्रबोधु परितोषु ।

अंब ईस आधीन जगु काहु न देइअ दोष ॥ २४४ ॥

गुरतिय पद बंदे दुहु भाई । सहित विप्रतिय जेसँग आई ॥
गंग गौरि सम सब सनमानीं । देहिं असीस मुदित मृदु बानीं ॥
गहि पद लगे सुमित्रा अंका । जनु भेंटी संपति अति रंका ॥
पुनि जननी चरननि दोउ भ्राता । परे पेम व्याकुल सब गाता ॥
अति अनुगग अंब उर लाए । नयन सनेह सलिल अन्हवाए ॥
तेहि अवसर कर हरष बिषादू । किमि कबि कहै मूक जिमि स्वादू ॥
मिलि जननिहि सानुज रघुगऊ । गुर सन कहेउ कि धारिअ पाऊ ॥
पुरजन पाइ मुनीस नयोगू । जल थल तकित कि उतरेउ लोगू

दो०—महिसुर मंत्री मातु गुर गने लोग लिए साथ ।

पावन आश्रम गवनु किय भरत लखन रघुनाथ ॥ २४५ ॥

सीय आइ मुनिबर पग लागी । उचित असीस लही मन मागी ॥
गुरपतिनिहि मुनितियन्ह समेता । मिली पेसु कहि जाइ न जेता ॥

बंदि बंदि पग सिय सबही के । आसिगबचन लहे प्रिय जी के ॥
 सासु सकल जब सीयँ निहारी । मूदे नयन सहमि सुकुमारी ॥
 परीं बधिक बस मनहुँ मराली । काह कीन्ह करतार कुचाली ॥
 तिन्ह सिय निरखि निपट दुखु पावा । सो सबु सहिअ जा दैउ सहावा
 जनकमुता तब उर धरि धीरा । नील नलिन लोयन भरि नीरा ॥
 मिली सकल सासुन्ह सिय जाई । तेहि अवसर करुना महि छाई ॥

दो०—लागि लागि पग सबनि सिय भेंटति अति अनुराग ।

हृदयँ असीसहिं पेम बस रहिअहु भरी सोहाग ॥ २४६ ॥

बिकल सनेहँ सीय सब रानी । बैठन सत्रहि कहेउ गुर ग्यानी ॥
 कहि जग गति मायिक मुनिनाथा । कहे कलुष परमारथ गाथा ॥
 नृप कर सुरपुर गवनु सुनावा । सुनि रघुनाथ दुसह दुखु पावा ॥
 मरन हेतु निज नेहु बिचारी । मे अति बिकल धीर धुर धारी ॥
 कुलिस कठोर सुनत कदु बानी । बिलपत लखन सीय सब रानी ॥
 सोक बिकल अति सकल समाजू । मानहुँ राजु अकाजेउ आजू ॥
 मुनिबर बहुरि राम समुझाए । सहित समाज सुसरित नहाए ॥
 ब्रतु निरंजु तेहि दिन प्रभु कीन्हा । मुनिहु कहें जलु काहुँ न लीन्हा ॥

दो०—भोरु भएँ रघुनंदनहि जो मुनि आयसु दीन्ह ।

श्रद्धा भगति समेत प्रभु सो सबु सादरु कीन्ह ॥ २४७ ॥

करि पितु क्रिया बेद जसि बरनी । मे पुनीत पातक तम तरनी ॥
 जासु नाम पावक अघ तूला । सुमिरत सकल सुमंगल मूला ॥
 सुद्ध सो भयउ साधु संमत अस । तोरथ आवाहन सुरसरि जस ॥
 सुद्ध भएँ दुइ बासर बीते । बोले गुर सन राम पिरीते ॥

नाथ लोग सब निपट दुखारी । कंद मूल फल अंबु अहारी ॥
सानुज भरतु सचिव सब माता । देखि मोहि पल जिमि जुग जाता
सब समेत पुर धारिअ पाऊ । आपु इहाँ अमरावति राऊ ॥
बहुत कहेउँ सब क्रियउँ ठिठाई । उचित होइ तस करिअ गोसाँई ॥

दो०—धर्म सेतु करुनायतन कस न कहहु अस राम ।

लोग दुखित दिन दुइ दरस देखि लहहुँ विश्राम ॥ २४८ ॥

राम बचन सुनि सभय समाजू । जनु जलनिधि महुँ बिकल जहाजू
सुनि गुर गिरा सुमंगल मूला । भयउ मनहुँ मारुत अनुकूला ॥
पावन पयँ तिहुँ काल नहाहीं । जो बिलोकि अघ ओघ नसाहीं ॥
मंगलमूर्ति लोचन भरि भरि । निरखहि हरषि दंडवत करि करि
राम सैल बन देखन जाहीं । जहँ सुख सकल सकल दुख नाही ॥
झरना झरहि सुधासम बारी । त्रिविध तापहर त्रिविध बयारी ॥
बिटप बेलि तृन अगनित जाती । फल प्रघ्नन पल्लव बहु भाँती ॥
सुंदर सिला सुखद तरु छाहीं । जाइ वरनि बन छवि केहि पाहीं ॥

दो०—सरनि सरोरुह जल बिहग कूजत गुंजत भुंग ।

बैर बिगत बिहरत बिपिन मृग बिहंग बहुरंग ॥ २४९ ॥

कोल किरात भिछ बनबासी । मधु सुचि सुंदर स्वादु सुधा सी ॥
भरि भरि परन पुटी रचि रूरी । कंद मूल फल अंकुर जूरी ॥
सबहि देहिं करि बिनय प्रनामा । कहि कहि स्वाद भेद गुननामा ॥
देहिं लोग बहु मोल न लेहीं । फेरत राम दोहाई देहीं ॥
कहहिं सनेह मगन मृदु बानी । मानत साधु पेम पहिचानी ॥
तुम्ह सुकृती हम नीच निषादा । पावा दरसनु राम प्रसादा ॥

हमहि अगम अति दरसु तुम्हारा । जस मरु धरनि देवधुनि धारा ॥
राम कृपाल निषाद नेवाजा । परिजन प्रजउ चहिअ जस राजा ॥

दो०—यह जियँ जानि सँकोचु तजि करिअ छोहु लखि नहु ।

हमहि कृतार्थ करन लागि फल तून अंकुर लेहु ॥ २५० ॥

तुम्ह प्रिय पाहुने बन पगु धारे । सेवा जोगु न भाग हमारे ॥
देब काह हम तुम्हहि गोसाँई । इंधनु पात किरात मितार्ई ॥
यह हमारि अति बड़ि सेवकाई । लेहि न बासन बसन चोराई ॥
हम जड़ जीव जीव गन घाती । कुटिल कुचाली कुमति कुजाती ॥
पाप करत निसि बासर जाहीं । नहि पट कटि नहि पेट अघाहीं ॥
सपनेहुँ धरम बुद्धि कस काऊ । यह रघुनंदन दरस प्रभाऊ ॥
जब तेँ प्रभु पद पदुम निहारे । मिटे दुसह दुख दोष हमारे ॥
वचन सुनत पुरजन अनुरागे । तिन्ह के भाग सराहन लागे ॥

छं०—लागे सराहन भाग सब अनुराग वचन मुहावहीं ।

बोलनि मिलनि सिय राम चरन सनेहु लखि सुगु पावहीं ॥

नर नारि निदरहिं नेहु निज मुनि कोल भिल्लनि की गिरा ।

तुलसी कृपा रघुवंसमनि की लोह लै लौका तिरा ॥

मो०—बिहरहिं बन चहु ओर प्रति दिन प्रमुदित लोग मव ।

जल ज्यों दादुर मोर भए पीन पावस प्रथम ॥ २५१ ॥

पुर जन नारि मगन अति प्रीती । बासर जाहि पलक मम वीती ॥
सीय सासु प्रति बेष बनाई । सादर करइ सरिस सेवकाई ॥
लखा न मरमु राम बिनु काहूँ । माया सब सिय माया माहूँ ॥
सीयँ सासु सेवा बस कीन्हीं । तिन्ह लहि सुख सिख आसिष दीन्हीं ॥

लखि सिय सहित सरल दोउ भाई । कुटिल रानि पछितानि अघाई
अवनि जमहि जाचति कैकेई । महि न बीचु बिधि मीचु न देई ॥
लोकहुँ बेद बिदित कबि कहहीं । राम बिमुख थलु नरक न लहहीं ॥
यहु संसउ सब के मन माहीं । राम गवनु बिधि अवध कि नाहीं

दो०—निसि न नीद नहिं भूख दिन भरतु विकल सुचि सोच ।

नीच कीच बिच मगन जम मीनहि सलिल सँकोच ॥२५२॥

कीन्हि मातु मिस काल कुचाली । ईति भीति जस पाकत साली ॥
केहि बिधि होइ राम अभिषेकू । मोहि अवकलत उपाउ न एकू ॥
अवसि फिरहिं गुर आयसु मानी । मुनिपुनि कहव राम रुचि जानी
मातु कहेहुँ बहुरहिं रघुराऊ । राम जननि हठ करबि कि काऊ ॥
मोहि अनुचर कर केतिक बाता । तेहि महँ कुसमउ बाम बिधाता ॥
जौं हठ करउँ त निपट कुकरमू । हरगिरि तें गुरु सेवक धरमू ॥
एकउ जुगुति न मन ठहरानी । सोचत भरतहि रैन बिहानी ॥
प्रात नहाइ प्रभुहि सिर नाई । बैठत पठए रिषयँ बोलाई ॥

दो०—गुर पद कमल प्रनामु करि बैठे आयसु पाइ ।

विप्र महाजन सचिव सब जुरे सभासद आइ ॥२५३॥

बोले मुनिवर समय समाना । सुनहु सभासद भरत सुजाना ॥
धरम धुरीन भानुकुल भानू । राजा रामु खबस भगवानू ॥
सत्यसंध पालक श्रुति सेतू । राम जनमु जग मंगल हेतू ॥
गुर पितु मातु बचन अनुसारी । खल दलु दलन देव हितकारी ॥
नीति प्रीति परमारथ स्वारथु । कोउ न राम सम जान जथारथु ॥
बिधि हरिहरु ससि रबि दिसिपाला । माया जीव करम कुलि काला

अहिप महिप जहँ लगि प्रभुताई । जोग सिद्धि निगमागम गाई ॥
करि बिचार जियँ देखहु नीकें । राम रजाइ सीस सबही कें ॥

दो०—राखें राम रजाइ रुख हम सब कर हित होइ ।

समुझि सयाने करहु अब सब मिलि संमत सोइ ॥२५४॥

सब कहँ सुखद राम अभिषेकू । मंगल मोद मूल मग एकू ॥
केहि विधि अवध चलहिं रघुराऊ । कहहु समुझि सोइ करिअ उपाऊ
सब सादर सुनि मुनिवर बानी । नय परमार्थ स्वारथ सानी ॥
उतरु न आव लोग भए भोरे । तब सिरु नाइ भरत कर जोरे ॥
भानुवंस भए भूप घनेरे । अधिक एक तें एक बड़ेरे ॥
जनम हेतु सब कहँ पितु माता । करम सुभासुभ देइ बिधाता ॥
दलि दुख सजइ सकल कल्याना । अस असीस राउरि जगु जाना ॥
सो गोसाईं विधि गति जेहिं छेंकी । सकइ को टारि टेक जो टेकी ॥

दो०—बूझिअ मोहि उपाउ अच सो सब मोर अभागु ।

सुनि सनेहमय वचन गुर उर उमगा अनुरागु ॥२५५॥

तात बात फुरि राम कृपाहीं । राम बिमुख सिधि सपनेहुँ नाहीं
सकुचउँ तात कहत एक बाता । अरध तजहिं बुध सरबस जाता ॥
तुम्ह कानन गवनहु दोउ भाई । फेरिअहिं लखन सीय रघुराई ॥
सुनि सुवचन हरषे दोउ भ्राता । भे प्रमोद परिपूरन गाता ॥
मन प्रसन्न तन तेज विराजा । जनु जिय राउ रामु भए राजा ॥
बहुत लाभ लोगन्ह लघु हानी । सम दुख सुख सब रोवहिं रानी ॥
कहहिं भरतु मुनि कहा सो कीन्हे । फलु जग जीवन्ह अभिमत दीन्हे
कानन कैरउँ जनम भरि बास । एहि तें अधिक न मोर सुपास ॥

दो०-अंतरजामी रामु सिय तुम्ह सरबग्य सुजान ।

जौ फुर कहहु त नाथ निज कीजिअ वचनु प्रवान ॥२५६॥

भरत बचन सुनि देखि सनेहू । सभा सहित मुनि भए बिदेहू ॥
भरत महा महिमा जलरासी । मुनि मति ठाढ़ि तीर अबला सी ॥
गा चह पारजतनु हियँ हेरा । पावति नाव न बोहितु बेरा ॥
औरु करिहि को भरत बढ़ाई । सरसी सीपि कि सिंधु समाई ॥
भरतु मुनिहि मन भीतर भाए । सहित समाज राम पहिँ आए ॥
प्रभु प्रनामु करि दीन्ह सुआसनु । बैठे सब सुनि मुनि अनुसासनु ॥
बोले मुनिवर वचन बिचारी । देस काल अवसर अनुहारी ॥
सुनहु राम सरबग्य सुजाना । धरम नीति गुन ग्यान निधाना ॥

दो०-सय के उर अंतर वसहु जानहु भाउ कुभाउ ।

पुरजन जननी भरत हित होइ सो कहिअ उपाउ ॥२५७॥

आरत कहहिं विचारिन काऊ । सुझ जुआरिहि आपन दाऊ ॥
सुनि मुनि वचन कहत रघुराऊ । नाथ तुम्हारेहि हाथ उपाऊ ॥
सब कर हित रुख राउरि राखें । आयसु किएँ मुदित फुर भाषें ॥
प्रथम जो आयसु मो कहँ होई । माथें मानि करैं सिख सोई ॥
पुनि जेहि कहँ जस कहव गोसाईं । सो सब भाँति घटिहि सेवकाईं ॥
कह मुनि राम सत्य तुम्ह भाषा । भरत सनेहँ बिचारु न राखा ॥
तेहि तें कहउँ बहोरि बहोरी । भरत भगति बस भइ मति मोरी ॥
मोरें जान भरत रुचि राखी । जो कीजिअ सो सुभ सिव साखी ॥

दो०-भरत विनय सादर सुनिअ करिअ विचारु बहोरि ।

करव साधुमत लोकमत नृपनय निगम निचोरि ॥२५८॥

गुर अनुरागु भरत पर देखी । राम हृदयँ आनंदु विसेषी ॥
 भरतहि धरम धुरंधर जानी । निज सेवक तन मानस बानी ॥
 बोले गुर आयस अनुकूला । वचन मंजु मृदु मंगलमूला ॥
 नाथ सपथ पितु चरनदोहाई । भयउ न भुअन भरत समभाई ॥
 जे गुर पद अंबुज अनुरागी । ते लोकहुँ बेदहुँ बड़भागी ॥
 राउर जा पर अस अनुरागू । को कहि सकइ भरत कर भागू ॥
 लखि लघु बंधुबुद्धि सकुचाई । करत बदन पर भरत बड़ाई ॥
 भरतु कहहि सोइ किऐँ भलाई । अस कहि राम रहे अरगाई ॥

दो०—तब मुनि बोले भरत सन मव सँकोचु तजि तात ।

कृपासिंधु प्रिय बंधु सन कहहु हृदय कै बात ॥२५९॥

मुनि मुनिवचन राम रुख पाई । गुरु साहिब अनुकूल अघाई ॥
 लखि अपनै सिर सबु छरु भारू । कहि न सकहिं कछु करहिं बिचारू ॥
 पुलकि सरीर सभाँ भए ठाढ़े । नीरज नयन नेह जल बाढ़े ॥
 कहब मोर मुनिनाथ निवाहा । एहि तैं अधिक कहौं मैं काहा ॥
 मैं जानउँ निज नाथ सुभाऊ । अपराधिहु पर कोह न काऊ ॥
 मो पर कृपा सनेहु विसेषी । खेलत खुनिस न कबहुँ देखी ॥
 सिसुपन तैं परिहरेउँ न संगू । कबहुँ न कीन्ह मोर मन भंगू ॥
 मैं प्रभु कृपा रीति जियँ जोही । हारेहुँ खेल जितावहिं मोही ॥

दो०—महं सनेह सकोच बस सनमुख कहि न बैन ।

दरसन तृपित न आजु लगि पेम पिआसे नैन ॥२६०॥

बिधि न सकेउ सहि मोर दुलारा । नीच बीचु जननी मिस पारा ॥
 यहउ कहैत मोहि आजु न सोभा । अपनीं समुझि साधु सुचि को भा

मातु मंदि मैं साधु सुचाली । उर अस आनत कोटि कुचाली ॥
फरइ कि कोदव बालि सुमाली । मुकता प्रसव कि संबुक काली ॥
सपनेहुँ दोसक लेसु न काहू । मोर अभाग उदधि अवगाहू ॥
बिनु समुझें निज अध परिपाकू । जारिउँ जायँ जननि कहि काकू ॥
हृदयँ हेरि हारेउँ सब ओरा । एकहि भाँति भलेहिं भल मोरा ॥
गुर गोसाईं साहिब सिय रामू । लागत मोहि नीक परिनामू ॥

दो०—साधु सभाँ गुर प्रभु निकट कहउँ सुथल सति भाउ ।

प्रेम प्रपंचु कि झूठ फुर जानहिं मुनि रघुराउ ॥२६१॥

भूपति मरन पेम पनु राखी । जननी कुमति जगतु सबु साखी ॥
देखि न जाहिं बिकल महतारीं । जरहिं दुसह जर पुर नर नारीं ॥
महीं सकल अनरथ कर मूला । सो मुनि समुझि सहिउँ सब सुला ॥
मुनि बन गवनु कीन्ह रघुनाथा । करि मुनि बेष लखन मिय साथा ॥
बिनु पानहिन्ह पयादेहि पाएँ । संकरु साखि रहेउँ एहि घाएँ ॥
बहुरि निहारि निषाद सनेहू । कुलिस कठिन उर भयउ न बेहू ॥
अब सबु आँखिन्ह देखेउँ आई । जिअत जीव जइ सबइ सहाई ॥
जिन्हहि निरखि मग साँपिनि बीछी । तजहिं बिपम विप्रतामस तीछी ॥

दो०—तेइ रघुनंदनु लखनु सिय अनहित लागे जाहि ।

तासु तनय तजि दुसह दुख दैउ सहावइ काहि ॥२६२॥

मुनि अति बिकल भरत बर बानी । आरति प्रीति बिनय नय सानी
सोक मगन सब सभाँ खभारू । मनहुँ कमल बन परेउ तुसारू ॥
कहि अनेक बिधि कथा पुरानी । भरत प्रबोधु कीन्ह मुनि ग्यानी ॥
बोले उचित बचन रघुनंदू । दिनकर कुल कैरव बन चंदू ॥

तात जायँ जियँ करहु गलानी । ईम अधीन जीव गति जानी ॥
 तीनि काल तिष्ठुअन मत मोरें । पुन्यसिलोक तात तर तोरें ॥
 उर आनत तुम्ह पर कुटिलाई । जाइ लोक परलोक नसाई ॥
 दोसु देहिं जननिहि जड़ तेई । जिन्ह गुरसाधु सभानहिं सेई ॥

दो०—मिटिहहिं पाप प्रपंच सब अखिल अमंगल भार ।

लोक सुजसु परलोक मुखु सुमिरत नामु तुम्हार ॥२६३॥

कहउँ सुभाउ सत्य सिव साखी । भरत भूमिरह राउरि राखी ॥
 तात कुतरक करहु जनि जाएँ । बैर पेम नहिं दुगइ दुराएँ ॥
 मुनि गन निकट बिहग मृग जाहीं । बाधक बधिक बिलोकि पराहीं ॥
 हित अनहित पसु पच्छिउ जाना । मानुष तनु गुन ग्यान निधाना ॥
 तात तुम्हहिं मैं जानउँ नीकें । करौं काह असमंजस जीकें ॥
 राखेउ रायँ सत्य मोहि त्यागी । तनु परिहरेउ पेम पन लागी ॥
 तासु बचन मेटत मन सोचू । तेहि तें अधिक तुम्हार सँकोचू ॥
 तापर गुर मोहि आयसु दीन्हा । अवसि जो कहहु चहउँ सोइ कीन्हा ॥

दो०—मनु प्रसन्न करि सकुच तजि कहहु करौं सोइ आजु ।

सत्यसंधं रघुबर बचन सुनि भा सुखी समाजु ॥२६४॥

सुर गन सहित सभय सुरराजू । सोचहिं चाहत होन अकाजू ॥
 बनत उपाउ करत कछु नाहीं । राम सरन सब गे मन माहीं ॥
 बहुरि बिचारि परस्पर कहहीं । रघुपति भगत भगति बस अहहीं ॥
 सुधि करि अंबरीष दुरबासा । भेसुर सुरपति निपट निरासा ॥
 सहे सुरन्ह बहु काल विषादा । नरहरि किए प्रगट प्रहलादा ॥
 लगि लगि कान कहहिं धुनि माथा । अब सुर काज भरत के हाथा ॥

आन उपाउ न देखिअ देवा । मानत राम सुसेवक सेवा ॥
हियँ सगेम सुमिरहु सब भरतहि । निज गुन सील राम बस करतहि
दो०—सुनि सुर मत सुरगुर कहेउ भल तुम्हार बड़ भागु ।

सकल सुमंगल मूल जग भरत चरन अनुरागु ॥२६५॥

सीतापति सेवक सेवकाई । कामधेनु सय सरिस सुहाई ॥
भरत भगति तुम्हरें मन आई । तजहु सोचु बिधि बात बनाई ॥
देखु देवपति भरत प्रभाऊ । सहज सुभायँ बिवस रघुराऊ ॥
मन थिर करहु देव डरु नाही । भरतहि जानि राम परिछाहीं ॥
सुनि सुरगुर सुर संमत सोचू । अंतरजामी प्रभुहि सकौचू ॥
निज सिरभारु भरत जियँ जाना । करत कोटि बिधि उर अनुमाना
करि विचारु मन दीन्ही ठीका । राम रजायस आपन नीका ॥
निज पन तजि राखेउ पनु मोरा । छोडू सनेहु कीन्ह नहि थोरा ॥

दो०—कीन्ह अनुग्रह अमित अति सब बिधि सीतानाथ ।

करि प्रनाम बोले भरत जोरि जलज जुग हाथ ॥२६६॥

कहाँ कदावों का अब स्वामी । कृपा अंबुनिधि अंतरजामी ॥
गुर प्रसन्न साहिब अनुकूला । मिटी मलिन मन कलपित छला ॥
अपडर डरेउँ न सोच समूलें । रबिहि न दोसु देव दिसि भूलें ॥
मोर अभागु मातु कुटिलाई । बिधि गति बिषय काल कठिनाई ॥
पाउ रोपि सब मिलि मोहि घाला । प्रनतपाल पन आपन पाला ॥
यह नइ रीति न राउरि होई । लोकहुँ बेद बिदित नहि गोई ॥
जगु अनभल भल एकु गोसाई । कहिअ होइ भल कासु भलाई ॥
देउ देवतरु सरिस सुभाऊ । सनमुख बिमुख न काहुहि काऊ ॥

दो०—जाइ निकट पहिचानि तरु छाहँ समनि सब सोच ।

मागत अभिमत पाव जग राउ रंकु भल पोच ॥२६७॥

लखि सब विधि गुर स्वामि सनेहू । मिटेउ छोभु नहिं मन संदेहू ॥
अब अरुनाकर कीजिअ सोई । जन हित प्रभु चित छोभु न होई ॥
जो सेवकु साहिबहि सँकोची । निज हित चहइ तासु मति पोची ॥
सेवक हित साहिब सेवकाई । करै सकल सुख लोभ बिहाई ॥
स्वारथु नाथ फिरें सबही का । किँए रजाइ कोटि बिधि नीका ॥
यह स्वारथु परभारथ सारू । सकल सुकृत फल सुगति सिंगारू ॥
देव एक बिनती सुनि मोरी । उचित होइ तस करब बहोरी ॥
तिलक समाजु साजि सबु आना । करिअ सुफल प्रभु जौं मनु माना

दो०—सानुज पटइअ मोहि बन कीजिअ सबहि सनाथ ।

नतरु फेरिअहिं वंधु दोउ नाथ चल्यौं मैं साथ ॥२६८॥

नतरु जाहिं बन तीनिउ भाई । बहुरिअ सीय सहित रघुराई ॥
जेहि बिधि प्रभु प्रसन्न मन होई । करुना सागर कीजिअ सोई ॥
देवँदीन्ह सबु मोहि अमारू । मोरें नीति न धरम बिचारू ॥
कहउँ बचन सब स्वारथ हेतू । रहत न आरत कैं चित चेतू ॥
उतरु देइ सुनि स्वामि रजाई । सो सेवकु लखि लाज लजाई ॥
अस मैं अवगुन उदधि अगाधू । स्वामि सनेहँ सराहत साधू ॥
अब कृपाल मोहि सो मत भावा । सकुच स्वामि मन जाइँ न पावा ॥
प्रभु पद सपथ कहउँ सति भाऊ । जग मंगल हित एक उपाऊ ॥

दो०—प्रभु प्रसन्न मन सकुच तजि जो जेहि आयसु देव ।

सो सिर धरि धरि करिहि सबु मिटिहि अनट अवरेब ॥२६९॥

भरत बचन सुचि सुनि सुर हरषे । साधु सराहि सुमन सुर वरषे ॥
 असमंजस बस अवध नेवासी । प्रमुदित मन तापस बनबासी ॥
 चुपहिं रहे रघुनाथ सँकोची । प्रभु गति देखि सभा सब सोची ॥
 जनक दूत तेहि अवसर आए । मुनि बसिष्ठ सुनि बेगि बोलाए ॥
 करि प्रनाम तिन्ह रामु निहारे । बेषु देखि भए निपट दुखारे ॥
 दूतन्ह मुनिबर बूझी बाता । कहहु बिदेह भूप कुसलाता ॥
 सुनि सकुचाइ नाइ महि माथा । बोले चर बर जोरें हाथा ॥
 बूझब राउर सादर साई । कुसल हेतु सो भयउ गोसाई ॥

दो०—नाहिं त कोसल नाथ कैं साथ कुसल गइ नाथ ।

मिथिला अवध बिसेष तें जगु सब भयउ अनाथ ॥ २७० ॥

कोसलपति गति सुनि जनकौरा । भे सब लोक सोक बस बौरा ॥
 जेहि देखे तेहि समय बिदेह । नामु सत्य अस लाग न केहू ॥
 रानि कुचालि सुनत नरपालहि । सुझ न कछु जस मनि बिनु व्यालहि ॥
 भरत राज रघुबर बनबास । भा मिथिलेसहि हृदयँ हराँस ॥
 नृप बूझे बुध सचिव समाजू । कहहु बिचारि उचित का आजू ॥
 समुझि अवध असमंजस दोऊ । चलिअ किरहिअ न कह कछु कोऊ ॥
 नृपहिं धीर धरि हृदयँ बिचारी । पठए अवध चतुर चर चारी ॥
 बूझि भरत सति भाउ कुभाऊ । आएहु बेगि न होइ लखाऊ ॥

दो०—गए अवध चर भरत गति बूझि देखि करतूति ।

चले चित्रकूटहि भरतु चार चले तैरहति ॥ २७१ ॥

दूतन्ह आइ भरत कह करनी । जनक समाज जथामति बरनी ॥
 सुनि गुर परिजन सचिव महीपति । भे सब सोच सनेहँ बिकल अति

धरि धीरजु करि भरत बड़ाई । लिए सुभट साहनी बोलाई ॥
 घर पुर देस राखि रखवारे । हय गयरथ बहु जान सँवारे ॥
 दुधरी साधि चले ततकाला । किए बिश्रामुन मग महिपाला ॥
 भोरहिं आजु नहाइ प्रयागा । चले जमुन उतरन सबु लागा ॥
 खबरि लेन हम पठए नाथा । तिन्ह कहि असि महि नायउ माथा ॥
 साथ किरात छ सातक दीन्हे । मुनिबर तुरत बिदा चर कीन्हे ॥

दो०—सुनत जनक आगवनु सबु हरषेउ अवध समाजु ।

रघुनंदनहि मकोचु बड़ सोच बिचस मुरराजु ॥ २७२ ॥

गरइ गलानि कुटिल कैकेई । काहि कहै केहि दूषनु देई ॥
 अस मन आनि मुदित नर नारी । भयउ बहोरिरहब दिन चारी ॥
 एहि प्रकार गत वासर सोऊ । प्रात नहान लाग सबु कोऊ ॥
 करि मज्जनु पूजहिं नर नारी । गनप गौरि तिपुरारि तमारी ॥
 रमा रमन पद वंदि बहोरी । बिनवहिं अंजुलि अंचल जोरी ॥
 राजा रामु जानकी रानी । आनँद अवधि अवध गजधानी ॥
 सुबस बसउ फिरि सहित समाजा । भरतहि रामु करहुँ जुबराजा ॥
 एहि सुख सुधँसींचि सब काहू । देव देहु जग जीवन लाहू ॥

दो०—गुर समाज भाइन्ह सहित राम राजु पुर होउ ।

अछन राम राजा अवध मरिअ माग मव कोउ ॥ २७३ ॥

सुनि सनेहमय पुरजन बानी । निंदहिं जोग विरति मुनि ग्यानी ॥
 एहि बिधि नित्य करम करि पुरजन । रामहिं करहिं प्रनाम पुलकितन ॥
 ऊँच नीच मध्यम नर नारी । लहहिं दरसु निज निज अनुहारी ॥
 सावधान सबही सनमानहिं । सकल सराहत कृपानिधानहिं ॥

लरिकाइहि लें रघुवर बानी । पालत नीति प्रीति पहिचानी ॥
सील सकोच सिंधु रघुराऊ । सुमुख सुलोचन सरल सुभाऊ ॥
कहत राम गुन गन अनुरागे । सब निज भाग सराहन लागे ॥
हम सम पुन्य पुंज जग थोरे । जिन्ह हिरामु जानत करि मोरे ॥

दो०—प्रेम मगन तेहि समय सब मुनि आवत मिथिलेमु ।

सहित सभा संभ्रम उठेउ रबिकुल कमल दिनेमु ॥ २७४ ॥

भाइ सचिव गुर पुरजन साथा । आगें गवनु कीन्ह रघुनाथा ॥
गिरिबरु दीख जनकपति जबहीं । करि प्रनामु रथ त्यागेउ तबहीं ॥
राम दरस लालसा उछाहू । पथ भ्रम लेसु कलेसु न काहू ॥
मन तहँ जहँ रघुवर बैदेही । विनु मन तन दुख सुख सुधि केही
आवत जनकु चले एहि भाँती । सहित समाज प्रेम मति माती ॥
आए निकट देखि अनुरागे । सादर मिलन परमपर लागे ॥
लगे जनक मुनिजन पद बंदन । रिषिन्ह प्रनामु कीन्ह रघुनंदन ॥
भाइन्ह सहित रामु मिलि राजहि । चले लवाइ समेत समाजहि ॥

दो०—आश्रम सागर सांत रस पूरन पावन पाथु ।

सेन मनहुँ करुना सरित लिपैं जाहिं रघुनाथु ॥ २७५ ॥

बोरति ग्यान बिराग करारे । बचन ससोक मिलत नदनारे ॥
सोच उसास समीर तरंगा । धीरज तट तरुवर कर भंगा ॥
बिषम बिपाद तोरावति धारा । भय भ्रम भवँ अवर्त अपारा ॥
केवट बुध बिद्या बड़ि नावा । सकहिं न खेइ ऐक नहिं आवा ॥
बनचर कोल किरात बिचारे । थके बिलोकि पथिक हियँ हारे ॥
आश्रम उदधि मिली जब जाई । मनहुँ उठेउ अंबुधि अकुलाई ॥

सोक बिकल दोउ राजसमाजा । रहा न ग्यानु न धीरजु लाजा॥
भूप रूप गुन सील सराही । रोवहिं सोक सिंधु अवगाही ॥

छं०—अवगाहि सोक समुद्र सोचहिं नारि नर न्याकुल महा ।
दै दोष सकल सरोष बोलहिं वाम विधि कीन्हो कहा ॥
सुर सिद्ध तापस जोगिजन मुनि देखि दसा विदेह की ।
तुलसी न ममरथु कोउ जो तरि सकै सरित सनेह की ॥
सो०—किण अमित उपदेस जहँ तहँ लोगन्ह मुनिवरन्ह ।
धीरजु धरिअ नरेस कहेउ बसिष्ठ विदेह सन ॥२७६॥

जासु ग्यानु रबि भव निसि नासा।बचन किरन मुनि कमल बिकास।
तेहि कि मोह ममता निअराई । यह सिय राम सनेह बड़ाई ॥
बिषई साधक सिद्ध सयाने । त्रिविध जीव जग बेद बखाने ॥
राम सनेह सरस मन जासू । साधु सभाँ बड़ आदर तासू ॥
सोह न राम पेम बिनु ग्यानु । करनधार बिनु जिमि जल जानू ॥
मुनि बहुविधि बिदेहु समुझाए । राम घाट सब लोग नहाए ॥
सकल सोक संकुल नर नारी । सो बासरु बीतेउ बिनु बारी ॥
पसु खग मृगनेह न कीन्ह अहारू।प्रिय परिजन कर कौन बिचारू॥

दो०—दोउ समाज निमिराजु रघुराजु नहाने प्रात ।
वैठे सब बट बिटप तर मन मलीन कस गात ॥२७७॥

जे महिसुर दसरथ पुर बासी । जे मिथिलापति नगर निवासी ॥
हंस बंस गुर जनक पुरोधा । जिन्ह जग मग परमारथु सोधा॥
लगे कहन उपदेस अनेका । सहित धरम नय बिरति बिबेका॥
कौसिक कहि कहि कथा पुरानी । समुझाई सब सभा सुबानी ॥

तब रघुनाथ कौसिकहि कहेऊ । नाथ कालि जल बिनु सबुरहेऊ ॥
मुनि कह उचित कहत रघुराई । गयउ बीति दिन पहर अढ़ाई ॥
रिषि रुख लखि कह तेरहुतिराजू । इहाँ उचित नहिँ असन अनाजू ॥
कहा भूप भल सबहिँ सोहाना । पाइ रजायसु चले नहाना ॥

दो०—तेहि अवसर फल फूल दल मूल अनेक प्रकार ।

लइ आए वनचर विपुल भरि भरि काँवरि भार ॥२७८॥

कामद भे गिरि राम प्रसादा । अवलोकत अपहरत विषादा ॥
सर सरिता वन भूमि विभागा । जनु उमगत आनंद अनुरागा ॥
बेलि बिटप सब सफल सफूला । बोलत खग मृग अलि अनुकूला ॥
तेहि अवसर वन अधिक उछाहू । त्रिविध समीर सुखद सब काहू ॥
जाइ न बरनि मनोहरताई । जनु महि करति जनक पहुनाई ॥
तब सब लोग नहाइ नहाई । राम जनक मुनि आयसु पाई ॥
देखि देखि तरुवर अनुरागे । जहँ तहँ पुरजन उतरन लागे ॥
दल फल मूल कंद विधि नाना । पावन सुंदर सुधा समाना ॥

दो०—सादर सब कहँ रामगुर पठए भरि भरि भार ।

पूजि पितर सुर अतिथि गुर लगें करन फरहार ॥२७९॥

एहि विधि वासर बीते चारी । रामु निरखि नर नारि सुखारी ॥
दुहु समाज अक्षिरुचि मन माहीं । बिनु सिय राम फिरब भल नाहीं ॥
सीता राम संग वनवास । कोटि अमरपुर सरिस सुपास ॥
परिहरि लखन रामु बैदेही । जेहि घरु भाव बाम विधि तेही ॥
दाहिन दइउ होइ जब सबही । राम समीप बसिअ वन तबही ॥
मंदाकिनि मजनु तिहु काला । राम दरसु मुद मंगल माला ॥

अटनु राम गिरि बन तापस थल । असनु अमिअ सम कंद मूल फल
सुख समेत संबत दुइ साता । पल सम होहि न जनि अहि जाता

दो०—एहि सुख जोग न लोग सब कहहि कहाँ अस भागु ।

सहज सुभायँ समाज दुहु राम चरन अनुरागु ॥२८०॥

एहि विधिसकल मनोरथ करहीं । बचन सप्रेम सुनत मन हरहीं ॥
सीय मातु तेहि समय पठाई । दासी देखि सुअवसरु आई ॥
सावकास सुनि सब सिय सासू । आयउ जनकराजरनिवासू ॥
कौसल्याँ सादर सनमानी । आसन दिए समय सम आनी ॥
सोलु सनेहु सकल दुहु आरा । द्रवहि देखि सुनि कुलिस कठोरा
पुलक सिथिल तन बारि बिलोचन । महि नख लिखन लगीं सब सोचन
सब सिय राम प्रीति किसि मूरति । जनु करुना बहु बेष बिसरति ॥
सीय मातु कह विधि बुधि बाँकी । जो पय फेनु फोर पबि टाँकी ॥

दो०—सुनिअ सुधा देखिअहिं गरल सब करतूति कराल ।

जहँ तहँ काक उलूक वक मानस सकुन मराल ॥२८१॥

सुनि ससोच कहूँ देवि सुमित्रा । विधि गति बड़ि विपरीत विचित्रा
जो सृजि पालइ हरइ बहोरी । बाल केलि सम विधि मति भोरी ॥
कौसल्या कह दोसु न काहू । करम बिबस दुख सुख छति लाहू ॥
कठिन करम गति जान बिधाता । जो सुभ असुभ सकल फल दाता
ईस रजाइ सीस सबही कें । उतपति थिति लय बिषहु अमी कें
देवि मोह बस सोचिअ बादी । विधि प्रपंचु अस अचल अनादी ॥
भूपति जिअब मरब उर आनी । सोचिअ सखिलखि निज हित हानी
सीय मातु कह सत्य सुबानी । सुकृती अवधि अवधपति रानी ॥

दो०—लखनु रामु सिध जाहुँ वन भल परिनाम न पोचु ।

गहवरि हियँ कह कौसिला मोहि भरत कर सोचु ॥२८२॥

ईस प्रसाद असीस तुम्हारी । सुत सुतबधू देवसरि बारी ॥
गम सपथ में कीन्हि न काऊ । सो करि कहउँ सखी सति भाऊ ॥
भरत सील गुन विनय बढ़ाई । भायप भगति भरोस भलाई ॥
कहत सारदहु कर मति हीचे । सागर सीप कि जाहिं उलीचे ॥
आनउँ सदा भरत कुलदीपा । बार बार मोहि कहेउ महीपा ॥
कसैं कनकु मनि पारिखि पाएँ । पुरुष परिखिअहिं समयँ सुभाएँ ॥
अनुचित आजु कहव अस मोरा । सोऊ सनेहँ सयानप थोरा ॥
सुनि सुरसरि सम पावनि बानी । भई सनेह बिकल सब रानी ॥
दो०—कौसल्या कह धीर धरि सुनहु देवि मिथिलेसि ।

को विवेकनिधि यल्लभहि तुम्हहि सकइ उपदेसि ॥२८३॥

गनि राय सन अवसरु पाई । अपनी भाँति कहव समुझाई ॥
रखिअहिं लखनु भरतु गवनहिं बन । जौं यह मत मानै महीप मन ॥
तौ भल जतनु करव सुबिचारी । मोरें सोचु भरत कर भारी ॥
गूढ़ सनेह भरत मन माहीं । रहैं नीक मोहि लागत नाहीं ॥
लखि सुभाउ सुनि सरल सुवानी । सब भइ मगन करुन रस रानी ॥
नभ प्रमून झरि धन्य धन्य धुनि । सिथिल सनेहँ सिद्ध जोगी मुनि ॥
सबु रनिवासु बिथकि लखि रहेऊ । तब धरि धीर सुमित्राँ कहेऊ ॥
देबि दंड जुग जामिनि बीती । राम मातु सुनि उठी सप्रीती ॥

दो०—वैगि पाउ धारिअ थलहि कह सनेहँ सतिभाय ।

हमरें तौ अव ईस गति कै मिथिलेस सहाय ॥२८४॥

लखि सनेह सुनि बचन बिनीता । जनकप्रिया गह पाय पुनीता ॥
 देबि उचित असि बिनय तुम्हारी । दसरथ धरिनि राम महतारी ॥
 प्रभु अपने नीचहु आदरहीं । अग्नि धूम गिरि सिर तिनु धरहीं
 सेवकु राउ करम मन बानी । सदा सहाय महेसु भवानी ॥
 रउरे अंग जोगु जग को है । दीप सहाय कि दिनकर सोहै ॥
 रामु जाइ बनु करि सुर काजू । अचल अवधपुर करिहहि राजू ॥
 अमर नाग नर राम बाहुबल । सुख बसिहहि अपने अपने थल ॥
 यह सब जागबलिक कहि राखा । देवि न होइ मुधा मुनि भाषा ॥

दो०—अस कहि पग परि पेम अनि सिय हित बिनय सुनाइ ।

सिय संमत सियमातु तब चली सुआयसु पाइ ॥२८५॥

प्रिय परिजनहि मिली बैदेही । जो जेहि जोगु भाँति तेहि तेही ॥
 तापस बेष जानकी देखी । भासबु बिकल विषाद बिसेषी ॥
 जनक राम गुर आयसु पाई । चले थलहि सिय देखी आई ॥
 लीन्हि लाइ उर जनक जानकी । पाहुनि पाषन पेम प्रान की ॥
 उर उमगेउ अंबुधि अनुरागू । भयउ भूप मनु मनहुँ पयागू ॥
 सिय सनेह बडु बाढ़त जोहा । ता पर राम पेम सिसु सोहा ॥
 चिरजीवी मुनि ग्यान बिकल जनु । बूढ़त लहेउ बाल अवलंबनु ॥
 मोह मगन मति नहि बिदेह की । महिमा सिय रघुवर सनेह की ॥

दो०—सिय पितु मातु सनेह बस बिकल न सकी सँभारि ।

धरनि सुताँ धीरजु धरेउ समउ सुधरमु बिचारि ॥२८६॥

तापस बेष जनक सिय देखी । भयउ पेशु परितोषु बिसेषी ॥
 पुत्रि पबित्र किए कुल दोऊ । सुजस धवल जगु कह सबु कोऊ ॥

जिति सुगसरि कीरति सरि तोरी । गवनु कीन्ह बिधि अंड करोरी ॥
गंग अवनि थल तीनि बड़ेरे । एहिं किए साधु समाज घनेरे ॥
पितु कह सत्य सनेहँ सुबानी । सीय सकुच महुँ मनहुँ समानी ॥
पुनि पितु मातु लीन्हि उर लाई । सिग्व आसिष हित दीन्हि सुहाई ॥
कहतिन सीय सकुचि मन माहीं । इहाँ वमव रजनीं भल नाही ॥
लखि रुख रानि जनायउ राऊ । हृदयँ सगाहत सीलु सुभाऊ ॥
दो० - बार बार मिलि भेंटि सिय विदा कीन्हि सनमानि ।

कही समय सिर भरत गति रानि सुवानि सयानि ॥ २८७ ॥
सुनि भूपाल भरत व्यवहारू । मोन सुगंध सुधा ससि मारू ॥
मूंद सजल नयन पुलके तन । सुजमु सराहन लगे मुदित मन ॥
सावधान सुनु सुमुखि मुलों चनि । भरत कथा भव बंध विमोचनि ॥
धरम राजनय ब्रह्मविचारू । इहाँ जथामति मोर प्रचारू ॥
सो मति मोरि भरत महि माही । कहै काह ललि लुअति न छाँही ॥
विधि गन गति अटि एति सिव सारद । कवि कविद बुध मुद्रि विसारद ॥
भरत चरित कीरति कस्तूती । धरम सील पुन विमल विभूती ॥
समुझत मुनत मुखद सब काहू । सुनि सुगसरि रुचि निदर सुधाहू ॥

दो० - निरवधि गुन निरुपम पुरुष भरतु भरत सम जानि ।

कहिअ सुमेरु कि सेंर सम कविकुल मति सकुवानि ॥ २८८ ॥

अगम सबहि बरनत बरबग्नी । जिमि जलहीन मीन गमु धरनी ॥
भरत अमित महिमा सुनु रानी । जानहिं गमु न सकहिं बखानी ॥
बरनि सप्रेम भरत अनुभाऊ । तिय जिय की रुचि लखि कह राऊ ॥
बहुरहिं लखनु भरतु बन जाहीं । सब कर भल सब के मन माहीं ॥

देवि परंतु भरत रघुवर की। प्रीति प्रतीति जाइ नहिं तरकी॥
 भरतु अवधि सनेह ममता की। जद्यपि रामु सीम समता की॥
 परमारथ स्वारथ सुख सारे। भरत न सपनेहुँ मनहुँ निहारे॥
 साधन सिद्धि राम पग नेहू। मोहिलखि परत भरत मतएहू॥
 दो०—भोरेहुँ भरत न पेलिहहिं मनसहुँ राम रजाइ ।

करिअ न सोचु सनेह बस कहेउ भूप बिलखाइ ॥२८९॥

राम भरत गुन गनत सप्रीती। निसि दंपतिहि पलक सम बीती॥
 राज समाज प्रात जुग जागे। न्हाइ न्हाइ सुर पूजन लागे॥
 गे नहाइ गुर पहिं रघुराई। बंदि चरन बोले रुख पाई॥
 नाथ भरतु पुरजन महतारी। सोक बिकल बनबास दुखारी॥
 सहित समाज राउ मिथिलेख। बहुत दिवस भए सहत कलेख॥
 उचित होइ सोइ कीजिअ नाथा। हित सबही कर रौरें हाथा॥
 अस कहि अति सकुचे रघुराऊ। मुनि पुलके लखि सीलु सुभाऊ॥
 तुम्ह बिनु राम सकल सुख साजा। नरक सरिस दुहु राज समाजा॥

दो०—प्राण प्राण के जीव के जिव सुख के सुख राम ।

तुम्ह तजि तात सोहात गृह जिन्हहि तिन्हहि विधि बाम॥२९०॥

सो सुखु करमु धरमु जरि जाऊ। जहँ न राम पद पंकजभाऊ॥
 जोगु कुजोगु ग्यानु अग्यानु। जहँ नहिं राम पेम परधानू ॥
 तुम्ह बिनु दुखी सुखी तुम्ह तेहीं। तुम्ह जानहु जिय जो जेहि केहीं
 राउर आयसु सिर सबही कें। बिदित कृपालहि गति सब नीकें
 आपु आश्रमहि धारिअ पाऊ। भयउ सनेह सिथिल मुनिराऊ॥
 करि प्रनामु तब रामु सिधाए। रिषि धरि धीरजनक पहिं भाए॥

राम बचन गुरु नृपहि सुनाए। सील सनेह सुभायँ सुहाए ॥
महाराज अब कीजिअ सोई। सब कर धरम सहित हित होई॥

दो०—ग्यान निधान सुजान सुचि धरम धीर नरपाल ।

तुम्ह बिनु असमंजस समन को समरथ एहि काल ॥२९१॥

मुनि मुनि बचन जनक अनुरागे। लखि गति ग्यानु बिरागु बिरागे॥
सिथिल सनेहँ गुनत मन माहीं। आए इहाँ कीन्ह भल नाहीं॥
रामहि रायँ कहेउ बन जाना। कीन्ह आपु प्रिय प्रेम प्रवाना॥
हम अब बन तें बनहि पठाई। प्रमुदित फिरब बिबेक बड़ाई॥
तापस मुनि महिसुर सुनि देखी। भए प्रेम बस बिकल बिसेषी॥
समउ समुझि धरि धीरजु राजा। चले भरत पहिँ सहित समाजा॥
भरत आइ आगें भइ लोन्हे। अवसर सरिस सुआसन दीन्हे॥
तात भरत कह तेरहुति राऊ। तुम्हहि बिदित रघुवीर सुभाऊ॥

दो०—राम सत्यव्रत धरम रत सब कर सीलु सनेहु ।

संकट सहत सकोच बस कहिअ जो आयसु देहु ॥२९२॥

मुनि तन पुलकि नयन भरि बारी। बोले भरतु धीर धरि भारी ॥
प्रभु प्रिय पूज्य पिता सम आपू। कुलगुरु सम हित माय न बापू॥
कौसिकादि मुनि सचिव समाजू। ग्यान अंबुनिधि आपुनु आजू॥
सिसु सेवकु आयसु अनुगामी। जानि मोहि सिख देइअ स्वामी॥
एहिँ समाज थल बूझब राउर। मौन मलिन मैं बोलब बाउर॥
छोटे बदन कहउँ बड़ि बाता। छमब तात लखि बाम बिधाता॥
आगम निगम प्रसिद्ध पुराना। सेवाधरमु कठिन जगु जाना॥
स्वामि धरम स्वारथहि बिरोधू। बैरु अंध प्रेमहि न प्रबोधू॥

दो०—राखि राम रुख धरमु ब्रतु पराधीन मोहि जानि ।

सब के संमत सर्व हित करिअ पेमु पहिचानि ॥२९३॥

भरत बचन सुनि देखि सुभाऊ। सहित समाज सराहत राऊ॥
सुगम अगम मृदु मंजु कठोर। अरथु अमित अति आखर थोर॥
ज्यों मुखु मुकुर मुकुरु निज पानी। गहि न जाइ अस अद्भुत बानी
भूप भरतु मुनि सहित समाजू। गेजहँ बिबुध कुमुद द्विजराजू॥
सुनि सुधि सोच बिकल सब लोगा। मनहुँ मीन गन नव जल जोगा
देवँ प्रथम कुलगुर गति देखी। निरखि बिदेह सनेह बिसेषी॥
राम भगतिमय भरतु निहारे। सुर स्वारथी हरि हियँ हारे
सब कोउ राम पेममय पेखा। भए अलख सोच बस लेखा॥

दो०—रामु सनेह सकोच बस कह ससोच सुरराजु ।

रचहु प्रपंचहि पंच मिलि नाहिं त भयउ अज्ञाजु ॥२९४॥

सुरन्ह सुमिरि सारदा सराही। देवि देव सरनागत पाही ॥
केरि भरत मति करि निज माया। पालु बिबुध कुल कमि छलाया
बिबुध बिनय गुनि देवि सयानी। बोली सुर स्वारथ जड़ जानी ॥
मो मन कहहु भरत मति फेरु। लोचन सहस न स्रष्टु सुमेरु॥
बिधि हरि हर माया बाँड़ भारी। मोउ न भरत मति सकइ निहारी
सो मति मोहि कहत करु भारी। चंदिनिकर किंचंडकर चोरी ॥
भरत हृदयँ सिय राम निवासू। तहाँ कतिमिर जहँ तरनि प्रकासू
अस काह सारद गइ बिधि लोका। बिबुध बिकल निमि मानहुँ कोका

दो०—सुर स्वारथी मलीन मन कीन्ह कुमंत्र कुठाटु ।

रचि प्रपंच माया प्रबल भय भ्रम अरति उचाटु ॥२९५॥

करि कुचालि सोचत सुरराजू । भरत हाथ सबुकाजु अकाजू ॥
गए जनकु रघुनाथ समीपा । सनमाने सबरबिकुल दीपा ॥
समय समाज धरम अबिरोधा । बोले तव रघुवंस पुरोधा ॥
जनक भरत संवाद सुनाई । भरत कहाउति कही सुहाई ॥
तान गम जस आयसु टेहू । सो सबु कर मोर मत एहू ॥
सुनिरघुनाथ जोरि जुग पानी । बोले सत्य सरल मृदु बानी ॥
बिद्यमान आपुनि मिथिलेसू । मोर कहव सब भौंति भदेसू ॥
राउर राय रजायसु होई । राउरि सपथ सही सिर सोई ॥

दो०—राम सपथ सुनि मुनि जनकु सकुचे सभा समेत ।

सकल विलोक्त भरत मुखु वनइ न ऊतरु देत ॥२९६॥

सभा सकुच बस भरत निहारी । रामबंधु धरि धीरजु भारी ॥
कुसमउ देखि सनेहु मँभारा । बढ़त बिंधि जिमि घटजनिवारा ॥
सोक कनक लांचन मति छोदी । हरी बिमल गुन गन जग जोनी ॥
भरत बिबेक बराहँ विसाला । अनायास उधरी तेहि काला ॥
करि प्रनामु सव कहँ कर जोरे । रामु राउ गुर साधु निहोरे ॥
छमव आजु अति अनुचित मोरा । कहँ बदन मृदु बचन कठोरा ॥
हियँ सुमिरी सारदा सुहाई । मानस ते मुख पंकज आई ॥
बिमल बिबेक धरम नय साली । भरत भारती मंजु मराली ॥

दो०—निरखि बिबेक विलोचनन्हि सिथिल सनेहँ समाजु ।

करि प्रनामु बोले भरतु सुमिरि सीय रघुराजु ॥२९७॥

प्रभु पितु मातु सुहृद गुर स्वामी । पूज्य परम हित अंतरजामी ॥
सरल सुसाहिबु सील निधानू । प्रनतपाल सर्वग्य सुजानू ॥

समरथ सरनागत हितकारी । गुनगाहकु अवगुन अध हारी ॥
 स्वामि गोसाँइहिसरिस गोसाँइ । मोहि समान मैं साँइ दोहाँइ ॥
 प्रभु पितु बचन मोह बस पेली । आयउँ इहाँ समाजु सकेली ॥
 जग भल पोच ऊँच अरु नीचू । अमिअ अमरपद माहुरु मीचू ॥
 राम रजाइ मेट मन माहीं । देखा सुना कतहुँ कोउ नाहीं ॥
 सो मैं सब बिधि कीन्हि ढिठाई । प्रभु मानी सनेह सेवकाई ॥
 दो०—कृपाँ भलाँ आपनी नाथ कीन्ह भल मोर ।

दूषन भे भूपन सरिस सुजमु चारु चहु ओर ॥२९८॥

राउरि रीति सुबानि बड़ाई । जगत बिदित निगमागम गाई ॥
 कूर कुटिल खल कुमति कलंकी । नीच निसील निरीस निसंकी ॥
 तेउ सुनि सरन साधुहँ आए । सकृत् प्रनामु किहँ अपनाए ॥
 देखि दोष कबहुँ न उर आने । सुनि गुन साधु समाज बखाने ॥
 को साहिब सेवकहि नेवाजी । आपु समाज साज सब साजी ॥
 निज करतूति न समझिअ सपनें । सेवक सकुच सोचु उर अपने ॥
 सां गोसाँइ नहिँ दूसर कोपी । भुजा उठाइ कहउँ पन रोपी ॥
 पसु नाचत सुक पाठ प्रवीना । गुन गति नट पाठक आधीना ॥

दो०—यों सुधारि सनमानि जन किए साधु सिरमोर ।

को कृपाल बिनु पालिहै बिरिदावलि बरजोर ॥२९९॥

सोक सनेहँ कि बाल सुभाएँ । आयउँ लाइ रजायसु बाएँ ॥
 तबहुँ कृपाल हेरि निज ओरा । सबहि भाँति भल मानेउ मोरा ॥
 देखेउँ पाय सुमंगल मूला । जानेउँ स्वामि सहज अनुकूला ॥
 बड़ें सम्राज बिलोकेउँ भागू । बड़ीं चूक साहिब अनुरागू ॥

कृपा अनुग्रह अंगु अघाई । कीन्हि कृपानिधि सब अधिकारै ॥
 राखा मोर दुलार गोसाईं । अपने सील सुभायँ भलाई ॥
 नाथ निपट मैं कीन्हि ठिठारै । स्वामि समाज सकोच बिहारै ॥
 अबिनय बिनय जथारुचि बानी । छमिहि देउ अति आरति जानी ॥

दो०—सुहृद सुजान सुसाहिबहि बहुत कहब बड़ि खोरि ।

आयसु देइअ देव अत्र सबइ सुधारि मोरि ॥३००॥

प्रभु पद पदुम पराग दोहाई । सत्य सुकृत सुख सीवँ सुहाई ॥
 सो करि कहउँ हिए अपने की । रुचि जागत सोवत सपने की ॥
 सहज सनेह स्वामि सेवकाई । स्वारथ छल फल चारि बिहारै ॥
 अग्या सम न सुसाहिब सेवा । सो प्रसादु जन पावै देवा ॥
 अस कहि प्रेम बिबस भए भारी । पुलक सरीर बिलोचन बारी ॥
 प्रभु पद कमल गहे अकुलाई । समउ सनेहु न सो कहि जाई ॥
 कृपासिंधु सनमानि सुबानी । बैठाए समीप गहि पानी ॥
 भरत बिनय सुनि देखि सुभाऊ । सिथिल सनेहँ सभारघुराऊ ॥

छं०—रघुराउ सिथिल सनेहँ साधु समाज मुनि मिथिला धनी ।

मन महुँ सराहत भरत भायप भगति की महिमा धनी ॥

भरतहि प्रसंसत बिबुध बरषत सुमन मानस मलिन से ।

तुलसी बिकल सब लोग सुनि सकुचे निसागम नलिन से ॥

सो०—देखि दुखारी दीन दुहु समाज नर नारि सब ।

मधवा महा मलीन मुए मारि मंगल चहत ॥३०१॥

कपट कुचालि सीवँ सुरराजू । पर अकाज प्रिय आपन काजू ॥
 काक समान पाकरिपु रीती । छली मलीन कतहुँ न प्रतीती ॥

प्रथम कुमत करि कपटु सँकेला । सो उचाडु सब कै सिर मेला ॥
 सुरमायाँ सब लाग विमोहे । राम प्रेम अतिसय न बिछाँहे ॥
 भय उचाट बस मन थिर नाही । छन बन रुचि छन सदन सांहाहीं
 दुबिध मनोगति प्रजा दुखारी । सरित सिंधु संगम जनु बारी ॥
 दुचित कतहुँ परितोपुन लहहीं । एक एक सन मरमुन कहहीं ॥
 लखि हियँ हँसि कह कृपानिधानू सरिस खान मघवान जुवानू ॥

दो०—भरतु जनकु मुनिजन सचिव साधु सवेत बिहाइ ।

लागि देवमाया सबहि जथाजोगु जनु पाइ ॥३०२॥

कृपामिधु लखि लाग दुखारे । निज सनेहँ सुरपति छल भारे ॥
 सभा गाउ गुर महिमुन मंत्रो । भरत भगति सब कै मति जंत्री ॥
 रामहि चितवत चित्र लिखे से । सकुचत बोलत बचन मिखेसे ॥
 भरत प्रीति नति बिनय बड़ाई । सुनत सुखद बरनत कठिनाई ॥
 जासु बिलांकि भगति लबलेसू । प्रेम मगन मुनिगन मिथिलेसू ॥
 महिमा तामु कहँ किमितुलसी । भगति सुभायँ सुमति हियँ हुरुसी
 आपु छोटि महिमा बड़ि जानी । कविकुल कानि मानि सकुचानी ॥
 कहि न सकाते सुन रुचि अधिकारी । मति गति वाल बचन की नाई ॥

दो०—भरत विमल जसु विमल विधु सुमति चकोर कुमारि ।

उदित विमल जन हृदय नभ एकटक रही निहारि ॥३०३॥

भरत सुभाउ न सुगम निगमहूँ । लघु मति चारलता कबि छमहूँ ॥
 कहत सुनत सति भाउ भरत को । सीय राम पद होइ न रत को ॥
 सुमिरत भरतहि प्रेमु राम को । जेहि न सुलभु तेहि सरिस बाम को
 देखि दर्याल दसा सबही की । राम सुजान जानि जन जी की ॥

धरम धुरीन धीर नय नागर । सत्य सनेह सील सुख सागर ॥
देसु कालुखि समउ समाजू । नीति प्रीति पालक रघुगजू ॥
बोले बचन बानि सरबसु से । हित परिनाम सुनत ससिरसु से ॥
तात भरत तुम्ह धरम धुरीना । लोक वेद विद प्रेम प्रवीना ॥

दो०-करम बचन मानस विमल तुम्ह समान तुम्ह तात ।

गुर समाज लवु बंधु गुन कुसमयँ किमि कहि जात ॥ ३०४ ॥

जानहु तात तरनि कुल रीती । सत्यमंध पितु कीरति प्रीती ॥
समउ ममाजु लाज गुरजन की । उदासीन हित अनहित मन की ॥
तुम्हहि विदित मवही कर करमू । आपन मोर परम हित धरमू ॥
मोहि सब भाँनि भरोम तुम्हारा । तदपि कइउँ अवसर अनुमाग ॥
तात तात बिनु बात हमारी । केवल गुरकुल कृपाँ मँ भारी ॥
नतरु प्रजा परिजन परिवारु । हमहि महिन सबु होत सुअरू ॥
जों बिनु अवसर अगवँ दिनेषु । जग केहि कहहु न हाँइ कलेषु ॥
तस उत गातु तात बिधि कान्हा । मुनि मिथिलेस गखि सबु लीन्हा

दो०-राज काज सब लाज पति धरम धरनि धन धाम ।

गुर प्रभाउ पालिहि सबहि भल होइहि परिनाम ॥ ३०५ ॥

सहित समाज तुम्हार हमारा । घर बन गुर प्रसाद रखवारा ॥
मातु पिता गुर स्वामि निदेसू । सकल धरम धरनीधर सेसू ॥
सो तुम्ह करहु करावहु मोहू । तात तगनिकुल पालक होहू ॥
साधक एक सकल सिधि देनी । कीरति सुगति भूतिमय बेनी ॥
सो बिचारि सहि संकटु भारी । करहु प्रजा परिवारु सुखारी ॥
बाँटी बिपति सबहि मोहि भाई । तुम्हहि अबधि भरि बड़ि कठिनाई ॥

जानि तुम्हहि मृदु कहउँ कठोरा । कुसमयँ तात न अनुचित मोरा॥
होहिं कुठायँ सुबंधु सहाए । ओढ़िअहिं हाथ असनिहु के घाए
दो०—सेवक कर पद नयन से मुख सो साहिबु होइ ।

तुलसी ग्रीति कि रीति सुनि सुकवि सराहहिं सोइ ॥ ३०६ ॥

सभा सकल सुनि रघुबर बानी । प्रेम पयोधि अमिअँ जनु सानी॥
सिथिल सभाज सनेह समाधी । देखि दसा चुप सारद साधी ॥
भरतहि भयउ परम संतोषू । सनमुख स्वामि बिमुख दुख दोषू
मुख प्रसन्न मन मिटा बिषादू । भा जनु गूँगेहि गिरा प्रसादू ॥
कीन्ह सप्रेम प्रनामु बहोरी । बोले पानि पंकरुह जोरी ॥
नाथ भयउ सुखु साथ गए को । लहेउँ लाहु जग जनमु भए को॥
अब कृपाल जस आयसु होई । करौं सीस धरि सादर सोई ॥
सो अवलंब देव मोहि देई । अवधि पारु पावौं जेहि सेई ॥

दो०—देव देव अभिषेक हित गुर अनुसासनु पाइ ।

आनेउ सब तीरथ सलिलु तेहि कहँ काह रजाइ ॥ ३०७ ॥

एकु मनोरथु बड़ मन माहीं । समयँ सकोच जात कहि नाहीं॥
कहहु तात प्रभु आयसु पाई । बोले बानि सनेह सुहाई ॥
चित्रकूटसुचि थल तीरथ बन । खग मृग सर सरि निर्झर गिरिगन
प्रभु पद अंकित अबनि बिसेषी । आयसु होइ त आवौं देखी ॥
अवसि अत्रि आयसु सिर धरहू । तात बिगतभय कानन चरहू ॥
मुनि प्रसाद बनु मंगल दाता । पावन परम सुहावन आता ॥
रिषिनायकु जहँ आयसु देहीं । राखेहु तीरथ जलु थल तेहीं ॥
मुनि प्रभु बचन भरत सुखु पावा॥मुनि पद कमल मुदित सिरु नावा

दो०—भरत राम संवादु सुनि सकल सुमंगल मूल ।

सुर स्वारथी सराहि कुल वरषत सुरतरु फूल ॥ ३०८ ॥

धन्य भरत जय राम गोसाईं । कहत देव हरषत बरिआई ॥
मुनि मिथिलेस सभाँ सब काहू । भरत वचन सुनि भयउ उछाहू ॥
भरत राम गुन ग्राम सनेहू । पुलकि प्रसंसत राउ बिदेहू ॥
सेवकस्वामि सुभाउ सुहावन । नेमु पेमु अति पावन पावन ॥
मति अनुसार सराहन लागे । सचिव सभासद सब अनुरागे ॥
सुनि सुनि राम भरत संवादू । दुहु समाज हियँ हरषु बिषादू ॥
राम मातु दुखु सुखु सम जानी । कहि गुन राम प्रबोधीं रानी ॥
एक कहहिं रघुबीर बड़ाई । एक सराहत भरत भलाई ॥

दो०—अत्रि कहेउ तब भरत सन सैल समीप सुकूप ।

राखिअ तीरथ तोय तहँ पावन अमिअ अनूप ॥ ३०९ ॥

भरत अत्रि अनुसासन पाई । जल भाजन सब दिए चलाई ॥
सानुज आपु अत्रि मुनि साधू । सहित गए जहँ कूप अगाधू ॥
पावन पाथ पुन्यथल राखा । प्रमुदित प्रेम अत्रि अस भाषा ॥
तात अनादि सिद्ध थल एहू । लोपेउ काल बिदित नहिं केहू ॥
तब सेवकन्ह सरस थल देखा । कीन्ह सुजल हित कूप बिसेषा ॥
बिधि बस भयउ बिस्व उपकारू । सुगम अगम अति धरम बिचारू ॥
भरतकूप अब कहिहहिं लोगा । अति पावन तीरथ जल जोगा ॥
प्रेम सनेम निमज्जत प्राणी । होइहहिं बिमल करम मन बानी ॥

दो०—कहत कूप महिमा सकल गए जहाँ रघुराउ ।

अत्रि सुनायउ रघुबरहि तीरथ पुन्य प्रभाउ ॥ ३१० ॥

कहत धरम इतिहास सप्रीती । भयउ भोरु निसि सो सुख बीती ॥
 नित्य निबाहि भरत दोउ भाई । राम अत्रि गुर आयसु पाई ॥
 सहित समाज साजसव सादें । चले राम बन अटन पयादें ॥
 कोमल चरन चलत बिनु पनहीं । भइ मृदु भूमि मकुचि मन मनहीं ॥
 कुस कंठरु काँकरी कुगई । कटुक कठोर कुबस्तु दुगई ॥
 महि मंजुल मृदु मारग कीन्हें । बहत समीग त्रिविध सुख ली-हें ॥
 सुमन बरषि सुरघन करि छाहीं । बिटप फूलि फलि तृन मृदुताहीं ॥
 मृग बिलोकि खग बोलि सुबानी । सेवहि सकल राम प्रिय जानी ॥

दो०—सुलभ सिद्धि सब प्राकृतहु राम कहत जमुहात ।

राम प्रानप्रिय भरत कहुँ यह न होइ बड़ि वात ॥ ३११ ॥

एहि विधि भरतु फिरत बन माहीं । नेमु प्रेमु लखि मुनि सकुचाहीं
 पुन्य जलाश्रय भूमि विभागा । खग मृग तरु तृन गिरि बन बागा
 चारु बिचित्र पवित्र बिसेषी । बृक्षत भरतु दिव्य सब देखी ॥
 सुनि मन मुदित कहत रिपिराऊ । हेतु नाम गुन पुन्य प्रभाऊ ॥
 कतहुँ निमज्जन कतहुँ प्रनामा । कतहुँ बिलोकत मन अभिरामा ॥
 कतहुँ बैठि मुनि आयसु पाई । सुमिरत सीय सहित दोउ भाई ॥
 देखि सुभाउ सनेहु सुसेवा । देहिं असीस मुदित बनदेवा ॥
 फिहिं गएँ दिनु पहर अढ़ाई । प्रभु पद कमल बिलाकहिं आई ॥

दो०—देखे थल तीरथ सकल भरत पाँच दिन माझ ।

कहत सुनत हरि हर सुजसु गयउ दिवसु भइ साँझ ॥ ३१२ ॥

भोर न्हाइ सबु जुग समाजू । भरत भूमिसुर तेरहुति राजू ॥
 भल दिन आजु जानि मन माहीं । राम कृपाल कहत सकुचाहीं ॥

गुर नृप भरत सभा अवलोकी । सकुचि राम फिरि अवनि बिलोकी
सील सराहि सभा सब सोची । कहूँ न राम सम स्वामिसँकोची ॥
भरत सुजान राम रुख देखी । उठि सप्रेम धरि धीर बिसेषी ॥
करि दंडवत कहत कर जोरी । राखी नाथ सकल रुचि मोरी ॥
मोहि लगि सहेउ सबहि संताप । बहुत भाँति दुख पावा आप ॥
अब गोसाईं मोहि देउ रजाई । सेवौ अवध अवधि भरि जाई ॥

दो०—जेहि उपाय पुनि पाय जुन देखे दीनदयाल ।

सो सिख देइअ अवधि लगि कोसलपाल कृपाल ॥३१३॥

पुरजन परिजन प्रजा गोसाईं । सब सुचिसरस सनेहँ सगाईं ॥
राउर बादि भल भव दुख दाहू । प्रभु विनु बादि परम पद लाहू ॥
स्वामि सुजानु जानि सब ही की । रुचि लालसारहनि जन जी की ॥
प्रनतपालु पालिहि सब काहू । देउ दुहु दिसि ओर निवाहू ॥
अस मोहि सब विधि भूरि भगोमो । किएँ बिचारुन सोचु खगे सो ॥
आरति मंग नाथ कर लाहू । दुहुँ मिलि कीन्ह दीतु हठि मोहू ॥
यह बड़ दापु दूरि करि स्वामी । तजि सकाँ न मिगइअ अनुगामी ॥
भरत बिनय मुनि सयहि प्रमंमी । खीर नीर बिबरन गति हंसी ॥

दो०—दीनबंधु सुनि बंधु के वचन दीन छत्रहीन ।

देस काल अवसर सरिस बोले रामु प्रवीन ॥३१४॥

तात तुम्हारि मोरि परिजन की । चिंता गुगहि नृपहि घर बन की ॥
माथे पर गुर मुनि मिथिलेसू । हमहि तुम्हहि सपनेहुँ न कलेसू ॥
मोर तुम्हार परम पुरुषारथु । स्वारथु सुजसु धर्म परमारथु ॥
पितु आयसु पालिहि दुहु भाई । लोक बेद भल भूप भलाई ॥

गुर पितु मातु खामि सिख पालें । चलेहुँ कुमग पग परहिं न खालें ॥
 अस बिचारि सब सोच बिहाई । पालहु अवध अवधि भरि जाई ॥
 देसु कोसु परिजन परिवारू । गुर पद रजहिं लाग छरुभारू ॥
 तुम्ह मुनि मातु सचिव सिख मानी । पालेहु पुहुमि प्रजा रजधानी

दो०—मुखिआ मुखु सो चाहिये खान पान कहूँ एक ।

बालइ पोषइ सकल अँग तुलसी सहित विवेक ॥३१५॥

राजधरम सरबसु एतनोई । जिमि मन माहँ मनोरथ गोई ॥
 बंधु प्रबोधु कीन्ह बहु भाँती । बिनु अधार मन तोषु न साँती ॥
 भरत सील गुर सचिव समाजू । सकुच सनेह बिबस रघुराजू ॥
 प्रभु करि कृपा पाँवरी दीन्हीं । सादर भरत सीस धरि लीन्हीं ॥
 चरनपीठ करुनानिधान के । जनु जुग जामिक प्रजा प्रान के ॥
 संपुट भरत सनेह रतन के । आखर जुग जनु जीव जतन के ॥
 कुल कपाट कर कुसल करम के । बिमल नयन सेवा सुधरम के ॥
 भरत मुदित अवलंब लहे तें । अस सुख जस सिय रामु रहे तें ॥

दो०—मागेउ विदा प्रनामु करि राम लिए उर लाइ ।

लोग उचौटे अमरपति कुटिल कुअवसरु पाइ ॥३१६॥

सो कुचालि सब कहँ भइ नीकी । अवधि आस सम जीवनि जी की ॥
 नतरु लखन सिय राम बियोगा । हहरि मरत सब लोग कुरोगा ॥
 रामकृपाँ अवरेब सुधारी । बिबुध धारि भइ गुनद गोहारी ॥
 भेंटत भुज भरि माइ भरत सो । राम प्रेम रसु कहि न परत सो ॥
 तन मन बचन उमग अनुरागा । धीर धुरंधर धीरजु त्यागा ॥
 बारिज लोचन मोचत बारी । देखि दसा सुर सभा दुखारी ॥

मुनिगन गुर धुर धीर जनक से । ग्यान अनल मन कसैं कनक से॥
जे विरंचि निरलेप उपाए । पदुम पत्र जिमि जग जल जाए॥

दो०—तेउ बिलोकि रघुवर भरत प्रीति अनूप अपार ।

भए मगन मन तन बचन सहित बिराग बिचार ॥३१७॥

जहाँ जनक गुर गति मति भोरी । प्राकृत प्रीति कहत बड़ि खोरी॥
बरनत रघुवर भरत बियोगू । सुनि कठोर कवि जानिहि लोगू॥
सो सकोच रसु अकथ सुबानी । समउ सनेहु सुमिरि सकुचानी॥
भेंटि भरतु रघुवर समुझाए । पुनि रिपुदवनु हरषि हियँ लाए॥
सेवक सचिव भरत रुख पाई । निज निज काज लगे सब जाई॥
सुनि दारुन दुखु दुहूँ समाजा । लगे चलन के साजन साजा॥
प्रभु पद पदुम बंदि दोउ भाई । चले सीस धरि राम रजाईं
मुनि तापस बनदेव निहोरी । सब सनमानि बहोरि बहोरी॥

दो०—लखनहिं भेंटि प्रनामु करि सिर धरि सिय पद धूरि ।

चले सप्रेम असीस सुनि सकल सुमंगल मूरि ॥३१८॥

सानुज राम नृपहि सिर नाई । कीन्ह बहुत बिधि विनय बढ़ाई॥
देव दया बस बड़ दुखु पायउ । सहित समाज काननहिं आयउ॥
पुर पगु धारिअ देइ असीसा । कीन्ह धीर धरि गवनु महीमा ॥
मुनि महिदेव साधु सनमाने । बिदा किए हरि हर सम जाने ॥
सासु समीप गए दोउ भाई । फिरे बंदि पग आसिष पाई ॥
कौसिक बामदेव जाबाली । पुरजन परिजन सचिव सुचाली ॥
जथा जोगु करि विनय प्रनामा । बिदा किए सब सानुज रामा॥
नारि पुरुष लघु मध्य बड़ेरे । सब सनमानि कृपानिधि फेरे ॥

दो०—भरत मातु पद बंदि प्रभु सुचि सनेहँ मिलि भेंटि ।

विदा कीन्ह सजि पालकी सकुच सोच सब भेंटि ॥३१९॥

परिजन मातु पितहि मिलि सीता । फिरी प्रानप्रिय प्रेम पुनीता ॥
करि प्रनामु भेंटिं सब सासू । प्रीति कहत कबि हियँ नहुलासू ॥
सुनि सिख अभिमत आसिप पाई । रही सीय दुहु प्रीति समाई ॥
रघुरति पदु पालकी मगाई । करि प्रवांधु सब मातु चढ़ाई ॥
बार बार हिलि मिलि दुहु भाई । सम सनेहँ जननी पहुँचाई ॥
साजि बाजि गज वाहन नाना । भरत भूप दल कीन्ह पयाना ॥
हृदयँ रामु सिय लखन समेत । चले जाहिं सब लोग अचेता ॥
बसह वाजि गज पमु हियँ हारें । चले जाहिं परबस मन मारें ॥

दो०—गुर गुरति पद बंदि प्रभु सीता लखन समेत ।

फिरे हरष विसय सहित आए परन निकेत ॥३२०॥

विदा कीन्ह मनमानि निषाद । चनेउ हृदयँ बड़ धिरह विषाद ॥
कोल किगन भिलउ वनचारी । फेरे फिरे जोहारि जोहारी ॥
प्रभु मिय लखन बेठि पट लाहीं । प्रिय परिजन बियोग बिलखाहीं ॥
भरत सनेह श्रुभाउ सुबानी । प्रिया अनुज मन कहत बखानी ॥
प्रीति प्रतीति व वन मन करनी । श्रीमुख राम प्रेम बस बरनी ॥
तेहि आस रत्न मृग जल मीना । चित्रकूट चर अचर मलीना ॥
त्रिवुध बिलाकि दसा रघुवर की । वरपि मुमन कहि गति घर घर की ॥
प्रभु प्रनामु करि दीन्ह भरोसो । चले मुदित मन डर न खरो सो ॥

दो०—सानुज सीय समेत प्रभु राजत परन कुटीर ।

भगीति ग्यानु बैराग्य जनु सोहत धरें सरीर ॥३२१॥

मुनि महिसुर गुर भरत भुआलू । राम बिरहँ सबु साजु बिहालू ॥
 प्रभु गुन ग्राम गनत मन माहीं । सब चुपचाप चले मग जाहीं ॥
 जमुना उतरि पार सबु भयऊ । सो बासर बिनु भोजन गयऊ ॥
 उतरि देवसरि दूसर बासू । रामसखाँ सब कीन्ह सुपासू ॥
 सई उतरि गोमती नहाए । चौथें दिवस अवधपुर आए ॥
 जनकु रहे पुर बासर चारी । राज काज सब साज सँभारी ॥
 सौँपि सचिव गुरु भरतहि राजू । तेरहुति चले साजि सबु साजू ॥
 नगर नारि नर गुर सिख मानी । बसे सुखेन राम रजधानी ॥

दो०—राम दरस लागि लोग सब करत नेम उपवास ।

तजि तजि भूषन भोग सुख जितत अवधि कीं आस ॥३२२॥

सचिव सुसेवक भरत प्रबोधे । निज निज काज पाइ सिख ओधे
 पुनि सिख दीन्ह बोलि लघु भाई । सौँपी सकल मातु सेवकाई ॥
 भूसुर बोलि भरत कर जोरे । करि प्रनाम बय बिनय निहोरे ॥
 ऊँच नीच कारजु भल पोचू । आयसु देव न करब सँकोचू ॥
 परिजन पुरजन प्रजा बोलाए । समाधानु करि सुवस बसाए ॥
 सानुज गे गुर गेहँ बहोरी । करि दंडवत कहत कर जोरी ॥
 आयसु होइ त रहौं सनेमा । बोले मुनि तन पुलकि सपेमा ॥
 समुझब कहब करब तुम्ह जोई । धरम सारु जग होइहि सोई ॥

दो०—सुनि सिख पाइ असीस बड़ि गनक बोलि दिनु साधि ।

सिंघासन प्रभु पादुका बैठारे निरुपाधि ॥३२३॥

राम मातु गुर पद सिरु नाई । प्रभु पद पीठ रजायसु पाई ॥
 नंदिगावँ करि परन कुटीरा । कीन्ह निवासु धरम धुर धीरा ॥

जटाजूट मिर मुनिपट धारी । महि खनि कुस साँथरी सँवारी ॥
 असन बसन बामन व्रत नेमा । करत कठिन रिषिधरम सप्रेमा ॥
 भूषन बसन भोग सुख भूरी । मन तन बचन तजे तिन तूरी ॥
 अवध राजु सुर राजु सिहाई । दसरथ धनु सुनि धनदु लजाई ॥
 तेहिं पुर बसत भरत विनुरागा । चंचरीक जिमि चंपक बागा ॥
 रमा बिलासु राम अनुरागी । तजत बमन जिमि जन बड़ भागी ॥

दो०-राम पेम भाजन भरतु बड़े न एहिं करतूति ।

चातक हंस सराहिअत टैंक बिबेक विभूति ॥३२४॥

देह दिनहु दिन द्बारि होई । घटइ तेजु बलु मुखछवि सोई ॥
 नित नव राम प्रेमपनु पीना । बढ़त धरमदलु मनु न मलीना ॥
 जिमि जल निघटत सरद प्रकासे । बिलसत बेतस बनज बिकासे ॥
 सम दम संजम नियम उवासा । नखत भरत हिय बिमल अकासा ॥
 ध्रुव बिस्वामु अवधिराकासी । स्वामि सुरति सुरबीधि बिकासी ॥
 राम पेम बिधु अचल अदोषा । सहित समाज सोह नित चोखा ॥
 भरत रहनि समुझनि करतूती । भगति बिरति गुन बिमल बिभूती ॥
 बरनत सकल सुकवि सकुचाहीं । सेस गनेस गिरा गमु नाहीं ॥

दो०-नित पूजत प्रभु पाँवरी प्रीति न हृदयँ समाति ।

मागि मागि आयसु करत राज काज बहु भाँति ॥३२५॥

पुलक गात हियँ सिय रघुबीरू । जीह नामु जप लोचन नीरू ॥
 लखन राम सिय कानन बसहीं । भरतु भवन बसि तप तनु कसहीं ॥
 दोउ दिसि समुझि कहत सबु लोगू । सब बिधि भरत सराहन जोगू ॥
 सुनि व्रत नेम साधु सकुचाहीं । देखि दसा मुनिराज लजाहीं ॥

परम पुनीत भरत आचरन् । मधुर मंजु मुद मंगल करन् ॥
हरन कठिन कलि कलुष कलेषु । महामोह निसि दलन दिनेषु ॥
पाप पुंज कुंजर मृगराजू । समन सकल संताप समाजू ॥
जन रंजन मंजन भव भारू । राम सनेह सुधाकर सारू ॥

छं०—सिय राम प्रेम पियूष पूरन होत जनमु न भरत को ।
मुनि मन अगम जमनियम सम दम बिषम ब्रत आचरत को ॥
दुख दाह दारिद दंभ दूषन सुजस मिस अपहरत को ।
कलिकाल तुलसी से सठन्हि हठि राम सनमुख करत को ॥

सो०—भरत चरित करि नेमु तुलसी जो सादर सुनहिं ।
सीय राम पद पेम अवसि होइ भव रस बिरति ॥ ३२६ ॥

मासपारायण, इक्कीसवाँ विश्राम




इति श्रीमद्रामचरितमानसे सकलकलिकलुषविध्वंसने
द्वितीयः सोपानः समाप्तः ।

(अयोध्याकाण्ड समाप्त)



सुतीक्ष्णजी रामके ध्यानमें



अतिसय प्रीति देखि रघुबीरा ।
प्रगटे हृदयँ हरन भव भीरा ॥

श्रीगणेशाय नमः
श्रीजानकीवल्लभो विजयते

श्रीरामचरितमानस

तृतीय सोपान

(अरण्यकाण्ड)

श्लोक

मूलं धर्मतरोर्विवेकजलधेः पूर्णेन्दुमानन्ददं
वैराग्याम्बुजभास्करं ह्यधधनध्वान्तापहं तापहम् ।
मोहाम्भोधरपूगपाटनविधौ स्वःसम्भवं शङ्करं
वन्दे ब्रह्मकुलं कलङ्कशमनं श्रीरामभूप्रियम् ॥ १ ॥
सान्द्रानन्दपयोदसौभगतनुं पीताम्बरं सुन्दरं
पाणौ बाणशरासनं कटिलसत्तणीरभारं वरम् ।
राजीवायतलोचनं धृतजटाजूटेन संशोभितं
सीतालक्ष्मणसंयुतं पथिगतं रामाभिरामं भजे ॥ २ ॥

सो०—उमा राम गुन गूढ़ पंडित मुनि पावहिं विरति ।
पावहिं मोह विमूढ़ जे हरि विमुख न धर्म रति ॥

पुर नर भरत प्रीति मैं गाई । मति अनुरूप अनूप सुहाई ॥
अब प्रभु चरित सुनहु अति पावन । करत जे बन सुर नर मुनि भावन

एक बार चुनि कुसुम सुहाए । निज कर भूषन राम बनाए ॥
 सीतहि पहिराए प्रभु सादर । बैठे फटिक सिला पर सुंदर ॥
 सुरपति सुत धरि बायस बेषा । सठ चाहत रघुपति बल देखा ॥
 जिमि पिपीलिका सागर थाहा । महा मंदमति पावन चाहा ॥
 सीता चरन चोंच हति भागा । मूढ़ मंदमति कारन कागा ॥
 चला रुधिर रघुनायक जाना । सींक धनुष सायक संधाना ॥

दो०—अति कृपाल रघुनायक सदा दीन पर नेह ।

ता सन आइ कीन्ह छलु मूरख अवगुन गेह ॥ १ ॥

प्रेरित मंत्र ब्रह्मसर धावा । चला भाजि बायस भय पावा ॥
 धरि निज रूप गयउ पितु पाहीं । राम बिमुख राखा तेहि नाहीं ॥
 भा निरास उपजी मन त्रासा । जथा चक्र भय रिषि दुर्बासा ॥
 ब्रह्मधाम सिवपुर सब लोका । फिरा श्रमित व्याकूल भय सोका ॥
 काहूँ बैठन कहा न ओही । राखि को सकइ राम कर द्रोही ॥
 मातु मृत्यु पितु समन समाना । सुधा होइ बिष सुनु हरिजाना ॥
 मित्र करइ सत रिपु कै करनी । ता कहँ बिबुधनदी बैतरनी ॥
 सब जगु ताहि अनलहु ते ताता । जो रघुबीर बिमुख सुनु भ्राता ॥
 नारद देखा बिकल जयंता । लागि दया कोमल चित संता ॥
 पठवा तुरत राम पहिं ताही । कहेसि पुकारि प्रनत हित पाही ॥
 आतुर सभय गहेसि पद जाई । त्राहि त्राहि दयाल रघुराई ॥
 अतुलित बल अतुलित प्रभुताई । मैं मतिमंद जानि नहिं पाई ॥
 निज कृत कर्म जनित फल पायउँ । अब प्रभु पाहि सरन तकि आयउँ ॥
 सुनि कृपाल अति आरत बानी । एकनयन करि तजा भवानी ॥

सो०—कीन्ह मोह बस द्रोह जद्यपि तेहि कर बध उचित ।

प्रभु छाड़ेउ करि छेह को कृपाल रघुवीर सम ॥ २ ॥

रघुपति चित्रकूट बसि नाना । चरित किए श्रुति सुधा समाना ॥
बहुरि राम अस मन अनुमाना । होइहि भीर सबहि मोहि जाना ॥
सकल मुनिन्ह सन बिदा कराई । सीता सहित चले द्वौ भाई ॥
अत्रि के आश्रम जब प्रभु गयऊ । सुनत महामुनि हरषित भयऊ ॥
पुलकित गात अत्रि उठि धाए । देखि रामु आतुर चलि आए ॥
करत दंडवत मुनि उर लाए । प्रेम बारि द्वौ जन अन्हवाए ॥
देखि राम छवि नयन जुड़ाने । सादर निज आश्रम तब आने ॥
करि पूजा कहि बचन सुहाए । दिए मूल फल प्रभु मन भाए ॥

सो०—प्रभु आसन आसीन भरि लोचन सोभा निरखि ।

मुनिवर परम प्रवीन जोरि पानि अस्तुति करत ॥ ३ ॥

छं०—नमामि भक्त वत्सलं । कृपालु शील कोमलं ॥
भजामि ते पदांबुजं । अकामिनां स्वधामदं ॥
निकाम श्याम सुंदरं । भवाम्बुनाथ मंदरं ॥
प्रफुल्ल कंज लोचनं । मदादि दोष मोचनं ॥
प्रलंब बाहु विक्रमं । प्रभोऽप्रमेय वैभवं ॥
निषंग चाप सायकं । धरं त्रिलोक नायकं ॥
दिनेश वंश मंडनं । महेश चाप खंडनं ॥
मुनींद्र संत रंजन । सुरारि वृंद भंजनं ॥
मनोज वैरि वंदितं । अजादि देव सेवितं ॥
विशुद्ध बोध विग्रहं । समस्त दूषणापहं ॥

नमामि इंदिरा पति । सुखाकरं सतां गति ॥
 भजे सशक्ति सानुजं । शची पति प्रियानुजं ॥
 त्वदंघ्रि मूल ये नराः । भजंति हीन मत्सराः ॥
 पतंति नो भवार्णवे । वितर्क वीचि संकुले ॥
 विविक्त वासिनः सदा । भजंति मुक्तये मुदा ॥
 निरस्य इंद्रियादिकं । प्रयांति ते गतिं स्वकं ॥
 तमेकमद्भुतं प्रभुं । निरीहमीश्वरं विभुं ॥
 जगद्गुरुं च शाश्वतं । तुरीयमेव केवलं ॥
 भजामि भाव वल्लभं । कुयोगिनां सुदुर्लभं ॥
 स्वभक्त कल्प पादपं । समं सुसेव्यमन्वहं ॥
 अनूप रूप भूपतिं । नतोऽहमुर्विजा पतिं ॥
 प्रसीद मे नमामि ते । पदाब्ज भक्ति देहि मे ॥
 पठंति ये स्तवं इदं । नरादरेण ते पदं ॥
 व्रजंति नात्र संशयं । त्वदीय भक्ति संयुताः ॥

दो०—विनती करि मुनि नाइ सिरु कह कर जोरि बहोरि ।

चरन सरोरुह नाथ जनि कवहुँ तजै मति मोरि ॥ ४ ॥

अनुसुइया के पद गहि सीता । मिली बहोरि सुसील बिनीता ॥
 रिषिपतिनी मन सुख अधिकाई । आसिष देइ निकट बैठाई ॥
 दिव्य बसन भूषन पहिराए । जे नित नूतन अमल सुहाए ॥
 कह रिषिवधू सरस मृदु बानी । नारिधर्म कछु व्याज बखानी ॥
 मातु पिता भ्राता हितकारी । मितप्रद सब सुनु राजकुमारी ॥
 अमित दानि भर्ता बयदेही । अधम सो नारि जो सेव न तेही ॥
 धीरज धर्म मित्र अरु नारी । आपद काल परिखिअहिं चारी ॥

बृद्ध रोगबस जड़ धनहीना । अंध बधिर क्रोधी अति दीना ॥
 ऐसेहु पति कर किएँ अपमाना । नारि पाव जमपुर दुख नाना ॥
 एकइ धर्म एक व्रत नेमा । कायँ बचन मन पति पद प्रेमा ॥
 जग पतिव्रता चारि बिधि अहहीं । बेद पुरान संत सब कहहीं ॥
 उत्तम के अस बस मन माहीं । सपनेहुँ आन पुरुष जग नाहीं ॥
 मध्यम परपति देखइ कैसेँ । भ्राता पिता पुत्र निज जैसेँ ।
 धर्म बिचारि समुझि कुल रहई । सो निकिष्ट त्रिय श्रुति अस कहई
 बिनु अवसर भय तें रह जोई । जानेहु अधम नारि जग सोई ॥
 पति बंचक परपति रति करई । रौरव नरक कल्प सत परई ॥
 छन सुख लागि जनम सत कोटी । दुख न समुझ तेहि सम को खोटी
 बिनु श्रम नारि परम गति लहई । पतिव्रत धर्म छाड़ि छल गहई ॥
 पति प्रतिकूल जनम जहँ जाई । बिधवा होइ पाइ तरुनाई ॥

सो०—सहज अपावनि नारि पति सेवत सुभ गति लहइ ।

जसु गावत श्रुति चारि अजहुँ तुलसिका हरिहि प्रिय ॥५(क)॥

सुनु सीता तव नाम सुमिरि नारि पतिव्रत करहिं ।

तोहि प्रानप्रिय राम कहिउँ कथा संसार हित ॥५(ख)॥

सुनि जानकीं परम सुखु पावा । सादर तासु चरन सिरु नावा ॥
 तब मुनि सन कह कृपानिधाना । आयसु होइ जाउँ बन आना ॥
 संतत मो पर कृपा करेहू । सेवक जानि तजेहु जनि नेहू ॥
 धर्म धुरंधर प्रभु कै बानी । सुनि सप्रेम बोले मुनि ग्यानी ॥
 जासु कृपा अज सिव सनकादी । चहत सकल परमारथ बादी ॥
 ते तुम्ह राम अकाम पिआरे । दीन बंधु मृदु बचन उचारे ॥

अब जानी मैं श्री चतुराई । भजी तुम्हहि सब देव बिहाई ॥
 जेहि समान अतिसय नहिं कोई । ता कर सील कस न अस होई ॥
 केहि बिधि कहौं जाहु अब स्वामी । कहहु नाथ तुम्ह अंतरजामी ॥
 अस कहि प्रभु बिलोकि मुनि धीरा । लोचन जल बह पुलक सरीरा ॥

छं०—तन पुलक निर्भर प्रेम पूरन नयन मुख पंकज दिए ।

मन ग्यान गुन गोतीत प्रभु मैं दीख जप तप का किए ॥

जप जोग धर्म समूह तैं नर भगति अनुपम पावई ।

रघुवीर चरित पुनीत निसि दिन दास तुलसी गावई ॥

दो०—कलिमल समन दमन मन राम सुजस सुखमूल ।

सादर सुनहिं जे तिन्ह पर राम रठहिं अनुकूल ॥६(क)॥

सो०—कठिन काल मल कोस धर्म न ग्यान न जोग जप ।

परिहरि सकल भरोस रामहि भजहिं ते चतुर नर ॥६(ख)॥

मुनि पद कमल नाइ करि सीसा । चले बनहि सुरनर मुनि ईसा ॥

आगें राम अनुज पुनि पाछें । मुनि बर बेप बने अति काछें ॥

उभय बीच श्री सोहइ कैसी । ब्रह्म जीव बिच माया जैसी ॥

सरिता बन गिरि अवघट घाटा । पति पहिचानि देहिं बर बाटा ॥

जहँ जहँ जाहिं देव रघुराया । करहिं मेष तहँ तहँ न भ छाया ॥

मिला असुर बिराध मग जाता । आवतहीं रघुवीर निपाता ॥

तुरतहिं रुचिर रूप तेहिं पावा । देखि दुखी निज धाम पठावा ॥

पुनि आए जहँ मुनि सरभंगा । सुंदर अनुज जानकी संगी ॥

दो०—देखि राम मुख पंकज मुनिवर लोचन भृंग ।

सादर पान करत अति धन्य जन्म सरभंग ॥ ७ ॥

कह मुनि सुनु रघुबीर कृपाला । संकर मानस राजमराला ॥
जात रहेउँ बिरंचि के धामा । सुनेउँ श्रवन बन ऐहहि रामा ॥
चितवत पंथ रहेउँ दिन राती । अब प्रभु देखि जुड़ानी छाती ॥
नाथ सकल साधन मैं हीना । कीन्ही कृपा जानि जन दीना ॥
सो कछु देव न मोहि निहोरा । निज पन राखेउ जन मन चोरा ॥
तब लगि रहहु दीन हित लागी । जब लगि मिलौं तुम्हहि तनु त्यागी ॥
जोग जग्य जप तप व्रत कीन्हा । प्रभु कहँ देइ भगति बर लीन्हा ॥
एहि बिधि सर रचि मुनि सरभंगा । बैठे हृदयँ छाड़ि सब संग्गा ॥

दो०—सीता अनुज समेत प्रभु नील जलद तनु स्याम ।

मम हियँ बसहु निरंतर सगुनरूप श्रीराम ॥ ८ ॥

अस कहि जोग अग्नि तनु जारा । राम कृपाँ बैकुण्ठ सिधारा ॥
ताते मुनि हरि लीन न भयऊ । प्रथमहि भेद भगति बर लयऊ ॥
रिषि निकाय मुनिबर गति देखी । सुखी भए निज हृदयँ बिसेषी ॥
अस्तुति करहि सकल मुनि बृन्दा । जयति प्रनत हित करुना कंदा ॥
पुनि रघुनाथ चले बन आगे । मुनिबर बृन्द बिपुल सँग लागे ॥
अस्थि समूह देखि रघुराया । पूछी मुनिन्ह लागि अति दाया ॥
जानतहुँ पूछिअ कस स्वामी । सबदरसी तुम्ह अंतरजामी ॥
निसिचर निकर सकल मुनि खाए । सुनि रघुबीर नयन जल छाए ॥

दो०—निसिचर हीन करउँ महि भुज उठाइ पन कीन्ह ।

सकल मुनिन्ह के आश्रमन्हि जाइ जाइ सुख दीन्ह ॥ ९ ॥

मुनि अगस्ति कर सिष्य सुजाना । नाम सुतीछन रति भगवाना ॥
मन क्रम बचन राम पद सेवक । सपनेहुँ आन भरोस न देवक ॥

प्रभु आगवनु श्रवन सुनि पावा । करत मनोरथ आतुर धावा ॥
 हे बिधि दीनबंधु रघुराया । मो से सठ पर करिहहिं दाया ॥
 सहित अनुज मोहिराम गोसाई । मिलिहहिं निज सेवक की नाई ॥
 मोरे जियँ भरोस दढ़ नाहीं । भगति बिरति न ग्यान मन माहीं
 नहिं सतसंग जोग जप जागा । नहिं दढ़ चरन कमल अनुरागा ॥
 एक बानि करुनानिधान की । सो प्रिय जाकें गति न आन की ॥
 होइहैं सुफल आजु मम लोचन । देखि बदन पंकज भव मोचन ॥
 निर्भर प्रेम मगन मुनि ग्यानी । कहिन जाइ सो दसा भवानी ॥
 दिसि अरु बिदिसि पंथ नहिं सूझा । को मैं चलेउँ कहाँ नहिं बूझा ॥
 कबहुँक फिरि पाछें पुनि जाई । कबहुँक नृत्य करइ गुन गाई ॥
 अबिरल प्रेम भगति मुनि पाई । प्रभु देखैं तरु ओट लुकाई ॥
 अतिसय प्रीति देखि रघुबीरा । प्रगटे हृदयँ हरन भव भीरा ॥
 मुनि मग माझ अचल होइ बैसा । पुलक सरीर पनस फल जैसा ॥
 तब रघुनाथ निकट चलि आए । देखि दसा निज जन मन भाए ॥
 मुनिहि राम बहु भाँति जगावा । जाग न ध्यान जनित सुख पावा ॥
 भूप रूप तबै राम दुरावा । हृदयँ चतुर्भुज रूप देखावा ॥
 मुनि अकुलाइ उठा तब कैसैं । बिकल हीन मनि फनिबर जैसैं ॥
 आगें देखि राम तन स्यामा । सीता अनुज सहित सुख धामा ॥
 परे लकुट इव चरनन्हि लागी । प्रेम मगन मुनिबर बड़भागी ॥
 भुज बिसाल गहि लिए उठाई । परम प्रीति राखे उर लाई ॥
 मुनिहि मिलत अस सोह कृपाला । कनक तरुहि जनु भेंट तमाला ॥
 राम बदनु बिलोक मुनि ठाढ़ा । मानहुँ चित्र माझ लिखि काढ़ा ॥

दो०—तब मुनि हृदयँ धीर धरि गहि पद बारहि बार ।

निज आश्रम प्रभु आनि करि पूजा विविध प्रकार ॥ १० ॥

कह मुनि प्रभु सुनु बिनती मोरी । अस्तुति करौं कवन बिधि तोरी ॥
 महिमा अमित मोरि मति थोरी । रवि सन्मुख खद्योत अँजोरी ॥
 श्याम तामरस दाम शरीरं । जटा मुकुट परिधन मुनिचीरं ॥
 पाणि चाप शर कटि तूणीरं । नौमि निरंतर श्रीरघुवीरं ॥
 मोह विपिन घन दहन कृशानुः । संत सरोरुह कानन भानुः ॥
 निश्चिचर करि वरूथ मृगराजः । त्रातु सदा नो भव खग बाजः ॥
 अरुण नयन राजीव सुवेशं । सीता नयन चकोर निशेशं ॥
 हर हृदि मानस बाल मरालं । नौमि राम उर बाहु विशालं ॥
 संश्रय सर्प ग्रसन उरगादः । शमन सुकर्कश तर्क विषादः ॥
 भव भंजन रंजन सुर यूथः । त्रातु सदा नो कृपा वरूथः ॥
 निर्गुण सगुण विषम सम रूपं । ज्ञान गिरा गोतीतमनूपं ॥
 अमलमखिलमनवद्यमपारं । नौमि राम भंजन महि भारं ॥
 भक्त कल्पपादप आरामः । तर्जन क्रोध लोभ मद कामः ॥
 अति नागर भव सागर सेतुः । त्रातु सदा दिनकर कुल केतुः ॥
 अतुलित भुज प्रताप बल धामः । कलि मल विपुल विभंजन नामः ॥
 धर्म वर्म नर्मद गुण ग्रामः । संतत शं तनोतु मम रामः ॥
 जदपि बिरज व्यापक अविनासी । सब के हृदयँ निरंतर बासी ॥
 तदपि अनुज श्री सहित खरारी । बसतु मनसि मम काननचारी ॥
 जे जानहिं ते जानहुँ स्वामी । सगुन अगुन उर अंतरजामी ॥
 जो कोसल पति राजिव नयना । करउ सो राम हृदय मम अयना ॥

अस अभिमान जाइ जनि भोरे । मैं सेवक रघुपति पति मोरे ॥
 मुनि मुनि बचन राम मन भाए । बहुरि हरषि मुनिबर उर लाए ॥
 परम प्रसन्न जानु मुनि मोही । जो बर मागहु देउँ सो तोही ॥
 मुनि कह मैं बर कबहुँ न जाचा । समुझि न परइ झूठ का साचा ॥
 तुम्हहि नीक लागै रघुराई । सो मोहि देहु दास सुखदाई ॥
 अबिरल भगति बिरति बिग्याना । होहु सकल गुन ग्यान निधाना ॥
 प्रभु जो दीन्ह सो बरु मैं पावा । अब सो देहु मोहि जो भावा ॥

दो०—अनुज जानकी सहित प्रभु चाप बान धर राम ।

मम हिय गगन इंदु इव बसहु सदा निहकाम ॥ ११ ॥

एवमस्तु करि रमानिवासा । हरषि चले कुंभजरिषि पासा ॥
 बहुत दिवस गुर दरसनु पाएँ । भए मोहि एहि आश्रम आएँ ॥
 अब प्रभु संग जाउँ गुर पाहीं । तुम्ह कहँ नाथ निहोरा नाहीं ॥
 देखि कृपानिधि मुनि चतुराई । लिए संग बिहसे द्वौ भाई ॥
 पंथ कहत निज भगति अनूपा । मुनि आश्रम पहुँचे सुरभूपा ॥
 तुरत सुतीछन गुर पहिँ गयऊ । करि दंडवत कहत अस भयऊ ॥
 नाथ कोसलाधीस कुमारा । आए मिलन जगत आधारा ॥
 राम अनुज समेत बैदेही । निसि दिनु देव जपत दहु जेही ॥
 सुनत अगस्ति तुरत उठि धाए । हरि बिलोकि लोचन जल छाए ॥
 मुनि पद कमल परे द्वौ भाई । रिषि अति प्रीति लिए उर लाई ॥
 सादर कुसल पूछि मुनि ग्यानी । आसन बर बैठारे आनी ॥
 पुनि करि बहु प्रकार प्रभु पूजा । मोहि सम भाग्यवंत नहिँ दूजा ॥
 जहँ लगि रहे अपर मुनि बृन्दा । हरषे सब बिलोकि सुखकंदा ॥

दो०—मुनि समूह महँ बैठे सन्मुख सब की ओर ।

सरद इंदु तन चितवत मानहुँ निकर चकोर ॥ १२ ॥

तब रघुबीर कहा मुनि पाहीं । तुम्ह सन प्रभु दुराव कछु नाहीं ॥
 तुम्ह जानहु जेहि कारन आयउँ । ताते तात न कहि समुझायउँ ॥
 अब सो मंत्र देहु प्रभु मोही । जेहि प्रकार मारौं मुनिद्रोही ॥
 मुनि मुसुकाने सुनि प्रभु बानी । पूछेहु नाथ मोहि का जानी ॥
 तुम्हरेई भजन प्रभाव अघारी । जानउँ महिमा कछुक तुम्हारी ॥
 ऊमरि तरु विसाल तव माया । फल ब्रह्मांड अनेक निकाया ॥
 जीव चराचर जंतु समाना । भीतर बसहिं न जानहिं आना ॥
 ते फल भच्छक कठिन कराला । तव भयँ डरत सदा सोउ काला ॥
 ते तुम्ह सकल लोकपति साइ । पूँछेहु मोहि मनुज की नाई ॥
 यह बर मागउँ कृपानिकेता । बसहु हृदयँ श्री अनुज समेता ॥
 अबिरल भगति बिरति सतसंगा । चरन सरोरुह प्रीति अभंगा ॥
 जद्यपि ब्रह्म अखंड अनंता । अनुभव गम्य भजहिं जेहि संता ॥
 अस तव रूप बखानउँ जानउँ । फिरि फिरि सगुन ब्रह्म रति मानउँ
 संतत दासन्ह देहु बड़ाई । तातें मोहि पूछेहु रघुराई ॥
 है प्रभु परम मनोहर ठाऊँ । पावन पंचबटी तेहि नाऊँ ॥
 दंडक बन पुनीत प्रभु करहु । उग्र साप मुनिबर कर हरहु ॥
 बास करहु तहँ रघुकुल राया । कीजे सकल मुनिन्ह पर दाया ॥
 चले राम मुनि आयसु पाई । तुरतहिं पंचबटी निअराई ॥

दो०—गीधराज सैं भेंट भइ बहु बिधि प्रीति बढ़ाइ ।

गोदावरी निकट प्रभु रहे परन गृह छाइ ॥ १३ ॥

जब ते राम कीन्ह तहँ बासा । सुखी भए मुनि बीती त्रासा ॥
 गिरि बन नदी ताल छबि छाए । दिन दिन प्रति अति होहिं सुहाए
 खग मृग बृंद अनंदित रहहीं । मधुर मधुप गुंजत छबि लहहीं ॥
 सो बन बरनिन सक अहिराजा । जहाँ प्रगट रघुवीर बिराजा ॥
 एक बार प्रभु सुख आसीना । लछिमन बचन कहे छलहीना ॥
 सुर नर मुनि सचराचर साईं । मैं पूछउँ निज प्रभु की नाईं ॥
 मोहि समुझाइ कहहु सोइ देवा । सब तजि करौं चरन रज सेवा ॥
 कहहु ग्यान बिराग अरु माया । कहहु सो भगति करहु जेहिं दाया

दो०—ईस्वर जीव भेद प्रभु सकल कहौ समुझाइ ।

जातें होइ चरन रति सोक मोह भ्रम जाइ ॥ १४ ॥

थोरेहि महँ सब कहउँ बुझाई । सुनहु तात मति मनचित लाई ॥
 मैं अरु मोर तोर तैं माया । जेहिं बस कीन्ह जीव निकाया ॥
 गो गोचर जहँ लगि मन जाई । सो सब माया जानेहु भाई ॥
 तेहि कर भेद सुनहु तुम्ह सोऊ । विद्या अपर अबिद्या दोऊ ॥
 एक दुष्ट अतिसय दुखरूपा । जा बस जीव परा भवकूपा ॥
 एक रचइ जगुन बस जाकें । प्रभु प्रेरित नहिं निज बल ताकें ॥
 ग्यान मान जहँ एकउ नाही । देख ब्रह्म समान सब माहीं ॥
 कहिअ तात सो परम बिरागी । तृन सम सिद्धि तीनि गुन त्यागी

दो०—माया ईस न आपु कहूँ जान कहिअ सो जीव ।

बंध मोच्छ प्रद सर्वपर माया प्रेरक सीव ॥ १५ ॥

धर्म तैं बिरति जोग तैं ग्याना । ग्यान मोच्छप्रद बेद बखाना ॥
 जातें बैंगि द्रवउँ मैं भाई । सो मम भगति भगत सुखदाई ॥

सो सुतंत्र अवलंब न आना । तेहि आधीन ग्यान बिग्याना ॥
 भगति तात अनुपम सुखमूला । मिलइ जो संत होई अनुकूला ॥
 भगति कि साधन कहउँ बखानी । सुगम पंथ मोहि पावहिं प्रानी ॥
 प्रथमहिं बिप्र चरन अति प्रीती । निज निज कर्म निरत श्रुति रीती ॥
 एहि कर फल पुनि बिषय बिरागा ॥ तब मम धर्म उपज अनुरागा ॥
 श्रवनादिक नव भक्ति दृढ़ाहीं । मम लीला रति अति मन माहीं ॥
 संत चरन पंकज अति प्रेमा । मन क्रम बचन भजन दृढ़ नेमा ॥
 गुरु पितु मातु बंधु पति देवा । सब मोहि कहँ जानँ दृढ़ सेवा ॥
 मम गुन गावत पुलक सरीरा । गदगद गिरा नयन बह नीरा ॥
 काम आदि मद दंभ न जाकें । तात निरंतर बस मैं ताकें ॥

दो०—बचन कर्म मन मोरि गति भजनु करहिं निःकाम ।

तिन्ह के हृदय कमल महुँ करउँ सदा विश्राम ॥ १६ ॥

भगति जोग सुनि अति सुख पावा । लछिमन प्रभु चरनन्हि सिरु नावा
 एहि बिधि गए कछुक दिन बीती । कहत बिराग ग्यान गुन नीती ॥
 स्वप्नखा रावन कै बहिनी । दुष्ट हृदय दारुन जस अहिनी ॥
 पंचबटी सो गइ एक बारा । देखि बिकल भइ जुगल कुमारा ॥
 भ्राता पिता पुत्र उरगारी । पुरुष मनोहर निरखत नारी ॥
 होइ बिकल सक मनहि न रोकी । जिमि रबिमनि द्रव रबिहि बिलोकी
 रुचिर रूप धरि प्रभु पहिं जाई । बोली बचन बहुत मुमुकाई ॥
 तुम्ह सम पुरुष न मो सम नारी । यह मैं जोग बिधि रचा बिचारी ॥
 मम अनुरूप पुरुष जग माहीं । देखेउँ खोजि लोक तिहु नाहीं ॥
 तातें अब लगि रहिउँ कुमारी । मनु माना कछु तुम्हहि निहारी ॥

सीतहि चितइ कही प्रभु बाता । अहइ कुआर मोर लघु भ्राता ॥
 गइ लछिमन रिपु भगिनी जानी । प्रभु बिलोकि बोले मृदु बानी ॥
 सुंदरि सुनु मैं उन्ह कर दासा । पराधीन नहिं तोर सुपासा ॥
 प्रभु समर्थ कोसलपुर राजा । जो कछु करहिं उनहि सब छाजा ॥
 सेवक सुख चह मान भिखारी । ब्यसनी धन सुभ गति बिभिचारी
 लोभी जसु चह चार गुमानी । नभ दुहि दूध चहत ए प्रानी ॥
 पुनि फिरि राम निकट सो आई । प्रभु लछिमन पहिं बहुरि पठाई ॥
 लछिमन कहा तोहि सो बरई । जो तन तोरि लाज परिहरई ॥
 तब खिसिआनि राम पहिं गई । रूप भयंकर प्रगटत भई ॥
 सीतहि सभय देखि रघुराई । कहा अनुज सन सयन बुझाई ॥

दो०—लछिमन अति लाघवँ सो नाक कान बिनु कीन्हि ।

ताके कर रावन कहँ मनो चुनौती दोन्हि ॥ १७ ॥

नाक कान बिनु भइ बिकरारा । जनु सब सैल गेरु कें धारा ॥
 खर दूषन पहिं गइ बिलपाता । धिग धिगतव पौरुष बल भ्राता ॥
 तेहिं पूछा मंत्र कहैसि बुझाई । जातुधान सुनि सेन बनाई ॥
 धाए निमिचैर निकर बरूथा । जनु सपच्छ कज्जल गिरि जूथा ॥
 नाना बाहन नानाकारा । नानायुध धर घोर अपारा ॥
 सपनखा आगें करि लीनी । असुभ रूप श्रुति नासा हीनी ॥
 अमगुन अमित होहिं भयकारी । गनहिं न मृत्यु बिबस सब ज्ञागी ॥
 गर्जहिं तर्जहिं गगन उड़ाही । देखि कटक भट अति हरषाही ॥
 कोउ कह जित धरहु द्रौ भाई । धरि मारहु निय लेहु छड़ाई ॥
 धूरि पूरि नभ मंडल रहा । राम बालाइ अनुज सन कहा ॥

लै जाना कहि जाहु गिरि कंदर । आवा निसिचर कटकु भयंकर ॥
रहेहु सजग सुनि प्रभु कै बानी । चले सहित श्री सर धनु पानी ॥
देखि राम रिपुदल चलि आवा । बिहसि कठिन कोदंड चढ़ावा ॥

छं०—कोदंड कठिन चढ़ाई सिर जट जूट बाँधत सोह क्यों ।
मरकत सयल पर लरत दामिनि कोटि सौ जुग भुजग ज्यों ॥
कटि कसिनिषंग बिसाल भुज गहि चाप बिसिख सुधारि कै ।
चितवत मनहुँ मृगराज प्रभु गजराज घटा निहारि कै ॥

सो०—आइ गए वगमेल धरहु धरहु धावत सुभट ।

जथा बिलोकि अकेल बाल रबिहि घेरत दनुज ॥ १८ ॥

प्रभु बिलोकि सर सकहिं न डारी । थकित भई रजनीचर धारी ॥
सचिव बोलि बाले खर दूषन । यह कोउ नृपबालक नर भूषन ॥
नाग असुर सुर नर मुनि जेते । देखे जिने हते हम केते ॥
हम भरि जन्म सुनहु सब भाई । देखी नहिं असि सुंदरताई ॥
जद्यपि भगिनी कीन्हि कुरुपा । बध लायक नहिं पुरुष अनूपा ॥
देहु तुरत निज नारि दुराई । जीअत भवन जाहु दौ भाई ॥
भोर कहा तुम्ह ताहि सुनावहु । तासु वचन सुनि आतुर आवहु ॥
दूतन्ह कहा राम सन जाई । सुनत राम बोले मुसुकाई ॥
हम छत्री मृगया बन करहीं । तुम्ह सेखल मृग खोजत फिरहीं ॥
रिपु बलवंत देखि नहिं डरहीं । एक बार कालहु सन लरहीं ॥
जद्यपि मनुज दनुज कुल घालक । मुनि पालक खल सालक बालक
जौ न होइ बल घर फिरि जाहु । समर बिमुख मै हत उँ न काहु ॥
रन चढ़ि करिअ कपट चतुराई । रिपु पर कृपा परम कदराई ॥

दूतन्ह जाइतुरत सब कहेऊ । सुनि खर दूषन उर अति दहेऊ ॥

छं०—उर दहेउ कहेउ कि धरहु धाए बिकट भट रजनीचरा ।

सर चाप तोमर सक्ति सूल कृपान परिघ परसु धरा ॥

प्रभु कीन्हि धनुष टकोर प्रथम कठोर घोर भयावहा ।

भए वधिर व्याकुल जातुधान न ग्यान तेहि अवसररहा ॥

दो०—सावधान होइ धाए जानि सबल आराति ।

लागे वरपन राम पर अख सख बहुभाँति ॥ १९ (क) ॥

तिन्ह के आयुध तिल सम करि काटे रचुबीर ।

तानि सरासन श्रवन लागि पुनि छाँड़े निज तीर ॥ १९ (ख) ॥

छं०—तब चले वान कराल । फुँकरत जनु बहु ब्याल ॥

कोपेउ समर श्रीराम । चले विसिख निसित निकाम ॥

अवलोकि खरतर तीर । मुरि चले निसिचर बोर ॥

भए क्रुद्ध तीनिउ भाइ । जो भागि रन ते जाइ ॥

तेहि बधव हम निज पानि । फिरे मरन मन महुँ ठानि ॥

आयुध अनेक प्रकार । सनमुख ते करहिँ प्रहार ॥

रिपु परम कोपे जानि । प्रभु धनुष सर संधानि ॥

छाँड़े विपुल नाराच । लगे कटन बिकट पिसाच ॥

उर सीस भुज कर चरन । जहँ तहँ लगे महि परन ॥

चिक्करत लागत वान । धर परत कुधर समान ॥

भट कटत तन सत खंड । पुनि उठत करि पापंड ॥

नभ उड़त बहु भुज मुंड । विनु मौलि धावत रुंड ॥

खग कंक काक सुगाल । कटकटीहि कठिन कराल ॥

छं०—कटकटहिं जंबुक भूत प्रेत पिसाच खर्पर संचहीं ।
 वेताल बीर कपाल ताल बजाइ जोगिनि नंचहीं ॥
 रघुबीर बान प्रचंड खंडहिं भटन्ह के उर भुज सिरा ।
 जहँ तहँ परहिं उठि लरहिं धर धरु धरु करहिं भयकर गिरा ॥
 अंतावरीं गहि उड़त गीध पिसाच कर गहि धावहीं ।
 संग्राम पुर वासी मनहुँ बहु बाल गुड़ी उड़ावहीं ॥
 मारे पछारे उर बिदारे बिपुल भट कहँरत परे ।
 अवलोकि निज दल बिकल भट तिसिरादि खरदूषन फिरे ॥
 सर सक्ति तोमर परमु सूल कृपान एकहि बारहीं ।
 करि कोप श्रीरघुबीर पर अगनित निसाचर डारहीं ॥
 प्रभु निमिप महुँ रिपु सर निवारि पचारि डारे सायका ।
 दस दस बिसिख उर माझ मारे सकल निसिचर नायका ॥
 महि परत उठि भटभिरत मरत न करत माया अति घनी ।
 सुर डरत चौदह सहस प्रेत बिलोकि एक अवध धनी ॥
 सुर मुनि सभय प्रभु देखि मायानाथ अति कौतुक करयो ।
 देखहिं परसपर राम करि संग्राम रिपुदल लरि मरयो ॥

दो०—राम राम कहि तनु तजहिं पावहिं पद निर्बान ।
 करि उपाय रिपु मारे छन महुँ कृपानिधान ॥ २०(क)॥
 हरपित वरषहिं सुमन सुर बाजहिं गगन निसान ।
 अस्तुति करि करि सब चले सोभित विविध विमान ॥ २०(ख)॥

जब रघुनाथ समर रिपु जीते । सुर नर मुनि सब के भय बीते ॥
 तब लछिमन सीतहि लै आए । प्रभु पद परत हरषि उर लाए ॥
 सीता चितव स्याम मृदु गाता । परम प्रेम लोचन न अषाता ॥

पंचवटीं बसि श्रीरघुनायक । करत चरित सुर मुनि सुख दायक ॥
 धुआँ देखि खर दूषन केरा । जाइ सुपनखाँ रावन प्रेरा ॥
 बोली बचन क्रोध करि भारी । देस कोस कै सुरति बिसारी ॥
 करसि पान सोवसि दिनु राती । सुधि नहिं तव सिर पर आराती ॥
 राज नीति बिनु धन बिनु धर्मा । हरिहि समपे बिनु सतकर्मा ॥
 बिद्या बिनु बिबेक उपजाएँ । भ्रम फल पढ़ें किएँ अरु पाएँ ॥
 संग तें जती कुमंत्र ते राजा । मान ते ग्यान पान तें लाजा ॥
 प्रीति प्रनय बिनु मद ते गुनी । नासहिं बेगि नीति अस सुनी ॥

सो०—रिपु रुज पावक पाप प्रभु अहि गनिअ न छोट करि ।

अस कहि विविध बिलाप करि लागी रोदन करन ॥ २१(क) ॥

दो०—सभा माझ परि व्याकुल बहु प्रकार कह रोइ ।

तोहि जिअत दसकंधर सोरि कि असि गति होइ ॥ २१(ख) ॥

सुनत सभासद उठे अकुलाई । समुझाई गहि बाँह उठाई ॥
 कह लंकेस कसि निज बाता । केहूँ तव नासा कान निपाता ॥
 अवध नृपति दूसरथ के जाए । पुरुष सिंघ बन खेलन आए ॥
 समुझि परी मोहि उन्ह कै करनी । रहित निसाचर करिहहिं धरनी ॥
 जिन्ह कर भुजबल पाइ दसानन । अभय भए बिचरत मुनि कानन ॥
 देखत बालक काल समाना । परम धीर धन्वी गुन नाना ॥
 अतुलित बल प्रताप द्वौ आता । खल बधरत सुर मुनि सुखदाता ॥
 सोभा धाम राम अम नामा । तिन्ह के संग नारि एक स्यामा ॥
 रूप रासि बिधि नारि सँवारी । रति सत कोटि तासु बलिहारी ॥
 तासु अनुज काटे श्रुति नासा । सुनि तव भगिनि करहिं परिहासा ॥

खर दूषन सुनि लगे पुकारा । छन महुँ सकल कटक उन्ह मारा ॥
खर दूषन तिसिरा कर घाता । सुनि दससीस जरे सब गाता ॥

दो०—सूपनखहि समुझाइ करि बल बोलेसि बहु भौंति ।

गयउ भवन अति सोचबस नीद परइ नहिं राति ॥ २२ ॥

सुर नर असुर नाग खग माहीं । मोरे अनुचर कहँ कोउ नाहीं ॥
खर दूषन मोहि सम बलवंता । तिन्हहि को मारइ विनु भगवंता ॥
सुर रंजन भंजन महि भारा । जौ भगवंत लीन्ह अवतारा ॥
तौ मैं जाइ बैरु हठि करऊँ । प्रभु सरप्राण तजैं भव तरऊँ ॥
होइहि भजनु न तामस देहा । मन क्रम बचन मंत्र दृढ़ एहा ॥
जौ नररूप भूपसुत कोऊ । हरिहउँ नारि जीति रनदोऊ ॥
चला अकेल जान चढ़ि तहवाँ । बम मारीच सिंधु तट जहवाँ ॥
इहाँ राम जमि जुगुति बनाई । सुनहु उमा मो कथा सुहाई ॥

दो०—लछिमन गए वनहिं जब लेन मूल फल कंद ।

जनकसुता सन बोले बिहसि कृपा सुख बृन्द ॥ २३ ॥

सुनहु प्रिया व्रत रुचिर सुसीला । मैं कछु करबि ललित नर लीला ॥
तुम्ह पावक महुँ करहु निवासा । जौ लगि करौं निसाचर नासा ॥
जबहिं राम सब कहा बखानी । प्रभु पद धरि हियँ अनल समानी ॥
निज प्रतिबिंब राखि तहँ सीता । तैमइ सील रूप सुबिनीता ॥
लछिमनहुँ यह मरमु न जाना । जो कछु चरित रचा भगवाना ॥
दसमुख गयउ जहाँ मारीचा । नाइ माथ स्वारथ रत नीचा ॥
नवनि नीच कै अति दुखदाई । जिमि अंकुस धनु उरग बिलाई ॥
भयदायक खल कै प्रिय बानी । जिमि अकाल के कुसुम भवानी ॥

दो०—करि पूजा मारीच तब सादर पूछी बात ।

कवन हेतु मन न्यग्र अति अकसर आयहु तात ॥ २४ ॥

दसमुख सकल कथा तेहि आगें । कही सहित अभिमान अभागें ॥
होहु कपट मृग तुम्ह छलकारी । जेहि विधि हरि आनौं नृपनारी ॥
तेहि पुनि कहा सुनहु दमसीसा । ते नररूप चराचर ईसा ॥
तासों तात बयरु नहिं कीजै । मारें मरिअ जिआए जीजै ॥
मुनि मख राखन गयउ कुमारा । विनु फर सररघुपति मोहि मारा
सत जोजन आयउ छन माहीं । तिन्ह सन बयरु किऐं भल नाहीं
भइ मम कीट भृंग की नाई । जहँ तहँ मैं देखउं दोउ भाई ॥
जौं नर तात तदपि अति सूरा । तिन्हहि विरोधि न आइहि पूरा ॥

दो०—जेहिं ताड़का सुबाहु हति खंडेउ हर कोदंड ।

खर दूषन तिसिरा बधेउ मनुज कि अस बरिबंड ॥ २५ ॥

जाहु भवन कुल कुसल विचारी । सुनत जरा दीन्हिसि बहु गारी ॥
गुरु जिमि मूढ़ करसि मम बोधा । कहु जग मोहि समान को जोधा
तब मारीच हृदयँ अनुमाना । नवहि विरोधे नहिं कल्याना ॥
सखी ममीं प्रभु सठ धनी । बैद बंदि कबि भानस गुनी ॥
उभय भाँति देखा निज मरना । तब ताकिसि रघुनायक सरना ॥
उतरु देत मोहि बधव अभागें । कस न मरौं रघुपति सर लागें ॥
अस जिय जानि दसानन संगी । चला राम पद प्रेम अभंगा ॥
मन अति हरष जनाव न तेही । आजु देखिहउं परम सनेही ॥

छं०—निज परम प्रीतम देखि लोचन सुपल करि सुख पाइहौं ।

श्री सहित अनुज समेत कृपानिकेत पद मन लाइहौं ॥

निर्बान दायक क्रोध जा कर भगति अबसहि बसकरी ।

निज पानि सर संधानि सो मोहि बधिहि सुखसागर हरी ॥

दो०—मम पाछें धर भावत धरें सरासन वान ।

फिरि फिरि प्रभुहि विलोकिहउँ धन्य न मो सम आन ॥ २६ ॥

तेहि बन निकट दमानन गयऊ । तब मारीच कपटमृग भयऊ ॥
अति बिचित्र कछु बरनि न जाई । कनक देह मनि रचित बनाई ॥
सीता परम रुचिर मृग देखा । अंग अंग सुमनोहर बेषा ॥
सुनहु देव रघुवीर कृपाला । एहि मृग क अति सुंदर छाला ॥
सत्यसंध प्रभु बधि करि एही । आनहु चर्म कहति बैदेही ॥
तब रघुपति जानत सब कारन । उठे हरषि सुर काजु सँवारन ॥
मृग विलोकि कटि परिकर बाँधा । करतल चाप रुचिर सर सँधा ॥
प्रभु लछिमनहि कहा समुझाई । फिरत बिपिन निसिचर बहु भाई
सीता केरि करेहु रखवारी । बुधि बिबेक बल समय बिचारी ॥
प्रभुहि विलोकि चला मृगभाजी । धाए रामु सरासन साजी ॥
निगम नेति सिव ध्यान न पावा । मायामृग पाछें सो धावा ॥
कबहुँ निकट पुनि दूरि पराई । कबहुँक प्रगटइ कबहुँ छपाई ॥
प्रगटत दुरत करत छल भूरी । एहि बिधि प्रभुहि गयउ लै दूरी ॥
तब तकि राम कठिन सर मारा । धरनि परेउ करि घोर पुकारा ॥
लछिमन कर प्रथमहि लै नामा । पाछें सुमिरेसि मन महुँ रामा ॥
प्राण तजत प्रगटेसि निज देहा । सुमिरेसि रामु समेत सनेहा ॥
अंतर प्रेम तासु पहिचाना । मुनि दुर्लभ गति दीन्हि सुजाना ॥

दो०—बिपुल सुमन सुर बरषहि गावहि प्रभु गुन नाथ ।

निज पद दीन्ह असुर कहूँ दीनबंधु रघुनाथ ॥ २७ ॥

खल बधि तुरत फिरे रघुबीरा । सोह चाप कर कटि तूनीरा ॥
 आरत गिरा सुनी जब सीता । कहलछिमन सन परम सभीता ॥
 जाहु बेगि संकट अति भ्राता । लछिमन बिहसि कहा सुनु माता
 भृकुटि बिलास सृष्टि लय होई । सपनेहुँ संकट परइ कि सोई ॥
 मरम बचन सीता जब बोला । हरि प्रेरित लछिमन मन डोला ॥
 बन दिसि देव सौँपि सब काहु । चले जहाँ रावन ससि राहु ॥
 छन बीच दसकंधर देखा । आवा निकट जती कें बेषा ॥
 जाकें डर सुर असुर डेराहीं । निमिन नीद दिन अन्न न खाहीं ॥
 सो दससीस खान की नाई । इत उत चितइ चला भड़िहाई ॥
 इमि कुपंथ पग देत खगेसा । रह न तेज तन बुधि बल लेसा ॥
 नाना बिधि करि कथा सुहाई । राजनीति भय प्रीति देखाई ॥
 कह सीता सुनु जती गोसाई । बोलेहु बचन दुष्ट की नाई ॥
 तब रावन निजरूप देखावा । भई सभय जब नाम सुनावा ॥
 कह सीता धड़िधीर जु गाढ़ा । आइ गयउ प्रभु रहु खल ठाढ़ा ॥
 जिमि हरिबधुहि छुद्र सस चाहा । भएसि काल बस निसिचर नाहा
 सुनत बचन दससीस रिसाना । मन महुँ चरन बंदि सुख माना ॥

दो०—क्रोधवंत तब रावन लीन्हिसि रथ बैठाइ ।

चला गगनपथ आतुर भयँ रथ हाँकि न जाइ ॥ २८ ॥

हा जग एक बीर रघुराया । केहि अपराध बिसारेहु दाया ॥
 आरति हरन सरन सुखदायक । हा रघुकुल सरोज दिननायक ॥

हा लछिमन तुम्हार नहिं दोसा । सो फलु पायउँ कीन्हेउँ रोसा॥
 बिबिध बिलाप करति बैदेही । भूरि कृपा प्रभु दूरि सनेही ॥
 बिपति मोरि को प्रभुहि सुनावा । पुरोडास चह रासभ खावा ॥
 सीता कै बिलाप सुनि भारी । भए चराचर जीव दुखारी ॥
 गीधराज सुनि आगत बानी । रघुकुलतिलकनारि पहिचानी॥
 अधम निसाचर लीन्हें जाई । जिमि मलेछ बस कपिला गाई॥
 सीते पुत्रि करसि जनि त्रासा । कग्हिउँ जातुधान कर नासा ॥
 धावा क्रोधवंत खग कैसें । छूटइ पबि परबत कहूँ जैसें ॥
 रे रे दुष्ट ठाढ़ किन होही । निर्भय चलेसि न जानेहि मोही ॥
 आवत देखि कृतांत समाना । फिरि दसकंधर कर अनुमाना ॥
 कीमैनाक कि खगपति होई । मम बल जान सहित पति सोई ।
 जाना जरठ जटायू एहा । मम कर तीरथ छाँड़िहि देहा ॥
 सुनत गीध क्रोधातुर धावा । कह सुनु रावन मोर सिखावा ॥
 तजि जानकिहि कुसल गृह जाहू । नाहिं त अस होइहि बहुबाहू ॥
 राम रोष पावक अति घोग । होइहि मकल सलभ कुल तोरा ॥
 उतरु न देत दसानन जोधा । तबहिं गीध धावा करि क्रोधा ॥
 धरि कच बिरथ कीन्ह महि गिरा । सीतहि राखि गीध पुनि फिरा॥
 चोचन्ह मारि बिदारेसि देही । दंड एक भइ मुरुछा तेही ॥
 तब सक्रोध निसिचर खिसिआना । काढ़ेसि परम कराल कृपाना॥
 काटेसि पंख परा खग धरनी । सुमिरि राम करि अदभुत करनी॥
 सीतहि जान चढ़ाइ बहोरी । चला उताइल त्रास न थोरी ॥
 करति बिलाप जाति नभ सीता । व्याध बिबस जनु मृगी सभीता॥

गिरि पर बैठे कपिन्ह निहारी । कहि हरि नाम दीन्ह पट बारी॥
एहि विधि सीतहि सो लै गयऊ । बन असोक महँ राखत भयऊ ॥

दो०—हारि परा खल बहु विधि भय अरु प्रीति देखाइ ।

तय असोक पादप तर राखिसि जतन कराइ ॥२९(क)॥

नवाह्नपारायण, छठा विश्राम

जेहि विधि कपट कुरंग सँग धाइ चले श्रीराम ।

सो छवि सीता राखि उर रटति रहति हरिनाम ॥२९(ख)॥

रघुपति अनुजहि आवत देखी । बाहिज चिंता कीन्ह बिसेषी॥
जनकमुखा परिहरिहु अकेली । आयहु तात बचन मम पेली ॥
निसिचर निकर फिरहि बन माहीं । मम मन सीता आश्रमनाहीं ॥
गहि पद कमल अनुज कर जोरी । कहेउ नाथ कछु मोहि न खोरी॥
अनुज समेत गए प्रभु तहवाँ । गोदावरि तट आश्रम जहवाँ॥
आश्रम देखि जानकी हीना । भए बिकल जस प्राकृत दीना॥
हा गुन खान्नि जानकी सीता । रूप सील व्रत नेम पुनीता ॥
लछिमन समुझाए बहु भाँती । पूछत चले लता तरु पाँती ॥
हे खग मृग हे मधुकर श्रेणी । तुम्ह देखी सीता मृगनैनी ॥
खंजन सुक कपोत मृग मीना । मधुप निकर कोकिला प्रबीना॥
कुंद कली दाड़िम दामिनी । कमल सरद ससि अहिभामिनी॥
बरुन पास मनोज धनु हंसा । गज केहरि निज सुनत प्रसंसा ॥
श्रीफल कुनक कदलि हरषाहीं । नेकु न संक सकुच मन माहीं॥
सुनु जानकी तोहि बिनु आजू । हरषे सकल पाइ जनु राजू ॥

किमि सहि जात अनख तोहि पाहीं । प्रिया बेगि प्रगटसि कस नाहीं
एहि बिधि खोजत बिलपत स्वामी । मनहुँ महा बिरही अति कामी॥
पूरनकाम राम सुख रासी । मनुज चरित कर अज अबिनासी॥
आगें परा गीधपति देखा । सुमिरत राम चरन जिन्ह रेखा॥

दो०—कर सरोज सिर परसेउ कृपासिंधु रघुवीर ।

निरखि राम छबि धाम मुख विगत भई सब पीर ॥ ३० ॥

तब कह गीध बचन धरि धीरा । सुनहु राम भंजन भव भीरा ॥
नाथ दसानन यह गति कीन्ही । तेहिं खल जनकसुता हरि लीन्ही
लै दन्छिन दिसि गयउ गोसाईं । विलपति अति कुररी की नाई॥
दरस लागि प्रभु राखेउँ प्राना । चलन चहत अब कृपानिधाना॥
राम कहा तनु राखहु ताता । मुख मुसुकाइ कही तेहिं बाता ॥
जा कर नाम मरत मुख आवा । अधमउ मुकुत होइ श्रुति गावा ॥
सो मम लोचन गोचर आगें । राखौं देह नाथ केहि खाँगें ॥
जल भरि नयन कहहिं रघुराई । तात कर्म निज तें गति पाई ॥
परहित बस जिन्ह के मन माहीं । तिन्ह कहूँ जग दुर्लभ कछु नाहीं
तनु तजितात जाहु मम धामा । देउँ काह तुम्ह पूरनकामा ॥

दो०—सीता हरन तात जनि कहहु पिता सन जाइ ।

जौ मैं राम त कुल सहित कहिहि दसानन आइ ॥ ३१ ॥

गीध देह तजि धरि हरि रूपा । भूषन बहु पट पीत अनूपा ॥
स्याम गात बिपाल भुज चारी । अस्तुति करत नयन भरि बारी ॥

छं०—जय राम रूप अनूप निर्गुन सगुन गुन प्रेरक सही ।

दससीस बाहु प्रचंड खंडन चंड सर मंडन मही ॥

पाथोद गात सरोज मुख राजीव आयत लोचनं ।
 नित नौमि राम कृपाल बाहु बिसाल भव भय मोचनं ॥ १ ॥
 बलमप्रमेयमनादिमजमव्यक्तमेकमगोचरं ।
 गोबिंद गोपर द्वंद्वहर बिग्यानघन धरनीधरं ॥
 जे राम मंत्र जपंत संत अनंत जन मन रंजनं ।
 नित नौमि राम अकाम प्रिय कामादि खल दल गंजनं ॥ २ ॥
 जेहि श्रुति निरंजन ब्रह्म व्यापक बिरज अज कहि गावहीं ।
 करि ध्यान ग्यान बिराग जोग अनेक मुनि जेहि पावहीं ॥
 सो प्रगट करुना कंद सोभा बृंद अग जग मोहई ।
 मम हृदय पंकज भृंग अंग अनंग बहु छबि सोहई ॥ ३ ॥
 जो अगम सुगम सुभाव निर्मल असम सम सीतल सदा ।
 पस्यंति जं जोगी जतन करि करत मन गो बस सदा ॥
 सो राम रमा निवास संतत दास बस त्रिभुवन धनी ।
 मम उर बसउ सो समन संसृति जासु कीरति पावनी ॥ ४ ॥

दो०—अविरल भगति मागि वर गीध गयउ हरिधाम ।

तेहि कौ क्रिया जथोचित निज कर कीन्ही राम ॥ ३२ ॥

कोमल चित अति दीनदयाला । कारन बिनु रघुनाथ कृपाला ॥
 गीध अधम खग आमिष भोगी । गति दीन्ही जो जाचत जोगी ॥
 सुनहु उपा ते लोग अभागी हरि तजिहांहि बिषय अनुरागी ॥
 पुनि सीतहि खोजत द्वौ भाई चले बिलोकत बन बहुताई ॥
 संकुल लृता बिटप घन कानन बहु खग मृग तहैं गज पंचानन ॥
 आवत पंथ कबंध निपाता । तेहि सब कही साप कै बाता ॥

दुरबासा मोहि दीन्ही सापा । प्रभु पद पेखि मिटा सो पापा ॥
सुनु गंभर्व कहउँ मैं तोही । मोहि न सोहाइ ब्रह्मकुल द्रोही ॥

दो०—मन क्रम बचन कपट तजि जो कर भूसुर सेव ।

मोहि समेत बिरंचि सिव बस ताकें सब देव ॥ ३३ ॥

सापत ताड़त परुष कहंता । बिप्र पूज्य अस गावहि संता ॥
पूजिअ बिप्र सील गुन हीना । सुद्रन गुन गन ग्यान प्रबीना ॥
कहि निज धर्म ताहि समुझावा । निज पद प्रीति देखि मन भावा ॥
रघुपति चरन कमल सिरु नाई । गयउ गगन आपनि गति पाई ॥
ताहि देइ गति राम उदारा । सबरी कें आश्रम पगु धारा ॥
सबरी देखि राम गृहँ आए । मुनि के बचन समुझि जियँ भाए ॥
सरसिजलोचन बाहु विमाला । जटा मुकुट सिर उर बनमाला ॥
स्याम गौर सुंदर दोउ भाई । सबरी परी चरन लपटाई ॥
प्रेम मगन मुख बचन न आवा । पुनि पुनि पद सरोज सिरनावा ॥
सादर जल लै चरन पग्वारे । पुनि सुंदर आसन बैठारे ॥

दो०—कंद मूल फल सुरस अनि दिए राम कहँ आनि ।

प्रेम सहित प्रभु खाए चारंबार बखानि ॥ ३४ ॥

पानि जोरि आगें भइ ठाढ़ी । प्रभुहि बिलोकि प्रीति अति बाढ़ी ॥
केहि बिधि अस्तुति करौं तुम्हारी । अधम जाति मैं जड़मति भारी ॥
अधम ते अधम अधम अति नारी । तिन्ह महुँ मैं मतिमंद अघारी ॥
कहरघुपति सुनु भामिनि बाता । मानउँ एक भगति कर नाता ॥
जाति पाँति कुल धर्म बड़ाई । धन बल परिजन गुन चतुराई ॥
भगति हीन नर सोहइ कंसा । बिनु जल बारिद देखिअ जैसा ॥

नवधा भगति कहउँ तोहि पाहीं । सावधान सुनु धरु मन माहीं ॥
प्रथम भगति संतन्ह कर संगी । दूसरि रति मम कथा प्रसंगी ॥

दो०—गुर पद पंकज सेवा तीसरि भगति अमान ।

चौथि भगति मम गुन गन करइ कपट तजि गान ॥ ३५ ॥

मंत्र जाप मम दृढ़ बिस्वासा । पंचम भजन सो बेद प्रकासा ॥
छठ दम सील बिरति बहु करमा । निरत निरंतर सज्जन धरमा ॥
सातवँ सम मोहि मय जग देखा । मोतें संत अधिक करि लेखा ॥
आठवँ जथालाभ संतोषा । सपनेहुँ नहिँ देखइ परदोषा ॥
नवम सरल सब सन छलहीना । मम भरोस हियँ हरष न दीना ॥
नव महुँ एकउ जिन्ह कैं होई । नारि पुरुष सचराचर कोई ॥
सोइ अतिसय प्रिय भामिनि मोरें । सकल प्रकार भगति दृढ़ तोरें ॥
जोगि बृंद दुरलभ गति जोई । तो कहूँ आजु सुलभ मइ सोई ॥
मम दरसन फल परम अनूपा । जीव पाव निज सहज सरूपा ॥
जनकसुता कइ सुधि भामिनी । जानहि कहु करिबरगामिनी ॥
पंपा सरहि जाहु रघुराई । तहँ होइहि सुग्रीव मिताई ॥
सो सब कहिहि देव रघुबीरा । जानतहुँ पूछहु मतिधीरा ॥
बार बार प्रभु पद सिरु नाई । प्रेम सहित सब कथा सुनाई ॥

छं०—कहि कथा सकल बिलौकि हरि मुख हृदयँ पद पंकज धरे ।

तजि जोग पावक देह हरि पद लीन भइ जहँ नहिँ फिरे ॥

नर विविध कर्म अधर्म बहु मत सोकप्रद सब त्यागइ ।

बिस्वास करि कह दास तुलसी राम पद अनुरागइ ॥

दो०—जाति हीन अघ जन्म महि मुक्त कीन्हि असि नारि ।

महामंद मन सुख चहसि ऐसे प्रभुहि विसारि ॥ ३६ ॥

चले राम त्यागा बन सोऊ । अतुलित बल नर केहरि दोऊ ॥
बिरही इव प्रभु करत विषादा । कहत कथा अनेक संबादा ॥
लछिमन देखु बिपिन कइ सोभा । देखत केहि कर मन नहिं छोभा
नारि सहित सब खग मृग वृंदा । मानहुँ मोरि करत हहिं निंदा ॥
हमहि देखि मृग निकर पराहीं । मृगीं कहहिं तुम्ह कहँ भय नाहीं ॥
तुम्ह आनंद करहु मृग जाए । कंचन मृग खोजन ए आए ॥
संग लाइ करिनीं करि लेहीं । मानहु मोहि सिखावनु देहीं ॥
सास्त्र सुचितित पुनि पुनि देखिअ । भूप सुसेवित बम नहिं लेखिअ
राखिअ नारि जदपि उर माहीं । जुबती सास्त्र नृपति बस नाहीं ॥
देखहु तात बसंत सुहावा । प्रिया हीन मोहि भय उपजावा ॥

दो०—बिरह बिकल बलहीन मोहि जानेसि निपट अकेल ।

सहित बिपिन मधुकर खग मदन कीन्ह बगमेल ॥ ३७(क) ॥

देखि गयउ आता सहित तासु दूत सुनि बात ।

डेरा कीन्हैउ मनहुँ तब कटकु हटकि मनजात ॥ ३७(ख) ॥

बिटप बिसाल लता अरुझानी । बिबिध बितान दिए जनु तानी ॥
कदलि ताल बर धुजा पताका । देखि न मोह धीर मन जाका ॥
बिबिध भाँति फूले तरु नाना । जनु बानैत बने बहु बाना ॥
कहुँ कहुँ सुंदर बिटप सुहाए । जनु भट बिलग बिलग होइ छाए

कूजत पिक मानहुँ गज माते । टेक महोख उँट बिसराते ॥
 मोर चक्रोर कीर बर बाजी । पारावत मगल सब ताजी ॥
 तीतिर लावक पदचर जूथा । बरान न जाइ मनोज बरूथा ॥
 रथ गिरि सिला दुंदुभी झरना । चातक बंदी गुनगन बरना ॥
 मधुकर मुग्वर भेरि सहनाई । त्रिविध बयारि बसीठी आई ॥
 चतुरंगिनी सेन संग लान्हें । बिचरत सबहि चुनौती दीन्हें ॥
 लछिमन देखत काम अनीका । रहहि धीर तन्ह कै जग लीका ॥
 एहि कें एक परम बल नारी । तेहि तें उबर सुभट सोइ भारी ॥

दो०—तात तीनि अति प्रबल खल काम क्रोध अरु लोभ ।

मुनि बिग्यान धाम मन करहि निमिष महुँ छोभ ॥ ३८ (क) ॥

लोभ कें इच्छा दंभ बल काम कें केवल नारि ।

क्रोध कें परुष बचन बल मुनिवर कहहि विचारि ॥ ३८ (ख) ॥

गुनातीत सचराचर स्वामी । राम उमा सब अंतरजामी ॥
 कामिन्ह कै दीनता देखाई । धीरन्ह कें मन बिरति दढ़ाई ॥
 क्रोध मनोज लोभ मद माया । छूटहि सकल राम कीं दाया ॥
 सो नर इंद्रजाल नहि भूला । जापर होइ सो नट अनुकूला ॥
 उमा कहउँ मैं अनुभव अपना । मत हरि भजनु जगत सब सपना ॥
 पुनि प्रभु गए मरोवर तीरा । पंथा नाम सुभग गंभीरा ॥
 संत हृदय जस निर्मल वागी । बाँधे घाट मनोहर चारी ॥
 जहँ तहँ पिअहि बिबिध मृग नीरा । जनु उदार गृह जाचक भीरा ॥

दो०—पुरइनि सघन ओट जल वेगि न पाइअ मर्म ।

मायाछन्न न देखिए जैसैं निर्गुन ब्रह्म ॥ ३९(क) ॥

सुखी मीन सब एक रस अति अगाध जल माहिं ।

जथा धर्मसीलन्ह के दिन सुख संजुत जाहिं ॥ ३९(ख) ॥

बिकसे सरसिज नाना रंगा । मधुर मुग्ध गुंजत बहु भृंगा ॥
बोलत जलकुक्कुट कलहंमा । प्रभु विलोकि जनु करत प्रसंसा ॥
चक्रवाक बक खग समुदाई । देखत बनइ बगनि नहिं जाई ॥
सुंदर खग गन गिरा सुहाई । जात पथिक जनु लेत बोलाई ॥
ताल समीप मुनिन्ह गृह छाए । चहुं दिसि कानन बिटप सुहाए ॥
चंपक बकुल कदंब तमाला । पाटल पनस परास रसाला ॥
नव पल्लव कुसुमित तरु नाना । चंचरीक पटली कर गाना ॥
सीतल मंद सुगंध सुभाऊ । संतत बहइ मनोहर बाऊ ॥
कुहू कुहू कोकिल धुनि करहीं । मुनि ख सरस ध्यान मुनि टरहीं ॥

दो०—फल भारन नमि विटप सब रहे भूमि निअराइ ।

पर उपकारी पुरुष जिमि नवहिं सुसंपति पाइ ॥ ४० ॥

देखि राम अति रुचिर तलावा । मज्जनु कीन्ह परम सुख पावा ॥
देखी सुंदर तरुवर छाया । बैठे अनुज सहित रघुगया ॥
तहुं पुनि सकल देव मुनि आए । अस्तुति करि निज धाम सिधाए ॥
बैठे परम प्रमन्न कृपाला । कहत अनुज सन कथा रमाला ॥
बिरहवंत भगवंतहि देखी । नारद मन भा सोच बिसेषी ॥

मोर साप करि अंगीकारा । सहत राम नाना दुख भारा ॥
 ऐसे प्रभुहि बिलोकउँ जाई । पुनि न बनिहि अस अवसरु आई ॥
 यह बिचारि नारद करबीना । गए जहाँ प्रभु सुख आसीना ॥
 गावत रामचरित मृदु बानी । प्रेम सहित बहु भाँति बखानी ॥
 करत दंडवत लिए उठाई । राखे बहुत बार उर लाई ॥
 स्वागत पूँछि निकट बैठारे । लछिमन सादर चरन पखारे ॥

दो०—नाना विधि विनती करि प्रभु प्रसन्न जियँ जानि ।

नारद बोले वचन तब जोरि सरोरुह पानि ॥ ४१ ॥

सुनहु उदार सहज रघुनायक । सुंदर अगम सुगम बर दायक ॥
 देहु एक बर मागउँ स्वामी । जद्यपि जानत अंतरजामी ॥
 जानहु मुनि तुम्ह मोर सुभाऊ । जन सन कबहुँ कि करउँ दुराऊ ॥
 कवन बस्तु अमि प्रिय मोहि लागी । जो मुनिबर न सकहु तुम्ह मागी ॥
 जन कहूँ कछु अदेय नहिँ मोरें । अस बिस्वास तजहु जनि भोरें ॥
 तब नारद बोले हरषाई । अस बर मागउँ करउँ ढिठाई ॥
 जद्यपि प्रभु के नाम अनेका । श्रुति कह अधिक एक तैं एका ॥
 राम सकल नामन्ह ते अधिका । होउ नाथ अघ खग गन बधिका ॥

दो०—राका रजनी भगति तव राम नाम सोइ सोम ।

अपर नाम उडगन विमल वसहुँ भगत उर व्योम ॥ ४२ (क) ॥

एवमस्तु मुनि सन कहेउ कृपासिंधु रघुनाथ ।

तब नारद मन हरष अति प्रभु पद नायउ माथ ॥ ४२ (ख) ॥

अति प्रसन्न रघुनाथहि जानी । पुनि नारद बोले मृदु बानी ॥
 राम जबहिं प्रेरेउ निज माया । मोहेहु मोहि सुनहु रघुराया ॥
 तब बिबाह मै चाहउँ कीन्हा । प्रभु केहि कारन करै न दीन्हा ॥
 सुनु मुनि तोहि कहउँ सहरोसा । भजहिं जे मोहि तजि सकल भरोसा
 करउँ सदा तिन्ह कै रखवारी । जिमि बालक राखइ महतारी ॥
 गढ़ सिमु बच्छ अनल अहि धाई । तहँ राखइ जननी अरगाई ॥
 प्रौढ़ भएँ तेहि सुत पर माता । प्रीति करइ नहिं पाछिलि बाता ॥
 मोरें प्रौढ़ तनय सम ग्यानी । बालक सुत सम दास अमानी ॥
 जनहि मोर बल निज बल ताही । दुहु कहँ काम क्रोध रिपु आही ॥
 यह बिचारि पंडित मोहि भजहीं । पाएहुँ ग्यान भगति नहिं तजहीं
 दो०—काम क्रोध लोभादि मद प्रबल मोह कै धारि ।

तिन्ह महँ अति दारुन दुखद मायारूपी नारि ॥ ४३ ॥

सुनु मुनि कह पुरान श्रुति संता । मोह बिपिन कहूँ नारि बसंता ॥
 जप तप नेम जलाश्रय झारी । होइ ग्रीषम सोषइ सब नारी ॥
 काम क्रोध मद मत्सर भेका । इन्हहि हरषप्रद बरषा एक ॥
 दुर्बासना कुमुद समुदाई । तिन्ह कहँ सरद सदा सुखदाई ॥
 धर्म सकल सरसीरुह बृंदा । होइ हिम तिन्हहि दहइ सुख मंदा
 पुनि ममता जवास बहुताई । पलुहइ नारि सिसिर रितु पाई ॥
 पाप उलूक निकर सुखकारी । नारि निबिड़ रजनी अँधिआरी ॥
 बुधि बल सील सत्य सब मीना । बनसी सम त्रिय कहहिं प्रबीना ॥

दो०—अवगुन मूल सूलप्रद प्रमदा सब दुख खानि ।

ताते कीन्ह निवारन मुनि मैं यह जियँ जानि ॥ ४४ ॥

सुनि गघुपति के वचन मुहाए । मुनि तन पुलक नयन भरि आए
कहहु कवन प्रभु कै अभि गीती । सेवक पर ममता अरु प्रीती ॥
जे न भजहिँ अस प्रभु भ्रम त्यागी । ग्यान रंक नर मंद अभागी ॥
पुनि सादर बोले मुनि नागद । सुनहु राम विग्यान बिसारद ॥
संतन्ह के लच्छन रघुबीरा । कहहु नाथ भव भंजन भीरा ॥
सुनु मुनि संतन्ह के गुन कहऊँ । जिन्ह ते मैं उन्ह कैं बस रहऊँ ॥
षट विकार जित अनघ अकामा । अचल अकिंचन सुचि सुखधामा
अमितबोध अनाह मितभार्गी । सत्यसार कवि कोबिद जोगी ॥
सावधान मानद मदहीना । धीर धर्म गति परम प्रबीना ॥

दो०—गुनागार संसार दुख रहित विगत संदेह ।

तजि मम चरन सरोज प्रिय तिन्ह कहें देह न गेह ॥ ४५ ॥

निज गुन श्रवन सुनत सकु चाहिँ । पर गुन सुनत अधिक हरषाहिँ ॥
सम सीतल नहिँ त्यागहिँ नीती । सरल सुभाउ सबहिँ सन प्रीती ॥
जप तप व्रत दम संजम नेमा । गुरु गोविंद विप्र पद प्रेमा ॥
श्रद्धा छमा मयत्री दाया । मुदिता मम पद प्रीति अमाया ॥
बिरति बिबेक विनय विग्याना । बोध जथारथ बेद पुराना ॥
दंभ मान मद करहिँ न काऊ । भूलि न देहिँ कुमारग पाऊ ॥
गावहिँ सुनहिँ सदा मम लीला । हेतु रहित परहित रत सीला ॥

मुनि सुनु साधुन्ह के गुन जेने । कहि न सकहि सारद श्रुति तेवे ॥

छं०—कहि सक न सारद सेप नारद सुनत पद पंकज गहे ।

अस दीनधंधु कृपाल अपने भगत गुन निज मुख कहे ॥

सिरु नाड वारहि वार चरनान्ह ब्रह्मपुर नारद गए ।

ते धन्य तुलसीदास आस बिहाइ जे हरि रँग रँग ॥

दो०—रावनारि जसु पावन गावहि सुनहि जे लोग ।

राम भगति दद पावहि विनु बिराग जप जोग ॥ ४६(क)॥

दीप सिखा सम जुबति तन मन जनि होसि पतंग ।

भजहि राम तजि काम मद करहि सदा सतसंग ॥ ४६(ख)॥

मासपारायण, बाईसवाँ विश्राम

इति श्रीमद्रामचरितमानसे सकलकलिकलुषविध्वंसने

तृतीयः सोपानः समाप्तः ।

(अरण्यकाण्ड समाप्त)



भगवान् रामकी सुग्रीवसे मैत्री



सखा सोच त्यागहु बल मोरें ।

सब विधि घटब काज मैं तोरें ॥

श्रीगणेशाय नमः

श्रीजानकीवल्लभो विजयते

श्रीरामचरितमानस

चतुर्थ सोपान

(किष्किन्धाकाण्ड)

श्लोक

कुन्देन्दीवरसुन्दरावतिबलौ विज्ञानधामाबुभौ
शोभाढ्यौ वरधन्विनौ श्रुतिनुतौ गोविप्रवृन्दप्रियौ ।
मायामानुषरूपिणौ रघुवरौ सद्धर्मवर्मौ हितौ
सीतान्वेषणतत्परौ पथिगतौ भक्तिप्रदौ तौ हि नः ॥ १ ॥
ब्रह्माम्भोधिसमुद्भवं कलिमलप्रध्वंसनं चान्ययं
श्रीमच्छम्भुमुखेन्दुसुन्दरवरे संशोभितं सर्वदा ।
संसारामयभेषजं सुखकरं श्रीजानकीजीवनं
धन्यास्ते कृतिनः पिबन्ति सततं श्रीरामनामामृतम् ॥ २ ॥

सो०—मुक्ति जन्म महि जानि ग्यान खानि अघ हानि कर ।

जहँ बस संभु भवानि सो कासी सेइअ कस न ॥

जरत सकल सुर बृंद विषम गरल जेहि पान किय ।

तेहि न भजसि मन मंद को कृपाल संकर सरिस ॥

आगे चले बहुरि रघुगया । रिष्यमूक पर्वत निग्रया ॥
 तहँ रह मखिव सहित सुग्रीवा । आगत देखि अतुल बल मीवा ॥
 अति सभीत कह सुनु हनुमाना । पुरुष जुगल बल रूप निधाना ॥
 धरि बटु रूप देखु तैं जाई । कहेमु जानि जियँ सयन बुझाई ॥
 पठए बालि होहि मन मैला । भागों तुरत तजौ यह सँला ॥
 बिप्र रूप धरि कपि तहँ गयऊ । माथ नाइ पूछत अस भयऊ ॥
 कोतुम्ह स्यामल गार सरीरा । छत्री रूप फिगहू बन वारा ॥
 कठिन भूमि कोमल पद गामी । कवन हेतु बिचरहु बन खामी ॥
 मृदुल मनोहर सुंदर गाता । सहत दुमह बन आतप बाता ॥
 की तुम्ह तीनि देव महँ काँऊ । नर नारायन की तुम्ह दोऊ ॥

दो०—जग कारन तारन भव भंजन धरनी भार ।

की तुम्ह अखिल भुवन पति लीन्ह मनुज अवतार ॥ १ ॥

कोमलेस दमगथ के जाए । हम पितु बचन मानि बन आए ॥
 नाम राम लछिमन दोउ भाई । संग नारि सुकुमारि मुहाई ॥
 इहाँ हरी निर्भिचर बैदेही । बिप्र फिगहिँ हम खोजत तेही ॥
 आपन चरित कहा हम गाई । कहहु बिप्र निज कथा बुझाई ॥
 प्रभु पहिचानि परेउ गहि चरना सां मुख उमा जाइ नहिँ बरना ॥
 पुलकित तन मुख आव न बचना । देखत रुचिर बेष क रचना ॥
 पुनि धीगजु धरि अस्तुति कीन्ही । हरप हृदयँ निज नाथहि चीन्ही ॥
 मोर न्याउ मैं पूछा साई । तुम्ह पूछहु कस नर की नाई ॥
 तव माया बस फिरउँ भुलाना । ताते मैं नहिँ प्रभु पहिचाना ॥

दो०—एकु मैं मंद मोहवस कुटिल हृदय अग्यान ।

पुनि प्रभु मोहि विसारेउ दीनबंधु भगवान ॥ २ ॥

जदपि नाथ बहु अवगुन सोरें । सेवक प्रभुहि परै जनि भोरें ॥
नाथ जीव तव मायाँ माहा । सो निस्तरइ तुम्हारेहि छाहा ॥
ता पर मैं रघुवीर दोहाई । जानउँ नहिं कछु भजन उपाई ॥
सेवक सुत पति मातु भरांसैं । रहइ अमांच वनइ प्रभु पोमें ॥
अस कहि परेउ चरन अकुलाई । निज तनु प्रगटि प्रीति उर छाई ॥
तब रघुपति उठाइ उर लावा । निज लांचन जल सींचि जुड़ावा ॥
सुनु कपि जियँ मानसि जनि ऊना । तैं मम प्रिय लछियन ने दूना ॥
समदरसी मोहि कह मव कोऊ । सेवक प्रिय अनन्यगति सोऊ ॥

दो०—सो अनन्य जाकें असि मति न टरइ हनुमंत ।

मैं सेवक सचराचर रूप स्वामि भगवंत ॥ ३ ॥

देखि पवनसुत पति अनुकूला । हृदयँ हरप बीती सब सूला ॥
नाथ सैल पर कपिपति रहई । सो सुग्रीव दास तव अहई ॥
तेहि सन नाथ मयत्री कीजे । दीन जानि तेहि अभय करीजे ॥
सो सीता कर खोज कराइहि । जहँ तहँ मरकट कोटि पठाइहि ॥
एहि विधि सकल कथा समुझाई । लिए दुआँ जन पीठि चढ़ाई ॥
जब सुग्रीवँ राम कहूँ देखा । अतिमय जन्म धन्य करि लेखा ॥
सादर मिलेउ नाइ पद माथा । भेटेउ अनुज सहित रघुनाथा ॥
कपि कर मन बिचार एहि रीती । करिहहिं विधि सो सन ए प्रीती ॥

दो०—तब हनुमंत उभय दिसि की सब कथा सुनाइ ।

पावक साखी देइ करि जोरी प्रीति ददाइ ॥ ४ ॥

कीन्हि प्रीति कलु बीच न राखा । लछिमन राम चरित सब भाषा ॥
 कह सुग्रीव नयन भरि बारी । मिलिहि नाथ मिथिलेस कुमारी ॥
 मंत्रिन्ह सहित इहाँ एक बारा । बैठ रहेउँ मैं करत बिचारा ॥
 गगन पंथ देखी मैं जाता । परबस परी बहुत बिलपाता ॥
 राम राम हा राम पुकारी । हमहि देखि दीन्हेउ पट डारी ॥
 मागा राम तुरत तेहि दीन्हा । पट उर लाइ सोच अति कीन्हा ॥
 कह सुग्रीव सुनहु रघुबीरा । तजहु सोच मन आनहु धीरा ॥
 सब प्रकार करिहउँ सेवकाई । जेहि बिधि मिलिहि जानकी आई

दो०—सखा बचन सुनि हरषे कृपासिंधु बलसीव ।

कारन कवन बसहु बन मोहि कहहु सुग्रीव ॥ ५ ॥

नाथ बालि अरु मैं द्वौ भाई । प्रीति रही कलु बरनि न जाई ॥
 मय सुत मायावी तेहि नाऊँ । आवा सो प्रभु हमरे गाऊँ ॥
 अर्ध राति पुर द्वार पुकारा । बाली रिपु बल सहै न पारा ॥
 धावा बालि देखि सो भागा । मैं पुनि गयउँ बंधुसँग लागा ॥
 गिरिबर गुहँ पैठ सो जाई । तब बाली मोहि कहा बुझाई ॥
 परिखेसु मोहि एक पखवारा । नहिँ आवौं तब जानेसु मारा ॥
 मास दिवस तहँ रहेउँ खरारी । निसरी रुधिर धार तहँ भारी ॥
 बालि हतेसि मोहि मारिहि आई । सिला देह तहँ चलेउँ पराई ॥
 मंत्रिन्ह पुर देखा बिनु साई । दीन्हेउ मोहि राज बरिआई ॥
 बाली ताहि मारि गृह आवा । देखि मोहि जियँ भेद बढ़ावा ॥
 रिपु सम मोहि मारेसि अति भारी । हरि लीन्हेसि सर्वसु अरु नारी ॥
 तार्कें भय रघुबीर कृपाला । सकल भुवन मैं फिरेउँ बिहाला ॥

इहाँ साप बस आवत नाहीं । तदपि सभीत रहउँ मन माहीं ॥
सुनि सेवक दुख दीनदयाला । फरकि उठीं द्वै भुजा बिसाला ॥

दो०—सुनु सुग्रीव मारिहउँ बालिहि एकहि बान ।

ब्रह्म रुद्र सरनागत गएँ न उवरिहिं प्रान ॥ ६ ॥

जे न मित्र दुख होहिं दुखारी । तिन्हहि बिलोकत पातक भारी ॥
निज दुख गिरिसमरज करि जाना । मित्रक दुखरज मेरुसमाना ॥
जिन्ह केँ असि मति सहज न आई । तेसठ कत हठि करत मितआई ॥
कुपथ निवारि सुपंथ चलावा । गुन प्रगटै अवगुनन्हि दुरावा ॥
देत लेत मन संक न धरई । बल अनुमान सदा हित करई ॥
बिपति काल करसत गुन नेहा । श्रुति कह संत मित्र गुन एहा ॥
आगेँ कह मृदु बचन बनाई । पाछेँ अनहित मन कुटिलाई ॥
जा कर चित अहि गति सम भाई । अस कुमित्र परिहरेहिं भलाई ॥
सेवक सठ नृप कृपन कुनारी । कपटी मित्र सूल सम चारी ॥
सखा सोच त्यागहु बल मोरें । सब बिधि घटब काज मै तोरें ॥
कह सुग्रीव सुनहु रघुबीरा । बालि महाबल अतिरनधीरा ॥
हुंहुंभि अस्थि ताल देखराए । बिनु प्रयास रघुनाथ ढहाए ॥
देखि अमित बल बाढ़ी प्रीती । बालि बधव इन्ह भइ परतीती ॥
बार बार नावइ पद सीसा । प्रभुहि जानि मन हरष कपीसा ॥
उपजा ग्यान बचन तब बोला । नाथ कृपाँ मन भयउ अलाला ॥
सुख संपति परिवार बड़ाई । सब परिहरि करिहउँ सेवकाई ॥
ए सब रामभगति के बाधक । कहहिं संत तव पद अवराधक ॥
सत्रु मित्र सुख दुख जग माहीं । माया कृत परमारथ नाहीं ॥

बालि परम हित जासु प्रसादा । मिलेहु राम तुम्ह समन बिषादा ॥
 सपनैं जेहि सन होइ लराई । जागैं समुझत मन सकुचाई ॥
 अब प्रभु कृपा करहु एहि भाँती । सब तजि भजनु करैं दिन राती ॥
 सुनि विराग संजुत कथि बानी । बोले बिहँसि राम धनुपानी ॥
 जो कछु कहेउ सत्य सब सोई ! सखा बचन मम मृषा न होई ॥
 नट मरकट इव मवहि नचावत । रामु खगेस बेद अस गावत ॥
 लै सुग्रीव संग रघुनाथा । चले चाप सायक गहि हाथा ॥
 तब रघुपति सुग्रीव पठावा । गर्जेमि जाइ निकट बल पावा ॥
 सुनत बालि क्रोधातुर धावा । गहि कर चरन नारि समुझावा ॥
 सुनु पति जिन्हहि मिलेउ सुग्रीवा । ते द्वौ बंधु तेज बल सींवा ॥
 कोसलेस सुत लछिमन रामा । कालहु जीति सकहि संग्रामा ॥

दो०—कह बाली सुनु भीरु प्रिय समदरसी रघुनाथ ।

जौं कदाचि मोहि मारहि तौ पुनि होउँ सनाथ ॥ ७ ॥

अम कहि चला महा अभिमानी । तन समान सुग्रीवहि जानी ॥
 भिरे उभौ बह्लौ अति तर्जा । मुठिका मारि महाधुनि गर्जा ॥
 तब सुग्रीव विकल होइ भागा । मुष्टि प्रहार वज्र मम लागा ॥
 मैं जो कहा रघुवीर कृपाला । बंधु न होइ मोर यह काला ॥
 एकरूप तुम्ह आता दोऊ । तेहि भ्रम तें नहि मारेउँ सोऊ ॥
 कर परमा सुग्रीव सरीरा । तनु भा कुलिस गई मव पीरा ॥
 मेली कंठ सुमन कैं माला । पठवा पुनि बल देइ बिसाला ॥
 पुनि नाना विधि भई लराई । बिटप ओट देखहि रघुराई ॥

दो०—बहु छल बल सुग्रीव कर हियँ हारा भय मानि ।

मारा बालि राम तब हृदय माल्न सर तानि ॥ ८ ॥

परा विकल मद्रि सर के लागें । पुनि उठि बैठ देखि प्रभु आगें ॥
 स्याम गात सिर जटा बनाएँ । अरुन नयन सरचाप चढ़ाएँ ॥
 पुनि पुनि चितइ चरन चित दीन्हा । सुफल जन्म माना प्रभु चीन्हा
 हृदयँ प्रीति मुख बचन कठोरा । बाला चितइ राम की ओरा ॥
 धर्म हेतु अवतरेहु गोसाई । मारेहु मोहि व्याध की नाई ॥
 मैं बैरी सुग्रीव पिआरा । अवगुन कवन नाथ मोहि मारा ॥
 अनुज बधू भगिनी सुत नारी । सुनु सठ कन्या सम एचारी ॥
 इन्हहि कुट्टि बिलाकइ जोई । ताहि बधेँ कछु पाप न होई ॥
 मूढ़ तोहि अतिसय अभिमाना । नारि सिखावन करसि न काना ॥
 मम भुज बल आश्रित तेहि जानी । मारा चहसि अधम अभिमानी ॥

दो०—सुनहु राम स्वामी सन चल न चातुरी मोरि ।

प्रभु अजहूँ मैं पापी अंतकाल गति तोरि ॥ ९ ॥

सुनत राम अति कोमल बानी । बालि सीस परसे उ निज पानी ॥
 अचल करौँ तनु राखहु प्राना । बालि कहा सुनु कृपा निधाना ॥
 जन्म जन्म मुनि जतनु करहीं । अंत राम कहि आवत नाही ॥
 जासु नाम बल मंकर कासी । देत सबहि मम गति अविनासी ॥
 मम लोचन गोचर सोइ आवा । बहुरि कि प्रभु अस बनिहि बनावा ॥

छं०—सो नयन गोचर जासु गुन नित नेति कहि श्रुति गावहीं ।

जिति पवन मन गो निरस करि मुनि ध्यान कबहुँक पावहीं ॥

मोहि जानि अति अभिमान बस प्रभु कहेउ राखु सरीरही ।
 अस कवन सठ हाँठ काटि सुरतरु बारि करिहि बबूरही ॥ १ ॥
 अब नाथ करि करुना बिलोकहु देहु जो बर मागऊँ ।
 जेहि जोनि जन्मौँ कर्म बस तहाँ राम पद अनुरागऊँ ॥
 यह तनय मम सम बिनय बल कल्याणप्रद प्रभु लीजिए ।
 गहि बाँह सुर नर नाह आपन दास अंगद कीजिए ॥ २ ॥

दो०—राम चरन हृद प्रीति करि बालि कीन्ह तनु त्याग ।
 सुमन माल जिमि कंठ ते गिरत न जानइ नाग ॥ १० ॥

राम बालि निज धाम पठावा । नगर लोग सब व्याकुल धावा ॥
 नाना बिधि बिलाप कर तारा । छूटे केस न देह सँभारा ॥
 तारा बिकल देखि रघुराया । दीन्ह ग्यान हरि लीन्ही माया ॥
 छिति जल पात्रक गगन समीरा । पंच रचित अति अधम सरीरा ॥
 प्रगट सो तनु तब आगें सोवा । जीव निन्य केहि लगि तुम्ह रोवा ॥
 उपजा ग्यान चरन तब लागी । लीन्हेसि परम भगति बर मागी ॥
 उमा दारु जोषित की नाई । सबहि नचावत रामु गोसाई ॥
 तब सुग्रीवहि आयसु दीन्हा । मृतक कर्मविधिवत सब कीन्हा ॥
 राम कहा अनुजहि समुझाई । राज देहु सुग्रीवहि जाई ॥
 रघुपति चरन नाइ करि माथा । चले सकल प्रेरित रघुनाथा ॥

दो०—लछिमन तुरत बोलाए पुरजन विप्र समाज ।
 राजु दीन्ह सुग्रीव कहँ अंगद कहँ जुबराज ॥ ११ ॥

उमा राम सम हित जग माहीं । गुरु पितु मातु बंधु प्रभु नाहीं ॥
 सुर नर मूनि सब कै यह रीती । स्वारथ लागि करहि सब प्रीती ॥

बालि त्रास व्याकुल दिन राती । तन बहु व्रन चिंताँ जर छाती ॥
 सोइ सुग्रीव कीन्ह कपिराऊ । अति कृपाल रघुबीर सुभाऊ ॥
 जानतहुँ अस प्रभु परिहरहीं । काहे न बिपति जाल नर परहीं ॥
 पुनि सुग्रीवहि लीन्ह बोलाई । बहु प्रकार नृपनीति सिखाई ॥
 कह प्रभु सुनु सुग्रीव हरीसा । पुर न जाउँ दस चारि बरीसा ॥
 गत ग्रीषम बरषा रितु आई । रहिहउँ निकट सैल पर छाई ॥
 अंगद सहित करहु तुम्ह राजू । संतत हृदयँ धरेहु मम काजू ॥
 जब सुग्रीव भवन फिरि आए । राम प्रवरषन गिरि पर छाए ॥

दो०—प्रथमहिं देवन्ह गिरि गुहा राखेउ रुचिर बनाइ ।

राम कृपानिधि कछु दिन बास करहिं गे आइ ॥ १२ ॥

सुंदर वनकुसुमित अति सोभा । गुंजत मधुप निकर मधु लोभा ॥
 कंद मूल फल पत्र सुहाए । भए बहुन जब ते प्रभु आए ॥
 देखि मनोहर सैल अनूपा । रहेतहुँ अनुज सहित सुरभूपा ॥
 मधुकर खग मृग तनु धरि देवा । करहिं सिद्ध मुनि प्रभु कै सेवा ॥
 मंगलरूप भयउ वन तब ते । कीन्ह निवासरमापति जब ते ॥
 फटिक सिला अति सुभ्र सुहाई । सुख आसीन तहाँ द्वौ भाई ॥
 कहत अनुज सन कथा अनेका । भगति विरति नृपनीति बिबेका ॥
 बरषा काल मेघ नभ छाए । गरजत लागत परम सुहाए ॥

दो०—लछिमन देखु मोर गन नाचत बारिद पेखि ।

गृही विरति रत हरष जस विष्णुभगत कहूँ देखि ॥ १३ ॥

घन घमंड नभ गरजत घोरा । प्रिया हीन डरपत मन मोरा ॥
 दामिनि दमक रह न घन माहीं । खल कै प्रीति जथा थिर नाहीं ॥

बरषहिं जलद भूमि निअराएँ । जथा नवहिं बुध बिद्या पाएँ ॥
 बूँद अघात सहहिं गिरि कैसैं । खल के बचन संत सह जैसैं ॥
 छुद्र नदीं भरि चलीं तोराई । जस थोरेहुँधन खल इतराई ॥
 भूमि परत भा ढाबर पानी । जनु जीवहि माया लपटानी ॥
 समिटि समिटि जल भरहिं तलावा । जिमि सदगुन सज्जन पहिं आवा
 सरिता जल जलनिधि महुँ जाई । होइ अचल जिमि जिव हरि पाई ॥

दो०-हरित भूमि तृन संकुल समुज्जि परहिं नहिं पंथ ।

जिमि पाखंड वाद तें गुप्त होहिं मदयंथ ॥ १४ ॥

दादुर धुनि चहु दिसा सुहाई । बेद पढ़हिं जनु बडु समुदाई ॥
 नव पल्लव भए बिटप अनेका । साधक मन जस मिलें बिबेका ॥
 अर्क जवास पात बिनु भयऊ । जस सुराज खल उद्यम गयऊ ॥
 खोजत कतहुँ मिलइ नहिं धूरी । करइ क्रोध जिमि धरमहि दूरी ॥
 ससि संपन्न सोह महि कैसी । उपकारी के संपति जैसी ॥
 निसि तम घन खद्योत बिराजा । जनु दंभिन्ह कर मिला समाजा ॥
 महावृष्टि चलि फूटि किआरीं । जिमि सुतंत्र भएँ बिगरहिं नारीं ॥
 कृषी निरावहिं चतुर किसाना । जिमि बुध तजहिं मोह मद माना ॥
 देखिअत चक्रवाक खग नाहीं । कलिहि पाइ जिमि धर्म पराहीं ॥
 ऊषर बरषइ तृन नहिं जामा । जिमि हरिजन हियँ उपज न कामा
 बिबिध जंतु संकुल महि आजा । प्रजा वाढ़ जिमि पाइ सुराजा ॥
 जहँ तहँ रहे पथिक थकि नाना । जिमि इंद्रिय गन उपजें ग्याना ॥

दो०-कबहुँ प्रवल बह मारुत जहँ तहँ मेघ विलाहिं ।

जिमि कपूत के उपजें कुल सद्धर्म नसाहिं ॥ १५(क) ॥

कबहुँ दिवस महँ निबिड़ तम कबहुँक प्रगट पतंग ।

बिनसइ उपजइ ग्यान जिमि पाइ कुसंग सुसंग ॥ १५ (ख) ॥

बरषा बिगत सरद रितु आई । लछिमन देखहु परम सुहाई ॥
 फूलें कास सकल महि छाई । जनु बरषाँ कृत प्रगट बुढ़ाई ॥
 उदित अगस्ति पंथ जल सोषा । जिमि लोभहि सोषइ संतोषा ॥
 सरिता सर निर्मल जल सोहा । संत हृदय जस गत मद मोहा ॥
 रस रस सुख सरित सर पानी । ममता त्याग करहिं जिमि ग्यानी
 जानि सरद रितु खंजन आए । पाइ समय जिमि सुकृत सुहाए ॥
 पंक न रेनु सोह असि धरनी । नीति निपुन नृप कै जसि करनी ॥
 जल संकोच बिकल भइ मीना । अबुध कुटुंबी जिमि धनहीना ॥
 बिनु घन निर्मल सोह अकासा । हरिजन इव परिहरि सब आसा ॥
 कहुँ कहुँ वृष्टि सारदी थोरी । कोउ एक पाव भगति जिमि मोरी

दो०—चले हरषि तजि नगर नृप तापस बनिक भिखारि ।

जिमि हरिभगति पाइ श्रम तजहिं आश्रमी चारि ॥ १६ ॥

सुखी मीन जे नीर अगाधा । जिमि हरि सरन न एकउ बाधा ॥
 फूलें कमल सोह सर कैसा । निर्गुन ब्रह्म सगुन भएँ जैसा ॥
 गुंजत मधुकर मुखर अनूपा । सुंदर खग रव नाना रूपा ॥
 चक्रबाक मन दुख निसि पेखी । जिमि दुर्जन पर संपति देखी ॥
 चातक रटत वृषा अति ओही । जिमि सुख लहइ न संकरद्रोही ॥
 सरदातप निसि ससि अपहरई । संत दरस जिमि पातक टरई ॥
 देखि इंदु चकोर समुदाई । चितवहिं जिमि हरिजन हरि पाई ॥
 मसक दंस बीते हिम त्रासा । जिमि द्विज द्रोह किएँ कुल नासा ॥

दो०—भूमि जीव संकुल रहे गए सरद रितु पाइ ।

सदगुर मिलें जाहिं जिमि संसय भ्रम समुदाइ ॥ १७ ॥

बरषा गत निर्मल रितु आई । सुधि न तात सीता कै पाई ॥
 एक बार कैसेहुँ सुधि जानौं । कालहु जीति निमिष महुँ आनौं ॥
 कतहुँ रहउ जौ जीवति होई । तात जतन करि आनउँ सोई ॥
 सुग्रीवहुँ सुधि मोरि बिसारी । पावा राज कोस पुर नारी ॥
 जेहि सायक मारा मैं बाली । तेहिं सर हतौं मूढ़ कहँ काली ॥
 जासु कृपाँ छूटहिं मद मोहा । ता कहँ उमा कि सपनेहुँ कोहा ॥
 जानहिं यह चरित्र मुनि ग्यानी । जिन्ह रघुबीर चरनरति मानी ॥
 लछिमन क्रोधवंत प्रभु जाना । धनुष चढ़ाइ गहे कर बाना ॥

दो०—तब अनुजहि समुझावा रघुपति करुना सीव ।

भय देखाइ लैं आवहु तात सखा सुग्रीव ॥ १८ ॥

इहाँ पवनसुत हृदयँ बिचारा । राम काजु सुग्रीवँ बिसारा ॥
 निकट जाइ चरनन्हि सिरु नावा । चारिहु बिधि तेहि कहि समुझावा
 सुनि सुग्रीवँ परम भय माना । विषयँ मोर हरि लीन्हेउ ग्याना ॥
 अब मारुतेसुत दूत समूहा । पठवहु जहँ तहँ बानर जूहा ॥
 कहहु पाख महुँ आव न जोई । मोरें कर ता कर बध होई ॥
 तब हनुमंत बोलाए दूता । सब कर करि सनमान बहूता ॥
 भय अरु प्रीति नीति देखराई । चले सकल चरनन्हि सिर नाई ॥
 एहि अवसर लछिमन पुर आए । क्रोध देखि जहँ तहँ कपि धाए ॥

दो०—धनुष चढ़ाइ कहा तब जारि करउँ पुर छार ।

ब्याकुल नगर देखि तब आयउ बालिकुमार ॥ १९ ॥

चरन नाइ सिरु बिनती कीन्ही । लछिमन अभय बाँह तेहि दीन्ही
 क्रोधवंत लछिमन सुनि काना । कह कपीस अति भयँ अकुलाना
 सुनु हनुमंत संग लै तारा । करि बिनती समुझाउ कुमारा ॥
 तारा सहित जाइ हनुमाना । चरन बंदि प्रभु सुजस बखाना ॥
 करि बिनती मंदिर लै आए । चरन पखारि पलंग बैठाए ॥
 तब कपीस चरनन्हि सिरु नावा । गहि भुज लछिमन कंठ लगावा ॥
 नाथ बिषय सम मद कलु नाहीं । मुनि मन मोह करइ छन माहीं ॥
 सुनत बिनीत बचन सुख पावा । लछिमन तेहि बहु बिधि समुझावा
 पवन तनय सब कथा सुनाई । जेहि बिधि गए दूत समुदाई ॥

दो०—हरषि चले सुग्रीव तब अंगदादि कपि साथ ।

रामानुज आगे करि आए जहँ रघुनाथ ॥ २० ॥

नाइ चरनसिरु कह कर जोरी । नाथ मोहि कलु नाहिन खोरी ॥
 अतिसय प्रबल देव तव माया । छूटइ राम करहु जौं दाया ॥
 बिषय बस्य सुर नर मुनि स्वामी । मैं पावँ पसु कपि अति कामी ॥
 नारिनयन सर जाहि न लागा । घोर क्रोध तम निसि जो जागा ॥
 लोभ पाँस जेहिं गरन बँधाया । सो नर तुम्ह समान रघुराया ॥
 यह गुन साधन तें नहिं होई । तुम्हरी कृपाँ पाव कोइ कोई ॥
 तब रघुपति बोले मुसुकाई । तुम्ह प्रिय मोहि भरत जिमि भाई
 अब सोइ जतनु करहु मन लाई । जेहि बिधि सीता कै सुधि पाई ॥

दो०—एहि बिधि होत बतकही आए बानर जूथ ।

नाना बरन सकल दिसि देखिअ कीस बरूथ ॥ २१ ॥

बानर कटक उमा मैं देखा । सो मूरुख जो करन चह लेखा ॥

आइ राम पद नावहिं माथा । निरखि बदन सब होहिं सनाथा
 अस कपि एक न सेना माहीं । राम कुसल जेहि पूछी नाहीं ॥
 यह कछु नहिं प्रभु कइ अधिकार्ई । बिस्वरूप व्यापक रघुराई ॥
 ठाढ़े जहँ तहँ आयसु पाई । कह सुग्रीव सबहि समुझाई ॥
 राम काजु अरु मोर निहोरा । बानर जूथ जाहु चहुँ ओरा ॥
 जनकसुता कहँ खोजहु जाई । मास दिवस महँ आएहु भाई ॥
 अवधि मेटि जो बिनु सुधि पाएँ । आवइ बनिहि सो मोहि मराएँ ॥

दो०—बचन सुनत सब बानर जहँ तहँ चले तुरंत ।

तब सुग्रीवँ बोलाए अंगद नल हनुमंत ॥ २२ ॥

सुनहु नील अंगद हनुमाना । जामवंत मतिधीर सुजाना ॥
 सकल सुभट मिलि दच्छिन जाहू । सीता सुधि पूछेहु सब काहू ॥
 मन क्रम बचन सो जतन बिचारेहु । रामचंद्र कर काजु सँवारेहु ॥
 भानु पीठि सेइअ उर आगी । स्वामिहि सर्व भाव छल त्यागी ॥
 तजि माया सेइअ परलोका । मिटहिं सकल भव संभव सोका ॥
 देह धरे कर यह फलु भाई । भजिअ राम सब काम बिहाई ॥
 सोइ गुनग्यँ सोई बड़भागी । जो रघुबीर चरन अनुरागी ॥
 आयसु मागि चरन सिरु नाई । चले हरषि सुमिरत रघुराई ॥
 पाछें पवन तनय सिरु नावा । जानि काज प्रभु निकट बोलावा ॥
 परसा सीस सरोरुह पानी । कर मुद्रिका दीन्हि जन जानी ॥
 बहु प्रकार सीतहि समुझाएहु । कहि बल बिरह बेगि तुम्ह आएहु ॥
 हनुमत जन्म सुफल करि माना । चलेउ हृदयँ धरि कृपानिधाना ॥
 जद्यपि प्रभु जामत सब बाता । राजनीति राखत सुरत्राता ॥

दो०—चले सकल बन खोजत सरिता सर गिरि खोह ।

राम काज लयलीन मन बिसरा तन कर छोह ॥ २३ ॥

कतहुँ होइ निमिचर सैं भेटा । प्रान लेहिं एक एक चपेटा ॥
बहु प्रकार गिरि कानन हेरहिं । कोउ मुनि मिलइ ताहि सब घेरहिं
लागि तृषा अतिसय अकुलाने । मिलइ न जल घन गहन भुलाने
मन हनुमान कीन्ह अनुमाना । मरन चहत सब बिनु जलपाना ॥
चढ़ि गिरि सिखर चहुँ दिसि देखा । भूमि बिबर एक कौतुक पेखा ॥
चक्रयाक वक हंस उड़ाहीं । बहुतक खग प्रबिसहिं तेहि माहीं ॥
गिरि ते उतरि पवनसुत आवा । सब कहुँ लैं सोइ बिबर देखावा ॥
आगें कै हनुमंतहि लीन्हा । पैठे बिबर बिलंब न कीन्हा ॥

दो०—दीख जाइ उपवन वर सर विगसित बहु कंज ।

मंदिर एक रुचिर तहँ वैठि नारि तप पुंज ॥ २४ ॥

दूरि ते ताहि सबन्हि सिरु नावा । पूछें निज वृत्तांत सुनावा ॥
तेहिं तब कहा करहु जल पाना । खाहु सुरस सुंदर फल नाना ॥
मज्जनु कीन्ह मधुर फल खाए । तासु निकट पुनि सब चलि आए
तेहिं सब आपनि कथा सुनाई । मै अब जाब जहाँ रघुगई ॥
मृदहु नयन बिबर तजि जाहू । पैहहु सीतहि जनि पछिताहू ॥
नयन मूदि पुनि देखहिं बीरा । ठाढ़े सकल सिंधु कैं तीरा ॥
सो पुनि गई जहाँ रघुनाथा । जाइ कमल पद नाएसि माथा ॥
नाना भाँति बिनय तेहिं कीन्ही । अनपायनी भगति प्रभु दीन्ही ॥

दो०—बदरीवन कहुँ सो गई प्रभु अग्या धरि सीस ।

उर धरि राम चरन जुग जे बंदत अज ईस ॥ २५ ॥

इहाँ विचारहिं कपि मन माहीं । बीती अवधि काज कछु नाहीं ॥
 सब मिलि कहहिं परस्पर बाता । बिनु सुधि लएँ करब का आता ॥
 कह अंगद लोचन भरि बारी । दुहुँ प्रकार भइ मृत्यु हमारी ॥
 इहाँ न सुधि सीता कै पाई । उहाँ गएँ मारिहि कपिराई ॥
 पिता बधे पर मारत मोही । राखा राम निहोर न ओही ॥
 पुनि पुनि अंगद कह सब पाहीं । मरन भयउ कछु संशय नाहीं ॥
 अंगद बचन सुनत कपि बीरा । बोलि न सकहिं नयन बह नीरा ॥
 छन एक सोच मगन होइ रहे । पुनि अस बचन कहत सब भए ॥
 हम सीता कै सुधि लीन्हें बिना । नहिं जैहैं जुबराज प्रबीना ॥
 अस कहि लवन सिंधु तट जाई । बैठे कपि सब दर्भ डसाई ॥
 जामवंत अंगद दुख देखी । कहीं कथा उपदेस बिसेषी ॥
 तात राम कहुँ नर जनि मानहु । निर्गुन ब्रह्म अजित अज जानहु ॥
 हम सब सेवक अति बड़भागी । मंतत मगुन ब्रह्म अनुरागी ॥

दो०—निज इच्छैं प्रभु अवतरइ सुर महि गो द्विज लागि ।

सगुन उपासक मंग तहँ रहहिं मोच्छ सब त्यागि ॥ २६ ॥

एहि विधि कथै कहहिं बहु भाँती । गिरि कंदराँ सुनी संपाती ॥
 बाहेर होइ देखि बहु कीसा । मोहि अहार दीन्ह जगदीसा ॥
 आजु सबहि कहँ भच्छन करउँ । दिन बहु चले अहार बिनु मरउँ
 कबहुँ न मिल भरि उदर अहारा । आजु दीन्ह विधि एकहिं बारा ॥
 डरपे गीध बचन सुनि काना । अब भामरन सत्य हम जाना ॥
 कपि सब उठे गीध कहँ देखी । जामवंत मन सोच बिसेषी ॥
 कह अंगद विचारि मन माहीं । धन्य जटायू सम कोउ नाहीं ॥

राम काज कारन तनु त्यागी । हरि पुर गयउ परम बड़भागी ॥
सुनि खग हरष सोक जुत बानी । आवा निकट कपिन्ह भय मानी
तिन्हहि अभय करि पूछेसि जाई । कथा सकल तिन्ह ताहि सुनाई ॥
सुनि संपाति बंधु कै करनी । रघुपति महिमा बहुविधि बरनी ॥

दो०—मोहि लै जाहु सिधुतट देउँ तिलांजलि ताहि ।

वचन सहाइ करवि मै पैहहु खोजहु जाहि ॥ २७ ॥

अनुज क्रिया करि सागर तीरा । कहि निज कथा सुनहु कपि बीरा
हम द्वौ बंधु प्रथम तरुनाई । गगन गए रवि निकट उड़ाई ॥
तेजन महि सक सो फिरि आवा । मैं अभिमानी रवि निअरावा ॥
जरे पंख अति तेज अपारा । परेउँ भूमि करि घोर चिकारा ॥
मुनि एक नाम चंद्रमा ओही । लागी दया देखि करि मोही ॥
बहु प्रकार तेहिं ग्यान सुनावा । देह जनित अभिमान छड़ावा ॥
त्रेता ब्रह्म मनुज तनु धरिही । तासु नारि निसिचर पति हरिही
तासु खोज पठइहि प्रभु दूता । तिन्हहि मिलें तैं होव पुनीता ॥
जमिहहि पंख करसि जनि चिंता । तिन्हहि देखाइ देहेसु तैं सीता ॥
मुनि कइ गिरा सत्य भइ आजू । सुनि मम वचन करहु प्रभु काजू
गिरि त्रिकूट ऊपर बस लंका । तहँ रह रावन सहज असंका ॥
तहँ असोक उपवन जहँ रहई । सीता बैठि सोच रत अहई ॥

दो०—मैं देखउँ तुम्ह नाहीं गीधहि दृष्टि अपार ।

बूढ़ भयउँ न न करतेउँ कछुक सहाय तुम्हार ॥ २८ ॥

जो नाघइ सत जोजन सागर । करइ सो राम काज मति आगर ॥
मोहि बिलोकि धरहु मन धीरा । राम कृपाँ कस भयउ सरीरा ॥

पापिउ जाकर नाम सुमिरहीं । अति अपार भवसागर तरहीं ॥
 तासु दूत तुम्ह तजि कदराई । राम हृदयँ धरि करहु उपाई ॥
 अस कहि गरुड़ गीध जब गयऊ । तिन्ह कै मन अति बिसमय भयऊ
 निज निज बल सब काहूँ भाषा । पार जाइ कर संसय राखा ॥
 जरठ भयउँ अब कहइ रिछेसा । नहिँ तन रहा प्रथम बल लेसा ॥
 जबहिँ त्रिविक्रम भए खरारी । तब मै तरुन रहेउँ बल भारी ॥

दो०—बलि बाँधत प्रभु बादेउ सो तनु वरनि न जाइ ।

उभय घरी महँ दीन्हिँ सात प्रदच्छिन धाइ ॥ २९ ॥

अंगद कहइ जाउँ मैं पारा । जियँ संसय कछु फिरती बारा ॥
 जामवंत कह तुम्ह सब लायक । पठइअ किमि सबही कर नायक ॥
 कहइ रीछपति सुनु हनुमाना । का चुप साधि रहेहु बलवाना ॥
 पवन तनय बल पवन समाना । बुधि बिबेक बिग्यान निधाना ॥
 कवन सो काज कठिन जग माहीं । जो नहिँ होइ तात तुम्ह पाहीं ॥
 राम काज लागि तब अवतारा । सुनतहिँ भयउ पर्वताकारा ॥
 कनक बरन तन तेज बिराजा । मानहुँ अपर गिरिन्ह कर राजा ॥
 सिंहनाद करै बारहिँ बारा । लीलहिँ नाघउँ जलनिधि खारा ॥
 सहित सहाय रावनहि मागी । आनउँ इहाँ त्रिकूट उपारी ॥
 जामवंत मैं पूँछउँ तोही । उचित सिखावनु दीजहु मोही ॥
 एतना करहु तात तुम्ह जाई । सीतहि देखि कहहु सुधि आई ॥
 तब निज भुज बल राजिवनैना । कौतुक लागि संग कपि सेना ॥

छं०—कपि सेन संग सँघारि निसिचर रामु सीतहि आनिहैं ।

त्रैलोक पावन सुजसु सुर मुनि नारदादि बखानिहैं ॥

जो सुनत गावत कहत समुझत परम पद नर पावई ।
 रघुबीर पद पाथोज मधुकर दास तुलसी गावई ॥
 दो०—भव भेषज रघुनाथ जसु सुनहिं जे नर अरु नारि ।
 तिन्ह कर सकल मनोरथ सिद्ध करहिं त्रिसिरारि ॥३०(क)॥
 सो०—नीलोत्पल तन स्याम काम कोटि सोभा अधिक ।
 सुनिअ तासु गुन ग्राम जासु नाम अघ खग वधिक ॥३०(ख)॥

मासपारायण, तेईसवाँ विश्राम

इति श्रीमद्रामचरितमानसे सकलकलिकलुषविध्वंसने
 चतुर्थः सोपानः समाप्तः ।

(किष्किन्धाकाण्ड समाप्त)



शरणागत विभीषण



श्रवन सुजसु सुनि आयउँ प्रभु भंजन भवभीर ।
त्राहि त्राहि आरति हरन मग्न सुखद ग्धुवीर ॥

श्रीगणेशाय नमः

श्रीबानकीवल्लभो विजयते

श्रीरामचरितमानस

पञ्चम सोपान

(सुन्दरकाण्ड)

श्लोक

शान्तं शाश्वतमप्रमेयमनघं निर्वाणशान्तिप्रदं
ब्रह्माशम्भुफणीन्द्रसेव्यमनिशं वेदान्तवेद्यं त्रिभुम् ।
रामाख्यं जगदीश्वरं सुरगुरुं मायामनुष्यं हरिं
वन्देऽहं करुणाकरं रघुवरं भूपालचूडामणिम् ॥ १ ॥
नान्या स्पृहा रघुपते हृदयेऽस्मदीये
सत्यं वदामि च भवानखिलान्तरात्मा ।
भक्तिं प्रयच्छ रघुपुङ्गव निर्भरां मे
कामादिदोषरहितं कुरु मानसं च ॥ २ ॥
अतुलितबलधामं हेमशैलाभदेहं
दनुजवनकृशानुं ज्ञानिनामग्रगण्यम् ।

सकलगुणनिधानं

वानराणामधीशं

रघुपतिप्रियभक्तं

वातजातं

नमामि ॥ ३ ॥

जामवंत के बचन सुहाए । सुनिहनुमंत हृदय अति भाए ॥
 तब लगि मोहि परिखेहु तुम्ह भाई । सहि दुख कंद मूल फल खाई ॥
 जब लगि आवौं सीतहि देखी । होइहि काजु मोहि हरष बिसेषी
 यह कहि नाइ सबन्हि कहूँ माथा । चलेउ हरषि हियँ धरि रघुनाथा
 सिंधु तीर एक भूधर सुंदर । कौतुक कूदि चढ़ेउ ता ऊपर ॥
 बार बार रघुबीर सँभारी । तरकेउ पवनतनय बल भारी ॥
 जेहि गिरि चरन देइ हनुमंता । चलेउ सो गा पाताल तुरंता ॥
 ज़िमि अमोघ रघुपति कर बाना । एही भाँति चलेउ हनुमाना ॥
 जलनिधि रघुपति दूत बिचारी । तैं मैनाक होहि श्रमहारी ॥

दो०—हनुमान तेहि परसा कर पुनि कीन्ह प्रनाम ।

राम काजु कीन्हें बिनु मोहि कहाँ विश्राम ॥ १ ॥

जात पवनसुत देवन्ह देखा । जानै कहूँ बल बुद्धि बिसेषा ॥
 सुरसा नाम अहिन्ह कै माता । पठइन्हि आई कही तेहिं बाता ॥
 आजु सुरन्ह मोहि दीन्ह अहारा । सुनत बचन कह पवनकुमारा ॥
 राम काजु करि फिरि मैं आवौं । सीता कइ सुधि प्रभुहि सुनावौं ॥
 तब तब बदन पैठिहउँ आई । सत्य कहउँ मोहि जान दे माई ॥
 कवनेहुँ जतन देइ नहिं जाना । ग्रससि न मोहि कहेउ हनुमाना ॥
 जो जन भरि तेहिं बदनु पसारा । कपि तनु कीन्ह दुगुन बिस्तारा ॥
 सोरह जो जन मुख तेहिं ठयऊ । तुरत पवनसुत बत्तिस भयऊ ॥
 जस जस सुरसा बदनु बढ़ावा । तासु दून कपि रूप देखावा ॥

सत जोजन तेहि आनन कीन्हा । अति लघु रूप पवनसुत लीन्हा ॥
बदन पइठि पुनि बाहेर आवा । मागा बिदा ताहि सिरु नावा ॥
मोहि सुरन्ह जेहि लागि पठावा । बुधि बल मरमु तोर मैं पावा ॥

दो०—राम काजु सबु करिहहु तुम्ह बल बुद्धि निधान ।

आसिष देइ गई सो हरषि चलेउ हनुमान ॥ २ ॥

निसिचरि एक सिंधु महँ रहई । करि माया नभु के खग गहई ॥
जीव जंतु जे गगन उड़ाहीं । जल बिलोकि तिन्ह कै परिछाहीं
गहइ छाहँ सक सो न उड़ाई । एहि बिधि सदा गगनचर खाई ॥
सोइ छल हनुमान कहँ कीन्हा । तासु कपटु कपि तुरतहि चीन्हा ॥
ताहि मारि मारुतसुत बीरा । बारिधि पार गयउ मति धीरा ॥
तहाँ जाइ देखी बन सोभा । गुंजत चंचरीक मधु लोभा ॥
नाना तरु फल फूल सुहाए । खग मृग वृद देखि मन भाए ॥
सैल बिसाल देखि एक आगें । ता पर धाइ चढ़ेउ भय त्यागें ॥
उमान कलु कपि कै अधिकाई । प्रभु प्रताप जो कालहि खाई ॥
गिरि पर चढ़ि लंका तेहि देखी । कहि न जाइ अति दुर्ग बिसेषी ॥
अति उत्तंग जलनिधि चहु पासा । कनक कोट कर परम प्रकासा ॥

छं०—कनक कोट बिचित्र मनि कृत सुंदरायतना घना ।

चउहट्ट हट्ट मुवट्ट वीथी चारु पुर बहु विधि बना ॥

गज बाजि खचर निकर पदचर रथ बरूथन्हि को गनै ।

बहुरूप निसिचर जूथ अतिबल सेन वरनत नहि बनै ॥ १ ॥

बन बाग उपवन बाटिका सर कूप बापी सोहहीं ।

नर नाग सुर गंधर्व कन्या रूप मुनि मन मोहहीं ॥

कहुँ माल देह बिसाल सैल समान अति बल गर्जहीं ।
 नाना अस्त्रारेन्ह भिरहिं बहुविधि एक एकन्ह तर्जहीं ॥ २ ॥
 करि जतन भट कोटिन्ह बिकट तन नगर चहुँ दिसि रच्छहीं ।
 कहुँ महिष मानुष धेनु खर अज खल निसाचर भच्छहीं ॥
 एहि लागि तुलसीदास इन्ह की कथा कछु एक है कही ।
 रघुबीर सर तीरथ सरीरन्हि त्यागि गति पैहहिं सही ॥ ३ ॥

दो०—पुर रखवारे देखि बहु कपि मन कीन्ह विचार ।
 अति लघु रूप धरौं निसि नगर करौं पइसार ॥ ३ ॥

मसक समान रूप कपि धरी । लंकहि चलेउ सुमिरि नरहरी ॥
 नाम लंकिनी एक निसिचरी । सो कह चलेसि मोहि निंदरी ॥
 जानेहि नहीं मरमु सठ मोरा । मोर अहार जहाँ लगि चोरा ॥
 मुठिका एक महा कपि हनी । रुधिर बमत धरनीं ढनमनी ॥
 पुनि संभारि उठी सो लंका । जोरि पानि कर विनय ससंका ॥
 जब रावनहि ब्रह्म बर दीन्हा । चलत बिरंचि कहा मोहि चीन्हा ॥
 बिकल होसि तैं कपि कै मारे । तब जानेसु निसिचर संघारे ॥
 तात मार अति पुन्य बहूता । देखेउँ नयन राम करदूता ॥
 दो०—तात स्वर्ग अपवर्ग सुख धरिअ तुला एक अंग ।

तूल न ताहि सकल मिलि जो सुख लव सतसंग ॥ ४ ॥

प्रबिसि नगर कीजे सब काजा । हृदयँ राखि कोसलपुर राजा ॥
 गरल सुधारिपु करहिं मिताई । गोपद सिंधु अनल सितलाई ॥
 गरुड़ सुमेरु रेनु सम ताही । राम कृपा करि चितवा जाही ॥
 अतिलघु रूप धरेउ हनुमाना । पैठा नगर सुमिरि भगवाना ॥

मंदिर मंदिर प्रति करि सोधा । देखे जहँ तहँ अगनित जोधा ॥
गयउ दसानन मंदिर माहीं । अति बिचित्र कहि जात सो नाहीं ॥
सयन किएँ देखा कपि तेही । मंदिर महुँ न दीखि बैदेही ॥
भवन एक पुनि दीख सुहावा । हरि मंदिर तहँ भिन्न बनावा ॥

दो०—रामायुध अंकित गृह सोभा बरनि न जाइ ।

नव तुलसिका वृंद तहँ देखि हरष कपिराइ ॥ ५ ॥

लंका निसिचर निकर निवासा । इहाँ कहाँ सज्जन कर बासा ॥
मन महुँ तरक करै कपि लागा । तेहीं समय बिभीषनु जागा ॥
राम राम तेहिं सुमिरन कीन्हा । हृदयँहरष कपि सज्जन चीन्हा ॥
एहि सन हठि करिहउँ पहिचानी । साधु ते होइ न कारज हानी ॥
बिप्र रूप धरि बचन सुनाए । सुनत बिभीषन उठि तहँ आए ॥
करि प्रनाम पूँछी कुसलाई । बिप्र कहहु निज कथा बुझाई ॥
की तुम्ह हरि दासन्ह महुँ कोई । मोरें हृदय प्रीति अति होई ॥
की तुम्ह रामु दीन अनुरागी । आयहु मोहि करन बड़भागी ॥

दो०—तब हनुमंत कही सब राम कथा निज नाम ।

सुनत जुगल तन पुलक मन मगन सुमिरि गुन ग्राम ॥ ६ ॥

सुनहु पवनसुत रहनि हमारी । जिमि दसनन्हि महुँ जीभ बिचारी
तात कबहुँ मोहि जानि अनाथा । करिहहिं कृपा भानुकुल नाथा ॥
तामस तनु कछु साधन नाहीं । प्रीति न पद सरोज मन माहीं ॥
अब मोहि भा भरोस हनुमंता । बिनु हरिकृपा मिलहिं नहिं संता ॥
जौं रघुबीर अनुग्रह कीन्हा । तौ तुम्ह मोहि दरसु हठि दीन्हा ॥
सुनहु बिभीषन प्रभु कै रीती । करहिं सदा सेवक पर प्रीती ॥

कहहु कवन मैं परम कुलीना । कपि चंचल सबहीं बिधिहीना ॥
प्रात लेइ जो नाम हमारा । तेहि दिन ताहि न मिलै अहारा ॥

दो०—अस मैं अधम सखा सुनु मोहू पर रघुबीर ।

कीन्ही कृपा सुमिरि गुन भरे बिलोचन नीर ॥ ७ ॥

जानतहूँ अस स्वामि बिसारी । फिरहिं ते काहेन होहिं दुखारी ॥
एहि बिधि कहत राम गुन ग्रामा । पावा अनिर्वाच्य विश्रामा ॥
पुनि सब कथा बिभीषन कही । जेहि बिधि जनकसुता तहँ रही ॥
तब हनुमंत कहा सुनु भ्राता । देखी चहउँ जानकी माता ॥
जुगुति बिभीषन सकल सुनाई । चलेउ पवनसुत बिदा कराई ॥
करि सोइ रूप गयउ पुनि तहवाँ । बन असोक सीता रह जहवाँ ॥
देखि मनहि महुँ कीन्ह प्रनामा । बैठेहिं बीति जात निसि जामा ॥
कृस तनु सीस जटा एक बेनी । जपति हृदयँ रघुपति गुन श्रेनी

दो०—निज पद नयन दिऐँ मन राम पद कमल लीन ।

परम दुखी भा पवनसुत देखि जानकी दीन ॥ ८ ॥

तरु पल्लव महुँ रहा लुकाई । करइ बिचार करौं का भाई ॥
तेहि अवसर रावनु तहँ आवा । संग नारि बहु किएँ बनावा ॥
बहु बिधि खल सीतहि समुझावा । सामदान भय भेद देखावा ॥
कह रावनु सुनु सुमुखि सयानी । मंदोदरी आदि सब रानी ॥
तब अनुचरीं करउँ पन मोरा । एक बार बिलोकु मम ओरा ॥
तुन धरि ओट कहति वैदेही । सुमिरि अवधपति परम सनेही ॥
सुनु दसमुख खद्योत प्रकासा । कबहुँ कि नलिनी करइ विकासा
असमन समुझ कहति जानकी । खल सुधि नहिं रघुबीर बान की ॥

सठ स्रने हरि आनेहि मोही । अधम निलज्ज लाज नहि तोही ॥

दो०—आपुहि सुनि खद्योत सम रामहि भानु समान ।

परुष बचन सुनि कादि असि बोला अति खिसिआन ॥ ९ ॥

सीता तैं मम कृत अपमाना । कटिहउँ तब सिर कठिन कृपाना ॥
नाहिं त सपदि मानु मम बानी । सुमुखि होति न त जीवन हानी ॥
स्याम सरोज दामसम सुंदर । प्रभु भुज करि करसम दसकंधर ॥
सो भुज कंठ कि तब असि घोरा । सुनु सठ अस प्रवान पन मोरा ॥
चंद्रहास हरु मम परितापं । रघुपति बिरह अनल संजातं ॥
सीतल निसित बहसि बर धारा । कह सीता हरु मम दुख भारा ॥
सुनत बचन पुनि मारन धावा । मयतनयाँ कहि नीति बुझावा ॥
कहेसि सकल निसिचरिन्ह बोलाई । सीतहि बहु बिधि त्रासहु जाई
मास दिवस महुँ कहान माना । तौ मैं मारबि कादि कृपाना ॥

दो०—भवन गयउ दसकंधर इहाँ पिसाचिनि वृंद ।

सीतहि त्रास देखावहिं धरहिं रूप बहु मंद ॥ १० ॥

त्रिजटा नाम राच्छसी एका । राम चरन रति निपुन बिबेका ॥
सबन्हौ बोलि सुनाएसि सपना । सीतहि सेइ करहु हित अपना ॥
सपनें बानर लंका जारी । जातुधान सेना सब मारी ॥
खर आरूढ़ नगन दससीसा । मुंडित सिर खंडित भुज बीसा ॥
एहि बिधि सो दच्छिन दिसि जाई । लंका मनहुँ बिभीषन पाई ॥
नगर फिरी रघुबीर दोहाई । तब प्रभु सीता बोलि पठाई ॥
यह सपना मैं कहउँ पुकारी । होइहि सत्य गएँ दिन चारी ॥
तासु बचन सुनि ते सब डरीं । जनकसुता के चरनन्हि परीं ॥

दो०—जहँ तहँ गई सकल तब सीता कर मन सोच ।

मास दिवस बीतें मोहि मारिहि निसिचर पोच ॥ ११ ॥

त्रिजटा सन बोलीं कर जोरी । मातु बिपति संगिनि तैं मोरी ॥
तजौं देह करु बेगि उपाई । दुसह बिरहु अबनहिं सहि जाई ॥
आनि काठ रचु चिता बनाई । मातु अनल पुनि देहि लगाई ॥
सत्य करहि मम प्रीति सयानी । सुनै को श्रवन सुल सम बानी ॥
सुनत बचन पद गहि समुझाएसि । प्रभु प्रताप बल सुजसु सुनाएसि
निसिन अनल मिल सुनु सुकुमारी । अस कहि सो निज भवन सिधारी
कह सीता बिधि भा प्रतिकूला । मिलिहि न पावक मिटिहि न सुला
देखिअत प्रगट गगन अंगारा । अविनि न आवत एकउ तारा ॥
पावकमय ससि स्रवत न आगी । मानहुँ मोहि जानि हतभागी ॥
सुनहि बिनय मम बिटप असोका । सत्य नाम करु हरु मम सोका ॥
नूतन किसलय अनल समाना । देहि अग्नि जनि करहि निदाना
देखि परम बिरहाकुल सीता । सो छन कपिहि कल्प सम बीता

सो०—कपि करि हृदयँ बिचार दीन्हि मुद्रिका डारि तब ।

जनु असोक अंगार दीन्ह हरषि उठि कर गहेउ ॥ १२ ॥

तब देखी मुद्रिका मनोहर । राम नाम अंकित अति सुंदर ॥
चकित चितव मुदरी पहिचानी । हरष बिषाद हृदयँ अकुलानी ॥
जीति को सकइ अजय रघुराई । माया तैं असि रचि नहिं जाई ॥
सीता मन बिचार कर नाना । मधुर बचन बोलेउ हनुमाना ॥
रामचंद्र गुन बरनै लागा । सुनतहिं सीता कर दुख भागा ॥
लागीं सुनै श्रवन मन लाई । आदिहु तैं सब कथा सुनाई ॥

श्रवनामृत जेहि कथा सुहाई । कही सो प्रगट होति किन भाई॥
तब हनुमंत निकट चलि गयऊ । फिरि बैठी मन बिसमय भयऊ॥
राम दूत मैं मातु जानकी । सत्य सपथ करुना निधान की ॥
यह मुद्रिका मातु मैं आनी । दीन्हि राम तुम्ह कहँ सहिदानी
नर बानरहि संग कहु कैसैं । कही कथा भइ संगति जैसैं ॥

दो०—कपि के बचन सप्रेम सुनि उपजा मन बिस्वास ।

जाना मन क्रम बचन यह कृपासिंधु कर दास ॥ १३ ॥

हरिजन जानि प्रीति अति गाढ़ी । सजल नयन पुलकावलि बाढ़ी॥
बूझत बिरह जलधि हनुमाना । भयहु तात मो कहूँ जलजाना ॥
अब कहु कुसल जाउँ बलिहारी । अनुज सहित सुख भवन खरारी॥
कोमलचित कृपाल रघुराई । कपि केहि हेतु धरी निठुराई ॥
सहज बानि सेवक सुख दायक । कबहुँक सुरति करत रघुनायक॥
कबहुँ नयन मम सीतल ताता । होइहहिं निरखि स्याम मृदु गाता
बचनु न आव नयन भरे बारी । अहह नाथ हौं निपट बिसारी ॥
देखि परम बिरहाकुल सीता । बोला कपि मृदु बचन बिनीता ॥
मातु कुसल प्रभु अनुज समेता । तब दुख दुखी सुकृपा निकेता ॥
जनि जननी मानहु जियँऊना । तुम्ह ते प्रेमु राम कें दूना ॥

दो०—रघुपति कर संदेसु अब सुनु जननी धरि धीर ।

अस कहि कपि गदगद भयउ भरे बिलोचन नीर ॥ १४ ॥

कहेउ राम बियोग तब सीता । मो कहूँ सकल भए बिपरीता ॥
नव तरु किसलय मनहुँ कृसानू । कालनिसा सम निसि ससि भानू
कुबलय बिपिन कुंत बन सरिसा । बारिद तपत तेल जनु बरिसा ॥

जे हित रहे करत तेइ पीरा । उरग स्वास सम त्रिविध समीरा ॥
 कहेहु तें कछु दुख घटि होई । काहि कहौ यह जान न कोई ॥
 तत्व प्रेम कर मम अरु तोरा । जानत प्रिया एकु मनु मोरा ॥
 सो मनु सदा रहत तोहि पाहीं । जानु प्रीति रसु एतनेहि माहीं ॥
 प्रभु संदेसु सुनत बैदेही । मगन प्रेम तन सुधि नहिं तेही ॥
 कह कपि हृदयें धीर धरु माता । सुमिरु राम सेवक सुखदाता ॥
 उर आनहु रघुपति प्रभुताई । सुनि मम बचन तजहु कदराई ॥

दो०—निसिचर निकर पतंग सम रघुपति बान कसानु ।

जननी हृदयें धीर धरु जरे निसाचर जानु ॥ १५ ॥

जौ रघुबीर होति सुधि पाई । करते नहिं बिलंबु रघुराई ॥
 राम बान रबि उएँ जानकी । तम बरूथ कहँ जातुधान की ॥
 अबहिं मातु मैं जाउँ लवाई । प्रभु आयसु नहिं राम दोहाई ॥
 कछुक दिवस जननी धरु धीरा । कपिन्ह सहित अइहहिं रघुबीरा
 निसिचर मारि तोहि लै जैहहिं । तिहुँ पुर नारदादि जसु गैहहिं ॥
 हैं सुत कपि सब तुम्हहि समाना । जातुधान अति भट बलवाना ॥
 मोरें हृदय परम संदेहा । सुनिकपि प्रगट कीन्हि निज देहा
 कनक भूधराकार सरीरा । समर भयंकर अतिबल बीरा ॥
 सीता मन भरोस तब भयऊ । पुनि लघु रूप पवनसुत लयऊ ॥

दो०—सुनु माता साखामृग नहिं बल बुद्धि बिसाल ।

प्रभु प्रताप तें गरुड़हि खाइ परम लघु ब्याल ॥ १६ ॥

मन संतोष सुनत कपि बानी । भगति प्रताप तेज बल सानी ॥
 आसिष दीन्हि राम प्रिय जाना । होहु तात बल सील निधाना ॥

अजर अमर गुननिधि सुत होहू । करहुँ बहुत रघुनायक छोहू ॥
 करहुँ कृपा प्रभु अस सुनि काना । निर्भर प्रेम मगन हनुमाना ॥
 बार बार नाएसि पद सीसा । बोला बचन जोरि कर कीसा ॥
 अब कृतकृत्य भयउँ मैं माता । आसिषतव अमोघ बिख्याता ॥
 सुनहु मातु मोहि अतिसय भूखा । लागि देखि सुंदर फल रूखा ॥
 सुनु सुत करहि बिपिन रखवारी । परम सुभट रजनीचर भारी ॥
 तिन्ह कर भय माता मोहि नाही । जौं तुम्ह सुख मानहु मन माहीं ॥

दो०—देखि बुद्धि बल निपुन कपि कहेउ जानकीं जाहु ।

रघुपति चरन हृदय धरि तात मधुर फल खाहु ॥ १७ ॥

चलेउ नाइ सिरु पंठेउ बागा । फल खाएसि तरु तोरैं लागा ॥
 रहे तहाँ बहु भट रखवारे । कछु मारेसि कछु जाइ पुकारे ॥
 नाथ एक आवा कपि भारी । तेहि असोक बाटिका उजारी ॥
 खाएसि फल अरु बिटप उपारे । रच्छक मर्दि मर्दि महि डारे ॥
 सुनि रावन पठए भट नाना । तिन्हहि देखि गर्जेउ हनुमाना ॥
 सब रजनीचर कपि संघारे । गए पुकारत कछु अधमारे ॥
 पुनि पठयउ तेहि अच्छकुमारा । चला संग लै सुभट अपारा ॥
 आवत देखि बिपट गहि तर्जा । ताहि निपाति महाधुनि गर्जा ॥

दो०—कछु मारेसि कछु मर्देसि कछु मिलएसि धरि धूरि ।

कछु पुनि जाइ पुकारे प्रभु मर्कट बल भूरि ॥ १८ ॥

सुनि सुत बध लंकेस रिसाना । पठएसि मेघनाद बलवाना ॥
 मारसि जनि सुत बाँधेसु ताही । देखिअ कपिहि कहाँ कर आही
 चला इंद्रजित अतुलित जोधा । बंधु निधन सुनि उपजा क्रोधा ॥

कपि देखा दारुन भट आवा । कटकटाइ गर्जा अरु धावा ॥
 अति बिसाल तरु एक उपारा । बिरथ कीन्ह लंकेस कुमारा ॥
 रहे महाभट ताके संगी । गहि गहि कपि मर्दइ निज अंगा
 तिन्हहि निपाति ताहि सनबाजा । भिरे जुगल मानहुँ गजराजा ॥
 मुठिका मारि चढ़ा तरु जाई । ताहि एक छन मुरुछा आई ॥
 उठि बहोरि कीन्हिसि बहु माया । जीति न जाइ प्रभंजन जाया ॥

दो०—ब्रह्म अस्त्र तेहिं साँधा कपि मन कीन्ह विचार ।

जौ न ब्रह्मसर मानउँ महिमा मिटइ अपार ॥ १९ ॥

ब्रह्मबान कपि कहूँ तेहिं मारा । परतिहुँ बार कटक संघारा ॥
 तेहिं देखा कपि मुरुछित भयऊ । नागपास बाँधेसि लै गयऊ ॥
 जासु नाम जपि सुनहु भवानी । भव बंधन काटहिं नर ग्यानी ॥
 तासु दूत कि बंध तरु आवा । प्रभु कारज लागि कपिहिं बंधावा
 कपि बंधन सुनि निसिचर धाए । कौतुक लागि सभाँ सब आए ॥
 दसमुख सभा दीखि कपि जाई । कहि न जाइ कछु अति प्रभुताई ॥
 कर जोरें सुर दिसिप बिनीता । भृकुटि बिलोकत सकल समीता ॥
 देखि प्रतापन कपि मन संका । जिमि अहिगन महुँ गरुड़ असंका ॥

दो०—कपिहि बिलोकि दसानन बिहसा कहि दुर्वाद ।

सुत बध सुरति कीन्हि पुनि उपजा हृदयँ विषाद ॥ २० ॥

कह लंकेस कवन तैं कीसा । केहि कैं बल घालेहि बन खीसा ॥
 की धौं श्रवन सुनेहि नहिं मोही । देखउँ अति असंक मठ तोही ॥
 मारे निसिचर केहिं अपराधा । कहु सठ तोहि न प्रान कइ बाधा
 सुनु रावन ब्रह्मांड निकाया । पाइ जासु बल बिरचति माया ॥

जाकें बल बिरंचि हरि ईसा । पालत सृजत हरत दससीसा ॥
जा बल सीस धरत सहसानन । अंड कोस समेत गिरि कानन ॥
धरइ जो बिबिध देह सुरत्राता । तुम्ह से सठन्ह सिखावनु दाता ॥
हर कोदंड कठिन जेहिं भंजा । तेहि समेत नृप दल मद गंजा ॥
खर दूषन त्रिसिरा अरु बाली । बधे सकल अतुलित बलसाली ॥

दो०—जाके बल लवलेस तें जितेहु चराचर झारि ।

तासु दूत मैं जा करि हरि आनेहु प्रिय नारि ॥ २१ ॥

जानउँ मैं तुम्हारि प्रभुताई । सहसबाहु सन परी लराई ॥
समर बालि सन करि जसु पावा । सुनि कपि बचन बिहसि बिहरावा
खायउँ फल प्रभु लागी भूँखा । कपि सुभाव तें तोरेउँ रूखा ॥
सब कें देह परम प्रिय स्वामी । मारहि मोहि कुमारग गामी ॥
जिन्ह मोहि माग ते मैं मारे । तेहि पर बाँधेउँ तनयँ तुम्हारे ॥
मोहि न कछु बाँधे कइ लाजा । कीन्ह चहउँ निज प्रभु कर काजा
बिनती करउँ जोरि कर रावन । सुनहु मान तजि मोर सिखावन
देखहु तुम्ह निज कुलहि बिचारी । भ्रम तजि भजहु भगत भयहारी ॥
जाकें डर अति काल डेराई । जो सुर असुर चराचर खाई ॥
तासों बयरु कबहुँ नहिं कीजै । मोरे कहें जानकी दीजै ॥

दो०—प्रनतपाल रघुनायक करुना सिंधु खरारि ।

गएँ सरन प्रभु राखिहैं तव अपराध बिसारि ॥ २२ ॥

राम चरन पंकज उर धरहू । लंका अचल राजु तुम्ह करहू ॥
रिषि पुलस्ति जसु बिमल मयंक । तेहि ससि महुँ जनि होहु कलंक
राम नाम बिनु गिरा न सोहा । देखु बिचारि त्यागि मद मोहा ॥

बसन हीन नहिं सोह सुरारी । सब भूषन भूषित बर नारी ॥
 राम बिमुख संपति प्रभुताई । जाइ रही पाई बिनु पाई ॥
 सजल मूल जिन्ह सरितन्ह नाहीं । बरषि गएँ पुनि तबहिं सुखाहीं ॥
 सुनु दसकंठ कहउँ पन रोपी । बिमुख राम त्राता नहिं कोपी ॥
 संकर सहस बिष्नु अज तोही । सकहिं न राखि राम कर द्रोही ॥

दो०—मोहमूल बहु सूल प्रद त्यागहु तम अभिमान ।

भजहु राम रघुनायक कृपा सिंधु भगवान ॥ २३ ॥

जदपि कही कपि अति हित बानी । भगति बिबेक बिरति नय सानी
 बोला बिहसि महा अभिमानी । मिला हमहि कपि गुर बड़ ग्यानी
 मृत्यु निकट आई खल तोही । लागेसि अधम सिखावन मोही ॥
 उलटा होइहि कह हनुमाना । मतिभ्रम तोर प्रगट मैं जाना ॥
 सुनि कपि बचन बहुत खिसि आना । बेगि न हरहु मूढ़ कर प्राना ॥
 सुनत निसाचर मारन धाए । सचिवन्ह सहित बिभीषनु आए ॥
 नाइ सीस करि बिनय बहूता । नीति बिरोध न मारिअ दूता ॥
 आन दंड कलु करिअ गोसाँई । सबहीं कहा मंत्र भल भाई ॥
 सुनत बिहसि बोला दसकंधर । अंग भंग करि पठइअ बंदर ॥

दो०—कपि के ममता पूँछ पर सबहि कहउँ समुझाइ ।

तेल बोरि पट बाँधि पुनि पावक देहु लगाइ ॥ २४ ॥

पूँछहीन बानर तहँ जाइहि । तब सठ निज नाथहि लइ आइहि ॥
 जिन्ह कै कीन्हिसि बहुत बड़ाई । देखउँ मैं तिन्ह कै प्रभुताई ॥
 बचन सुनत कपि मन मुसुकाना । भइ सहाय सारद मैं जाना ॥
 जातुधान सुनि रावन बचना । लागे रचै मूढ़ सोइ रचना ॥

रहा न नगर बसन घृत तेला । बाढ़ी पूँछ कीन्ह कपि खेला ॥
कौतुक कहँ आए पुरबासी । मारहिं चरन करहिं बहु हाँसी ॥
बाजहिं ढोल देहिं सब तारी । नगर फेरि पुनि पूँछ प्रजारी ॥
पावक जरत देखि हनुमंता । भयउ परम लघुरूप तुरंता ॥
निबुकि चढ़ेउ कपि कनक अटारीं । भई सभीत निसाचर नारीं ॥

दो०—हरि प्रेरित तेहि अवसर चले मरुत उनचास ।

अटहास करि गर्जा कपि बदि लाग अकास ॥ २५ ॥

देह बिसाल परम हरुआई । मंदिर तें मंदिर चढ़ धाई ॥
जरइ नगर भा लोग बिहाला । झपट लपट बहु कोटि कराला ॥
तात मातु हा सुनिअ पुकारा । एहिं अवसर को हमहि उबारा ॥
हमजो कहा यह कपि नहिं होई । बानर रूप धरें सुर कोई ॥
साधु अवग्या कर फलु ऐसा । जरइ नगर अनाथ कर जैसा ॥
जारा नगरु निमिष एक माहीं । एक बिभीषन कर गृह नाहीं ॥
ता कर दूत अनल जेहिं सिरजा । जरा न सो तेहिं कारन गिरिजा ॥
उलटि पलटि लंका सब जारी । कूदि परा पुनि सिंधु मझारी ॥

दो०—पूँछ बुझाइ खोइ श्रम धरि लघु रूप बहोरि ।

जनकसुता कें आगें ठाढ़ भयउ कर जोरि ॥ २६ ॥

मातु मोहि दीजे कछु चीन्हा । जैसैं रघुनायक मोहि दीन्हा ॥
चूड़ामनि उतारि तब दयऊ । हरष समेत पवनसुत लयऊ ॥
कहेहु तात अस मोर प्रनामा । सब प्रकार प्रभु पूरनकामा ॥
दीन दयाल विरिदु संभारी । हरहु नाथ मम संकट भारी ॥
तात सक्रसुत कथा सुनाएहु । बान प्रताप प्रभुहि समुझाएहु ॥

मास दिवस महुँ नाथु न आवा । तौ पुनि मोहि जिअत नहिँ पावा॥
 कहु कपि केहि बिधि राखौँ प्राणा । तुम्हहू तात कहत अब जाना॥
 तोहि देखि सीतलि भइ छाती । पुनि मो कहुँ सोइ दिनु सो राती॥

दो०—जनकसुतहि समुझाइ करि बहु विधि धीरजु दीन्ह ।

चरन कमल सिरु नाइ कपि गवतु राम पहिँ कीन्ह ॥ २७ ॥

चलत महाधुनि गर्जेसि भारी । गर्भस्रवहिँ सुनि निसिचर नारी॥
 नाधि सिंधु एहि पारहि आवा । सबद किलिकिला कपिन्ह सुनावा
 हरषे सब बिलोकि हनुमाना । नूतन जन्म कपिन्ह तब जाना ॥
 मुख प्रसन्न तन तेज बिराजा । कीन्हेसि रामचंद्र कर काजा ॥
 मिले सकल अति भए सुखारी । तलफत मीन पाव जिमि बारी ॥
 चले दरषि रघुनायक पासा । पूँछत कहत नवल इतिहासा ॥
 तब मधुवन भीतर सब आए । अंगद संमत मधु फल खाए ॥
 रखवारे जब वरजन लागे । मुष्टि प्रहार हनत सब भागे ॥

दो०—जाइ पुकारे ते सब वन उजार जुवराज ।

सुनि सुग्रीव हरष कपि करि आए प्रभु काज ॥ २८ ॥

जौं न हंति सीता सुधि पाई । मधुवन के फल सकहिँ किखाई॥
 एहिँ बिधि मन बिचार कर राजा । आइ गए कपि सहित समाजा॥
 आइ सबन्दि नावा पद सीसा । मिलेउ सबन्दि अति प्रेम कपीसा॥
 पूँछी कुसल कुसल पद देखी । राम कृपाँ भा काजु बिसेषी ॥
 नाथ काजु कीन्हेउ हनुमाना । राखे सकल कपिन्ह के प्राणा ॥
 सुनि सुग्रीव बहुरि तेहि मिलेऊ । कपिन्ह सहित रघुगति पहिँ चलेऊ॥
 राम कपिन्ह जब आवत देखा । किँएँ काजु मन हरष बिसेषा ॥

फटिक सिला बैठे द्रौ भाई । परे सकल कपि चरनन्हि जाई ॥

दो०—प्रीति सहित सब भेटे रघुपति करुना पुंज ।

पूँछी कुसल नाथ अब कुसल देखि पद कंज ॥ २९ ॥

जामवंत कह सुनु रघुराया । जा पर नाथ करहु तुम्ह दाया ॥
ताहिसदा सुभ कुसल निरंतर । सुर नर मुनि प्रसन्न ता ऊपर ॥
सोइ बिजई बिनई गुन सागर । तासु सुजसु त्रैलोक उजागर ॥
प्रभु कीं कृपा भयउ सबु काजू । जन्म हमार सुफल भा आजू ॥
नाथ पवनसुत कीन्हि जो करनी । सहसहुँ सुख न जाइ सो बरनी ॥
पवनतनय के चरित सुहाए । जामवंत रघुपतिहि सुनाए ॥
सुनत कृपानिधि मन अति भाए । पुनि हनुमान हरषि हियँ लाए ॥
कहहु तात केहि भाँति जानकी । रहति करति रच्छा स्वप्रान की ॥

दो०—नाम पाहरू दिवस निसि ध्यान तुम्हार कपाट ।

लोचन निज पद जंघित जाहि प्रान केहिं बाट ॥ ३० ॥

चलत मोहि चूड़ामनि दीन्ही । रघुपति हृदयँ लाइ सोइ लीन्ही ॥
नाथ जुगल लोचन भरि बारी । बचन कहे कलु जनककुमारी ॥
अनुज समेत गहेहु प्रभु चरना । दीन बंधु प्रनतारति हरना ॥
मन क्रम बचन चरन अनुरागी । केहिं अपराध नाथ हौं त्यागी ॥
अवगुन एक मोर मैं माना । बिछुरत प्रान न कीन्ह पयाना ॥
नाथ सो नयनन्हिको अपराधा । निसरत प्रान करहिं हठि बाधा ॥
बिरह अगिनि तनु तूल समीरा । स्वास जरइ छन माहिं सरीरा ॥
नयन स्रवहिं जलु निज हित लागी । जरैं न पाव देह बिरहागी ॥
सीता कै अति बिपति बिसाला । बिनहिं कहें भलि दीन दयाला ॥

दो०—निमिष निमिष करुनानिधि जाहिं कलप सम बीति ।

बेगि चलिअ प्रभु आनिअ भुज बल खल दल जीति ॥ ३१ ॥

सुनि सीता दुख प्रभु सुख अयना । भरि आए जल राजिव नयना ॥
बचन कायँ मन मम गति जाही । सपनेहुँ बूझिअ बिपति कि ताही ॥
कह हनुमंत बिपति प्रभु सोई । जब तव सुमिरन भजन न होई ॥
केतिक बात प्रभु जातुधान की । रिपुहि जीति आनिबी जानकी ॥
सुनु कपि तोहि समान उपकारी । नहिं कोउ सुर नर मुनि तनुधारी
प्रति उपकार करौं का तोरा । सनमुख होइ न सकत मन मोरा ॥
सुनु सुत तोहि उरिन मैं नाहीं । देखेउँ करि बिचार मन माहीं ॥
पुनि पुनि कपिहि चितव सुरत्राता । लोचन नीर पुलक अति गाता ॥

दो०—सुनि प्रभु बचन बिलोकि मुख गात हरषि हनुमंत ।

चरन परेउ प्रेमाकुल त्राहि त्राहि भगवंत । ३२ ॥

बार बार प्रभु चहइ उठावा । प्रेम मगन तेहि उठब न भावा ॥
प्रभु कर पंकज कपि कैं सीसा । सुमिरि सो दसा मगन गौरीसा ॥
सावधान मन्त्र करि पुनि संकर । लागे कहन कथा अति सुंदर ॥
कपि उठाइ प्रभु हृदयँ लगावा । कर गहि परम निकट बैठावा ॥
कहु कपि रावन पालित लंका । केहि बिधि दहेउ दुर्ग अति बंका ॥
प्रभु प्रसन्न जाना हनुमाना । बोला बचन बिगत अभिमाना ॥
साखामृग कै बड़ि मनुसाई । साखा तैं साखा पर जाई ॥
नाधि सिंधु हाटक पुर जारा । निसिचर गन बधि बिपिन उजारा ॥
सो सब तव प्रताप रघुराई । नाथ न कछु मोरि प्रभुताई ॥

दो०—ता कहूँ प्रभु कछु अगम नहीं जा पर तुम्ह अनुकूल ।

तब प्रभावेँ बड़वानलहि जारि सकइ खलु तूल ॥ ३३ ॥

नाथ भगति अति सुखदायनी । देहु कृपा करि अनपायनी ॥
सुनि प्रभु परम सरल कपि बानी । एवमस्तु तब कहेउ भवानी ॥
उमा राम सुभाउ जेहिं जाना । ताहि भजन तजि भाव न आना
यह संवाद जासु उर आवा । रघुपति चरन भगति सोइ पावा
सुनि प्रभु बचन कहहिं कपिबुंदा । जय जय जय कृपाल सुखकंदा ॥
तब रघुपति कपिपतिहि बोलावा । कहा चलै कर करहु बनावा ॥
अब बिलंबु केहि कारन कीजे । तुरत कपिन्ह कहूँ आयसु दीजे ॥
कौतुक देखि सुमन बहु बरषी । नभ तें भवन चले सुर हरषी ॥

दो०—कपिपति बेगि बोलाए आए जूथप जूथ ।

नाना बरन अतुल बल वानर भालु बरूथ ॥ ३४ ॥

प्रभु पद पंकज नावहिं सीसा । गर्जहिं भालु महाबल कीसा ॥
देखी राम सकल कपि सेना । चितइ कृपा करि राजिव नैना ॥
राम कृपा बल पाइ कपिंदा । भए पच्छजुत मनहुँ गिरिंदा ॥
हरषि राम तब कीन्ह पयाना । सगुन भए सुंदर सुभ नाना ॥
जासु सकल मंगलमय कीती । तासु पयान सगुन यह नीती ॥
प्रभु पयान जाना बैदेहीं । फरकि बाम अँग जनु कहि देहीं
जोइ जोइ सगुन जानकिहि होई । असगुन भयउ रावनहि सोई ॥
चला कटकु को बरनै पारा । गर्जहिं वानर भालु अपारा ॥
नख आयुध गिरि पादपधारी । चले गगन महि इच्छाचारी ॥
केहरिनाद भालु कपि करहीं । डगमगाहिं दिग्गज चिकरहीं ॥

छं०—चिकरहिं दिग्गज डोल महि गिरि लोल सागर खरभरे ।
 मन हरष सभ गंधर्व सुर मुनि नाग किंनर दुख टरे ॥
 कटकटहिं मर्कट बिकट भट बहु कोटि कोटिन्ह धावहीं ।
 जय राम प्रबल प्रताप कोसलनाथ गुन गन गावहीं ॥ १ ॥
 सहि सक न भार उदार अहिपति बार बारहिं मोहई ।
 गह दसन पुनि पुनि कमठ पृष्ठ कठोर सो किमि सोहई ॥
 रघुबीर रुचिर प्रयान प्रस्थिति जानि परम सुहावनी ।
 जनु कमठ खर्पर सर्पराज सो लिखत अबिचल पावनी ॥ २ ॥

दो०—एहि बिधि जाइ कृपानिधि उतरे सागर तीर ।
 जहँ तहँ लागे खान फल भालु बिपुल कपि बीर ॥ ३५ ॥

उहाँ निसाचर रहहिं ससंका । जब तें जारि गयउ कपि लंका ॥
 निज निज गृहँ सब करहिं बिचारा । नहिं निसिचर कुल केर उबारा
 जासु दूत बल बरनि न जाई । तेहि आएँ पुर कवन भलाई ॥
 दूतिन्ह सन सुनि पुरजन बानी । मंदोदरी अधिक अकुलानी ॥
 रहसि जोरि कर पति पग लागी । बोली बचन नीति रस पागी ॥
 कंत करष हरि सन परिहरहू । मोर कहा अति हित हियँ धरहू ॥
 समुझत जासु दूत कइ करनी । स्रवहिं गर्भ रजनीचर घरनी ॥
 तासु नारि निज सचिव बोलाई । पठवहु कंत जो चहहु भलाई ॥
 तब कुल कमल बिपिन दुखदाई । सीता सीत निसा सम आई ॥
 सुनहु नाथ सीता बिनु दीन्हें । हित न तुम्हार संभ्र अज कीन्हें ॥

दो०—राम बान अहि गन सरिस निकर निसाचर मेक ।
 जब लगि प्रसत न तब लगि जतनु करहु तजि टेक ॥ ३६ ॥

भवन सुनी सठ ता करि बानी । बिहसा जगत बिदित अभिमानी
सभय सुभाउ नारि कर साचा । मंगल महुँ भय मन अति काचा ॥
जौं आवइ मर्कट कटकाई । जिअहिं बिचारे निसिचर खाई ॥
कंपहिं लोकप जाकीं त्रासा । तासु नारि सभीत बड़ि हासा ॥
अस कहि बिहसि ताहि उर लाई । चलेउ सभाँ ममता अधिकाई ॥
मंदोदरी हृदय कर चिंता । भयउ कंत पर बिधि बिपरीता ॥
बैठेउ सभाँ खबरि असि पाई । सिंधु पार सेना सब आई ॥
बूझेसि सचिव उचित मत कहहू । ते सब हँसे मष्ट करि रहहू ॥
जितेहु सुरामुर तब श्रम नाहीं । नर बानर केहि लेखे माहीं ॥

दो०—सचिव वेद गुर तीनि जौं प्रिय बोलहिं भय आस ।

राज धर्म तन तीनि कर होइ बेगिहीं नास ॥ ३७ ॥

सोइ रावन कहुँ बनी सहाई । अस्तुति करहिं मुनाइ मुनाई ॥
अवसर जानि विभीषनु आवा । भ्राता चरन सीसु तेहिं नावा ॥
पुनि सिरु नाइ बैठ निज आसन । बोला बचन पाइ अनुसासन ॥
जौं कृपाल पूछिहु मांहि वाता । मति अनुरूप कहउँ हित ताता ॥
जौं आपन चाहै कल्याना । सुजसु सुगति सुभ गति सुख नाना ॥
सो परनारि लिलार गोसाईं । तजउ चउथि के चंद कि नाई ॥
चौदह भुवन एक पति होई । भूतद्रोह तिष्टइ नहिं सोई ॥
गुन सागर नागर नर जाऊ । अलपलांभ भल कहइ न कोऊ ॥

दो०—काम क्रोध मद लोभ सब नाथ नरक के पंथ ।

सब परिहरि रघुवीरहिं भजहु भजहिं जेहि संत ॥ ३८ ॥

तात राम नहिं नर भूपाला । भुवनेस्वर कालहु कर काला ॥

ब्रह्म अनामय अज भगवंता । व्यापक अजित अनादि अनन्ता ॥
 गो द्विज धेनु देव हितकारी । कृपा सिंधु मानुष तनुधारी ॥
 जन रंजन भंजन खल ब्राता । वेद धर्म रच्छक सुनु आता ॥
 ताहि बयरु तजि नाइअ माथा । प्रनतारति भंजन रघुनाथा ॥
 देहु नाथ प्रभु कहूँ बैदेही । भजहु राम बिनु हेतु सनेही ॥
 सरन गएँ प्रभु ताहु न त्यागा । बिस्व द्रोह कृत अघ जेहि लागा ॥
 जासु नाम त्रय ताप नसावन । सोइ प्रभु प्रगट समुझु जियँ रावन

दो०—बार बार पद लागउँ विनय करउँ दससीस ।

परिहरि मान मोह मद भजहु कोसलाधीस ॥ ३९(क) ॥

मुनि पुलस्ति निज सिष्य सन कहि पठई यह बात ।

तुरत सो मैं प्रभु सन कही पाइ सुअवसरु तात ॥ ३९(ख) ॥

माल्यवंत अति सचिव सयाना । तासु बचन सुनि अति सुख माना
 तात अनुज तव नीति बिभूषन । सो उर धरहु जो कहत बिभीषन ॥
 रिपु उतकरष कहत सठ दोऊ । दरि न करहु इहाँ हइ कोऊ ॥
 माल्यवंत गृह गयउ बहोरी । कहइ बिभीषनु पुनि कर जोरी ॥
 सुमति कुमति सब केँ उर रहहीं । नाथ पुरान निगम अस कहहीं ॥
 जहाँ सुमति तहँ संपति नाना । जहाँ कुमति तहँ बिपति निदाना ॥
 तव उर कुमति बसी बिपरीता । हित अनहित मानहु रिपु प्रीता ॥
 कालराति निसिचर कुल केरी । तेहि सीता पर प्रीति घनेरी ॥

दो०—तात चरन गहि मागउँ राखहु मोर दुलार ।

सीता देहु राम कहूँ अहित न होइ तुम्हार ॥ ४० ॥

बुध पुरान श्रुति संमत बानी । कही बिभीषन नीति बखानी ॥

सुनत दसानन उठा रिसाई । खल तोहि निकट मृत्यु अब आई
जिअसि सदा सठ मोर जिआवा । रिपु कर पच्छ मूढ़ तोहि भावा ॥
कहसि न खल अस को जग माहीं । भुज बल जाहि जिता मैं नाहीं ॥
मम पुर बसि तपसिन्ह पर प्रीती । सठ मिलु जाइ तिन्हहि कहु नीती
अस कहि कीन्हेसि चरन प्रहारा । अनुज गहे पद बारहिं बारा ॥
उमा संत कइ इहइ बड़ाई । मंद करत जो करइ भलाई ॥
तुम्ह पितु सरिस भलेहिं मोहि मारा । रामु भजें हित नाथ तुम्हारा ॥
सचिव संग लैन भ पथ गयऊ । सबहि सुनाइ कहत अस भयऊ ॥

दो०—रामु सत्यसंकल्प प्रभु सभा कालवस तोरि ।

मैं रघुवीर सरन अब जाउँ देहु जनि खोरि ॥ ४१ ॥

अस कहि चला बिभीषनु जवहीं । आयूहीन भए सब तबहीं ॥
साधु अवग्या तुरत भवानी । कर कल्याण अखिल कै हानी ॥
रावन जवहिं बिभीषन त्यागा । भयउ बिभव बिनु तबहिं अभागा
चलेउ हरषि रघुनायक पाहीं । करत मनोरथ बहु मन माहीं ॥
देखिहउँ जाइ चरन जलजाता । अरुन मृदुल सेवक सुखदाता ॥
जे पद परसि तरी रिषिनारी । दंडक कानन पावनकारी ॥
जे पद जनकसुताँ उर लाए । कपट कुरंग संग धर धाए ॥
हर उर सर सरोज पद जेई । अहोभाग्य मैं देखिहउँ तेई ॥

दो०—जिन्ह पायन्ह के पादुकन्हि भरतु रहे मन लाइ ।

ते पद आजु विलोकिहउँ इन्ह नयनन्हि अब जाइ ॥ ४२ ॥

एहि बिधि करत सप्रेम बिचारा । आयउ सपदि सिंधु एहिं पारा ॥
कपिन्ह बिभीषनु आवत देखा । जाना कोउ रिपु दूत बिसेषा ॥

ताहि राखि कपीस पहिँ आए । समाचार सब ताहि सुनाए ॥
 कह सुग्रीव सुनहु रघुराई । आवा मिलन दसानन भाई ॥
 कह प्रभु सखा बूझिये काहा । कहइ कपीस सुनहु नरनाहा ॥
 जानि न जाइ निसाचर माया । कामरूप केहि कारन आया ॥
 भेद हमार लेन सठ आवा । राखिअ बाँधि मोहि अस भावा ॥
 सखा नीति तुम्ह नीकि बिचारी । मम पन सरनागत भयहारी ॥
 सुनि प्रभु बचन हरष हनुमाना । सरनागत बच्छल भगवाना ॥

दो०—सरनागत कहूँ जे तजहिं निज अनहित अनुमानि ।

ते नर पावँर पापमय तिन्हहि विलोकत हानि ॥ ४३ ॥

कोटि बिप्र बध लागहिं जाहू । आएँ सरन तजउँ नहिं ताहू ॥
 सनमुख होइ जीव मोहि जवहीं । जन्म कोटि अघ नासहिं तवहीं ॥
 पापवंत कर सहज सुभाऊ । भजनु मोर तेहि भाव न काऊ ॥
 जौं पै दुष्टहृदय सोइ होई । मोरें सनमुख आव कि सोई ॥
 निर्मल मन जन सो मोहि पावा । मोहि कपट छल छिद्र न भावा ॥
 भेद लेन पठवा दससीसा । तबहुँ न कलु भय हानि कपीसा ॥
 जग महुँ सखा निसाचर जेते । लछिमनु हनइ निमिष महुँ तेते ॥
 जौं समीत आवा मरनाई । रखिहउँ ताहि प्रान की नाई ॥

दो०—उभय भाँति तेहि आनहु हँसि कह कृपानिकेत ।

जय कृपाल कहि कपि चले अंगद हनू समेत ॥ ४४ ॥

सादर तेहि आगें करि बानर । चले जहाँ रघुपति करुनाकर ॥
 दूरिहि ते देखे द्रौ आता । नयनानंद दान के दाता ॥
 बहुरि राम छविधाम बिलोकी । रहेउ ठटुकि एकटक पल रोकी ॥

भुज प्रलंब कंजारुन लोचन । स्यामल गात प्रनत भय मोचन ॥
 सिंघ कंध आयत उर सोहा । आनन अमित मदन मन मोहा ॥
 नयन नीर पुलकित अति गाता । मन धरि धीर कही मृदु बाता ॥
 नाथ दसानन कर मैं भ्राता । निसिचर बंस जनम सुरत्राता ॥
 सहज पापप्रिय तामस देहा । जथा उलूकहि तम पर नेहा ॥

दो०—श्रवन सुजसु सुनि आयउँ प्रभु भंजन भव भीर ।

त्राहि त्राहि आरति हरन सरन सुखद रघुवीर ॥ ४५ ॥

अस कहि करत दंडवत देखा । तुरत उठे प्रभु हरष विसेषा ॥
 दीन बचन मुनि प्रभु मन भावा । भुज विसाल गहि हृदयँलगावा ॥
 अनुज सहित मिलि ढिग बैठारी । बोले बचन भगत भयहारी ॥
 कहु लंकेस सहित परिवारा । कुसल कुठाहर बास तुम्हारा ॥
 खल मंडलीं बसहु दिनु राती । सखा धरम निबहइ केहि भाँती ॥
 मैं जानउँ तुम्हारि सब रीती । अति नय निपुन न भाव अनीती ॥
 बरु भल बास नरक कर ताता । दुष्ट संग जनि देइ बिधाता ॥
 अब पद देखि कुसल रघुराया । जौं तुम्ह कीन्हि जानि जन दाया ॥

दो०—तब लगि कुसल न जीव कहूँ सपनेहुँ मन विश्राम ।

जब लगि भजत न राम कहूँ सोक धाम तजि काम ॥ ४६ ॥

तब लगि हृदयँ बसत खल नाना । लोभ मोह मच्छर मद माना ॥
 जब लगि उर न बसन रघुनाथा । धरें चाप सायक कटि भाथा ॥
 ममता तरुन तमी अँधिआरी । राग द्वेष उलूक सुखकारी ॥
 तब लगि बमति जीव मन माहीं । जब लगि रभु प्रनाप रबि नाहीं ॥
 अब मैं कुसल मिटे भय भारे । देखि राम पद कमल तुम्हारे ॥

तुम्ह कृपाल जा पर अनुकूल। ताहि न व्याप त्रिविध भव सूला॥
 मैं निसिचर अति अधम सुभाऊ। सुभ आचरनु कीन्ह नहिं काऊ॥
 जासु रूप मुनि ध्यान न आवा। तेहिं प्रभु हरषि हृदयँ मोहि लावा
 दो०—अहोभाग्य मम अमित अति राम कृपा सुख पुंज ।

देखेउँ नयन विरंचि सिव सेव्य जुगल पद कंज ॥ ४७ ॥

सुनहु सखानिज कहउँ सुभाऊ। जान भुसुंड़ि संभु गिरिजाऊ॥
 जौं नर होइ चराचर द्रोही। आवै सभय सरन तकि मोही ॥
 तजि मद मोह कपट छल नाना। करउँ सद्य तेहि साधु समाना ॥
 जननी जनक बंधु सुत दारा। तनु धनु भवन सुहृद परिवारा ॥
 सब कै ममता ताग बटोरी। मम पद मनहि बाँध बरि डोरी॥
 समदरसी इच्छा कछु नाहीं। हरष सोक भय नहिं मन माहीं ॥
 अस सज्जन मम उर बस कैसैं। लोभी हृदयँ बसइ धनु जैसैं ॥
 तुम्ह सारिखे संत प्रिय मोरें। धरउँ देह नहिं आन निहोरें ॥

दो०—सगुन उपासक परहित निरत नीति हृद नेम ।

ते नर प्रान समान मम जिन्ह कें द्विज पद प्रेम ॥ ४८ ॥

सुनु लंकैसैं सकल गुन तोरें। तातें तुम्ह अतिसय प्रिय मोरें ॥
 राम बचन सुनि बानर जूथा। सकल कहहिं जय कृपा बरूथा ॥
 सुनत बिभीषनु प्रभु कै बानी। नहिं अघात श्रवनामृत जानी ॥
 पद अंबुज गहि बारहिं बारा। हृदयँ समात न प्रेमु अपाग ॥
 सुनहु देव सचराचर स्वामी। पनतपाल उर अंतरजामी ॥
 उर कछु प्रथम बासना रही। प्रभुपद प्रीतिसरित सां बही॥
 अब कृपाल निज भगति पावनी। देहु सदा सिव मन भावनी ॥

एवमस्तु कहि प्रभु रनधीरा । मागा तुरत सिंधु कर नीरा ॥
जदपि सखा तव इच्छा नाहीं । मोर दरसु अमोघ जग माहीं ॥
अस कहि राम तिलक तेहि सारा । सुमन वृष्टि नभ भई अपारा ॥

दो०—रावन क्रोध अनल निज स्वास समीर प्रचंड ।

जरत विभीषनु राखेउ दीन्हेउ राजु अखंड ॥ ४९ (क) ॥

जो संपति सिव रावनहि दीन्हि दिऐँ दस माथ ।

सोइ संपदा विभीषनहि सकुचि दीन्हि रघुनाथ ॥ ४९ (ख) ॥

अस प्रभु छाड़ि भजहिं जे आना । ते नर पसु विनु पूँछ बिषाना ॥
निज जन जानि ताहि अपनावा । प्रभु सुभाव कपि कुल मन भावा
पुनि सर्वग्य सर्व उर बासी । सर्वरूप सब रहित उदासी ॥
बोले बचन नीति प्रतिपालक । कारन मनुज दनुज कुल घालका ॥
सुनु कपीस लंकापति बीरा । केहि विधि तरिअ जलधि गंभीरा
संकुल मकर उरग झष जाती । अति अगाध दुस्तर सब भाँती ॥
कह लंकेस सुनहु रघुनायक । कोटि सिंधु सोषक तव सायक ॥
जद्यपि तदपि नीति असि गाई । विनय करिअ सागर सन जाई ॥

दो०—प्रभु तुम्हार कुलगुर जलधि कहिहि उपाय बिचारि ।

विनु प्रयास सागर तरिहि सकल भालु कपि धारि ॥ ५० ॥

सखा कही तुम्ह नीकि उपाई । करिअ दैव जौं होइ सहाई ॥
मंत्र न यह लछिमन मन भावा । राम बचन सुनि अति दुख पावना ॥
नाथ दैव कर कवन भरोसा । सोषिअ सिंधु करिअ मन गोमा ॥
कादर मन कहूँ एक अधारा । दैव दैव आलसी पुकारा ॥
सुनत बिहसि बोले रघुबीरा । ऐसेहिं करब धरहु मन धीरा ॥

अस कहि प्रभु अनुजहि समुझाई । सिंधु समीप गए रघुराई ॥
 प्रथम प्रनाम कीन्ह सिरु नाई । बैठे पुनि तट दर्भ डसाई ॥
 जबहिं बिभीषन प्रभु पहिं आए । पाछें रावन दूत पठाए ॥

दी०—सकल चरित तिन्ह देखे धरें कपट कपि देह ।

प्रभु गुन हृदयें सराहहिं सरनागत पर नेह ॥ ५१ ॥

प्रगट बखानहिं राम सुभाऊ । अतिसप्रेमगाबिसरि दुराऊ ॥
 रिपु के दूत कपिन्ह तब जाने । सकल बाँधि कपीस पहिं आने ॥
 कह सुग्रीव सुनहु सब बानर । अंग भंग करि पठवहु निसिचरा ॥
 सुनि सुग्रीव बचन कपि धाए । बाँधि कटक चहु पाम फिराए ॥
 बहु प्रकार मारन कपि लागे । दीन पुकारत तदपि न त्यागे ॥
 जो हमार हर नामा काना । तेहि कोसलाधीस के आना ॥
 सुनि लछिमन सब निकट बोलाए । दया लागि हँसि तुरत छोड़ाए
 रावन कर दीजहु यह पाती । लछिमन बचन वाचु कुलघाती ॥

दी०—कहेहु मुखार मूढ़ सन मम संदेसु उदार ।

मीता देइ मिलहु न त आवा काल तुम्हार ॥ ५२ ॥

तुरत नाइ लछिमन पद माथा । चले दूत बरनत गुन गाथा ॥
 कहत राम जसु लंकाँ आए । रावन चरन सीस तिन्ह नाए ॥
 बिहसि दसानन पूँछी बात । कहसि न सुक आपनि कुसलाता
 पुनि कहु खबरि बिभीषन केरी । जाहि मृत्यु आई अति नेरी ॥
 करत राज लंका सठ त्यागी । होइहि जव कर कीट अभागी ॥
 पुनि कहु भालु कीस कटकाई । कठिन काल प्रेरित चलि आई ॥
 जिन्ह के जीवन कर रखवारा । भयउ मृदुल चित सिंधु बिचारा ॥

कहु तपसिन्ह कै बात बहोरी । जिन्ह के हृदयँ त्रास अति मोरी ।

दो०—क्री भइ भेंट कि फिरि गए श्रवन सुजसु सुनि मोर ।

कहसि न रिपु दल तेज बल बहुत चकित चित तोर ॥ ५०

नाथ कृपा करि पूँछेहु जैसे । मानहु कहा क्रोध तजि तै
मिला जाइ जब अनुज तुम्हाग । जातहिं राम तिलक तेहि सा
रावन दूत हमहि सुनि काना । कपिन्ह बाँधि दीन्हें दुख न
श्रवन नासिका काटैं लागे । राम सपथ दीन्हें हम तर
पूँछिहु नाथ राम कटकाई । बदन कोटि सत बरनि
नाना बरन भालु कपि धारी । विकटानन विसाल भय
जेहि पुर दहेउ हतेउ सुत तोरा । सकल कपिन्ह महँ तेहि
अमित नाम भट कठिन कराला । अमित नाग बल विपु

दो०—द्विविद मयंद नील नल अंगद गद विकटारि

दधिमुख केहरि निसठ सठ जामवंत वन्दारि

ए कपि सब सुग्रीव समाना । इन्ह सम कोटिन्ह
राम कृपाँ अतुलित बल तिन्हहीं । तन समान त्रैलोक्य
अस मैं सुना श्रवन दसकंधर । पदुम अठारह
नाथ कटक महँ सो कपि नाही । जो न तुम्हहि जी
परम क्रोध मीजहिं सब हाथा । आयसु पै न ते
सोषहिं मिधु मद्रित झष व्याला । पूरहिं न त भरि
मदिं गर्द मिलवहिं दसमीमा । ऐमेइ बचन क
गर्जहिं तर्जहिं सहज असंका । मानहुँ ग्रसन

५०—सहज सूर कपि भालु सब पुनि सिर पर प्रभुराम ।

रावन काल कोटि कहूँ जीति सकहिं संग्राम ॥ ५५ ॥

तेज बल बुधि बिपुलाई । सेष सहस सत सकहिं न गाई ॥
 सर एक सोषि सत सागर । तव भ्रातहि पूँछेउ नय नागर ॥
 बचन सुनि सागर पाहीं । मागत पंथ कृपा मन माहीं ॥
 बचन बिहसा दससीसा । जौं असि मति सहाय कृत कीसा
 भीरु कर बचन दढ़ाई । सागर सन ठानी मचलाई ॥
 ॥ का करसि बड़ाई । रिपु बल बुद्धि थाह मै पाई ॥
 प्रभीत विभीषन जाकें । बिजय बिभूति कहाँ जग ताकें ॥
 ५ बचन दूत रिस बाढ़ी । समय बिचारि पत्रिका काढ़ी ॥
 दीन्ही यह पाती । नाथ बचाइ जुड़ावहु छाती
 ॥ म कर लीन्ही रावन । सचिव बोलि सठ लाग बचावन

१ मनहि रिझाइ सठ जनि घालसि कुल खीस ।

बेरोध न उबरसि सरन बिष्नु अज ईस ॥ ५६ (क) ॥

१ मान अनुज इव प्रभु पद पंकज भृंग ।

२ १ राम सरानल खल कुल सहित पतंग ॥ ५६ (ख) ॥

१ मुख मुसुकाई । कहत दसानन सबहि सुनाई ॥
 १ इत अकासा । लघु तापस कर बाग बिलासा ॥
 १ य सब बानी । समुझहु छाड़ि प्रकृति अभिमानी
 १ रिहरि क्रोधा । नाथ राम सन तजहु बिरोधा ॥
 १ रीर सुभाऊ । जद्यपि अखिल लोक कर राऊ ॥

मिलत कृपा तुम्ह पर प्रभु करिही । उर अपराध न एकउ धरिही ॥
जनकसुता रघुनाथहि दीजे । एतना कहा मोर प्रभु कीजे ॥
जब तेहि कहा देन वैदेही । चरन प्रहार कीन्ह सठ तेही ॥
नाइ चरन सिरु चला सो तहाँ । कृपासिंधु रघुनायक जहाँ ॥
करि प्रनामु निज कथा सुनाई । राम कृपाँ आपनि गति पाई ॥
रिषि अगस्ति कीं साप भवानी । राछस भयउ रहा मुनि ग्यानी ॥
बंदि राम पद बारहिं बारा । मुनि निज आश्रम कहूँ पशु धारा ॥

दो०—बिनय न मानत जलधि जड़ गए तीनि दिन बीति ।

बोले राम सकोप तब भय बिनु होइ न प्रीति ॥ ५७ ॥

लछिमन बान सरासन आनू । सोषौं बारिधि बिसिख कृसानू ॥
सठ सन बिनय कुटिल सन प्रीती । सहज कृपन सन सुंदर नीती ॥
ममता रत सन ग्यान कहानी । अति लोभी सन बिरति बखानी ॥
क्रोधिहि सम कामिहि हरि कथा । ऊसर बीज बएँ फल जथा ॥
अस कहि रघुपति चाप चढ़ावा । यह मत लछिमन के मन भावा ॥
संधानेउ प्रभु बिसिख कराला । उठी उदधि उर अंतर ज्वाला ॥
मकर उरग झष गन अकुलाने । जरत जंतु जलनिधि जब जाने ॥
कनक थार भरि मनि गन नाना । बिप्र रूप आयउ तजि माना ॥

दो०—काटेहि पइ कदरी फरइ कोटि जतन कोउ सींच ।

बिनय न मान खगेस सुनु डाटेहि पइ नव नीच ॥ ५८ ॥

सभय सिंधु गहि पद प्रभु केरे । छमहु नाथ सब अवगुन मेरे ॥
गगन समीर अनल जल धरनी । इन्ह कह नाथ सहज जड़ करनी ॥

तव प्रेरित मायाँ उपजाए । सृष्टि हेतु सब ग्रंथनि गाए ॥
 प्रभु आयसु जेहि कहँ जस अहई । सो तेहि भौँति रहें सुख लहई ॥
 प्रभु भल कीन्ह मोहि सिख दीन्ही । मरजादा पुनि तुम्हरी कीन्ही ॥
 ढोल गवाँर स्रद्र पसु नारी । सकल ताड़ना के अधिकारी ॥
 प्रभु प्रताप मैं जाब सुखाई । उतरिहि कटकुन मोरि बड़ाई ॥
 प्रभु अग्या अपेल श्रुति गाई । करौँ सो बेगि जो तुम्हहि सोहाई ॥

दो०—सुनत विनीत बचन अति कह कृपाल मुसुकाइ ।

जेहि विधि उतरे कपि कटकु तात सो कहहु उपाइ ॥ ५९ ॥

नाथ नील नल कपि द्वौ भाई । लरिकाई रिषि आसिष पाई ॥
 तिन्ह कें परस किएँ गिरि भारे । तरिहहिँ जलधि प्रताप तुम्हारे ॥
 मैं पुनि उर धरि प्रभु प्रभुताई । करिहउँ बल अनुमान सहाई ॥
 एहि विधि नाथ पयोधि बँधाइअ । जेहिँ यह सुजसु लोक तिहुँ गाइअ ॥
 एहिँ सर मम उत्तर तट बासी । हतहु नाथ खल नर अघ रासी ॥
 सुनि कृपाल सागर मन पीरा । तुरतहिँ हरी राम रनधीरा ॥
 देखि राम ब्रूल पौरुष भारी । हरषि पयोनिधि भयउ सुखारी ॥
 सकल चरित कहि प्रभुहि सुनावा । चरन बंदि पाथोधि सिधावा ॥

छं०—निज भवन गवनेउ सिंधु श्रीरघुपतिहि यह मत भायऊ ।

यह चरित कलि मलहर जथामति दास तुलसी गायऊ ॥

सुख भवन संसय समन दवन बिषाद रघुपति गुन गना ।

तजि सकल आस भरोस गावहि सुनहि संतत सठ मना ॥

दो०—सकल सुमंगल दायक रघुनायक गुन गान ।

सादर सुनहिं ते तरहिं भव सिंधु बिना जलजान ॥ ६० ॥

मासपारायण, चौबीसवाँ विश्राम


इति श्रीमद्रामचरितमानसे सकलकलिकलुषविध्वंसने

पञ्चमः सोपानः समाप्तः ।

(सुन्दरकाण्ड समाप्त)



रामके लिये देव-रथ



३

तेजपुंज रथ दिव्य अनूपा ।

हरषि चढ़े कोसलपुर भूपा ॥

श्रीगणेशाय नमः

श्रीजानकीवल्लभो विजयते

श्रीरामचरितमानस

षष्ठ सोपान

(लङ्काकाण्ड)

श्लोक

रामं कामारिसेव्यं भवभयहरणं कालमत्तेभसिंहं
योगीन्द्रं ज्ञानगम्यं गुणनिधिभजितं निर्गुणं निर्विकारम् ।
मायातीतं सुरेशं खलवधनिरतं ब्रह्मवृन्दैकदेवं
वन्दे कन्दावदातं सरसिजनयनं देवमुर्वीशरूपम् ॥ १ ॥
शङ्खेन्द्राभमतीवसुन्दरतनुं शार्दूलचर्मम्बरं
कालव्यालकरालभूषणधरं गङ्गाशशाङ्कप्रियम् ।
काशीशं कलिकल्मषौघशमनं कल्याणकल्पद्रुमं
नौमीडयं गिरिजापतिं गुणनिधिं कन्दर्पहं शङ्करम् ॥ २ ॥
यो ददाति सतां शम्भुः कैवल्यमपि दुर्लभम् ।
खलानां दण्डकृद्योऽसौ शङ्करः शं तनोतु मे ॥ ३ ॥

दो०—लव निमेष परमानु जुग वरष कल्प सर चंड ।

भजसि न मन तेहि राम को कालु जासु कोदंड ॥

सो०—सिंधु बचन सुनि राम सचिव बोलि प्रभु अस कहेउ ।
 अब बिलंबु केहि काम करहु सेतु उतरै कटक ॥
 सुनहु भानुकुल केतु जामवंत कर जोरि कह ।
 नाथ नाम तव सेतु नर चढ़ि भवसागर तरहिं ॥

यह लघु जलधि तरत कति बारा । अस सुनि पुनि कह पवनकुमारा ॥
 प्रभु प्रताप बड़वानल भारी । सोषेउ प्रथम पयोनिधि बारी ॥
 तव रिपु नारि रुदन जलधारा । भरेउ बहोरि भयउ तेहिं खारा ॥
 सुनि अति उकुति पवनसुत केरी । हरषे कपि रघुपति तन हेरी ॥
 जामवंत बोले दोउ भाई । नल नीलहि सब कथा सुनाई ॥
 राम प्रताप सुमिरि मन माहीं । करहु सेतु प्रयास कछु नाहीं ॥
 बोलि लिए कपि निकर बहोरी । सकल सुनहु बिनती कछु मांरी ॥
 राम चरन पंकज उर धरहु । कौतुक एक भालु कपि करहु ॥
 धावहु मर्कट बिकट बरूथा । आनहु बिटप गिरिन्ह के जूथा ॥
 सुनि कपि भालु चले करि हूहा । जय रघुबीर प्रताप समूहा ॥

दो०—अनि उत्तंग गिरि पादप लीलहि लेहि उटाइ ।

आनि देहि नल नीलहि रचहिं ते सेतु बनाइ ॥ १ ॥

सैल बिसाल आनि कपि देहीं । कंदुक इव नल नील ते लेहीं ॥
 देखि सेतु अति सुंदर रचना । बिहसि कृपानिधि बोले बचना ॥
 परम रम्य उत्तम यह धरनी । महिमा अभित जाइ नहिं बरनी ॥
 करिहउँ इहाँ संभु थापना । मोरे हृदय परम कल्पना ॥
 सुनि कपीस बहु दूत पठाए । मुनिवर सकल बोलि लै आए ॥
 लिंग थापि विधिवत करि पूजा । सिव समान प्रिय मोहि न दूजा ॥

सिव द्रोही मम भगत कहावा । सो नर सपनेहुँ मोहि न पावा ॥
संकर विमुख भगति चह मोरी । सो नारकी मूढ़ मति थोरी ॥

दो०—संकर प्रिय मम द्रोही सिव द्रोही मम दास ।

ते नर करहि कलप भरि घोर नरक महुँ बास ॥ २ ॥

जे रामेस्वर दरसनु करिहहि । ते तनु तजि मम लोक सिधरिहहि
जो गंगाजलु आनि चढ़ाइहि । सो साजुज्य मुक्ति नर पाइहि ॥
होइ अकाम जो छल तजि सेइहि । भगति मोरि तेहि संकर देइहि ॥
मम कृत सेतु जो दरसनु करिही । सो बिनु श्रम भवसागर तरिही ॥
राम बचन सब के जिय भाए । मुनिबर निज निज आश्रम आए
गिरिजा रघुपति कै यह रीती । संतत करहि प्रनत पर प्रीती ॥
बाँधा सेतु नील नल नागर । गमकृपाँ जसु भयउ उजागर ॥
बूझहि आनहि बोरहि जेई । भए उपल बोहित सम तेई ॥
महिमा यहन जलधि कइ बरनी । पाहन गुन न कपिन्ह कइ करनी

दो०—श्री रघुवीर प्रताप ते सिंधु तरे पाषाण ।

ते मतिमंद जे राम तजि भजहि जाइ प्रभु आन ॥ ३ ॥

बाँधि सेतु अति सुदृढ़ बनावा । देखि कृपानिधि के मन भावा ॥
चली सेन कलु बरनि न जाई । गर्जहि मर्कट भट समुदाई ॥
सेतुबंध ढिग चढ़ि रघुगई । चितव कृपाल सिंधु बहुताई ॥
देखन कहूँ प्रभु करुना कंदा । प्रगट भए सब जलचर बृंदा ॥
मकर नक नाना झष ब्याला । सत जो जन तन परम बिसाला ॥
अइसेउ एक तिन्हहि जे खाहीं । एकन्ह कें डर तेपि डेराहीं ॥
प्रभुहि बिलोकहिं टरहिं न टारे । मन हरषित सब भए सुखारे ॥

तिन्ह कीं ओट न देखिअ बारी । मगन भए हरि रूप निहारी ॥
चला कटक प्रभु आयसु पाई । को कहि सक कपि दल बिपुलाई ॥

दो०—सेतुबंध भइ भीर अति कपि नभ पंथ उड़ाहिं ।

अपर जलचरन्ह ऊपर चदि चदि पारहि जाहिं ॥ ४ ॥

अस कौतुक बिलोकि द्वौ भाई । बिहँसि चले कृपाल रघुराई ॥
सेन सहित उतरे रघुबीरा । कहि न जाइ कपि जूथप भीरा ॥
सिंधु पार प्रभु डेरा कीन्हा । सकल कपिन्ह कहूँ आयसु दीन्हा
खाहु जाइ फल मूल सुहाए । सुनत भालु कपि जहँ तहँ धाए ॥
सब तरु फरे राम हित लागी । रितु अरुकुरितु काल गति त्यागी
खाहिं मधुर फल बिटप हलावहिं । लंका सन्मुख सिखर चलावहिं ॥
जहँ कहूँ फिरत निसाचर पावहिं । घेरि सकल बहु नाच नचावहिं ॥
दसनन्हि काटि नासिका काना । कहि प्रभु सुजसु देहिं तब जाना ॥
जिन्ह कर नासा कान निपाता । तिन्ह रावनहि कही सब बाता ॥
सुनत श्रवन बारिधि बंधाना । दस मुख बोलि उठा अकुलाना ॥

दो०—बाँध्यो वननिधि नीरनिधि जलधि सिंधु वारीस ।

सख्य तोयनिधि कंपति उदधि पयोधि नदीस ॥ ५ ॥

निज बिकलता बिचारि बहोरी । बिहँसि गयउ गृह करि भय भोरी
मंदोदरीं सुन्यो प्रभु आयो । कौतुकहीं पाथोधि बैँधायो ॥
कर गहि पतिहि भवन निज आनी । बोली परम मनोहर बानी ॥
चरन नाइ सिरु अंचलु रोपा । सुनहु बचन पिय परिहरि कोपा
नाथ बयरु कीजे ताही सों । बुधि बल सकिअ जीति जाही सों
तुम्हहि रघुपतिहि अंतर कैसा । खलु खद्योत दिनकरहि जैसा ॥

अतिबल मधु कैटभ जेहि मारे । महाबीर दितिसुत संधारे ॥
जेहि बलि बाँधि सहस भुज मारा । सोइ अवतरेउ हरन महि भारा ॥
तासु बिरोध न कीजिअ नाथा । काल करम जिव जाकें हाथा ॥

दो०—रामहि सौंपि जानकी नाइ कमल पद माथ ।

सुत कहूँ राज समर्पि वन जाइ भजिअ रघुनाथ ॥ ६ ॥

नाथ दीनदयाल रघुगई । बाघउ सनमुख गएँ न खाई ॥
चाहिअ करन सो सब करि बीते । तुम्ह सुर असुर चराचर जीते ॥
संत कहहिं असि नीति दसानन । चौथेंपन जाइहि नृप कानन ॥
तासु भजनु कीजिअ तहँ भर्ता । जो कर्ता पालक संहर्ता ॥
सोइ रघुबीर प्रनत अनुरागी । भजहु नाथ ममता सब त्यागी ॥
मुनिबर जतनु करहिं जेहि लागी । भूप राजु तजि होहिं बिरागी ॥
सोइ कोसलाधीस रघुराया । आयउ करन तोहि परदाया ॥
जौं पिय मानहु मोर सिखावन । सुजसु होइ तिहुँ पुर अति पावन ॥

दो०—अस कहि नयन नीर भरि गहि पद कंपित गात ।

नाथ भजहु रघुनाथहि अचल होइ अहिवात ॥ ७ ॥

तब रावन मयसुता उठाई । कहै लाग खल निज प्रभुताई ॥
सुनु तैं प्रिया वृथा भय माना । जग जांधा को मोहि समाना ॥
बरुन कुबेर पवन जम काला । भुज बल जितेउँ सकल दिगपाला ॥
देव दनुज नर सब बस मोरें । कवन हेतु उपजा भय तोरें ॥
नाना बिधि तेहि कहेसि बुझाई । सभाँ बहोरि बैठ सो जाई ॥
मंदोदरीं हृदयँ अस जाना । काल बख्य उपजा अभिमाना ॥
सभाँ आइ मंत्रिन्ह तेहि बुझा । करब कवन बिधिरिपु सैं जूझा ॥

कहहिं सचिव सुनु निसिचर नाहा । बार बार प्रभु पूछहु काहा॥
कहहु कवन भय करिअ बिचारा । नर कपि भालु अहार हमारा ॥

दो०—सब के बचन श्रवन सुनि कह प्रहस्त कर जोरि ।

नीति बिरोध न करिअ प्रभु मंत्रिन्ह मति अति थोरि ॥ ८ ॥

कहहिं सचिव सठ ठकुरसोहाती । नाथ न पूर आव एहि भाँती ॥
बारिधि नाधि एक कपि आवा । तासु चरित मन महँ सबु गावा॥
छुधा न रही तुम्हहि तब काहू । जारत नगरु कस न धरि खाहू ॥
सुनत नीक आगें दुख पावा । सचिवन अस मत प्रभुहि सुनावा
जेहि बारीस बँधायउ हेला । उतरैउ सेन समेत सुबेला ॥
सो भनु मनुज खाव हम भाई । बचन कहहिं सब गाल फुलाई ॥
तात बचन मम सुनु अति आदर । जनि मनु गुनहु मोहि करि कादर
प्रिय बानी जे सुनहिं जे कहहीं । ऐसे नर निकाय जग अहहीं ॥
बचन परम हित सुनत कठोरे । सुनहिं जे कहहिं ते नर प्रभु थोरे ॥
प्रथम बसीठ पठउ सुनु नीती । सीता देइ करहु पुनि प्रीती ॥

दो०—नारि पाइ फिरि जाहिं जौं तौ न बढ़ाइअ रारि ।

नाहि त सन्मुख समर महि तात करिअ हठि मारि ॥ ९ ॥

यह मत जौं मानहु प्रभु मोरा । उभय प्रकार सुजसु जग तोरा॥
सुत सन कह दसकंठ रिसाई । असि मति सठ केहिं तोहि सिखाई
अबहीं ते उर संसय होई । बेनुमूल सुत भयहु घमोई ॥
सुनि पितु गिरा परुष अति घोरा । चला भवन कहि बचन कठोरा॥
हित मत तोहि न लागत कैसें । काल बिबस कहूँ भेषज जैसें ॥
• संख्या समय जानि दससीसा । भवन चलेउ निरखत भुज बीसा

लंका सिखर उपर आगारा । अति विचित्र तहँ होइ अखारा ॥
बैठ जाइ तेहि मंदिर रावन । लागे किंनर गुन गन गावन ॥
बाजहि ताल पखाउज बीना । नृत्य करहि अपछरा प्रबीना ॥

दो०—सुनासीर सत सरिस सो संतत करइ विलास ।

परम प्रबल रिपु सीस पर तद्यपि सोच न त्रास ॥ १० ॥

इहाँ सुबेल सैल रघुबीरा । उतरे सेन सहित अति भीरा ॥
सिखर एक उत्तंग अति देखी । परम रम्य सम सुभ्र बिसेषी ॥
तहँ तरु किसलय सुमन सुहाए । लछिमन रचि निज हाथ डसाए
ता पर रुचिर मृदुल मृगछाला । तेहि आसन आसीन कृपाला ॥
प्रभु कृत सीस कगीस उछंगा । बाम दहिन दिसि चाप निषंगा ॥
दुहुँ कर कमल सुधारत बाना । कह लंकेस मंत्र लागि काना ॥
बड़भागी अंगद हनुमाना । चरन कमल चापत विधि नाना ॥
प्रभु पाछें लछिमन बीरासन । कटि निषंग कर बान सरासन ॥

दो०—एहि विधि कृपा रूप गुन धाम राम आसीन ।

धन्य ते नर एहि ध्यान जे रहत सदा लयलीन ॥ ११ (क) ॥

पूरब दिसा बिलोकि प्रभु देखा उदित मयंक ।

कहत सबहि देखहु ससिहि मृगपति सरिस असंक ॥ ११ (ख) ॥

पूरब दिशि गिरिगुहा निवासी । परम प्रताप तेज बल रासी ॥
मत्त नाग तम कुंभ बिदारी । ससि केसरी गगन बन चारी ॥
बिथुरे नभ मुकुताहल ताग । निमि सुंदरी केर सिंगारा ॥
कह प्रभु ससि महुँ मेचकताई । कहहु काह निज निज मति भाई ॥
कह सुग्रीव सुनहु रघुराई । ससि महुँ प्रगट भूमि कै झाई ॥

मारेउ राहु ससिहि कह कोई । उर महुँ परी स्यामता सोई ॥
 कांड कह जब बिधिरति मुख कीन्हा । सार भाग ससि कर हरि लीन्हा
 छिद्र सो प्रगट इंदु उर माहीं । तेहि मग देखिअ नभ परिछाहीं
 प्रभु कह गरल बंधु ससि केरा । अति प्रिय निज उर दीन्ह बसेरा
 बिष संजुत कर निकर पसारी । जारत बिरहवत नर नारी ॥

दो०—कह हनुमंत सुनहु प्रभु ससि तुम्हार प्रिय दास ।

तव मूरति बिधु उर बसति सोइ स्यामता अभास ॥१२(क)॥

नवाह्नपारायण, सातवाँ विश्राम

पवन तनय के बचन सुनि विहँसे रामु सुजान ।

दच्छिन दिसि अवलोकि प्रभु बोले कृपा निधान ॥१२(ख)॥

देखु बिभीषन दच्छिन आसा । घन घमंड दामिनी बिलासा ॥
 मधुर मधुर गरजइ घन घोरा । होइ बृष्टि जनि उपल कठोरा ॥
 कहत बिभीषन सुनहु कृपाला । होइ न तड़ित न बारिद माला ॥
 लंका सिखर उपर आगारा । तहँ दसकंधर देख अखारा ॥
 छत्र मेघडंबर सिर धारी । सोइ जनु जलद घटा अति कारी ॥
 मंदोदरी^३ श्रवन ताटंका । सोइ प्रभु जनु दामिनी दमंका ॥
 बाजहि ताल मृदंग अनूपा । सोइ रव मधुर सुनहु सुरभूपा ॥
 प्रभु मुसुकान समुझि अभिमाना । चाप चढ़ाइ बान संधाना ॥

दो०—छत्र मुकुट ताटक तब हते एकहीं बान ।

सब के देखत महि परे मरमु न कोऊ जान ॥१३(क)॥

अस कौतुक करि राम सर प्रविसेउ आइ निषंग ।

रावन सभा ससंक सब देखि महा रसभंग ॥१३(ख)॥

कंप न भूमि न मरुत बिसेषा । अस्त्र सस्त्र कछु नयन न देखा ॥
 सोचहिं सब निज हृदय मझारी । असगुन भयउ भयंकर भारी ॥
 दसमुख देखि सभा भय पाई । बिहसि बचन कह जुगुति बनाई ॥
 सिरउ गिरे संतत सुभ जाही । मुकुट परे कस असगुन ताही ॥
 सयन करहु निज निज गृह जाई । गवने भवन सकल सिर नाई ॥
 मंदोदरी सोच उर बसेऊ । जब ते श्रवनपूर महि खसेऊ ॥
 सजल नयन कह जुग कर जोरी । सुनहु प्रानपति बिनती मोरी ॥
 कंत राम बिरोध परिहरहु । जानि मनुज जनि हठ मन धरहु ॥

दो०—बिस्वरूप रघुवंस मनि करहु बचन बिस्वासु ।

लोक कल्पना बेद कर अंग अंग प्रति जासु ॥ १४ ॥

पद पाताल सीस अज धामा । अपर लोक अँग अँग विश्रामा ॥
 भृकुटि बिलास भयंकर काला । नयन दिवाकर कच घन माला ॥
 जासु घ्रान अखिनीकुमारा । निसि अरु दिवस निमेष अपारा ॥
 श्रवन दिसा दस बेद बखानी । मारुत खास निगम निज बानी ॥
 अधर लोभ जम दसन कराला । माया हास बाहु दिगपाला ॥
 आनन अनल अंबुपति जीहा । उतपति पालन प्रलय समीहा ॥
 रोम राजि अष्टादस भारा । अस्थि सैल सरिता नस जारा ॥
 उदर उदधि अधगो जातना । जगमय प्रभु का बहु कल्पना ॥

दो०—अहंकार सिव बुद्धि अज मन ससि चित्त महान ।

मनुज बास सचराचर रूप राम भगवान ॥ १५(क) ॥

अस बिचारि सुनु प्रानपति प्रभु सन बयरु बिहाइ ।

श्रीति करहु रघुबीर पद मम अहिवात न जाइ ॥ १५(ख) ॥

बिहँसा नारि बचन सुनि काना । अहो मोह महिमा बलवाना ॥
 नारि सुभाउ सत्य सब कहहीं । अवगुन आठ सदा उर रहहीं ॥
 साहस अनृत चपलता माया । भय अविबेक असौच अदाया ॥
 रिपु कर रूप सकल तैं गावा । अति बिसाल भय मोहि सुनावा ॥
 सो सब प्रिया सहज बस मोरें । समुझि परा प्रमाद अब तोरें ॥
 जानिउँ प्रिया तोरि चतुर्गई । एहि विधि कहहु मोरि प्रभुताई ॥
 तब बतकही गूढ़ मृगलोचनि । समुझत सुखद सुनत भय मोचनि
 मंदोदरि मन महुँ अस ठयऊ । पियहि काल बस मतिभ्रम भयऊ ॥

दो०—एहि विधि करत विनोद बहु प्रात प्रगट दसकंध ।

सहज असंक लंकपति सभौ गयउ मद अंध ॥ १६(क) ॥

सो०—फूलइ फरइ न बेत जदापि सुधा बरपहिं जलद ।

मूरुख हृदयँ न चेत जौं गुर मिलहिं विरंचि सम ॥ १६(ख) ॥

इहाँ प्रात जागे रघुराई । पूछा मत सब सचिव बोलाई ॥
 कहहु बेगि का करिअ उपाई । जामवंत कह पद सिरु नाई ॥
 सुनु सर्वग्य सकल उर बासी । बुधि बल तेज धर्म गुन रासी ॥
 मंत्र कहउँ निज मति अनुसार । दूत पठाइअ बालिकुमारा ॥
 नीक मंत्र सब के मन माना । अंगद सन कह कृपानिधाना ॥
 बालितनय बुधि बल गुनधामा । लंका जाहु तात मम कामा ॥
 बहुत बुझाई तुम्हहि का कहउँ । परम चतुर मैं जानत अहउँ ॥
 काजु हमार तासु हित होई । रिपु सन करेहु बतकही सोई ॥

सो०—प्रभु अग्या धरि सीस चरन वंदि अंगद उठेउ ।

सोइ गुन सागर ईस राम कृपा जा पर करहु ॥ १७(क) ॥

स्वयंसिद्ध सब काज नाथ मोहि आदरु दियउ ।

अस बिचारि जुवराज तन पुलकित हरषित हियउ ॥१७(ख)॥

बंदि चरन उर धरि प्रभुताई । अंगद चलेउ सबहि सिरु नाई ॥
 प्रभु प्रताप उर सहज असंका । रन बाँकुरा बालिसुत बंका ॥
 पुर पैठत रावन कर बेटा । खेलत रहा सो होइ गै भेटा ॥
 बातहिं बात करष बढ़ि आई । जुगल अतुल बल पुनि तरुनाई ॥
 तेहिं अंगद कहूँ लात उठाई । गहि पद पटकेउ भूमि भवौं आई ॥
 निसिचर निकर देखि भट भारी । जहँ तहँ चले न सकहिं पुकारी ॥
 एक एक सन सरमु न कहहीं । समुझि तासु बध चुप करि रहहीं ॥
 भयउ कोलाहल नगर मझारी । आवा काप लंका जेहिं जारी ॥
 अब धौं कहा करिहि करतारा । अति सभीत सब करहिं बिचारा ॥
 बिनु पूछे मगु देहिं दिखाई । जेहिं बिलोक सोइ जाइ सुखाई ॥
 दो०—गयउ सभा दरवार तव सुभिरि राम पद कंज ।

भिंह ठवनि इत उन चितव धीर वीर बल पुंज ॥ १८ ॥

तुरत निसाचर एक पठावा । समाचार रावनहि जनावा ॥
 सुनत बिहँसि बोला दससीमा । आनहु बोलि कहाँ कर कीसा ॥
 आयसु पाइ दूत बहु धाए । कपिकुंजरहि बोलि लै आए ॥
 अंगद दीख दसानन बैसैं । सहित प्रान कज्जल गिरि जैसैं ॥
 भुजा बिट्ठ सिर सुंग समाना । रोमावली लता जनु नाना ॥
 मुख नासिका नयन अरु काना । गिरि कंदरा खोह अनुमाना ॥
 गयउ सभाँ मन नेकु न मुरा । बालितनय अतिबल बाँकुरा ॥
 उठे सभासद कपि कहूँ देखी । रावन उर भा क्रोध बिसेषी ॥

दो०—जथा मत्त गज जूथ महुँ पंचानन चलि जाइ ।

राम प्रताप सुमिरि मन बैठ सभाँ सिरु नाइ ॥ १९ ॥

कह दसकंठ कवन तैं बंदर । मैं रघुबीर दूत दसकंधर ॥
मम जनकहि तोहि रही मिताई । तव हित कारन आयउँ भाई ॥
उत्तम कुल पुलस्ति कर नाती । सिव विरंचि पूजेहु बहु भाँती ॥
बर पायहु कीन्हेहु सब काजा । जीतेहु लोकपाल सब राजा ॥
नृप आभमान मोह बस किंवा । हरि आनिहु सीता जगदंबा ॥
अब सुभ कहा सुनहु तुम्ह मोरा । सब अपराध छमिहि प्रभु तोरा ॥
दसन गहहु तन कंठ कुठारी । परिजन सहित संग निज नारी ॥
सादर जनकसुता करि आगें । एहि बिधि चलहु सकल भय त्यागें ॥

दो०—प्रनतपाल रघुवंसमनि त्राहि त्राहि अब मोहि ।

आरत गिरा सुनत प्रभु अभय करैगो तोहि ॥ २० ॥

रे कपिपोत बोलु संभारी । मूढ़ न जानेहि मोहि सुरारी ॥
कहु निज नाम जनक कर भाई । केहि नातें मानिए मिताई ॥
अंगद नाम बालि कर बेटा । तासों कबहुँ भई ही मेटा ॥
अंगद बचन सुनत सकुचाना । रहा बालि बानर मैं जाना ॥
अंगद तहीं बालि कर बालक । उपजेउ बंस अनल कुल धालक ॥
गर्म न गयहु व्यर्थ तुम्ह जायहु । निज मुख तापस दूत कहायहु ॥
अब कहु कुसल बालि कहँ अहई । बिहँसि बचन तब अंगद कहई ॥
दिन दस गएँ बालि पहि जाई । बूझेहु कुसल सखा उर लाई ॥
राम बिरोध कुसल जसि होई । सो सब तोहि सुनाइहि सोई ॥
सुनु सठ भेद होइ मन ताकें । श्रीरघुबीर हृदय नहि जाकें ॥

दो०—हम कुल घालक सत्य तुम्ह कुल पालक दससीस ।

अंधउ बधिर न अस कहहि नयन कान तव बीस ॥ २१ ॥

सिव बिरंचि सुर मुनि समुदाई । चाहत जासु चरन सेवकाई ॥
तासु दूत होइ हम कुल बोरा । अइसिहुँ मति उर बिहरन तोरा ॥
सुनि कठोर बानी कपि केरी । कहत दसानन नयन तरेरी ॥
खल तव कठिन बचन सब सहऊँ । नीति धर्म मैं जानत अहऊँ ॥
कह कपि धर्मसीलता तोरी । हमहुँ सुनी कृत पर त्रिय चोरी ॥
देखी नयन दूत रखवारी । बूढ़ि न मरहु धर्म ब्रतधारी ॥
काननाक बिनु भगिनि निहारी । छमा कीन्हि तुम्ह धर्म बिचारी ॥
धर्मसीलता तव जग जागी । पावा दरसु हमहुँ बड़भागी ॥

दो०—जनि जल्पसि जड़ जंतु कपि सठ बिलोकु मम बाहु ।

लोकपाल बल बिपुल ससि ग्रसन हेतु सब राहु ॥ २२(क) ॥

पुनि नभ सर मम कर निकर कमलन्हि पर करि बास ।

सोभत भयउ मराल इव संभु सहित कैलास ॥ २२(ख) ॥

तुम्हरे कटक माझ सुनु अंगद । मो सन भिरिहि कवन जोधा बद ॥
तव प्रभु नारि बिरहै बलहीना । अनुज तासु दुख दुखी मलीना ॥
तुम्ह सुग्रीव कूलद्रुम दोऊ । अनुज हमार भीरु अति सोऊ ॥
जामवंत मंत्री अति बूढ़ा । सो कि होइ अब समगरूढ़ा ॥
सिल्यि कर्म जानहिं नल नीला । है कपि एक महा बलसीला ॥
आवा प्रथम नगरु जेहिं जारा । सुनत बचन कह बालिकुमारा ॥
सत्य बचन कहु निसिचर नाहा । साँचेहुँ कीस कीन्ह पुर दाहा ॥
रावन नगर अल्प कपि दहई । सुनि अस बचन सत्य को कहई ॥

जो अति सुभट सराहेहु रावन । सो सुग्रीव कैर लघु धावन ॥
चलइ बहुत सो बीर न होई । पठवा खबरि लेन हम सोई ॥

दो०—सत्य नगरु कपि जारेउ बिनु प्रभु आयसु पाइ ।

फिरि न गयउ सुग्रीव पहिं तेहिं भय रहा लुकाइ ॥२३(क)॥

सत्य कहहि दसकंठ सब मोहि न सुनि कछु कोह ।

कोउ न हमारें कटक अस तो सन लरत जो सोह ॥२३(ख)॥

ग्रीति बिरोध समान सन करिअ नीति असि आहि ।

जौ मृगपति बध मेडुकन्हि भल कि कहइ कोउ ताहि ॥२३(ग)॥

जद्यपि लघुता राम कहूँ तोहि वधें बड़ दोष ।

तदपि कठिन दसकंठ सुनु छत्र जाति कर रोष ॥२३(घ)॥

बक्र उक्ति धनु बचन सर हृदय दहेउ रिपु कीस ।

प्रतिउत्तर सड़सिन्ह मनहु कादत भट दससीम ॥२३(ङ)॥

हँसि बोलेउ दसमौलि तब कपि कर बड़ गुन एक ।

जो प्रतिपालइ तासु हित करइ उपाय अनेक ॥२३(च)॥

धन्य कीस जो निज प्रभु काजा । जहँ तहँ नाचइ परिहरि लाजा ॥

नाचि कूदि कैरि लोग रिझाई । पति हित करइ धर्म निपुनाई ॥

अंगद स्वामिभक्त तव जाती । प्रभु गुन कस न कहसि एहि भौती

मैं गुन गाहक परम सुजाना । तव कटुरटनि करउँ नहिं काना

कह कपि तव गुन गाहकताई । सत्य पवनसुत मोहि सुनाई ॥

बन बिघंसि सुत वधि पुर जारा । तदपि न तेहिं कछु कृत अपकारा ॥

सोइ बिचारि तव प्रकृति सुहाई । दसकंधर मैं कीन्हि ढिठाई ॥

देखेउँ आइ जो कछु कपि भाषा । तुम्हरेँ लाज न रोष न माखा ॥

जौँ असि मति पितु खाए कीसा । कहि अस बचन हँसा दससीसा
पितहि खाइ खातेउँ पुनि तोही । अबहीं समुझि परा कछु मोही॥
बालि बिमल जस भाजन जानी । हतउँ न तोहि अधम अभिमानी
कहु रावन रावन जग केते । मैनिज श्रवन सुने सुनु जेते ॥
बलिहि जितन एक गयउ पताला । राखेउ बाँधि सिसुन्ह हयसाला
खेलहिं बालक मारहिं जाई । दया लागि बलि दीन्ह छोड़ाई ॥
एक बहोरि सहस भुज देखा । धाइ धरा जिमि जंतु बिसेषा ॥
कौतुक लागि भवन लै आवा । सोपुलस्ति मुनि जाइ छोड़ावा॥

दो०—एक कहत मोहि सकुच अति रहा बालि कीँ काँख ।

इन्ह महुँ रावन तैं कवन सत्य बदहि तजि माख ॥ २४ ॥

सुनु सठ सोइ रावन बलसीला । हरगिरि जान जासु भुज लीला ॥
जान उमापति जासु सुराई । पूजेउँ जेहि सिर सुमन चढ़ाई ॥
सिर सरोज निज करन्हि उतागी । पूजेउँ अमित बार त्रिपुरारी ॥
भुज बिक्रम जानहिं दिगपाला । सठ अजहूँ जिन्ह कें उर साला ॥
जानहिं दिग्गज उर कठिनाई । जब जब भिरउँ जाइ बरिआई ॥
जिन्ह के दसन कराल न फूटे । उर लागत मूलक इव टूटे ॥
जासु चलत डोलति इमि धरनी । चढ़त मत्त गज जिमि लघु तरनी
सांइ रावन जग बिदित प्रतापी । सुनेहि न श्रवन अलीक प्रलापी ॥

दो०—तेहि रावन कहँ लघु कहसि नर कर करसि बखान ।

रे कपि बर्बर खर्ब खल अब जाना तव ग्यान ॥ २५ ॥

सुनि अंगद सकोप कह बानी । बोल्लु सँभारि अधम अभिमानी ॥
सहसबाहु भुज गहन अपारा । दहन अनल सम जासु कुठारा ॥

जासु परसु सागर खर धारा । बूढ़े नृप अगनित बहु बारा ॥
 तासु गर्ब जेहि देखत भागा । सो नर बर्यो दससीस अभागा ॥
 राम मनुज कस रे सठ बंगा । धन्वो कासु नदी पुनि गंगा ॥
 पसु सुरधेनु कल्पतरु रूखा । अन्न दान अरु रस पीयूषा ॥
 बैनतेय खग अहि सहसानन । चितामनि पुनि उपल दसानन ॥
 सुनु मतिमंद लोक बैकुंठा । लाभ किरघुपति भगति अकुंठा ॥

दो०—सेन सहित तव मान मथि बन उजारि पुर जारि ।

कस रे सठ हनुमान कपि गयउ जो तव सुत मारि ॥ २६ ॥

सुनु रावन परिहरि चतुराई । भजसि न कृपासिंधु रघुराई ॥
 जौं खल भएसि राम कर द्रोही । ब्रह्म रुद्र सक राखि न तोही ॥
 मूढ़ बृथा जनि मारसि गाला । राम बयर अस होइहि हाला ॥
 तव सिर निकर कपिन्ह के आगें । परिहहि धरनि राम सर लागें ॥
 ते तव सिर कंदुक सम नाना । खेलिहहि भालु कीस चौगाना ॥
 जबहि समर कोपिहि रघुनायक । छुटिहहि अति कराल बहु साथक ॥
 तब कि चलिहि अस गाल तुम्हारा । अस बिचारि भजुराम उदारा ॥
 सुनत चचन रावन परजरा । जरत महानल जनु घृत परा ॥

दो०—कुंभकरन अस बंधु मम सुत प्रसिद्ध सकारि ।

मोर पराक्रम नहि सुनेहि जितेउ चराचर झारि ॥ २७ ॥

सठ साखामृग जोरि सहाई । बाँधा सिंधु इहइ प्रभुताई ॥
 नाषहि खग अनेक बारीसा । सर न होहि ते सुनु सब कीसा ॥
 मम भुज सागर बल जल पूरा । जहँ बूढ़े बहु सुर नर सारा ॥
 बीस पयोधि अगाध अपारा । को अस बीर जो पाइहि पारा ॥

दिगपालन्ह मैं नीर भरावा । भूप सुजस खल मोहि सुनावा ॥
जौं पै समर सुभट तव नाथा । पुनि पुनि कहसि जासु गुन गाथा ॥
तौ बसीठ पठवत केहि काजा । रिपु सन प्रीति करत नहिं लाजा ॥
हरगिरि मथन निरखु मम बाहू । पुनि सठ कपि निज प्रभुहि सराहू ॥

दो०—सूर कवन रावन सरिस स्वकर काटि जेहिं सीस ।

हुने अनल अति हरप बहु बार साखि गौरीस ॥ २८ ॥

जरत बिलोकेउँ जबहिं कपाला । बिधि के लिखे अंक निज भाला ॥
नर कें कर आपन बध बाँची । हँसेउँ जानि बिधि गिरा असाँची ॥
सोउ मन समुझि त्रास नहिं मोरें । लिखा बिरंचि जरठ मति भोरें ॥
आन बीर बल सठ मम आगें । पुनि पुनि कहसि लाज पति त्यागें ॥
कह अंगद सलज्ज जग माहीं । रावन तोहि समान कोउ नाहीं ॥
लाजवंत तव सहज सुभाऊ । निज मुख निज गुन कहसि न काऊ
सिरु अरु सैल कथा चित रही । ताते बार बीस तैं कही ॥
सो भुजबल राखेउ उर घाली । जीतेहु सहसबाहु बलि बाली ॥
सुनु मतिमंद देहि अब पूरा । काटें सीस कि होइअ सरा ॥
इंद्रजालि कहूँ कहिअ न बीरा । काटइ निज कर सकल सरीरा ॥

दो०—जरहिं पतंग मोह बस भार बहहिं खर बृंद ।

ते नहिं सूर कहावहिं समुझि देखु मतिमंद ॥ २९ ॥

अब जनि बतबढ़ाव खल करही । सुनु मम बचन मान परिहरही ॥
दसमुख मैं न बसीठीं आयउँ । अस बिचारि रघुबीर पठायउँ ॥
बार बार अस कहइ कृपाला । नहिं गुजारि जसु बधैं सुकाला ॥
मन महुँ समुझि बचन प्रभु केरे । सहेउँ कठोर बचन सठ तेरे ॥

नाहिं त करि मुख मंजन तोरा । लै जातेउँ सीतहि बरजोरा ॥
 जानेउँ तव बल अधम सुरारी । स्रनै हरि आनिहि परनारी ॥
 तैं निसिचर पति गर्व बहूता । मै रघुपति सेवक कर दूता ॥
 जौं न राम अपमानहि डरउँ । तोहि देखत अस कौतुक करउँ ॥

दो०—तोहि पटक महि सेन हति चौपट करि तव गाउँ ।

तव जुबतिन्ह समेत सठ जनकसुतहि लै जाउँ ॥ ३० ॥

जौं अस करौं तदपि न बड़ाई । मुएहि बधे नहिं कलु मनुसाई ॥
 कौल कामबस कृपिन बिमूढ़ा । अति दरिद्र अजसी अति बूढ़ा ॥
 सदा रोगवस संतत क्रोधी । बिष्णु बिमुख श्रुति संत बिरोधी
 तनु पोषक निंदक अध खानी । जीवत सब सम चौदह प्रानी ॥
 अस बिचारि खल बधे न तोही । अब जनि रिस उपजावसि मोही
 सुनि सकोप कह निसिचर नाथा । अधर दसन दसि मीजत हाथा ॥
 रे कपि अधम मरन अब चहसी । छोटे बदन बात बड़ि कहसी ॥
 कटु जल्पमि जड़ कपि बल जाकैं । बल प्रताप बुधि तेज न ताकैं ॥

दो०—अगुन अमान जानि तेहि दीन्ह पिता बनबास ।

सौ दुख अरु जुबती बिरह पुनि निसि दिन मम त्रास ॥ ३१ (क) ॥

जिन्ह के बल कर गर्व तोहि अइसे मनुज अनेक ।

खाहिं निसाचर दिवस निसि मूढ़ समुझु तजि टेक ॥ ३१ (ख) ॥

जब तेहिं कीन्हि राम कै निंदा । क्रोधवत अति भयउ कपिंदा ॥
 हरिहर निंदा सुनइ जो काना । होइ पाप गोघात समाना ॥
 कटकटात कपिकुंजर भारी । दुहु भुजदंड तमकि महि मारी ॥
 डोलत धरनि सभासद खसे । चले भाजि भय मारुत ग्रसे ॥

गिरत सँभारि उठा दसकंधर । भूतल परे मुकुट अति सुंदर ॥
कछु तेहिँ लै निज सिरन्हि सँवारे । कछु अंगद प्रभु पास पवारे ॥
आवत मुकुट देखि कपि भागे । दिनहीं लूक परन बिधि लागे ॥
की रावन करि कोप चलाए । कुलिस चारि आवत अति धाए ॥
कह प्रभु हँसि जनि हृदयँ डेराहू । लूक न असनि केतु नहिँ राहू ॥
ए किरीट दसकंधर केरे । आवत बालितनय के प्रेरे ॥

दो०—तरकि पवनसुत कर गहे आनि धरे प्रभु पास ।

कौतुक देखहि भालु कपि दिनकर सरिस प्रकास ॥३२(क)॥

उहाँ सकोपि दसानन सब सन कहत रिसाइ ।

धरहु कपिहि धरि मारहु सुनि अंगद मुसुकाइ ॥३२(ख)॥

एहि बधि बेगि सुभट सब धावहु । खाहु भालु कपि जहँ जहँ पावहु ॥
मर्कटहीन करहु महि जाई । जिअत धरहु तापस द्रौ भाई ॥
पुनि सकोप बोलेउ जुवराजा । गाल बजावत तोहि न लाजा ॥
मरु गर काटि निलज कुलघाती । बल बिलोकि बिहरति नहिँ छाती
रे त्रिय चोर कुमारग गामी । खल मल रासि मंदमति कामी ॥
सन्यपात जल्पसि दुर्बादा । भएसि कालबस खल मनुजादा ॥
याको फलु पावहिगो आगें । बानर भालु चपेटन्हि लागें ॥
राघु मनुज बोलत असि बानी । गिरहिँ न तवरसना अभिमानी ॥
गिरिहहिँ रसना संसय नाहीं । सिरन्हि समेत समर महि माहीं ॥

सो०—सो नर क्यों दसकंध बालि बध्यो जेहिँ एक सर ।

बीसहुँ लोचन अंध धिग तव जन्म कुजाति जड़ ॥३३(क)॥

तव सोनित कीं प्यास तृषित राम सायक निकर ।

तजउँ तोहि तेहि त्रास कटु जल्पक निसिचर अधम ॥३३(ख)॥

मैं तब दसन तोरिबे लायक । आयसु मोहि न दीन्ह रघुनायक ॥
 असिरिस होति दसउ मुख तोरौं । लंका गहि समुद्र महँबोरौं ॥
 गूलरि फल समान तव लंका । बसहु मध्य तुम्ह जंतु असंका ॥
 मैं बानर फल खात न बारा । आयसु दीन्ह न राम उदारा ॥
 जुगुति सुनत रावन मुसुकाई । मूढ़ सिखिहि कहँ बहुत झुठाई ॥
 बालि न कबहुँ गाल अस मारा । मिलि तपसिन्ह तैं भएसि लबारा
 साँचेहुँ मैं लबार भुज बीहा । जौ न उपारिउँ तव दस जीहा ॥
 समुझि राम प्रताप कपि कोपा । सभा माझ पन करि पद रोपा ॥
 जौं मम चरन सकसि सठटारी । फिरहिं रामु सीता मैं हारी ॥
 सुनहु सुभट सब कह दससीसा । पद गहि धरनि पछारहु कीसा ॥
 इंद्रजीत आदिक बलवाना । हरषि उठे जहँ तहँ भट नाना ॥
 झपटहिं करि बल बिपुल उपाई । पद न टरइ बैठहिं सिरु नाई ॥
 पुनि उठि झपटहिं सुर आराती । टरइन कीस चरन एहि भाँती ॥
 पुरुष कुजोग्गी जिमि उरगारी । मोह बिटप नहिं सकहिं उपारी ॥

दो०—कोटिन्ह मेघनाद सम सुभट उठे हरषाइ ।

झपटहिं टरै न कपि चरन पुनि बैठहिं सिर नाइ ॥३४(क)॥

भूमि न छाँड़त कपि चरन देखत रिपु मद भाग ।

कोटि बिघ्न ते संत कर मन जिमि नीति न त्याग ॥३४(ख)॥

कपि बल देखि मकल हियँ हारे । उठा आपु कपि कें परचारे ॥
 गहत चरन कह बालिकुमारा । मम पद गहँ न तोर उबारा ॥

गहसि न राम चरन सठ जाई । सुनत फिग मन अति सकुचाई ॥
 भयउ तेजहत श्री सब गई । मध्य दिवस जिमिससि सोहई ॥
 सिंघासन बैठेउ सिर नाई । मानहुँ संपति सकल गँवाई ॥
 जगदातमा प्रानपति रामा । तासु बिमुख किमिलह विश्रामा ॥
 उमा रामकी भृकुटि बिलासा । होइ बिस्व पुनि पावइ नासा ॥
 तन ते कुलिस कुलिस तन करई । तासु दूत पन कहु किमि टरई ॥
 पुनि कपि कही नीति विधि नाना । मान न ताहि कालु निअराना ॥
 रिपु मद मथि प्रभु सुजसु सुनायो । यह कहि चलयो बालि नृप जायो
 हतौं न खेत खेलाइ खेलाई । नोहि अबहिं का करौं बड़ाई ॥
 प्रथमहिं तासु तनय कपि मारा । सो सुनि रावन भयउ दुखारा ॥
 जातुभान अंगद पन देखी । भय व्याकुल सब भए बिसेयी ॥

दो०—रिपु बल धरषि हरषि कपि बालि तनय बल पुंज ।

पुलक सरीर नयन जल गहे राम पद कंज ॥३५(क)॥

साँझ जानि दसकंधर भवन गयउ बिलखाइ ।

मंदोदरी रावनहि बहुरि कहा समुझाइ ॥३५(ख)॥

कंत समुझि मन तजहु कुमतिही । सोह न समर तुम्हहि रघुपतिही ॥
 रामानुज लघु रेख खचाई । सोउ नहिं नाघेहु असि मनुसाई ॥
 पिय तुम्ह ताहि जितव संग्रामा । जाके दूत केर यह कामा ॥
 कौतुक सिंधु नाधि तव लंका । आयउ कपि केहरी असंका ॥
 रखवारे हति बिपिन उजारा । देखत तोहि अच्छ तेहिं मारा ॥
 जारि सकल पुर कोन्हेसि छारा । कहाँ रहा बल गर्ब तुम्हारा ॥
 अब पति मृषा गाल जनि मारहु । मोर कहाँ छु हृदयँ बिचारहु ॥

पति रघुपतिहि नृपति जनि मानहु । अग जग नाथ अतुल बल जानहु
 बान प्रताप जान मारीचा । तासु कहा नहि मानेहि नीचा ॥
 जनक सभाँ अगनित भूपाला । रहे तुम्हउ बल अतुल बिसाला ॥
 मंजि धनुष जानकी बिआही । तब संग्राम जितेहु किन ताही ॥
 सुरपति सुत जानइ बल थोरा । राखा जिअत आँखि गहि फोरा ॥
 सूपनखा कै गति तुम्ह देखी । तदपि हृदयँ नहि लाज बिसेषी ॥

दो०—बधि विराध खर दूषनहि लीलाँ हत्यो कबंध ।

बालि एक सर मारयो तेहि जानहु दसकंध ॥ ३६ ॥

जेहि जलनाथ बँधायउ हेला । उतरे प्रभु दल सहित सुबेला ॥
 कारुणीक दिनकर कुल केतू । दूत पठायउ तव हित हेतू ॥
 सभा माझ जेहि तव बल मथा । करि बरूथ महुँ मृगपति जथा ॥
 अंगद हनुमत अनुचर जाके । रन बाँकुरे बीर अति बाँके ॥
 तेहि कहँ पिय पुनि पुनि नर कहहू । मुधा मान ममता मद बहहू ॥
 अहह कंत कृत राम बिरोधा । काल बिबस मन उपजन बोधा ॥
 काल दंड गहि काहु न मारा । हरइ धर्म बल बुद्धि बिचारा ॥
 निकट काल जेहि आवत साई । तेहि भ्रम होइ तुम्हारिहि नाई ॥

दो०—दुइ सुत मरे दहेउ पुर अजहुँ पूर पिय देहु ।

कृपासिंधु रघुनाथ भजि नाथ विमल जसु लेहु ॥ ३७ ॥

नारि बचन सुनि बिसिख समाना । सभाँ गयउ उठि होत बिहाना ॥
 बैठ जाइ सिंघासन फूली । अति अभिमान त्रास सब भूली ॥
 इहाँ राम अंगदहि बोलावा । आइ चरन पंकज सिरु नावा ॥
 अति आदर समीप बैठारी । बोले बिहसि कृपाल खरारी ॥

बालि तनय कौतुक अति मोही । तात सत्य कहूँ पूछउँ तोही ॥
 रावनु जातुधान कुल टीका । भुज बल अतुल जासु जग लीका ॥
 तासु मुकुट तुम्ह चारि चलाए । कहहु तात कवनी बिधि पाए ॥
 सुनु सर्वग्य प्रनत सुखकारी । मुकुट न होहिं भूप गुन चारी ॥
 साम दान अरु दंड बिभेदा । नृप उर बसहिं नाथ कह बेदा ॥
 नीति धर्म के चरन सुहाए । अस जियँ जानि नाथ पहिं आए ॥

दो०—धर्महीन प्रभु पद बिमुख काल बिबस दससीस ।

तेहि परिहरि गुन आए सुनहु कोसलाधीस ॥३८(क)॥

परम चतुरता श्रवन सुनि बिहँसे रामु उदार ।

समाचार पुनि सब कहे गढ़ के बालिकुमार ॥३८(ख)॥

रिपु के समाचार जब पाए । राम सचिव सब निकट बोलाए ॥
 लंका बाँके चारि दुआरा । केहि बिधि लागिअ करहु बिचारा ॥
 तब कपीस रिच्छेस बिभीषन । सुमिरि हृदयँ दिनकर कुल भूषन ॥
 करि बिचार तिन्ह मंत्र दढ़ावा । चारि अनी कपि कटकु बनावा ॥
 जथाजोग सेनापति कीन्हे । जूथप सकल बोलि तब लीन्हे ॥
 प्रभु प्रताप कहि सब समुझाए । सुनि कपि सिंघनाद करि धाए ॥
 हरषित राम चरन सिर नावहिं । गहि गिरि सिखर बीर सब धावहिं
 गर्जहिं तर्जहिं भालु कपीसा । जय रघुबीर कोसलाधीसा ॥
 जानत परम दुर्ग अति लंका । प्रभु प्रताप कपि चले असंका ॥
 घटाटोप करि चहुँ दिसि घेरी । मुखहिं निसान बजावहिं भेरी ॥

दो०—जयति राम जय लछिमन जय कपीस सुग्रीव ।

गर्जहिं सिंघनाद कपि भालु महा बल सीव ॥ ३९ ॥

लंका भयउ कोलाहल भारी । सुना दसानन अति अहँकारी ॥
 देखहु बनरन्ह केरि ढिठाई । बिहँसि निसाचर सेन बोलाई ॥
 आए कीस काल के प्रेरे । छुधावंत सब निसिचर मेरे ॥
 अस कहि अट्टहास सठ कीन्हा । गृह बैठे अहार बिधि दीन्हा ॥
 सुभट सकल चारिहुँ दिसि जाहू । धरि धरि भालु कीस सब खाहू ॥
 उमा रावनहि अस अभिमाना । जिमि टिट्ठिभ खग सूत उताना ॥
 चले निसाचर आयसु मागी । गहि करि भिडिपाल बर साँगी ॥
 तोमर मुद्गर परसु प्रचंडा । खल कृपान परिष गिरिखंडा ॥
 जिमि अरुनोपल निकर निहारी । धावहिं सठ खग मांस अहारी ॥
 चोंच मंग दुख तिन्हहि न सझा । तिमि धाए मनुजाद अबूझा ॥

दो०—नानायुध सर चाप धर जातुधान बल वीर ।

कोट कँगूरन्हि चढ़ि गए कोटि कोटि रनधीर ॥ ४० ॥

कोट कँगूरन्हि सोहहिं कैसे । मेरु के सुंगनि जनु घन बैसे ॥
 बाजहिं ढोल निसान जुझाऊ । सुनि धुनि होइ भटन्हि मन चाऊ ॥
 बाजहिं भेरि नफीरि अपारा । सुनि कादर उर जाहिं दरारा ॥
 देखिन्ह जाइकपिन्ह केठट्टा । अति बिसाल तनु भालु सुभट्टा ॥
 धावहिं गनहिं न अवघट घाटा । पर्वत फोरि करहिं गहि बाटा ॥
 कटकटाहिं कोटिन्ह भट गर्जहिं । दसन ओठ काटहिं अति तर्जहिं ॥
 उत रावन इत राम दोहाई । जयति जयति जय परी लराई ॥
 निसिचर सिखर समूह ढहावहिं । कूदि धरहिं कपि फेरि चलावहिं ॥

छं०—धरि कुधर खंड प्रचंड मरकट भालु गद पर डारहीं ।

झपटहिं चरन गहि पटक महि भजि चलत बहुरि पचारहीं ॥

अति तरल तरुन प्रताप तरपहिं तमकि गढ़ चढ़ि चढ़ि गए ।

कपि भालु चढ़ि मंदिरन्ह जहँ तहँ राम जसु गावत भए ॥

दो०—एकु एकु निसिचर गहि पुनि कपि चले पराइ ।

ऊपर आपु हेठ भट गिरहिं धरनि पर आइ ॥ ४१ ॥

राम प्रताप प्रबल कपिजूथा । मर्दहिं निसिचर सुभट बरूथा ॥

चढ़े दुर्ग पुनि जहँ तहँ बानर । जय रघुबीर प्रताप दिवाकर ॥

चले निसाचर निकर पराई । प्रबल पवन जिमि घन समुदाई ॥

हाहाकार भयउ पुर भारी । रोवहिं बालक आतुर नारी ॥

सब मिलि देहिं रावनहि गारी । राज करत एहिं मृत्यु हँकारी ॥

निज दल बिचल सुनी तेहिं काना । फेरि सुभट लंकेस रिसाना ॥

जो रन बिमुख सुना मैं काना । सो मैं हतब कराल कृपाना ॥

सर्वसु खाइ भोग करि नाना । समर भूमि भए बल्लभ प्राना ॥

उग्र बचन सुनि सकल डेराने । चले क्रोध करि सुभट लजाने ॥

सन्मुख मरन बीर कै सोभा । तब तिन्ह तजा प्रान कर लोभा ॥

दो०—बहु आयुध धर सुभट सब भिरहिं पचारि पचारि ।

व्याकुल किए भालु कपि परिघ त्रिसूलन्ह मारि ॥ ४२ ॥

भय आतुर कपि भागन लागे । जद्यपि उमा जीतिहहिं आगे ॥

कोउ कह कहँ अंगद हनुमंता । कहँ नल नील दुबिद बलवंता ॥

निज दल बिकल सुना हनुमाना । पच्छिम द्वार रहा बलवाना ॥

मेघनाद तहँ करइ लराई । टूट न द्वार परम कठिनाई ॥

पवन तनय मन भा अति क्रोधा । गर्जेउ प्रबल काल सम जोधा ॥

कूदि लंक गढ़ ऊपर आवा । गहि गिरि मेघनाद कहँ धावा ॥

भंजेउ रथ सारथी निपाता । ताहि हृदय महुँ मारेसि लाता ॥
दुसरेँ सूत बिकल तेहि जाना । स्यंदन घालि तुरत गृह आना ॥

दो०—अंगद सुना पवनसुत गढ़ पर गयउ अकेल ।

रन बाँकुरा बालिसुत तरकि चढ़ेउ कपि खेल ॥ ४३ ॥

जुद्ध विरुद्ध क्रुद्ध द्रौ बंदर । राम प्रताप सुमिरि उर अंतर ॥
रावन भवन चढ़े द्रौ भाई । करहि कोसलाधीस दोहाई ॥
कलस सहित गहि भवनु ढहावा । देखि निसाचरपति भय पावा ॥
नारि बृंद कर पीठहिं छाती । अब दुई कपि आए उतपाती ॥
कपिलोला करि तिन्हहि डेरावहिं । रामचंद्र कर सुजसु सुनावहिं ॥
पुनि कर गहि कंचन के खंभा । कहेन्हि कगि अ उतपात अरंभा ॥
गर्जि परे रिपु कटक मझारी । लागे मदैँ भुज बल भारी ॥
काहुहि लात चपेटन्हि केहू । भजहु न रामहि सो फल लेहू ॥

दो०—एक एक सों मर्दहिं तोरि चलावहिं मुंड ।

रावन आगे परहिं ते जनु फूटहिं दधि कुंड ॥ ४४ ॥

महा महा मुखिआ जे पावहिं । ते पद गहि प्रभु पास चलावहिं ॥
कहइ बिभीषनु तिन्ह के नामा । देहिं राम तिन्हहु निज धामा ॥
खल मनुजाद द्विजामिष भोगी । पावहिं गति जो जाचत जोगी ॥
उमा राम मृदुचित करुनाकर । बयर भाव सुमिरत मोहि निसिचर
देहिं परम गति सो जियँ जानी । अस कृपाल को कहहु भवानी ॥
अस प्रभु सुनि न भजहिं भ्रम त्यागी । नर मतिमंद ते परम अभागी
अंगद अरु हनुमंत प्रवेसा । कीन्ह दुर्ग अस कह अवघेसा ॥
लंकाँ द्रौ कपि सोहहिं कैसैं । मथहिं सिंधु दुइ मंदर जैसैं ॥

दो०—भुज बल रिपु दल दलमलि देखि दिवस कर अंत ।

कूदे जुगल बिगत भ्रम आए जहँ भगवंत ॥ ४५ ॥

प्रभुपद कमल सीस तिन्ह नाए । देखि सुभट रघुपति मन भाए ॥
राम कृपा करि जुगल निहारे । भए बिगतभ्रम परम सुखारे ॥
गए जानि अंगद हनुमाना । फिरे भालु मर्कट भट नाना ॥
जातुधान प्रदोष बल पाई । धाए करि दससीस दोहाई ॥
निसिचर अनी देखि कपि फिरे । जहँ तहँ कटकटाइ भट भिरे ॥
द्वौ दल प्रबल पचारि पचारी । लरत सुभट नहिँ मानहिँ हारी ॥
महाबीर निसिचर सब कारे । नाना बरन बलीमुख भारे ॥
सबल जुगल दल सम बल जोधा । कौतुक करत लरत करि क्रोधा ॥
प्राबिट सरद पयोद घनेरे । लरत मनहुँ मारुत के प्रेरे ॥
अनिप अकंपन अरु अतिकाया । बिचलत सेन कीन्हि इन्ह माया ॥
भयउ निमिष महँ अति अँधि आरा । वृष्टि होइ रुधिरोपल छारा ॥

दो०—देखि निबिड़ तम दसहुँ दिसि कपिदल भयउ खभार ।

एकहि एक न देखई जहँ तहँ कराहें पुकार ॥ ४६ ॥

सकल मरमु रघुनायक जाना । लिए बोलि अंगद हनुमाना ॥
समाचार सब कहि समुझाए । सुनत कोपि कपिकुंजर धाए ॥
पुनि कृपाल हँसि चाप चढ़ावा । पावक सायक सपदि चलावा ॥
भयउ प्रकास कतहुँ तम नाही । ग्यान उदयँ जिमि संसय जाहीं ॥
भालु बलीमुख पाइ प्रकासा । धाए हरष बिगत भ्रम त्रासा ॥
हनूमान अंगद रन गाजे । हाँक सुन्नत रजनीचर भाजे ॥
भागत भट पटकहिँ धरि धरनी । करहिँ भालु कपि अद्भुत करनी ॥

गहि पद डारहिं सागर माहीं । मकर उरग झष धरि धरिखाहीं॥

दो०—कछु मारे कछु घायल कछु गद चढ़े पराइ ।

गर्जहिं भालु बलीमुख रिपु दल बल बिचलाइ ॥ ४७ ॥

निसा जानि कपि चारिउ अनी । आए जहाँ कोसला धनी ॥
 राम कृपा करि चितवा सबही । भए बिगतश्रम बानर तबही ॥
 उहाँ दसानन सचिव हँकारे । सब सन कहेसि सुभट जे मारे ॥
 आधा कटकु कपिन्ह संधारा । कहहु बेगि का करिअ बिचारा॥
 माल्यवंत अति जरठ निसाचर । रावन मातु पिता मंत्री बर ॥
 बोला बचन नीति अति पावन । सुनहु तात कछु मोर सिखावन॥
 जब ते तुम्ह सीता हरि आनी । असगुन होहिं न जाहिं बखानी॥
 बेद पुरान जासु जसु गायो । राम बिमुख काहुँ न सुख पायो॥

दो०—हिरन्याच्छ भ्राता सहित मधु कैटभ बलवान ।

जेहिं मारे सोइ अवतरेउ कृपासिंधु भगवान ॥ ४८(क)॥

मासपारायण, पच्चीसवाँ विश्राम

कालरूप खल बन दहन गुनागार घनबोध ।

सिव बिरंचि जेहि सेवहिं तासों कवन बिरोध ॥ ४८(ख)॥

परिहरि बयरु देहु बैदेही । भजहु कृपानिधि परम सनेही ॥
 ताके बचन बान सम लागे । करिआ मुह करि जाहि अभागे ॥
 बूढ़ भएसि न त मरतेउँ तोही । अब जनि नयन देखावसि मोही॥
 तेहिं अपने मन अस अनुमाना । बध्यो चहत एहि कृपानिधाना॥
 सो उठि गयउ कहत दुर्बादा । तब सकोप बोलेउ घननादा ॥

कौतुक प्रात देखिअहु मोरा । करिहुँ बहुत कहौं का थोरा ॥
 सुनि सुत वचन भरोसा आवा । प्रीति समेत अंक बैठावा ॥
 करत विचार भयउ भिनुसारा । लागे कपि पुनि चहँ दुआरा ॥
 कोपि कपिन्ह दुर्घट गदु घेरा । नगर कोलाहलु भयउ घनेरा ॥
 विविधायुध धर निसिचर धाए । गढ़ ते पर्वत सिखर ढहाए ॥

छं०—ढाहे महीधर सिखर कोटिन्ह विविध विधि गोला चले ।

घहरात जिमि पविपात गर्जत जनु प्रलय के बादले ॥

मर्कट बिकट भट जुटत कटत नलटत तन जर्जर भए ।

गहि सैल तेहि गढ़ पर चलावहि जहँ सो तहँ निसिचर हए ॥

दो०—मेघनाद सुनि श्रवन अस गदु पुनि छेका आइ ।

उतरयो वीर दुर्ग ते सन्मुख चलयो बजाइ ॥४९॥

कहँ कोसलाधीस द्रौ आता । धन्वी सकल लोक बिख्याता ॥
 कहँ नल नीलदुबिद सुग्रीवा । अंगद हनूमंत बल सीवा ॥
 कहाँ बिभीषनु आता द्रोही । आजु सबहि हठि मारउँ ओही ॥
 अस कहि कठिन बान संधाने । अतिसय क्रोध श्रवन लगि ताने ॥
 सर समूह सो छाड़ै लागा । जनु सपच्छ धावहि बहु नागा ॥
 जाँ तहँ परत देखिअहि बानर । सन्मुख होइ न सके तेहि अवसरा ॥
 जहँ तहँ भागि चले कपि रीछा । बिसरी सबहि जुद्ध कै ईछा ॥
 सो कपि भालु न रन महँ देखा । कीन्हेसि जेहि न प्रान अवसेषा ॥

दो०—दस दस सर सब मारेसि परे भूमि कपि वीर ।

सिंहनाद करि गर्जा मेघनाद बल धीर ॥ ५० ॥

देखि पवनसुत कटक बिहाला । क्रोधवत जनु धायउ काला ॥

महासैल एक तुरत उपारा । अति रिस मेघनाद पर डारा ॥
 आवत देखि गयउ नभ सोई । रथ सारथी तुरग सब खोई ॥
 बार बार पचार हनुमाना । निकट न आव मरमु सो जाना ॥
 रघुपति निकट गयउ घननादा । नाना भाँति करेसि दुर्बादा ॥
 अस्त्र सस्त्र आयुध सब डारे । कौतुकहीं प्रभु काटि निवारे ॥
 देखि प्रताप मूढ़ खिसिआना । करै लाग माया बिधि नाना ॥
 जिमि कोउ करै गरुड़ सैं खेला । डरपावै गहि स्वल्प सपेला ॥

दो०—जासु प्रबल माया बस सिव बिरंचि बड़ छोट ।

ताहि दिखावड़ निसिचर निज माया मति खोट ॥ ५१ ॥

नभ चढ़ि बरष बिपुल अंगारा । महि ते प्रगट होहिं जलधारा ॥
 नाना भाँति पिसाच पिसाची । मारु काटु धुनि बोलहिं नाची ॥
 बिष्टा पूय रुधिर कच हाड़ा । बरषइ कबहुँ उपल बहु छाड़ा ॥
 बरषि धूरि कीन्हैसि अँधिआरा । सृज्ज न आपन हाथ पसारा ॥
 कपि अकुलाने माया देखें । सब कर मरन बना एहि लेखें ॥
 कौतुक देखि राम मुसुकाने । भए सभीत सकल कपि जाने ॥
 एक बान काटी सब माया । जिमि दिनकर हर तिमिर निकाया
 कृपादृष्टि कपि भालु बिलोके । भए प्रबल रन रहहिं न रोके ॥

दो०—आयसु मागि राम पहिं अंगदादि कपि साथ ।

लछिमन चले क्रुद्ध होइ बान सरासन हाथ ॥ ५२ ॥

छतज नयन उर बाहु बिसाला । हिमगिरि निभ तनु कछु एक लाला
 इहाँ दसानन सुभट पठाए । नाना अस्त्र सस्त्र गहि धाए ॥
 भूधर नख बिटपायुध धारी । धाए कपि जय राम पुकारी ॥

भिरे सकल जोरिहि सन जोरी । इत उत जयइच्छा नहिं थोरी ॥
मुठिकन्ह लातन्ह दातन्ह काटहिं । कपि जय सील मारि पुनि डाटहिं
मारु मारु धरु धरु धरु मारु । सीस तोरि गहि भुजा उपारु ॥
असि रव पूरि रही नव खंडा । धावहिं जहँ तहँ रुंड प्रचंडा ॥
देखहिं कौतुक नभ सुर वृंदा । कबहुँक बिसमय कबहुँ अनंदा ॥

दो०—रुधिर गाड़ भरि भरि जम्यो ऊपर धूरि उड़ाइ ।

जनु अँगार रासिन्ह पर मृतक धूम रह्यो छाड़ ॥ ५३ ॥

घायल बीर बिराजहिं कैसे । कुसुमित किंसुक के तरु जैसे ॥
लछिमन मेघनाद द्वौ जोधा । भिरहिं परसपर करि अति क्रोधा
एकहि एक सकइ नहिं जीती । निसिचर छल बल करइ अनीती ॥
क्रोधवंत तब भयउ अनंता । भंजेउ रथ सारथी तुरंता ॥
नाना विधि प्रहार कर सेषा । राच्छस भयउ प्रान अवसेषा ॥
रावन सुत निज मन अनुमाना । संकठ भयउ हरिहि मम प्राना ॥
बीरघातिनी छाड़िसि साँगी । तेज पुंज लछिमन उर लागी ॥
गुरुछा भई सक्ति के लागें । तब चलि गयउ निकट भय त्यागें

दो०—मेघनाद सम कोटि सत जोधा रहे उठाइ ।

जगदाधार सेष किमि उठै चले खिसिआइ ॥ ५४ ॥

सुनु गिरिजा क्रोधानल जासू । जारइ भुवन चारिदस आसू ॥
सक संग्राम जीति को ताही । सेवहिं सुर नर अग जग जाही ॥
यह कौतूहल जानइ सोई । जापर कृपा राम कै होई ॥
संघ्या भइ फिरि द्वौ बाहनी । लगे सँभारन निज निज अनी ॥
व्यापक ब्रह्म अजित भुवनेस्वर । लछिमन कहाँ बूझ करुनाकर ॥

तब लगि लै आयउ हनुमाना । अनुज देखि प्रभु अति दुख माना
जामवंत कह बैद सुषेना । लंकाँ रहइ को पठई लेना ॥
धरि लघु रूप गयउ हनुमंता । आनेउ भवन समेत तुरंता ॥

दो०—राम पदारबिंद सिर नायउ आइ सुषेन ।

कहा नाम गिरि औषधी जाहु पवनसुत लेन ॥ ५५ ॥

राम चरन सरसिज उर राखी । चला प्रभंजनसुत बल भाषी ॥
उहाँ दूत एक मरमु जनावा । रावन कालनेमि गृह आवा ॥
दसमुख कहा मरमु तेहिं सुना । पुनि पुनि कालनेमि सिरु धुना ॥
देखत तुम्हहि नगरु जेहिं जारा । तासु पंथ को रोकन पारा ॥
भजि रघुपति करुहित आपना । छाँड़हु नाथ मृषा जल्पना ॥
नील कंज तनु सुंदर स्यामा । हृदयँ राखु लोचनाभिरामा ॥
मैं तैं मोर मूढ़ना न्यागू । महा मोह निसि सतत जागू ॥
काल ब्याल कर भच्छक जोई । सपनेहुँ समर कि जीतिअ सोई ॥

दो०—सुनि दसकंठ रिसान अति तेहि मन कीन्ह बिचार ।

राम दूत कर मरौं बरु यह खल रत मल भार ॥ ५६ ॥

अस कहि चला रचिसि मग माया । मर मंदिर बर बाग बनाया ॥
मारुतसुत देखा सुभ आश्रम । मुनिहि बृक्षि जल पियौं जाइ श्रम
राच्छस कपट बेष तहँ सोहा । मायापति दूतहि चह मोहा ॥
जाइ पवनसुत नायउ माथा । लाग सो कहै राम गुन गाथा ॥
होष महा रन रावन रामहिं । जितिहहिं राम न संसय या महिं
इहाँ भएँ मैं देखउँ भाई । ग्यानदृष्टिबल मोहि अधिकार्ई ॥
मागा जल तेहिं दीन्ह कमंडल । कह कपि नहिं अघाउँ थोरें जल ॥

सर मज्जन करि आतुर आनहु । दिच्छा देउँ ग्यान जेहि पावहु ॥

दो०—सर पैठत कपि पद गहा मकरि तब अकुलान ।

मारी सो धरि दिव्य तनु चली गगन चदि जान ॥ ५७ ॥

कपि तव दरस भइउँ निष्पापा । मिटा तात मुनिवर कर सापा ॥
मुनि न होइ यह निसिचर घोरा । मानहु सत्य बचन कपि मोरा ॥
अस कहि गई अवछरा जबहीं । निसिचर निकट गयउ कपि तबहीं ॥
कह कपि मुनि गुरदछिना लेहू । पाछें हमहि मंत्र तुम्ह देहू ॥
सिर लंगूर लपेटि पछारा । निज तनु प्रगटेसि मरती बारा ॥
राम राम कहि छाड़ेसि प्राना । सुनि मन हरषि चलेउ हनुमाना ॥
देखा सैल न औषध चीन्हा । सहसा कपि उपारि गिरि लीन्हा ॥
गहि गिरि निसि न भधावन भयऊ । अवधपुरी ऊपर कपि गयऊ ॥

दो०—देखा भरत बिसाल अति निसिचर मन अनुमानि ।

बिनु फर सायक मारेउ चाप श्रवन लगि तानि ॥ ५८ ॥

परेउ मुरुछि महि लागत सायक । सुभिरत राम राम रघुनायक ॥
सुनि प्रिय बचन भरत तब धाए । कपि समीप अति आतुर आए ॥
बिकल बिलोकि कीस उर लावा । जागत नहिं बहु भाँति जगावा ॥
मुख मलीन मन भए दुखारी । कहत बचन भरि लोचन बारी ॥
जेहि विधि राम विमुख मोहिं कीन्हा । तेहिं पुनि यह दारुन दुख दीन्हा ॥
जौं मोरें मन बच अरु काया । प्रीति रामपद कमल अमाय ॥
तौ कपि होउ विगत श्रम सूला । जौं मो पर रघुपति अनुकूला ॥
सुनत बचन उठि बैठ कपीसा । कहि जय जयति कोसलाधीसा ॥

सो०—लीन्ह कपिहि उर लाइ पुलकित तनु लोचन सजल ।

प्रीति न हृदयँ समाइ सुमिरि राम रघुकुल तिलक ॥ ५९ ॥

तात कुसल कहू सुखनिधान की । सहित अनुज अरु मातु जानकी ॥
कपि सब चरित समास बखाने । भए दुखी मन महुँ पछिताने ॥
अहह दैव मैं कत जग जायउँ । प्रभु के एकहु काज न आयउँ ॥
जानि कुअवसरु मन धरि धीरा । पुनि कपि सन बोले बलबीरा ॥
तात गहरु होइहि तोहि जाता । काजु नमाइहि होत प्रभाता ॥
चहु मम सायक सैल समेता । पठवौं तोहि जहँ कृपानिकेता ॥
सुनि कपि मन उपजा अभिमाना । मोरें भार चलिहि किमि बाना ॥
राम प्रभाव बिचारि बहोरी । बंदि चरन कह कपि कर जोरी ॥

दो०—तव प्रताप उर राखि प्रभु जैहउँ नाथ तुरंत ।

अस कहि आयसु पाइ पद बंदि चलेउ हनुमंत ॥ ६० (क) ॥

भरत बाहु बल सील गुन प्रभु पद प्रीति अपार ।

मन महुँ जात सराहत पुनि पुनि पवनकुमार ॥ ६० (ख) ॥

उहाँ राम लछिमनहि निहारी । बोले बचन मनुज अनुसारी ॥
अर्धराति गई कपि नहिं आयउ । राम उठाइ अनुज उर लायउ ॥
सकहु न दुखित देखि मोहि काऊ । बंधु सदा तव मृदुल सुभाऊ ॥
मम हित लागि तजेहु पितु माता । सहेहु बिपिन हिम आतप बाता ॥
सो अनुराग कहाँ अब भाई । उठहु न सुनि मम बच बिकलाई ॥
जौं जनतेउँ बन बंधु बिछोहू । पिता बचन मनतेउँ नहिं ओहू ॥
सुत बित नारि भवन परिवारा । होहिं जाहिं जग बारहिं बारा ॥
अस बिचारि जियँ जागहु ताता । मिलइ न जगत सहोदर भ्राता ॥

जथा पंख बिनु खग अति दीना । मनि बिनु फनि करिवर कर हीना ॥
 अस मम जिवन बंधु बिनु तोही । जौं जड़ दैव जिआवै मोही ॥
 जैहउँ अवध कौन मुहु लाई । नारि हेतु प्रिय भाइ गँवाई ॥
 बरु अपजस सहनेउँ जग माहीं । नारि हानि विशेष छति नाहीं ॥
 अब अपलोकु सोकु सुत तोरा । सहिहि निठुर कठोर उर मोरा ॥
 निज जननी के एक कुमारा । तात तासु तुम्ह प्रान अधारा ॥
 सौपेसि मोहि तुम्हहि गहि पानी । सब विधि सुखद परम हित जानी ॥
 उतरु काह दैहउँ तेहि जाई । उठि किन मोहि सिखावहु भाई ॥
 बहु विधि सोचत सोच विमोचन । स्रवत सलिल राजिव दल लोचन ॥
 उमा एक अखंड रघुराई । नर गति भगत कृपाल देखाई ॥

सो०—प्रभु प्रलाप सुनि कान बिकल भए बानर निकर ।

आइ गयउ हनुमान जिमि करुना महँ वीर रस ॥ ६१ ॥

हरषि राम भेटेउ हनुमाना । अति कृतग्य प्रभु परम सुजाना ॥
 तुरत बैद तब कीन्हि उपाई । उठि बैठे लछिमन हरषाई ॥
 हृदयँ लाइ प्रभु भेटेउ आता । हरषे सकल भालु कपि ब्राता ॥
 कपि पुनि बैद तहाँ पहुँचावा । जेहि विधि तबहिं ताहिलइ आवा ॥
 यह वृत्तांत दसानन सुनेऊ । अति बिषाद पुनि पुनि सिरधुनेऊ ॥
 व्याकुल कुंभकरन पहिं आवा । विविध जतन करि ताहि जगावा ॥
 जागा निसिचर देखिअ कैसा । मानहुँ कालु देह धरि बैसा ॥
 कुंभकरन बूझा कहु भाई । काहे तब मुख रहे सुखाई ॥
 कथा कही सब तेहिं अभिमानी । जेहि प्रकार सोता हरि आनी ॥
 तात कपिन्ह सब निसिचर मारे । महा महा जोधा संघारे ॥

दुर्मुख सुररिपु मनुज अहारी । भट अतिकाय अकंपन भारी ॥
अपर महोदर आदिक बीरा । परे समर महि सब रनधीरा ॥

दो०—सुनि दसकंधर बचन तब कुंभकरन बिलखान ।

जगदंबा हरि आनि अब सठ चाहत कल्यान ॥ ६२ ॥

भल न कीन्ह तैं निसिचर नाहा । अब मोहि आइ जगाएहि काहा ॥
अजहूँ तात त्यागि अभिमाना । भजहु राम होइहि कल्याना ॥
हैं दससीस मनुज रघुनायक । जाके हनूमान से पायक ॥
अहह बंधु तैं कीन्हि खोटाई । प्रथमहि मोहि न सुनाएहि आई ॥
कीन्हेहु प्रभु बिरोध तेहि देवक । सिव बिरंचि सुर जाके सेवक ॥
नारद मुनि मोहि ग्यान जो कहा । कहतेउँ तोहि समय निरबहा ॥
अब भरि अंक भेंडु मोहि भाई । लोचन सुफल करौं मैं जाई ॥
स्याम गात सरसीरुह लोचन । देखौं जाइ ताप त्रय मोचन ॥

दो०—राम रूप गुन सुमिरत मगन भयउ छन एक ।

रावन मागेउ कोटि घट मद अरु महिष अनेक ॥ ६३ ॥

महिष खाइ करि मदिरा पाना । गर्जा बज्राघात समाना ॥
कुंभकरन दुर्मद रन रंगा । चला दुर्ग तजि सेननसंगा ॥
देखि बिभीषनु आगे आयउ । परेउ चरन निज नाम सुनायउ ॥
अनुज उठाइ हृदयँ तेहि लायो । रघुपति भक्त जानि मन भायो ॥
तात लात रावन मोहि मारा । कहत परम हित मंत्र बिचारा ॥
तेहि गलानि रघुपति पहिं आयउँ । देखि दीन प्रभु के मन भायउँ ॥
सुनु सुत भयउ कालबस रावन । सो कि मान अब परम सिखावन ॥
धन्य धन्य तैं धन्य बिभीषन । भयहु तात निसिचर कुल भूषन ॥

बंधु बंस तैं कीन्ह उजागर । भजेहु राम सोभा सुख सागर ॥

दो०—बचन कर्म मन कपट तजि भजेहु राम रनधीर ।

जाहु न निज पर सूझ मोहि भयउँ कालवस वीर ॥ ६४ ॥

बंधु बचन सुनि चला बिभीषन । आयउ जहँ त्रैलोक बिभूषन ॥
नाथ भूधराकार सरीरा । कुंभकरन आवत रनधीरा ॥
एतना कपिन्ह सुना जब काना । किलकिलाइ धाए बलवाना ॥
लिए उठाइ बिटप अरु भूधर । कटकटाइ डारहिं ता ऊपर ॥
कोटि कोटि गिरि सिखर प्रहारा । करहिं भालु कपि एक एक बारा ॥
सुरयो न मनु तनु टरयो न टारयो । जिमि गज अर्क फलनि को मारयो ॥
तब मारुत सुत मुठिका हन्यो । परयो धरनि व्याकुल सिर घुन्यो ॥
पुनि उठि तेहिं मारेउ हनुमंता । घुर्मित भूतल परेउ तुरंता ॥
पुनि नल नीलहि अवनि पछारेसि । जहँ तहँ पटक पटक भट डारेसि ॥
चली बलीमुख सेन पराई । अति भयत्रसित न कोउ समुहाई ॥

दो०—अंगदादि कपि मुरुछित करि समेत सुग्रीव ।

काँख दाबि कपिराज कहूँ चला अमित बल सीब ॥ ६५ ॥

उमा करत रघुपति नरलीला । खेलत गरुड़ जिमि अहिगन मीला
भृकुटि भंग जो कालहि खाई । ताहि कि सोहइ ऐसि लराई ॥
जग पावनि कीरति बिस्तरिहिहिं । गाइ गाइ भवनिधि नर तरिहिहिं
मुरुछा गइ मारुत सुत जागा । सुग्रीवहि तब खोजन लागा ॥
सुग्रीवहु कै मुरुछा बीती । निबुकि गयउ तेहि मृतक प्रतीती
काटेसि दसन नासिका काना । गरजि अकास चलेउ तेहिं जाना
गहेउ चरन गहि भूमि पछारा । अति लाषवँ उठि पुनि तेहि मारा ॥

पुनि आयउ प्रभु पहिँ बलवाना । जयति जयति जय कृपानिधाना॥
नाक कान काटे जियँ जानी । फिरा क्रोध करि भइ मन ग्लानी॥
सहज भीम पुनि बिनु श्रुति नासा । देखत कपि दल उपजी त्रासा॥

दो०—जय जय जय रघुवंस मनि धाए कपि दै हूह ।

एकहि बार तासु पर छाड़ेन्हि गिरि तरु जूह ॥ ६६ ॥

कुंभकरन रन रंग बिरुद्धा । सन्मुख चला काल जनु क्रुद्धा ॥
कोटि कोटि कपि धरि धरि खाई । जनु टीढ़ी गिरि गुहाँ समाई॥
कोटिन्ह गहि सरीर सन मर्दा । कोटिन्ह मीजि मिलव महि गर्दा॥
मुख नासा श्रवनन्हि कीं बाटा । निसरि पराहिँ भालु कपि ठाटा ॥
रन मद मत्त निसाचर दर्पा । बिस्व ग्रसिहि जनु एहि बिधि अपा
मुरे सुभट सब फिरहिँ न फेरे । स्रज न नयन सुनिहिँ नहिँ टेरे ॥
कुंभकरन कपि फौज बिडारी । सुनि धाई रजनीचर धारी ॥
देखी राम बिकल कटकाई । रिपु अनीक नाना बिधि आई ॥

दो०—सुनु सुग्रीव बिभीषन अनुज सँभारेहु सैन ।

मैं देखउँ खल बल दलहि बोले राजिवनैन ॥ ६७ ॥

कर सारंगै साजि कटि भाथा । अरि दल दलन चले रघुनाथा ॥
प्रथम कीन्हि प्रभु धनुष टँकोरा । रिपु दल बधिर भयउ सुनि सोरा॥
सत्यसंध छाँड़े सर लच्छा । कालसर्प जनु चले सपच्छा ॥
जहँ तहँ चले बिपुल नाराचा । लगे कटन भट बिकट पिसाचा॥
कटहिँ चरन उर सिर भुजदंडा । बहुतक बीर होहिँ सत खंडा ॥
घुमिँ घुमिँ बायल महि परहीं । उठि संभारि सुभट पुनि लरहीं ॥
लागंत जान जखद जिमि गाजहि । बहुतक देखि कठिन सर भाजहि ॥

रुंड प्रचंड मुंड बिनु धावहिं । धरु धरु मारु मारु धुनि गावहिं ॥

दो०—छन महुँ प्रभु के सायकन्हि काटे बिकट पिसाच ।

पुनि रघुबीर निषंग महुँ प्रविसे सब नाराच ॥ ६८ ॥

कुंभकरन मन दीख बिचारी । हति छन माझ निसाचर धारी ॥

भा अति क्रुद्ध महाबल बीरा । कियो मृगनायक नाद गँभीरा ॥

कोपि महीधर लेइ उपारी । डारइ जहँ मर्वट भट भारी ॥

आवत देखि सैल प्रभु भारे । सरन्हि काटि रज सम करि डारे ॥

पुनि धनु नानि कोपि रघुनायक । छाँड़े अति कराल बहु सायक ॥

तनु महुँ प्रविसे निसरि सर जाहीं । जिमि दामिनि घन माझ समाहीं ॥

सोनित स्रजन मोह तन कारे । जनु कज्जरु गिरि गेरु पनारे ॥

बिकल बिलांकि भालु कपि धाए । बिहँसा जबहिं निकट कपि आए

दो०—महानाद करि गर्जा कोटि कोटि गंहि कीस ।

महि पटकइ गजराज इव सपथ करइ दससीस ॥ ६९ ॥

भागे भालु बलीमुख जूथा । बृकु बिलोकि जिमि मेष बरूथा ॥

चले भागि कपि भालु भवानी । बिकल पुकारत आरत बानी ॥

यह निसिचर दुकाल सम अहई । कपिकुल देस परन अब चहई ॥

कृपा बारिधर राम खरारी । पाहि पाहि प्रनतारति हारी ॥

सकरुन बचन सुनत भगवाना । चले सुधारि सरासन बाना ॥

राम सेन निज पाछें घाली । चले सक्रोध महा बलसाली ॥

खैंचि धनुष सर सत संधाने । छूटे तीर सरीर समाने ॥

लागत सर धावा रिस भरा । कुधर डगमगत डोलति धरा ॥

लीन्ह एक तेहिं सैल उपाटी । रघुकुलतिलक भुजा सोइ काटी ॥

धावा बाम बाहु गिरि धारी । प्रभु सोउ भुजा काटि महि पारी॥
 काटें भुजा सोह खल कैसा । पच्छहीन मंदर गिरि जैसा ॥
 उग्र बिलोकनि प्रभुहि बिलोका । ग्रसन चहत मानहुँ त्रैलोका॥

दो०—करि चिकार घोर अति धावा बदन पसारि ।
 गगन सिद्ध सुर त्रासित हा हा हेति पुकारि ॥७०॥

सभय देव करुनानिधि जान्यो । श्रवन प्रजंत सरासनु तान्यो ॥
 बिसिख निकर निसिचर मुख भरेऊ । तदपि महाबल भूमि न परेऊ ॥
 सरन्हि भरा मुख सन्मुख धावा । काल त्रोन सजीव जनु आवा ॥
 तब प्रभु कोपि तीव्र सर लीन्हा । धर ते भिन्न तासु सिर कीन्हा ॥
 सो सिर परेउ दसानन आगें । बिकल भयउ जिमि फनि मनि त्यागें
 धरनि धसइ धर ध्राव प्रचंडा । तब प्रभु काटि कीन्ह दुइ खंडा ॥
 परे भूमि जिमि नभ तें भूधर । हेठ दाबि कपि भालु निसाचर ॥
 तासु तेज प्रभु बदन समाना । सुर मुनि सबहिं अचंभव माना ॥
 सुर दुंदुभीं बजावहिं हरषहिं । अस्तुति करहिं सुमन बहु वरषहिं ॥
 करि बिनुती सुर सकल सिधाए । तेही समय देवरिषि आए ॥
 गगनोपरि हरि गुन गन गाए । रुचिर बीररस प्रभु मन भाए ॥
 बेगि हतहु खल कहि मुनि गए । राम समर महि सोभत भए ॥

छं०—संग्राम भूमि विराज रघुपति अतुल बल कोसल धनी ।
 श्रम बिंदु मुख राजीव लोचन अरुन तन सोनिन कनी ॥
 भुज जुगल फेरत सर सरासन भालु कपि चहु दिसि बने ।
 कह दास तुलसी कहि न सक छवि सेष जेहि आनन घने ॥

दो०—निसिचर अधम मलाकर ताहि दीन्ह निज धाम ।

गिरिजा ते नर मंदमति जे न भजहिं श्रीराम ॥७१॥

दिन के अंत फिरीं द्वौ अनी । समर भई सुभटन्ह श्रम घनी ॥
राम कृपाँ कपि दल बल बाढ़ा । जिमि तन पाइ लाग अति डाढ़ा ॥
छीजहिं निसिचर दिनु अरु राती । निज मुख कहें सुकृत जेहि माँती ॥
बहु विलाप दसकंधर करई । बंधु सीस पुनि पुनि उर धरई ॥
रोवहिं नारि हृदय हति पानी । तासु तेज बल बिपुल बखानी ॥
मेघनाद तेहि अवसर आयउ । कहि बहु कथा पिता समुझायउ ॥
देखेहु कालि मोरि मनुसाई । अवहिं बहुत का करौं बड़ाई ॥
इष्टदेव सैं बल रथ पायउँ । सो बल तात न तोहि देखायउँ ॥
एहि विधि जल्पत भयउ बिहाना । चहुँ दुआर लागे कपि नाना ॥
इत कपि भालु काल सम बीरा । उत रजनीचर अति रनधीरा ॥
लरहिं सुभट निज निज जय हेतू । बरनि न जाइ समर खगकेतू ॥

दो०—मेघनाद मायामय रथ चढ़ि गयउ अकास ।

गजेंउ अट्टहास करि भइ कपि कटकहि त्रास ॥७२॥

सक्ति सूल तरवारि कृपाना । अस्र सस्र कुलिसायुध नाना ॥
डारइ परसु परिघ पाषाणा । लागेउ बृष्टि करै बहु बाना ॥
दस दिसि रहे वान नभ छाई । मानहुँ मघा मेघ झरि लाई ॥
धरु धरु मारु सुनि अधुनि काना । जो मारइ तेहि कोउ न जाना ॥
गहि गिरि तरु अकास कपि धावहिं । देखहिं तेहि न दुखित फिरि आबहिं ॥
अवघट घाट बाट गिरि कंदर । माया बल कीन्हेसि सर पंजर ॥
जाहिं कहाँ व्याकुल भए बंदर । सुरपति बंदि परे जनु मंदर ॥

मारुतसुत अंगद नल नीला । कीन्हेसि बिकल सकल बलसीला
 पुनिलछिमन सुग्रीव बिभीषन । सरन्हि मारि कीन्हेसि जर्जर तन
 पुनि रघुपति सैं जूझै लागा । सर छाँड़इ होइ लागहि नागा ॥
 ब्याल पाम बस भए खरारी । खबस अनंत एक अबिकारी ॥
 नटइव करट चरित कगनाना । सदा स्वतंत्र एक भगवाना ॥
 रन सोभा लागि प्रभुहि बंधायो । नागपास देवन्ह भय पायो ॥

दो०—गिरिजा जासु नाम जपि मुनि काटहिं भव पास ।

सो कि बंध तर आवइ व्यापक बिस्व निवास ॥ ७३ ॥

चरित राम के सगुन भवानी । तर्किन जाहिं बुद्धि बल बानी ॥
 अस बिचारि जे तग्य बिरागी । रामहि भजहिं तर्क सब त्यागी ॥
 व्याकुल कटकु कीन्ह घननादा । पुनि भा प्रगट कहइ दुर्बादा ॥
 जामवंत कह खल रहु ठाढ़ा । सुनि करि ताहि क्रोध अति बाढ़ा
 बूढ़ जानि सठ छाँड़ेउं तोही । लागेसि अभ्रम पचारै मोही ॥
 अस कहि तरल त्रिसूल चलायो । जामवंत कर गहि सोइ धायो ॥
 मारिमि मेघनाद कै छाती । परा भूमि छुर्मित सुरघाती ॥
 पुनिरिसान् गहि चरन फिरायो । महि पछारि निज बल देखरायो
 बर प्रसाद सो मरइ न मारा । तब गहि पद लंका पर डारा ॥
 इहाँ देवरिषि गरुड़ पठायो । राम समीप सपदि सो आयो ॥

दो०—खगपति सब धरि खाए माया नाग बरूथ ।

माया बिगत भए सब हरषे बानर जूथ ॥ ७४(क) ॥

गहि गिरि पादप उपल नख धाए कीस रिसाइ ।

चले तमीचर बिकलतर गढ़ पर चढ़े पराइ ॥ ७४(ख) ॥

मेघनाद कै मुरछा जागी । पितहि बिलोकि लाज अतिलागी
तुगत गयउ गिरिबर कंदरा । करौ अजय मख अस मन धरा ॥
इहाँ बिभीषन मंत्र बिचारा । सुनहु नाथ बल अतुल उदारा ॥
मेघनाद मख करइ अपावन । खल मायावी देव सतावन ॥
जौ प्रभु सिद्ध होइ सो पाइहि । नाथ बेगि पुनि जीति न जाइहि ॥
सुनिरघुपति अतिसय सुख माना । बोले अंगदादि कपि नाना ॥
लछिमन संग जाहु सब भाई । करहु विधंस जग्य कर जाई ॥
तुम्ह लछिमन मारेहु रन ओही । देखि सभय सुर दुख अति मोही ॥
मारेहु तेहि बल बुद्धि उपाई । जेहि छाँजै निसिचर सुनु भाई ॥
जामवंत सुग्रीव बिभीषन । सेन समेत रहेहु तीनिउ जन ॥
जब रघुबीर दीन्ह अनुसासन । कटि निषंग कसि साजि सरासन
प्रभु प्रताप उर धरि रन धीरा । बोले घन इव गिरा गँभीरा ॥
जौ तेहि आजु बधे बिनु आवौ । तौ रघुपति सेवक न कहावौ ॥
जौ सत संकर करहि सहाई । तदपि हतउ रघुबीर दोहाई ॥

दो०—रघुपति चरन नाइ सिरु चलेउ तुरंत अनंत ।

अंगद नील मयंद नल संग सुभट हनुमंत ॥ ७५ ॥

जाइ कपिन्ह सो देखा बैसा । आहुति देत रुधिर अरु मैसा ॥
कीन्ह कपिन्ह सब जग्य विधंसा । जब न उठइ तब करहि प्रसंसा ॥
तदपि न उठइ धरेन्हि कच जाई । लातन्हि हाति हति चले पराई ॥
लै त्रिदल धावा कपि भागे । आए जहँ रामानुज आगे ॥
आवा परम क्रोध कर मारा । गर्ज घोर ख बारहि बारा ॥
कोपि मरुतसुत अंगद धाए । हति त्रिदल उर धरनि गिराए ॥

प्रभु कहँ छाँड़ेसि खल प्रचंडा । सर हति कृत अनंत जुग खंडा ॥
 उठि बहोरि मारुति जुबराजा । हतहिं कोपि तेहि घाउ न बाजा ॥
 फिरे बीर रिपु मरइ न मारा । तब धावा करि घोर चिकारा ॥
 आवत देखि क्रुद्ध जनु काला । लछिमन छाड़े बिसिख कराला ॥
 देखेसि आवत पबि सम बाना । तुरत भयउ खल अंतरधाना ॥
 विविध बेष धरि करइ लराई । कबहुँक प्रगट कबहुँ दुरि जाई ॥
 देखि अजय रिपु डरपे कोसा । परम क्रुद्ध तब भयउ अहीसा ॥
 लछिमन मन अस मंत्र दढ़ावा । एहि पापिहि मै बहुत खेलावा ॥
 सुमिरि कोसलाधीस प्रतापा । सर संधान कीन्ह करि दापा ॥
 छाड़ा बान माझ उर लागा । मरती बार कपटु सब त्यागा ॥

दो०—रामानुज कहँ रामु कहँ अस कहि छाँड़ेसि प्रान ।

धन्य धन्य तब जननी कह अंगद हनुमान ॥ ७६ ॥

बिनु प्रयास हनुमान उठायो । लंका द्वार राखि पुनि आयो ॥
 तासु मरन सुनि सुर गंधर्वा । चढ़ि बिमान आए नभ सर्वा ॥
 बरषि सुमन दुंदुभी बजावहिं । श्रीरघुनाथ बिमल जसु गावहिं ॥
 जय अनंत जय जगदाधारा । तुम्ह प्रभु सब देवन्हि निस्तारा ॥
 अस्तुति करि सुर सिद्ध सिधाए । लछिमन कृपासिंधु पहिं आए ॥
 सुत बध सुना दसानन जबहीं । मुरुछित भयउ परेउ महि तबहीं ॥
 मंदोदरी रुदन कर भारी । उर ताड़न बहु भौंति पुकारी ॥
 नगर लोग सब व्याकुल सोचा । सकल कहहिं दसकंधर पोचा ॥

दो०—तब दसकंठ विविधि विधि समुझाई सब नारि ।

नस्वर रूप जगत सब देखहु हृदयँ बिचारि ॥ ७७ ॥

तिन्हहि ग्यान उपदेसा रावन । आपुन मंद कथा सुभ पावन ॥
 पर उपदेस कुसल बहुतेरे । जे आचरहि ते नर न घनेरे ॥
 निसा सिरानि भयउ भिनुसारा । लगे भालु कपि चारिहुँ द्वारा ॥
 सुभट बोलाइ दसानन बोला । रन सन्मुख जाकर मन डोला ॥
 सो अबहीं बरु जाउ पराई । संजुग बिमुख भएँ न भलाई ॥
 निज भुज बल मैं बयरु बढ़ावा । देहउँ उतरु जो रिपु चढ़ि आवा ॥
 अस कहि मरुत बेग रथ साजा । बाजे सकल जुझाऊ बाजा ॥
 चले बीर सब अतुलित बली । जनु कजल कै आँधी चली ॥
 असगुन अमित होहि तेहि काला । गनइ न भुजबल गर्व बिसाला ॥

छं०—अति गर्व गनइ न सगुन असगुन सबहि आयुध हाथ ते ।
 भट गिरत रथ ते बाजि गज चिकरत भाजहिँ साथ ते ॥
 गोमाय गीध कराल खर रव स्वान बोलहिँ अति घने ।
 जनु कालदूत उलूक बोलहिँ बचन परम भयावने ॥

दो०—ताहि कि संपति सगुन सुभ सपनेहुँ मन विश्राम ।
 भूत द्रोह रत मोहबस राम बिमुख रति काम ॥ ७८ ॥

चलेउ निसाचर कटकु अपारा । चतुरंगिनी अनी बहु धारा ॥
 बिबिधि भौंति बाहनरथ जाना । बिपुल बरन पताक ध्वज नाना ॥
 चले मत्त गज जूथ घनेरे । प्राबिट जलद मरुत जनु प्रेरे ॥
 बरन बरन बिरदैत निकाया । समर सूर जानहिँ बहु माया ॥
 अति बिचित्र बाहिनी बिराजी । बीर बसंत सेन जनु साझी ॥
 चलत कटक दिगसिंधुर डगहीं । छुभित पयोधि कुधर डगमगहीं ॥
 उठी रेनु रबि गयउ छपाई । मरुत थकित बसुधा अकुलाई ॥

पनव निसान घोर रव बाजहि । प्रलय समय के धन जनु गाजहि ॥
 मेरि नफीरि बाज सहनाई । मारू राग सुभट सुखदाई ॥
 केहरि नाद बीर सब करहीं । निज निज बल पौरुष उच्चरहीं ॥
 कहइ दसानन सुनहु सुभट्टा । मर्दहु भालु कपिन्ह के ठट्टा ॥
 हौं मागिहउँ भूप द्रौ भाई । अस कहि सन्मुख फौज रेंगाई ॥
 यह सुधि सकल कपिन्ह जब पाई । धाए करि रघुबीर दोहाई ॥

छं०—धाए बिसाल कराल मर्कट भालु काल समान ते ।
 मानहुँ सपच्छ उड़ाहिं भूधर बृंद नाना बान ते ॥
 नख दसन सैल महाद्रुमायुध सबल संक न मानहीं ।
 जय राम रावन मत्त गज मृगराज सुजसु बखानहीं ॥

दो०—दुहु दिसि जय जयकार करि निज निज जोरी जानि ।
 भिरे बोर इत रामहि उत रावनहि बखानि ॥ ७९ ॥

रावनु रथी बिरथ रघुबीरा । देखि बिभीषन भयउ अधीरा ॥
 अधिक प्रीति मन भा संदेहा । बंदि चरन कह सहित मनेहा ॥
 नाथ न रथ नहिं तन पद त्राना । केहि बिधि जितब बीर बलवाना
 सुनहु सखा कहै कृपानिधाना । जेहिं जय होइ सो स्यंदन आना ॥
 सौरज धीरज तेहि रथ चाका । सत्य सील दृढ़ ध्वजा पताका ॥
 बल त्रिबेक दम परहित घोरे । छमा कृपा समता रजु जोरे ॥
 ईस भजनु सारथी सुजाना । बिरति चर्म संतोष कृपाना ॥
 दानपपरसु बुधि सक्ति प्रचंडा । बर बिग्यान कठिन कोदंडा ॥
 अमल अचल मन त्रोन समाना । सम जम नियम सिलीमुख नाना ॥
 कवच अमेद बिप्र गुर पूजा । एहि सम बिजय उपाय न दजा ॥

सखा धर्ममय अस रथ जाकें । जीतन कहन कतहुँ रिपु ताकें ॥

दो०—महा अजय संसार रिपु जीति सकइ सो बीर ।

जाकें अस रथ होइ दृढ़ सुनहु सखा मतिधीर ॥८०(क)॥

सुनि प्रभु बचन विभीषन हरषि गहे पद कंज ।

एहि मिस मोहि उपदेसेहु राम कृपा सुख पुंज ॥८०(ख)॥

उत पचार दसकंधर इत अंगद हनुमान ।

लरत निसाचर भालु कपि करि निज निज प्रभु आन ॥८०(ग)॥

सुर ब्रह्मादि सिद्ध मुनि नाना । देखत रन नभ चढ़े विमाना ॥
हमह उमा रहे तेहि संगी । देखत राम चरित रन रंगा ॥
सुभटसमर रस दुहु दिसि माते । कपि जयसील राम बल ताते ॥
एक एक सन भिरहिं पचारहिं । एकन्ह एक मदिं महि पारहिं ॥
मारहिं काटहिं धरहिं पछारहिं । सीस तोरि सीसन्ह सन मारहिं ॥
उदर बिदारहिं भुजा उपारहिं । गहि पद अवनि पटकि भट डारहिं ॥
निसिचर भट महि गाढ़हिं भालू । ऊपर ढारि देहिं बहु बालू ॥
बीर बलीमुख जुद्ध विरुद्धे । देखिअत बिपुल काल जनु क्रुद्धे ॥

छं०—क्रुद्धे कृतांत समान कपि तन स्रवत सोनित राजहीं ।

मर्दहिं निसाचर कटक भट बलवंत घन जिमि गाजहीं ॥

मारहिं चपेटन्ह डाटि दातन्ह काटि लातन्ह मोजहीं ।

चिकरहिं मर्कट भालु छल बल करहिं जेहिं खल छीजहीं ॥

भरि गाल फारहिं उर बिदारहिं गल अँतावरि मेलहीं ।

प्रह्लादपति जनु विविध तनु धरि समर अंगन खेलहीं ॥

धरु मारु काटु पछारु घोर गिरा गगन महि भरि रही ।
 जय राम जो तृन ते कुलिस कर कुलिस ते कर तृन सही ॥
 दो०—निज दल बिचलत देखेसि बीस भुजाँ दस चाप ।
 रथ चढ़ि चलेउ दसानन फिरहु फिरहु करि दाप ॥८१॥

धायउ परम क्रुद्ध दसकंधर । सन्मुख चले हूह दै बंदर ॥
 गहि कर पादप उपल पहारा । डारेन्हि ता पर एकहिं बारा ॥
 लागहिं सैल बज्र तन तासू । खंड खंड होइ फूटहिं आसू ॥
 चला न अचल रहा रथ रोपी । रन दुर्मद रावन अति कोपी ॥
 इत उत झपटि दपटि कपि जोधा । मदै लाग भयउ अति क्रोधा ॥
 चले पराइ भालु कपि नाना । त्राहि त्राहि अंगद हनुमाना ॥
 पाहि पाहि रघुबीर गोसाईं । यह खल खाइ काल की नाई ॥
 तेहिं देखे कपि सकल पराने । दसहुँ चाप सायक संधाने ॥

छं०—संधानि धनु सर निकर छाड़ेसि उरग जिमि उड़ि लागहीं ।
 रहे पूरि सर धरनी गगन दिसि बिदिसि कहँ कपि भागहीं ॥
 भयो अति कोलाहल बिकल कपि दल भालु बोलहिं आतुरे ।
 रघुबीर करुना सिंधु आरत बंधु जन रच्छक हरे ॥
 दो०—निज दल बिकल देखि कटि कसि निषंग धनु हाथ ।
 लछिमन चले कुद्ध होइ नाइ राम पद माथ ॥८२॥

रे खल का मारसि कपि भालू । मोहि बिलोकु तोर मैं कालू ॥
 खोजत रहेउँ तोहि सुतघाती । ग्राजु निपाति जुड़ावउँ छाती ॥
 अस कहि छाड़ेसि बान प्रचंडा । लछिमन किए सकल सत खंडा ॥
 कोटिन्ह आयुध रावन डारे । तिल प्रवान करि काटि निवारे ॥

पुनि निज बानन्ह कीन्ह प्रहारा । स्यंदनु भंजि सारथी मारा ॥
सत सत सर मारे दस भाला । गिरि सृंगन्ह जनु प्रबिसहिं ब्याला ॥
पुनि सत सर मारा उर माहीं । परेउ धरनि तल सुाध कछु नाहीं ॥
उठा प्रबल पुनि मुरुछा जागी । छाड़िसि ब्रह्म दीन्हि जो साँगी ॥

छं०—सो ब्रह्मदत्त प्रचंड सक्ति अनंत उर लागी सही ।

परयो बीर बिकल उठाव दसमुख अतुलबल महिमा रही ॥

ब्रह्मांड भवन विराज जाकेँ एक सिर जिमि रज कनी ।

तेहि चह उठावन मूढ़ रावन जान नहिं त्रिभुअन धनी ॥

दो०—देखि पवनसुत धायउ बोलत बचन कठोर ।

आवत कपिहि हन्यो तेहि मुष्टि प्रहार प्रघोर ॥८३॥

जानु टेकि कपि भूमिन गिरा । उठा सँभारि बहुत रिस भरा ॥
मुठिका एक ताहिकपि मारा । परेउ सैल जनु बज्र प्रहारा ॥
मुरुछा गै बहोरि सो जागा । कपि बल बिपुल सराहन लागा ॥
धिग धिग मम पौरुष धिग मोही । जौँ तैं जिअत रहेसि सुरद्रोही ॥
अस कहि लछिमन कहूँ कपि ल्यायो । देखि दसानन बिसमय पायो
कह रघुबीर समुझु जियँ आता । तुम्ह कृतांत भच्छक सुरत्राता ॥
सुनत बचन उठि बैठ कृपाला । गई गगन सो सकति कराला ॥
पुनि कोदंड बान गहि धाए । रिपु सन्मुख अति आतुर आए ॥

छं०—आतुर बहोरि विभंजि स्यंदन सूत हति व्याकुल कियो ।

गिरयो धरनि दसकंधर बिकलतर बानसत बेध्यो हियो ॥

सारथी दूसर घालि रथ तेहि तुरत लंका लै गयो ।

रघुबीर बंधु प्रताप पुंज बहोरि प्रभु चरनन्हि नयो ॥

दो०—उहाँ दसानन जागि करि करै लग कछु जग्य ।

राम विरोध बिजय चह सठ हठ बस अति अग्य ॥८४॥

इहाँ बिभीषन सब सुधि पाई । सपदि जाइ रघुपतिहि सुनाई ॥
नाथ करइ रावन एक जागा । सिद्ध भएँ नहिं मरिहि अभागा ॥
पठवहु नाथ बेगि भट बंदर । करहिं बिधंस आव दसकंधर ॥
प्रात होत प्रभु सुभट पठाए । हनुमदादि अंगद सब धाए ॥
कौतुक कूदि चढ़े करि लंका । पैठे रावन भवन असंका ॥
जग्य करत जबहीं सो देखा । सकल कपिन्ह भा क्रोध बिसेषा ॥
रन ते निलज भाजि गृह आवा । इहाँ आइ बक ध्यान लगावा ॥
अस कहि अंगद मारा लाता । चितव न सठ स्वारथ मन राता ॥

छं०—नहिं चितव जब करि कोप कपि गहि दसन लातन्ह मारहीं ।

धरि केस नारि निकारि बाहेर तेऽतिदीन पुकारहीं ॥

तब उठेउ क्रुद्ध कृतांत सम गहि चरन बानर डारई ।

एहि बीच कपिन्ह बिधंस कृत मख देखि मन महुँ हारई ॥

दो०—जग्य बिधंसि कुसल कपि आए रघुपति पास ।

चलेउ निसाचर क्रुद्ध होइ त्यागि जिवन कै आस ॥८५॥

चलत होहिं अति असुभ भयंकर । बैठहिं गीध उड़ाइ सिरन्ह पर ॥
भयउ कालबस काहु न माना । कहैसि बजावहु जुद्ध निसाना ॥
चली तमीचर अनी अपारा । बहु गजरथ पदाति असवारा ॥
प्रभु सन्मुख धाए खल कैसैं । सलभ समूह अनल कहैं जैसैं ॥
इहाँ देवतन्ह अस्तुति कीन्ही । दारुन बिपति हमहि एहिं दीन्ही
अब जनि राम खेलावहु एही । अतिसय दुखित होति बैदेही ॥

देव वचन सुनि प्रभु मुसुकाना । उठि रघुबीर सुधारे बाना ॥
जटा जूट दढ़ बाँधे माथे । सोहहिं सुमन बीच बिच गाथे ॥
अरुन नयन बारिद तनु स्यामा । अखिल लोक लोचनाभिरामा ॥
कटि तट परिकर कस्यो निषंगा । कर कोदंड कठिन सारंगा ॥

छं०—सारंग कर सुंदर निषंग सिलीमुखाकर कटि कस्यो ।
भुजदंड पीन मनोहरायत उर घरासुर पद लस्यो ॥
कह दास तुलसी जबहिं प्रभु सर चाप कर फेरन लगे ।
ब्रह्मांड दिग्गज कमठ अहि महि सिंधु भूधर डगमगे ॥
दो०—सोभा देखि हरषि सुर वरषहिं सुमन अपार ।
जय जय जय करुनानिधि छवि बल गुन आगार ॥ ८६ ॥

एहीं बीच निसाचर अनी । कसमसात आई अति घनी ॥
देखि चले सन्मुख कपि भट्टा । प्रलयकाल के जनु घन घट्टा ॥
बहु कृपान तरवारि चमंकहिं । जनु दहँ दिसि दामिनीं दमंकहिं ॥
गजरथ तुरग चिकार कठोरा । गर्जहिं मनहुँ बलाहक घोरा ॥
कपि लंगूर बिपुल नभ छाए । मनहुँ इंद्रधनु उए सुहाए ॥
उठइ धुरि मानहुँ जलधारा । बान बुंद मै वृष्टि अपारा ॥
दुहुँ दिसि पर्वत करहिं प्रहारा । बज्रपात जनु बारहिं बारा ॥
रघुपति कोपि बान झरि लाई । घायल मै निसिचर समुदाई ॥
लागत बान बीर चिकरहीं । घुमिं घुमिं जहँतहँ महि परहीं ॥
सबहिं सैल जनु निर्झर भारी । सोनित सरि कादर भयकारी ॥

छं०—कादर भयंकर रुधिर सरिता चली परम अपावनी ।

दोउ कूल दल रथ रेत चक्र अवर्त बहति भयावनी ॥

जलजंतु गज पदचर तुरग खर विविध बाहन को गने ।

सर सक्ति तोमर सर्प चाप तरंग चर्म कमठ घने ॥

दो०—बीर परहिं जनु तीर तरु मज्जा बहु बह फेन ।

कादर देखि डरहिं तहँ सुभटन्ह के मन चेन ॥ ८७ ॥

मज्झहिं भूत पिसाच बेताला । प्रमथ महा झोटिंग कराला ॥

काक कंक लै भुजा उड़ाहीं । एक ते छीनि एक लै खाहीं ॥

एक कहहिं ऐसिउ सौंघाई । सठहु तुम्हार दरिद्र न जाई ॥

कहँरत भट घायल तट गिरे । जहँ तहँ मनहुँ अर्धजल परे ॥

खँचहिं गीध आँत तट भए । जनु बंसी खेलत चित दए ॥

बहु भट बहहिं चढ़े खग जाहीं । जनु नावरि खेलहिं सरि माहीं ॥

जोगिनि भरि भरि खप्पर संचहिं । भूत पिसाच बधू नभ नंचहिं ॥

भट कपाल करताल बजावहिं । चामुंडा नाना बिधि गावहिं ॥

जंबुक निकर कटकट कट्टहिं । खाहिं हुआहिं अघाहिं दण्डहिं ॥

कोटिन्ह रुंड मुंड बिनु डोल्लहिं । सीस परे महि जय जय बोल्लहिं ॥

छं०—बोल्लहिं जो जय जय मुंड रुंड प्रचंड सिर बिनु धावहीं ।

खप्परिन्ह खग अलुञ्जि जुञ्जहिं सुभट भटन्ह ढहावहीं ॥

बानर निसाचर निकर मर्दहिं राम बल दर्पित भए ।

संग्राम अंगन सुभट सोवहिं राम सर निकरिन्ह हए ॥

दो०—रावन हृदयँ बिचारा भा निसिचर संघार ।

मैं अकेल कपि भालु बहु माया करौं अपार ॥ ८८ ॥

देवन्ह प्रभुहि पयादें देखा । उपजा उर अति छांभ बिसेषा ॥

सुरपति निजरथ तुरत पठावा । हरष सहित मातलि लै आवा ॥

तेज पुंज रथ दिव्य अनूपा । हरषि चढ़े कोसलपुर भूपा ॥
चंचल तुरग मनोहर चारी । अजर अमर मन सम गतिकारी
रथारूढ़ रघुनाथहि देखी । धाए कपि बलु पाइ बिसेषी ॥
सही न जाइ कपिन्ह कै मारी । तब रावन माया बिस्तारी ॥
सो माया रघुबीरहि बाँची । लछिमन कपिन्ह सो मानी साँची ॥
देखी कपिन्ह निसाचर अनी । अनुज सहित बहु कोसलधनी ॥

छं०—बहु राम लछिमन देखि मर्कट भालु मन अति अपडरे ।
जनु चित्र लिखित समेत लछिमन जहँ सो तहँ चितवहिं खरे ॥
निज सेन चकित बिलोकि हँसि सर चाप सजि कोसल धनी ।
माया हरी हरि निमिष महँ हरषी सकल मर्कट अनी ॥

दो०—बहुरि राम सब तन चितइ बोले बचन गँभीर ।
द्वंदजुद्ध देखहु सकल श्रमित भए अति वीर ॥ ८९ ॥

अस कहि रथ रघुनाथ चलावा । बिप्र चरन पंकज सिरु नावा ॥
तब लंकेस क्रोध उर छावा । गर्जत तर्जत सन्मुख धावा ॥
जीतेहु जे भट संजुग माहीं । सुनु तापस मै तिन्ह सम नाहीं ॥
रावन नाम जगत जस जाना । लोकप जाके बंदीखाना ॥
खर दूषन बिराध तुम्ह मारा । बधेहु व्याध इव बालि बिचारा ॥
निसिचर निकर सुभट संघारेहु । कुंभकरन घननादहि मारेहु ॥
आजु बयरु सबु लेउँ निबाही । जौं रन भूप भाजि नहिं जाही ॥
आजु करउँ खलु काल हवाले । परेहु कठिन रावन के पाले ॥
सुनि दुर्बचन कालबस जाना । बिहँसि बचन कह कृपानिधाना ॥
सत्त्व सत्य सब तब प्रभुताई । जल्पसि अनि देखाउ मनुसाई ॥

छं०—जनि जल्पना करि सुजसु नासहि नीति सुनहि करहि छमा ।
 संसार महँ पूरुष त्रिविध पाटल रसाल पनस समा ॥
 एक सुमनप्रद एक सुमन फल एक फलइ केवल लागहीं ।
 एक कहहि कहहिं करहिं अपर एक करहिं कहत न बागहीं॥

दो०—राम बचन सुनि बिहँसा मोहि सिखावत ग्यान ।
 बयरु करत नहिं तब डरे अब लागे प्रिय प्रान ॥ ९० ॥

कहि दुर्बचन क्रुद्ध दसकंधर । कुलिस समान लाग छाँड़ै सर ॥
 नानाकार सिलीमुख धाए । दिसि अरु बिदिसि गगन महि छाए॥
 पावक सर छाँड़ेउ रघुबीरा । छन महँ जरे निसाचर तीरा ॥
 छाड़िसि तीव्रसक्ति खिसिआई । बान संग प्रभु फेरि चलाई ॥
 कोटिन्ह चक्र त्रिसूल पवारै । बिनु प्रयास प्रभु काटि निवारै ॥
 निफल होहिं रावन सर कैसैं । खल के सकल मनोरथ जैसैं ॥
 तब सत बान सारथी मारेसि । परेउ भूमि जय राम पुकारेसि ॥
 राम कृपा करि स्रुत उठावा । तब प्रभु परम क्रोध कहँ पावा॥

छं०—भए क्रुद्ध जुद्ध विरुद्ध रघुपति त्रोन सायक कसमसे ।
 कोदंड धुनि अति चंड सुनि मनुजाद सब मारुत ग्रसे ॥
 मंदोदरी उर कंप कंपति कमठ भू भूधर त्रसे ।
 चिकरहिं दिग्गज दसन गहि महि देखि कौतुक सुर हँसे ॥

दो०—तानेउ चाप श्रवन लागि छाँड़े विमिख कराल ।
 राम मारगन गन चले लहलहात जनु ब्याल ॥ ९१ ॥

चले बान सपच्छ जनु उरगा । प्रथमहिं हतेउ सारथी तुरगा॥
 रथ बिमंजि हति केतु पताका । गर्जा अति अंतर बल थाका ॥

तुरत आन रथ चढ़ि खिसिआना । अस्त्र सस्त्र छाँड़ेसि बिधि नाना॥
 बिफल होहिं सब उद्यम ताके । जिमि परद्रोह निरत मनसा के ॥
 तब रावन दस सूल चलावा । बाजि चारि महि मारि गिरावा ॥
 तुरग उठाइ कोपि रघुनायक । खैंचि सरासन छाँड़े सायक ॥
 रावन सिर सरोज बनचारी । चलि रघुबीर सिलीमुख धारी ॥
 दस दस बान भाल दस मारे । निसरि गए चले रुधिर पनारे ॥
 स्रवत रुधिर धायउ बलवाना । प्रभु पुनि कृत धनु सर संधाना ॥
 तीस तीर रघुबीर पबारे । भुजन्हि समेत सीस महि पारे ॥
 काटतहीं पुनि भए नबीने । राम बहोरि भुजा सिर छीने ॥
 प्रभु बहु बार बाहु सिर हए । कटत झटिति पुनि नूतन भए ॥
 पुनि पुनि प्रभु काटत भुज सीसा । अति कौतुकी कोसलाधीसा ॥
 रहे छाइ नभ सिर अरु बाहू । मानहुँ अमित केतु अरु राहू ॥

छं०—जनु राहु केतु अनेक नभ पथ स्रवत सोनित धावहीं ।
 रघुबीर तीर प्रचंड लागहिं भूमि गिरन न पावहीं ॥
 एक एक सर सिर निकर छेदे नभ उड़त इमि सोहहीं ।
 जनु कोपि दिनकर कर निकर जहँ तहँ बिधुतुद पोहहीं ॥

दो०—जिमि जिमि प्रभु हर तासु सिर तिमि तिमि होहिं अपार ।

सेवत बिषय बिबर्ध जिमि नित नित नूतन मार ॥ ९२ ॥

दसमुख देखि सिरन्ह कै बाढ़ी । बिसरा मरन भईरिस गाढ़ी ॥
 गर्जेउ मूढ़ महा अभिमानी । धायउ दसहु सरासन तानी ॥
 समर भूमि दसकंधर कोप्यो । बरषि बान रघुपति रथ तोप्यो ॥
 दंड एक रथ देखि न परेऊ । जनु निहार महुँ दिनकरदुरेऊ ॥

हाहाकार सुरन्ह जब कीन्हा । तब प्रभु कोपि कारमुक लीन्हा ॥
सर निवारि रिपु के सिर काटे । ते दिसि बिदिसि गगन महि पाटे ॥
काटे सिरनभ मारग धावहिं । जय जय धुनि करि भय उपजावहिं
कहँ लछिमन सुग्रीव कपीसा । कहँ रघुबीर कोसलाधीसा ॥

छं०—कहँ रामु कहि सिर निकर घाए देखि मर्कट भजि चले ।
संधानि धनु रघुवंसमनि हैंसि सरन्हि सिर बेधे भले ॥
सिर मालिका कर कालिका गहि बृंद बृंदन्हि बहु मिलीं ।
करि रुधिर सरि मज्जनु मनहुँ संग्राम बट पूजन चलीं ॥

दो०—पुनि दसकंठ क्रुद्ध होइ छँड़ी सक्ति प्रचंड ।
चली बिभीषन सन्मुख मनहुँ काल कर दंड ॥ ९३ ॥

आवत देखि सक्ति अति घोरा । प्रनतारति मंजन पन मोरा ॥
तुरत बिभीषन पाछें मेला । सन्मुख राम सहेउ सोइ सेला ॥
लागि सक्ति मुरुछा कछु भई । प्रभु कृत खेल सुरन्ह विकलई ॥
देखि बिभीषन प्रभु श्रम पायो । गहि कर गदा क्रुद्ध होइ धायो ॥
रे कुभाग्य सठ मंद कुबुद्धे । तैं सुर नर मुनि नाग बिरुद्धे ॥
सादर सिक्कहुँ सीस चढ़ाए । एक एक के कोटिन्ह पाए ॥
तेहि कारन खल अब लगि बाँच्यो । अब तव कालु सीस पर नाच्यो ॥
राम बिमुख सठ चहसि संपदा । अस कहि हनेसि माझ उर गदा ॥

छं०—उर माझ गदा प्रहार घोर कठोर लागत महि परयो ।
दस बदन सोनित स्रवत पुनि संभारि धायो रिस भरयो ॥
द्वौ भिरे अतिबल मल्लजुद्ध बिरुद्ध एकु एकहि हनै ।
रघुबीर बल दर्पित बिभीषनु घालि नहिं ता कहुँ गनै ॥

दो०—उमा बिभीषणु रावनहि सन्मुख चितव कि काउ ।

सो अब भिरत काल ज्यो श्रीरघुवीर प्रभाउ ॥ ९४ ॥

देखा श्रमित बिभीषणु भारी । धायउ हनुमान गिरि धारी ॥
रथ तुरंग सारथी निपाता । हृदय माझ तेहि मारेसि लाता ॥
ठाढ़ रहा अति कंपित गाता । गयउ बिभीषणु जहँ जनत्राता ॥
पुनि रावन कपि हतेउ पचारी । चलेउ गगन कपि पूँछ पसारी ॥
गहिसि पूँछ कपि सहित उड़ाना । पुनि फिरि भिरेउ प्रबल हनुमाना
लरत अकाम जुगल सम जोधा । एकहि एकु हनत करि क्रोधा ॥
सोहहि नभ छल बल बहु करहीं । कज्जल गिरि सुमेरु जनु लरहीं ॥
बुधि बल निसिचर परइन पारथो । तब मारुतसुत प्रभु संभारथो ॥

छं०—संभारि श्रीरघुवीर धीर पचारि कपि रावनु हन्यो ।

महि परत पुनि उठि लरत देवन्ह जुगल कहँ जय जय मन्यो ॥

हनुमंत संकट देखि मर्कट भालु क्रोधातुर चले ।

रन मत्त रावन सकल सुभट प्रचंड भुज बल दलमले ॥

दो०—तब रघुवीर पचारे धाए कीस प्रचंड ।

कपि बल प्रबल देखि तेहि कीन्ह प्रगट पाषंड ॥ ९५ ॥

अंतरधान भयउ छन एका । पुनि प्रगटे खल रूप अनेका ॥
रघुपति कटक भालु कपि जेते । जहँ तहँ प्रगट दसानन तेते ॥
देखे कपिन्ह अभित दससीसा । जहँ तहँ भजे भालु अरु कीसा ॥
भागे बानर धरहि न धीरा । त्राहि त्राहि लछिमन रघुवीरा ॥
दहँ दिसि धावहि कोटिन्ह रावन । गर्जहि घोर कठोर भयावन ॥
डरे सकल सुर चले पराई । जय कै आस तजहु अब भाई ॥

सब सुर जिते एक दसकंधर । अब बहु भए तकहु गिरि कंदर ॥
रहे बिरंचि संभु मुनि ग्यानी । जिन्ह जिन्ह प्रभु महिमा कछु जानी ॥

छं०—जाना प्रताप ते रहे निर्भय कपिन्ह रिपु माने फुरे ।

चले बिचलि मर्कट भालु सकल कृपाल पाहि भयातुरे ॥

हनुमंत अंगद नील नल अतिबल लरत रन बाँकुरे ।

मर्दहि दसानन कोटि कोटिन्ह कपट भू भट अंकुरे ॥

दो०—सुर बानर देखे बिकल हँस्यो कोसलाधीस ।

सजि सारंग एक सर हते सकल दससीस ॥ ९६ ॥

प्रभु छन महँ माया सब काटी । जिमिरबिउएँ जाहिं तम फाटी ॥

रावनु एकु देखि सुर हरषे । फिरे सुमन बहु प्रभु पर बरषे ॥

भुज उठाइ रघुपति कपि फेरे । फिरे एक एकन्ह तब टेरे ॥

प्रभु बलु पाइ भालु कपि धाए । तरल तमकि संजुग महि आए ॥

अस्तुति करत देवतन्हि देखें । भयउँ एक मैं इन्ह के लेखें ॥

सठहु सदा तुम्ह मोर मरायल । अस कहि कोपि गगन पर धायल ॥

हाहाकार करत सुर भागे । खलहु जाहु कहँ मोरें आगे ॥

देखि बिकळ सुर अंगद धायो । कूदि चरन गहि भूमि गिरायो ॥

छं०—गहि भूमि पारचोलात मारचो बालिसुत प्रभु पहिं गयो ।

संभारि उठि दसकंठ घोर कठोर रव गर्जत भयो ॥

करि दाप चाप चढ़ाइ दस संधानि सर बहु बरषई ।

किए सकल भट घायल भयाकुल देखि निज बल हरषई ॥

दो०—तब रघुपति रावन के सीस भुजा सर चाप ।

फाटे बहुत बड़े पुनि जिमि तीरथ कर चाप ॥ ९७ ॥

सिर भुज बाढ़ि देखि रिपु केरी । भालु कपिन्ह रिस भई घनेरी ॥
 मरत न मृद कटेहुँ भुज सीसा । धाए कोपि भालु भट कीसा ॥
 बालितनय मारुति नल नीला । बानरराज दुबिद बलसीला ॥
 बिटप महीधर करहिं प्रहारा । सोइ गिरि तरु गहि कपिन्ह सो मारा ॥
 एक नखन्हि रिपु बपुष बिदारी । भागि चलहिं एक लातन्ह मारी
 तब नल नील सिरन्हि चढ़ि गयऊ । नखन्हि लिलार बिदारत भयऊ
 रुधिर देखि बिषाद उर भारी । तिन्हहि धरन कहुँ भुजा पसारी ॥
 गहे न जाहिं करन्हि पर फिरहीं । जनु जुग मधुप कमल बन चरहीं ॥
 कोपि कूदि द्वौ धरेसि बहोरी । महि पटकत भजे भुजा मरोरी ॥
 पुनि सक्रोप दस धनु कर लीन्हे । सरन्हि मारि घायल कपि कीन्हे ॥
 हनुमदादि मुरुछित करि बंदर । पाइ प्रदोष हरष दसकंधर ॥
 मुरुछित देखि सकल कपि बीरा । जामवंत धायउ रनधीरा ॥
 संग भालु भूधर तरु धारी । मारन लगे पचारि पचारी ॥
 भयउ क्रुद्ध रावन बलवाना । गहि पद महि पटकइ भट नाना ॥
 देखि भालुपति निज दल घाता । कोपि माझ उर मारेसि लाता ॥

छं०—उर लात घात प्रचंड लागत विकल रथ ते महि परा ।

गहि भालु बीसहुँ कर मनहुँ कमलन्हि बसे निसि मधुकरा ॥

मुरुछित बिलोकि बहोरि पद हति भालुपति प्रभु पहिं गयो ।

निसि जानि स्पंदन घालि तेहि तब सूत जतनु करत भयो ॥

दो०—मुरुछ विगत भालु कपि सब आए प्रभु पास ।

निसिचर सकल रावनहि घेरि रहे अति त्रास ॥ ९८॥

मासपारायण, छब्बीसवाँ विश्राम

तेही निसि सीता पहि जाई । त्रिजटा कहि सब कथा सुनाई ॥
 सिर भुज बाढ़ि सुनत रिपु केरी । सीता उर भइ त्रास घनेरी ॥
 मुख मलीन उपजी मन चिंता । त्रिजटा सन बोली तब सीता ॥
 होइहि कहा कहसि किन माता । केहि बिधि मरिहि बिस्व दुखदाता
 रघुपति सर सिर कटेहुँ न मरई । बिधि बिपरीत चरित सब करई ॥
 मोर अभाग्य जिआवत ओही । जेहिं हौं हरि पद कमल बिछोही
 जेहिं कृत कपट कनक मृग झूठा । अजहुँ सो दैव मोहि पर रूठा ॥
 जेहिं बिधि मोहि दुख दुसह सहाए । लछिमन कहुँ कदु बचन कहाए
 रघुपति बिरह सविष सर भारी । तकि तकि मार बार बहु मारी ॥
 ऐसेहुँ दुख जो राख मम प्राणा । सोइ बिधि ताहि जिआव न आना
 बहु बिधि कर बिलाप जानकी । करि करि सुरति कृपानिधान की
 कह त्रिजटा सुनु राजकुमारी । उर सर लागत मरइ सुरारी ॥
 प्रभु ताते उर हतइ न तेही । एहि के हृदयँ बसति बैदेही ॥

छं०—एहि के हृदयँ बस जानकी जानकी उर मम बास है ।
 मम उदर भुअन अनेक लागत बान सब कर नास है ॥
 सुनि बचन हरष बिषाद मन अति देखि पुनि त्रिजटाँ कहा ।
 अब मैरिहि रिपु एहि बिधि सुनहि सुंदरि तजहि संसय महा ॥

दो०—काटत सिर होइहि बिकल छुटि जाइहि तव ध्यान ।
 तब रावनहि हृदय महुँ मरिहहिं रामु सुजान ॥ ९९ ॥

अस कहि बहुत भाँति समुझाई । पुनि त्रिजटा निज भवन सिधाई ॥
 राम सुभाउ सुमिरि बैदेही । उपजी बिरह बिथा अति तेही ॥
 निसिहि ससिहि निंदति बहु भाँती । जुग सम भई सिराति न राती ॥

करति बिलाप मनहिं मन भारी । राम बिरहँ जानकी दुखारी॥
जब अति भयउ बिरह उर दाह । फरकेउ वामनयन अरु बाह॥
सगुन बिचारि धरी मन धीरा । अब मिलिहहिं कृपाल रघुबीरा॥
इहाँ अर्धनिसि रावनु जागा । निज सारथि सन खीझन लागा॥
सठ रैनभूमि छड़ाइसि मोही । धिग धिग अधम मंदमति तोही॥
तेहिं पद गहि बहुबिधि समुझावा । भोरु भएँ रथ चढ़ि पुनि धावा॥
सुनि आगवनु दसानन केरा । कपि दल खरभर भयउ घनेरा॥
जहँ तहँ भूधर बिटप उपारी । धाए कटकटाइ भट भारी ॥

छं०—धाए जो मर्कट बिकट भालु कराल कर भूधर धरा ।

अति कोप करहिं प्रहार मारत भजि चले रजनीचरा ॥

बिचलाइ दल बलवंत कीसन्ह घेरि पुनि रावनु लियो ।

चहुँ दिसि चपेटन्ह मारि नखन्हि बिदारि तनु व्याकुल कियो॥

दो०—देखि महा मर्कट प्रबल रावन कीन्ह बिचार ।

अंतरहित होइ निमिष महुँ कृत माया विस्तार ॥ १०० ॥

छं०—जब कीन्ह तेहिं पाषंड । भए प्रगट जंतु प्रचंड ॥

बेताल भूत पिसाच । कर धरें धनु नाराच ॥ १ ॥

जोगिनि गहें करबाल । एक हाथ मनुज कपाल ॥

करि सद्य सोनित पान । नाचहिं करहिं बहु गान ॥ २ ॥

धरु मारु बोलहिं घोर । रहि पूरि धुनि चहुँ ओर ॥

मुख बाइ धावहिं खान । तब लगे कीस परान ॥ ३ ॥

जहँ जाहिं मर्कट भागि । तहँ बरत देखहिं आगि ॥

भए बिकल बानर भालु । पुनि लाग बरषै बालु ॥ ४ ॥

जहँ तहँ थकित करि कीस । गजेंउ बहुरि दससीस ॥
 लछिमन कपीस समेत । भए सकल बीर अचेत ॥ ५ ॥
 हा राम हा रघुनाथ । कहि सुभट मीजहिँ हाथ ॥
 एहि बिधि सकल बल तोरि । तेहि कीन्ह कपट बहोरि ॥ ६ ॥
 प्रगटेसि बिपुल हनुमान । धाए गहे पाषाण ॥
 तिन्ह रामु घेरे जाइ । चहुँ दिसि बरूथ बनाइ ॥ ७ ॥
 मारहु धरहु जनि जाइ । कटकटहिँ पूँछ उठाइ ॥
 दहँ दिसि लँगूर विराज । तेहिँ मध्य कोसलराज ॥ ८ ॥

छं०—तेहि मध्य कोसलराज सुंदर स्याम तन सोभा लही ।
 जनु इंद्रधनुष अनेक की बर बारि तुंग तमालही ॥
 प्रभु देखि हरष विषाद उर सुर बदत जय जय जय करी ।
 रघुबीर एकहिँ तीर कोपि निमेष महुँ माया हरी ॥ १ ॥
 माया बिगत कपि भालु हरषे बिटप गिरि गहि सब फिरे ।
 सर निकर छाड़े राम रावन बाहु सिर पुनि माहि गिरे ॥
 श्रीराम रावन समर चरित अनेक कल्प जो गावहीं ।
 सत सेष सारद निगम कवि तेउ तदपि पार न पावहीं ॥ २ ॥

दो०—ताके गुन गन कछु कहे जड़मति तुलसीदास ।
 जिमि निज बल अनुरूपते माछी उड़इ अकास ॥ १०१ (क) ॥
 काटे सिर भुज बार बहु मरत न भट लंकेस ।
 प्रभु क्रीड़त सुर सिद्ध मुनि व्याकुल देखि कलेस ॥ १०१ (ख) ॥
 काटत बढ़हिँ सीस समुदाई । जिमि प्रति लाभ लोभ अधिकारि ॥
 मरइ न रिपु श्रम भयउ बिसेषा । राम विभीषन तन तब देखा ॥

उमा काल मर जाकी ईछा । सो प्रभु जन कर प्रीति परीछा ॥
 सुनु सरबग्य चराचर नायक । प्रनतपाल सुर मुनि सुखदायक ॥
 नाभिकुंड पियूष बस याकें । नाथ जित रावनु बल ताकें ॥
 सुनत बिभीषन बचन कृपाला । हरषि गहे कर वान कराला ॥
 असुभ होन लागे तब नाना । रोवहिं खर सृकाल बहु खाना ॥
 बोलहिं खग जग आरति हेतू । प्रगट भए नभ जहँ तहँ केतू ॥
 दस दिसि दाह होन अति लागा । भयउ परब बिनुरबि उपरागा ॥
 मंदोदरि उर कंपति भारी । प्रतिमा सबहिं नयन मग बारी ॥

छं०—प्रतिमा रुदहिं पविपात नभ अति बात बह डोलति मही ।

बरषहिं बलाहक रुधिर कच रज असुभ अति सक को कही ॥

उतपात अमित बिलोकि नभ सुर विकल बोलहिं जय जए ।

सुर सभय जानि कृपाल रघुपति चाप सर जोरत भए ॥

दो०—खैचि सरासन श्रवन लगि छाड़े सर एकतीस ।

रघुनायक सायक चले मानहुँ काल फनीस ॥ १०२ ॥

सायक एक नाभि सर सोषा । अपर लगे भुज सिर करि रोषा ॥
 लै सिर बाहु चले नाराचा । सिर भुज हीन रुंड महि नाचा ॥
 धरनि धसइ धर धाव प्रचंडा । तब सर हति प्रभु कुत दुइ खंडा ॥
 गर्जेउ मरत घोर रव भारी । कहाँ रामु रन हतौ पचारी ॥
 डोली भूमि गिरत दसकंधर । छुभित सिंधु सरि दिग्गज भूधर ॥
 धरनि परेउ ड्रौ खंड बढ़ाई । चापि भालु मर्कट समुदाई ॥
 मंदोदरि आगें भुज सीसा । धरि सर चले जहाँ जगदीसा ॥
 प्रबिसे सब निषंग महुँ जाई । देखि सुरन्ह दुंदुभी बजाई ॥

तासु तेज समान प्रभु आनन । हरषे देखि संभु चतुरानन ॥
जय जय धुनि पूरी ब्रह्मंडा । जय रघुबीर प्रबल भुजदंडा ॥
बरषहिं सुमन देव मुनि बृंदा । जय कृपाल जय जयति मुकुंदा ॥

छं०—जय कृपा कंद मुकुंद द्वंद हरन सरन सुखप्रद प्रभो ।

खल दल बिदारन परम कारन कारुणीक सदा बिभो ॥

सुर सुमन बरषहिं हरष संकुल बाज दुंदुभि गहगही ।

संग्राम अंगन राम अंग अनंग बहु सोभा लही ॥

सिर जटा मुकुट प्रसून बिच बिच अति मनोहर राजहीं ।

जनु नीलगिरि पर तड़ित पटल समेत उडुगन आजहीं ॥

भुजदंड सर कोदंड फेरत रुधिर कन तन अति बने ।

जनु रायमुनीं तमाल पर बैठीं विपुल सुख आपने ॥

दो०—कृपादृष्टि करि वृष्टि प्रभु अभय किए सुर बृंद ।

भालु कीस सब हरषे जय सुख धाम मुकुंद ॥ १०३ ॥

पति सिर देखत मंदोदरी । मुरुछित बिकल धरनि खसि परी ॥

जुबति बृंद रोवत उठि भाई । तेहि उठाइ रावन पहि आई ॥

पति गति देखि ते करहिं पुकारा । छूटे कच नहिं बपुष सँभारा ॥

उर ताड़ना करहिं बिधि नाना । रोवत करहिं प्रताप बखाना ॥

तव बल नाथ डोल नित धरनी । तेज हीन पावक ससि तरनी ॥

सेष कमठ सहि सकहिं न भारा । सो तनु भूमि परेउ भरि छारा ॥

बरुन कुबेर सुरेस समीरा । रन सन्मुख धरि काहुँ न धीरा ॥

भुजबल जितेहु काल जमसाई । आजु परेउ अनाथ की नाई ॥

जगत बिदित तुम्हारि प्रभुताई । सुत परिजन बल बरनिन जाई ॥

रामबिमुख अस हाल तुम्हारा । रहा न कोउ कुल रोवनिहारा ॥
तव बस बिधि प्रपंच सब नाथा । सभय दिसिप नित नावहिं माथा
अब तव सिर भुज जंबुक खाहीं । राम बिमुख यह अनुचित नाहीं ॥
काल बिबस पति कहा न माना । अग जग नाथु मनुज करि जाना ॥

छं०—ज्ञान्यो मनुज करि दनुज कानन दहन पावक हरि स्वयं ।
जेहि नमत सिव ब्रह्मादि सुर पिय भजेहु नहिं करुनामयं ॥
आजन्म ते परद्रोह रत पापौघमय तव तनु अयं ।
तुम्हहू दियो निज धाम राम नमामि ब्रह्म निरामयं ॥

दो०—अहह नाथ रघुनाथ सम कृपासिंधु नहिं आन ।
जोगि वृंद दुर्लभ गति तोहि दीन्हि भगवान ॥१०४॥
मंदोदरी बचन सुनि काना । सुर मुनि सिद्ध सबन्हि सुख माना
अज महेस नारद सनकादी । जे मुनिबर परमारथबादी ॥
भरि लोचन रघुपतिहि निहारी । प्रेम मगन तब भए सुखारी ॥
रुदन करत देखीं सब नारी । भयउ बिभीषन मन दुख भारी ॥
बंधुदसा बिलोकि दुख कीन्हा । तब प्रभु अनुजहि आयसु दीन्हा
लछिमन तेहि बहु बिधि समुझायो । बहुरि बिभीषन प्रभु पहिं आयो
कृपादृष्टि प्रभु ताहि बिलोका । करहु क्रिया परिहरि सब मोका ॥
कीन्हि क्रिया प्रभु आयसु मानी । बिधिवत देस काल जियँ जानी ॥

दो०—मंदोदरी आदि सब देइ तिलांजलि ताहि ।

भवन गई रघुपति गुन गन बरन्त मन माहि ॥१०५॥
आइ बिभीषन पुनि सिरु नायो । कृपासिंधु तब अनुज बोलायो ॥
तुम्ह कपीस अंगद नल नीला । जामवंत मारुति नयसीला ॥

सब मिलि जाहु बिभीषन साथी । सारेहु तिलक कहेउ रघुनाथी॥
 पिता बचन मैं नगर न आवउँ । आपु सरिस कपि अनुज पठावउँ
 तुरत चले कपि सुनि प्रभु बचना । कीन्ही जाइ तिलक की रचना॥
 सादर सिंहासन बैठारी । तिलक सारि अस्तुति अनुसारी॥
 जोरि पानि सबहीं सिर नाए । सहित बिभीषन प्रभु पहिँ आए॥
 तब रघुबीर बोलि कपि लीन्हे । कहि प्रिय बचन सुखी सब कीन्हे
 छं०—किए सुखी कहि बानी सुधा सम बल तुम्हारें रिपु हयो ।

पायो बिभीषन राज तिहुँ पुर जसु तुम्हारो नित नयो ॥

मोहि सहित सुभ कीरति तुम्हारी परम प्रीति जो गाइहैं ।

संसार सिंधु अपार पार प्रयास बिनु नर पाइहैं ॥

दो०—प्रभु के बचन श्रवन सुनि नहिँ अघाहिँ कपि पुंज ।

बार बार सिर नावहिँ गहहिँ सकल पद कंज ॥१०६॥

पुनि प्रभु बोलि लियउ हनुमाना । लंका जाहु कहेउ भगवाना ॥
 समाचार जानकिहि सुनावहु । तासु कुसल लै तुम्ह चलि आवहु
 तब हनुमंत नगर महुँ आए । सुनि निसिचरी निसाचर धाए॥
 बहु प्रकार तिन्ह पूजा कीन्ही । जनकसुता देखाइ पुनि दीन्ही॥
 दूरिहि ते प्रनाम कपि कीन्हा । रघुपति दूत जानकी चीन्हा ॥
 कहहु तात प्रभु कृपानिकेता । कुसल अनुज कपि सेन समेता॥
 सब बिधि कुसल कोसलाधीसा । मातु समर जीत्यो दससीसा ॥
 अबिचल राजु बिभीषन पायो । सुनि कपि बचन हरष उर छायो ॥

छं०—अति हरष मन तन पुलक लोचन सजल कह पुनि पुनि रमा ।

क्रा देउँ तोहि त्रैलोक महुँ कपि किमपि नहिँ बानी समा ॥

सुनु मातु मैं पायो अखिल जग राजु आजु न संसयं ।

रन जीति रिपुदल बंधु जुत पस्यामि राममनामयं ॥

दो०—सुनु सुत सदगुन सकल तव हृदयँ बसहुँ हनुमंत ।

सानुकूल कोसलपति रहहुँ समेत अनंत ॥१०७॥

अब सोइ जतन करहु तुम्ह ताता । देखौं नयन स्याम मृदु गाता ॥
तब हनुमान राम पहिं जाई । जनकसुता कै कुसल सुनाई ॥
सुनि संदेसु भानुकुलभूषन । बोलि लिए जुबराज बिभीषन ॥
मारुतसुत के संग सिधावहु । सादर जनकसुतहि लै आवहु ॥
तुरतहिं सकल गए जहँ सीता । सेवहिं सब निसिचरीं बिनीता ॥
बेगि बिभीषन तिन्हहि सिखायो । तिन्ह बहु बिधि मज्जन करवायो ॥
बहु प्रकार भूषन पहिराए । सिबिका रुचिर साजि पुनिल्याए
ता पर हरषि चढ़ी बैदेही । सुमिरि राम सुखधाम सनेही ॥
बेतपानि रच्छक चहु पासा । चले सकल मन परमहुलासा ॥
देखन भालु कीस सब आए । रच्छक कोपि निवारन धाए ॥
कह रघुबीर कहाँ मम मानहु । सीतहि सखा पयादें आनहु ॥
देखहुँ कपि जननी की नाई । बिहसि कहारघुनाथ गोसाई ॥
सुनि प्रभु बचन भालु कपि हरषे । नभ ते सुरन्ह सुमन बहु बरषे ॥
सीता प्रथम अनल महुँ राखी । प्रगट कीन्हि चह अंतर साखी ॥
दो०—तेहि कारन करुनानिधि कहे कछुक दुर्बाद ।

सुनत जातुधानीं सब लागीं करै बिषाद ॥१०८॥

प्रभु के बचन सीस धरि सीता । बोली मन क्रम बचन पुनीता ॥
लछिमन होहु धरम के नेगी । पावक प्रगट करहु तुम्ह बेगी ॥

मुनि लछिमन सीता कै बानी । बिरह बिबेक धरम निति सानी ॥
 लोचन सजल जोरि कर दोऊ । प्रभु सन कछु कहि सकत न ओऊ
 देखि राम रुख लछिमन धाए । पावक प्रगटि काठ बहु लाए ॥
 पावक प्रबल देखि बैदेही । हृदयँ हरष नहिं भय कछु तेही ॥
 जौं मन बच क्रम मम उर माहीं । तजि रघुबीर आन गति नाहीं ॥
 तौ कृसानु सब कै गति जाना । मो कहूँ होउ श्रीखंड समाना ॥

छं०—श्रीखंड सम पावक प्रवेस कियो सुमिरि प्रभु मैथिली ।

जय कोसलेस महेस बंदित चरन रति अति निर्मली ॥
 प्रतिबिंब अरु लौकिक कलंक प्रचंड पावक महुँ जरे ।
 प्रभु चरित काहुँ न लखे नभ सुर सिद्ध मुनि देखहिं खरे ॥ १ ॥
 धरि रूप पावक पानि गहि श्री सत्य श्रुति जग बिदित जो ।
 जिमि छीरसागर इंदिरा रामहि समर्पी आनि सो ॥
 सो राम बाम बिभाग राजति रुचिर अति सोभा भली ।
 नव नील नीरज निकट मानहुँ कनक पंकज की कली ॥ २ ॥

दो०—बरषहिं सुमन हरषि सुर बाजहिं गगन निसान ।

गावहिं किंनर सुरबधू नाचहिं चर्दी विमान ॥ १०९ (क) ॥

जनकसुता समेत प्रभु सोभा अमित अपार ।

देखि भालु कपि हरषे जय रघुपति सुख सार ॥ १०९ (ख) ॥

तब रघुपति अनुसासन पाई । मातलि चलेउ चरन सिरु नाई ॥
 आए देव सदा स्वारथी । बचन कहहिं जनु परमारथी ॥
 दीन बंधु दयाल रघुराया । देव कीन्हि देवन्ह पर दायी ॥
 बिस्व द्रोह रत यह खल कामी । निज अघ गयउ कुमारगामी ॥

तुम्ह समरूप ब्रह्म अबिनासी । सदा एकरस सहज उदासी ॥
 अकल अगुन अज अनघ अनामय । अजित अमोघ सक्ति करुनामय
 मीन कमठ सूकर नरहरी । बामन परसुराम बपु धरी ॥
 जब जब नाथ सुरन्ह दुखु पायो । नाना तनु धरि तुम्हई नसायो ॥
 यह खल मलिन सदा सुरद्रोही । काम लोभ मद रत अति कोही ॥
 अधम सिरोमनि तब पद पावा । यह हमरें मन बिसमय आवा ॥
 हम देवता परम अधिकारी । स्वारथ रत प्रभु भगति बिसारी ॥
 भव प्रबाहँ संतत हम परे । अब प्रभु पाहि सरन अनुसरे ॥

दो०—करि बिनती सुर सिद्ध सब रहे जहँ तहँ कर जोरि ।

अति सप्रेम तन पुलकि विधि अस्तुति करत बहोरि ॥११०॥

छं०—जय राम सदा सुखधाम हरे । रघुनायक सायक चाप धरे ॥
 भव बारन दारन सिंह प्रभो । गुन सागर नागर नाथ बिभो ॥
 तन काम अनेक अनूप छबी । गुन गावत सिद्ध मुनींद्र कबी ॥
 जसु पावन रावन नाग महा । खगनाथ जथा करि कोप गहा ॥
 जन रंजन भंजन सोक भयं । गतक्रोध सदा प्रभु बोधमयं ॥
 अवतार उदार अपार गुनं । महि भार बिभंजन ग्यानघनं ॥
 अज व्यापकमेकमनादि सदा । करुनाकर राम नमामि मुदा ॥
 रघुवंस बिभूषन दूषन हा । कृत भूष बिभीषन दीन रहा ॥
 गुन ग्यान निधान अमान अजं । नित राम नमामि बिभुं बिरजं ॥
 भुजदंड प्रचंड प्रताप बलं । खल वृंद निकंद महा कुसलं ॥
 बिनु कारन दीन दयाल हितं । छवि धाम नमामि रमा सहितं ॥
 भव तारन कारन काज परं । मन संभव दारुन दोष हरं ॥

सर चाप मनोहर श्रोन धरं । जलजारुन लोचन भूपबरं ॥
 सुख मंदिर सुंदर श्रीरमनं । मद मार मुधा ममता समनं ॥
 अनवद्य अखंड न गोचर गो । सब रूप सदा सब होइ न गो ॥
 इति बेद बंदति न दंतकथा । रवि आतप भिन्नमभिन्न जथा ॥
 कृतकृत्य बिभो सब बानर ए । निरखंति तवानन सादर ए ॥
 धिग जीवन देव सरीर हरे । तव भक्ति बिना भव भूलि परे ॥
 अब दीनदयाल दया करिऐ । मति मोरि बिभेदकरी हरिऐ ॥
 जेहि ते बिपरीत क्रिया करिऐ । दुख सो सुख मानि सुखी चरिऐ ॥
 खल खंडन मंडन रम्य छमा । पद पंकज सेवित संभु उमा ॥
 नृप नायक दे बरदानमिदं । चरनांबुज प्रेमु सदा सुभदं ॥

दो०—बिनय कीन्हि चतुरानन प्रेम पुलक अति गात ।

सोभासिंधु बिलोकत लोचन नहीं अघात ॥१११॥

तेहि अवसर दसरथ तहँ आए । तनय बिलोकि नयन जल छाए ॥
 अनुज सहित प्रभु बंदन कीन्हा । आसिरबाद पिताँ तब दीन्हा ॥
 तात सकल तव पुन्य प्रभाऊ । जीन्यों अजय निसाचर राऊ ॥
 सुनि सुत बचन प्रीति अति बाढ़ी । नयन सलिल रोमावलि ठाढ़ी ॥
 रघुपति प्रथम प्रेम अनुमाना । चितइ पितहि दीन्हे उ दढ़ ग्याना ॥
 ताते उमा मोच्छ नहीं पायो । दसरथ भेद भगति मन लायो ॥
 सगुनोपासक मोच्छ न लेहीं । तिन्ह कहूँ राम भगति निज देहीं ॥
 बार बार करि प्रभुहि प्रनामा । दसरथ हरषि गए सुरधामा ॥

दो०—अनुज जानकी सहित प्रभु कुसल कोसलाधीस ।

सोभा देखि हरषि मन अस्तुति कर सुर ईस ॥११२॥

छं०—जय राम सोभा धाम । दायक प्रनत विश्राम ॥
 धृत त्रोन बर सर चाप । भुजदंड प्रबल प्रताप ॥
 जय दूषनारि खरारि । मर्दन निसाचर धारि ॥
 यह दुष्ट मारेउ नाथ । भए देव सकल सनाथ ॥
 जय हरन धरनी भार । महिमा उदार अपार ॥
 जय रावनारि कृपाल । किए जातुधान बिहाल ॥
 लंकेस अति बल गर्व । किए बस्य सुर गंधर्व ॥
 मुनि सिद्ध नर खग नाग । हठि पंथ सब कै लाग ॥
 परद्रोह रत अति दुष्ट । पायो सो फलु पापिष्ट ॥
 अब सुनहु दीन दयाल । राजीव नयन बिसाल ॥
 मोहि रहा अति अभिमान । नहिं कोउ मोहि समान ॥
 अब देखि प्रभु पद कंज । गत मान प्रद दुख पुंज ॥
 कोउ ब्रह्म निर्गुन ध्याव । अव्यक्त जेहि श्रुति गाव ॥
 मोहि भाव कोसल भूप । श्रीराम सगुन सरूप ॥
 बैदेहि अनुज समेत । मम हृदयँ करहु निकेत ॥
 मोहि जानिए निज दास । दे भक्ति रमानिवास ॥

छं०—दे भक्ति रमानिवास त्रास हरन सरन सुखदायकं ।
 सुख धाम राम नमामि काम अनेक छवि रघुनायकं ॥
 सुर वृंद रंजन द्वंद भंजन मनुजतनु अतुलितबलं ।
 ब्रह्मादि संकर सेव्य राम नमामि करुना कोमलं ॥

दो०—अब करि कृपा बिलोकि मोहि आयसु देहु कृपाल । •

काह करौं सुनि प्रिय बचन बोले दीनदयाल ॥११३॥

सुनु सुरपति कपि भालु हमारे । परे भूमि निसिचरन्हि जे मारे ॥

मम हित लागि तजे इन्ह प्राना । सकल जिआउ सुरेस सुजाना ॥
 सुनु खगेस प्रभु कै यह बानी । अति अगाध जानहिं मुनि ग्यानी
 प्रभु सक त्रिभुअन मारि जिआई । केवल सक्रहि दीन्ह बड़ाई ॥
 सुभा बरषि कपि भालु जिआए । हरषि उठे सब प्रभु पहिं आए ॥
 सुभाबृष्टि मै दुहु दल ऊपर । जिए भालु कपि नहिं रजनीचर ॥
 रामाकार भए तिन्ह के मन । मुक्त भए छूटे भव बंधन ॥
 सुर अंसिक सब कपि अरु रीछा । जिए सकल रघुपति कीं ईछा ॥
 राम सरिस को दीन हितकारी । कीन्हे मुकुत निसाचर झारी ॥
 खल मल धाम कामरत रावन । गति पाई जो मुनिबर पावन ॥

दो०—सुमन बरषि सब सुर चले चढ़ि चढ़ि रुचिर बिमान ।

देखि सुअवसर प्रभु पहिं आयउ संभु सुजान ॥११४(क)॥

परम प्रीति कर जोरि जुग नलिन नयन भरि बारि ।

पुलकित तन गदगद गिराँ बिनय करत त्रिपुरारि ॥११४(ख)॥

छं०—मामभिरक्षय रघुकुल नायक । धृत बर चाप रुचिर कर सायक ॥

मोहमहा धन पटल प्रभंजन । संसय बिपिन अनल सुर रंजन ॥

अगुन सगुन गुन मंदिर सुंदर । अम तम प्रबल प्रताप दिवाकर ॥

काम क्रोध मद गज पंचानन । बसहु निरंतर जन मन कानन ॥

विषय मनोरथ पुंज कंज बन । प्रबल तुषार उदार पार मन ॥

भव बारिधि मंदर परमं दर । बारय तारय संसृति दुस्तर ॥

स्याम गात राजीव बिलोचन । दीन बंधु प्रनतारति मोचन ॥

अनुज जानकी सहित निरंतर । बसहु राम नृप मम उर अंतर ॥

मुनि रंजन महि मंडल मंडन । तुलसिदास प्रभु त्रास बिखंडन ॥

दो०—नाथ जबहिं कोसलपुरी होइहि तिलक तुम्हार ।

कृपासिंधु मैं आउब देखन चरित उदार ॥ ११५ ॥

करि बिनती जब संभु सिधाए । तब प्रभु निकट बिभीषनु आए ॥
नाइ चरन सिरु कह मृदु बानी । बिनय सुनहु प्रभु सारंग पानी ॥
सकुल सदल प्रभु रावन मारथो । पावन जस त्रिभुवन बिस्तारथो ॥
दीन मलीन हीन मति जाती । मो पर कृपा कीन्हि बहु भाँती ॥
अब जन गृह पुनीत प्रभु कीजे । मज्जनु करिअ समरश्रम छीजे ॥
देखि कोस मंदिर संपदा । देहु कृपाल कपिन्ह कहूँ मुदा ॥
सब बिधि नाथ मोहि अपनाइअ । पुनि मोहि सहित अवधपुर जाइअ ॥
सुनत बचन मृदु दीनदयाला । सजल भए द्वौ नयन बिसाला ॥

दो०—तोर कोस गृह मोर सब सत्य बचन सुनु प्रात ।

भरत दसा सुमिरत मोहि निमिष कल्प सम जात ॥ ११६ (क) ॥

तापस बेध गात कस जपत निरंतर मोहि ।

देखौ बेगि सो जतनु करु सखा निहोरउँ तोहि ॥ ११६ (ख) ॥

बीतैं अवधि जाउँ जौ जिअत न पावउँ बीर ।

सुमिरत अनुज प्रीति प्रभु पुनि पुनि पुलक सरीर ॥ ११६ (ग) ॥

करेहु कल्प भरि राजु तुम्ह मोहि सुमिरेहु मन माहि ।

पुनि मम धाम पाइहहु जहाँ संत सब जाहिं ॥ ११६ (घ) ॥

सुनत बिभीषन बचन राम के । हरषि गहे पद कृपाधाम के ॥
बानर भालु सकल हरषाने । गहि प्रभु पद गुन बिमल बखाने
बहुरि बिभीषन भवन सिधायो । मनि गन बसन बिमान धरायो ॥
लै पुष्पक प्रभु आगेँ राखा । हँसि करि कृपासिंधु तब भाषा ॥

चढ़ि बिमान सुनु सखा बिभीषन । गगन जाइ बरषहु पट भूषन ॥
 नभ पर जाइ बिभीषन तबही । बरषि दिए मनि अंबर सबही ॥
 जोइ जोइ मन भावइ सोइ लेहीं । मनि मुख मेलि डारि कपि देहीं ॥
 हँसे राम श्री अनुज समेता । परम कौतुकी कृपा निकेता ॥

दो०—मुनि जेहि ध्यान न पावहिं नेति नेति कह बेद ।

कृपासिंधु सोइ कपिन्ह सन करत अनेक बिनोद ॥११७(क) ॥

उमा जोग जप दान तप नाना मख व्रत नेम ।

राम कृपा नहिं करहिं तसि जसि निष्केवल प्रेम ॥११७(ख) ॥

भालु कपिन्ह पट भूषन पाए । पहिरि पहिरि रघुपति पहिं आए
 नाना जिनस देखि सब कीसा । पुनि पुनि हँसत कोसलाधीसा ॥
 चितइ सबन्हि पर कीन्ही दाया । बोले मृदुल बचन रघुगया ॥
 तुम्हरे बल मैं रावनु मारयो । तिलक बिभीषन कहूँ पुनि सारयो
 निज निज गृह अब तुम्ह सब जाहू । सुमिरहु मोहि डरपहु जनि काहू
 सुनत बचन प्रेमाकुल बानर । जोरि पानि बांले सब सादर ॥
 प्रभु जोइ कहहु तुम्हहि सब सोहा । हमरे होत बचन सुनि मोहा ॥
 दीन जानै कपि किए सनाथा । तुम्ह त्रैलोक ईस रघुनाथा ॥
 सुनि प्रभु बचन लाज हम मरहीं । ममक कहूँ खगपति हित करहीं ॥
 देखि राम रुख बानर रीछा । प्रेम मगन नहिं गृह कै ईछा ॥

दो०—प्रभु प्रेरित कपि भालु सब राम रूप उर राखि ।

हरष-विषाद सहित चले विनय विविध विधि भाषि ॥११८(क) ॥

कृपिपति नील रीछपति अंगद नल हनुमान ।

सहित बिभीषन अपर जे जूथप कपि बलवान ॥११८(ख) ॥

कहि न सकहिँ कछु प्रेम बस भरि भरि लोचन बारि ।

सन्मुख चितवहिँ राम तन नयन निमेष निवारि ॥११८(ग)॥

अतिसय प्रीति देखि रघुगई । लीन्हे सकल बिमान चढ़ाई॥
मन महुँ बिप्र चरन सिरु नायो । उत्तर दिसिहि बिमान चलायो॥
चलत बिमान कोलाहल होई । जय रघुबीर कहइ सबु कोई॥
सिंहासन अति उच्च मनोहर । श्री समेत प्रभु बैठे ता पर ॥
राजत रामु सहित भामिनी । मेरु सुंग जनु घन दामिनी ॥
रुचिर बिमानु चलेउ अति आतुर । कीन्हि सुमन बृष्टि हरषे सुर॥
परम सुखद चलि त्रिबिध बयारी । सागर सर सरि निर्मल बारी ॥
सगुन होहिँ सुंदर चहुँ पासा । मन प्रसन्न निर्मल नभ आसा॥
कह रघुबीर देखु रन सीता । लछिमन इहाँ हत्यो इँद्रजीता॥
हनूमान अंगद के मारे । रन महि परे निसाचर भारे ॥
भकरन रावन द्रौ भाई । इहाँ हते सुर मुनि दुखदाई ॥

दो०—इहाँ सेतु बाँध्यों अरु थापेउँ सिव सुख धाम ।

सीता सहित कृपानिधि संभुहि कीन्ह प्रनाम ॥११९(क)॥

जहँ जहँ कृपासिंधु बन कीन्ह बास विश्राम ।

सकल देखाए जानकिहि कहे सबन्हि के नाम ॥११९(ख)॥

तुरत बिमान तहाँ चलि आवा । दंडक बन जहँ परम सुहावा ॥
कुंभजादि मुनिनायक नाना । गए रामु सब केँ अस्थाना ॥
सकल रिषिन्ह सन पाइ असीसा । चित्रकूट आए जगदीसा ॥
तहँ करि मुनिन्ह केर संतोषा । चला बिमानु तहाँ ते चोखा ॥
बहुरि राम जानकिहि देखाई । जमुना कलि मल हरनि सुहाई ॥

पुनि देखी सुरसरी पुनीता । राम कहा प्रनाम करु सीता॥
 तीरथपति पुनि देखु प्रयागा । निरखत जन्म कोटि अब भागा॥
 देखु परम पावनि पुनि बेनी । हरनि सोक हरि लोक निसेनी॥
 पुनि देखु अवधपुरी अति पावनि । त्रिविध ताप भव रोग नसावनि

दो०—सीता सहित अवध कहूँ कीन्ह कृपाल प्रनाम ।

सजल नयन तन पुलकित पुनि पुनि हरषित राम ॥१२०(क)॥

पुनि प्रभु आइ त्रिवेनी हरषित मज्जनु कीन्ह ।

कपिन्ह सहित बिग्रन्ह कहूँ दान विविध विधि दीन्ह॥१२०(ख)॥

प्रभु हनुमंतहि कहा बुझाई । धरि बटु रूप अवधपुर जाई॥
 भरतहि कुसल हमारि सुनाएहु । समाचार लै तुम्ह चलि आएहु॥
 तुरत पवनसुत गवनत भयऊ । तब प्रभु भरद्वाज पहिँ गयऊ॥
 नाना बिधि मुनि पूजा कीन्ही । अस्तुति करि पुनि आसिष दीन्ही
 मुनि पद बंदि जुगल कर जोरी । चढ़ि बिमान प्रभु चले बहोरी॥
 इहाँ निषाद सुना प्रभु आए । नाव नाव कहँ लोग बोलाए॥
 सुरसरि नाधि जान तब आयो । उतरेउ तट प्रभु आयसु पायो॥
 तब सीताँ पूजी सुरसरी । बहु प्रकार पुनि चरनन्हि परी॥
 दीन्हि असीस हरषि मन गंगा । सुंदरि तव अहिवात अभंगा॥
 सुनत गुहा धायउ प्रेमाकुल । आयउ निकट परम सुख संकुल॥
 प्रभुहि सहित बिलोकि बैदेही । परेउ अवनि तन सुधि नहिँ तेही॥
 प्रीति परम बिलोकि रघुराई । हरषि उठाइ लियो उर लाई ॥

छं०—लियो हृदयँ लाइ कृपा निधान सुजान रायँ रमापती ।

बैठारि परम समीप बूझी कुसल सो कर बीनती ॥

अब कुसल पद पंकज बिलोकि बिरंचि संकर सेव्य जे ।
 सुख धाम पूरनकाम राम नमामि राम नमामि ते ॥ १ ॥
 सब भौंति अधम निषाद सो हरि भरत ज्यों उर लाइयो ।
 मदिमंद तुलसीदास सो प्रभु मोह बस बिसराइयो ॥
 यह रावनारि चरित्र पावन राम पद रतिप्रद सदा ।
 कामादिहर बिग्यानकर सुर सिद्ध मुनि गावहिं मुदा ॥ २ ॥


दो०—समर बिजय रघुबीर के चरित जे सुनहिं सुजान ।
 बिजय बिबेक बिभूति नित तिन्हहि देहिं भगवान ॥ १२१(क)॥
 यह कलिकाल मलायतन मन करि देखु बिचार ।
 श्रीरघुनाथ नाम तजि नाहिन आन अधार ॥ १२१(ख)॥

मासपारायण, सत्ताईसवाँ विश्राम

इति श्रीमद्रामचरितमानसे सकलकलिकलुषविध्वंसने

षष्ठः सोपानः समाप्तः ।

(लङ्काकाण्ड समाप्त)



प्रभुका ऐश्वर्य



अमित रूप प्रगटे तेहि काला ।
जथाजोग मिले सबहि कृपाला ॥

श्रीगणेशाय नमः

श्रीजानकीवल्लभो विजयते

श्रीरामचरितमानस

सप्तम सोपान

(उत्तरकाण्ड)

श्लोक

केकीकण्ठाभनीलं सुरवरविलसद्विप्रपादाब्जचिह्नं
शोभाढ्यं पीतवस्त्रं सरसिजनयनं सर्वदा सुप्रसन्नम् ।
पाणौ नाराचचापं कपिनिकरयुतं बन्धुना सेव्यमानं
नौमीढ्यं जानकीशं रघुवरमनिशं पुष्पकारुढरामम् ॥ १ ॥
कोसलेन्द्रपदकञ्जमञ्जुलौ कोमलावजमहेशवन्दितौ ।
जानकीकरसरोजलालितौ चिन्तकस्य मनभृङ्गसङ्गिनौ ॥ २ ॥
कुन्दइन्दुदरगौरसुन्दरं अम्बिकापतिमभीष्टसिद्धिदम् ।
कारुणीककलकञ्जलोचनं नौमि शङ्करमनङ्गमोचनम् ॥ ३ ॥

दो०—रहा एक दिन अवधि कर अति आरत पुर लोग ।

जहँ तहँ सोचहि नारि नर कस तन राम बियोग ॥

सगुन होहि सुंदर सकल मन प्रसन्न सब केर ।

प्रभु आगवन जनाव जनु नगर रम्य चहुँ फेर ॥

कौसल्यादि मातु सब मन अनंद अस होइ ।

आयउ प्रभु श्री अनुज जुत कहन चहत अब कोइ ॥

भरत नयन भुज दच्छिन फरकत बारहि बार ।

जानि सगुन मन हरष अति लागे करन बिचार ॥

रहेउ एक दिन अवधि अधारा । समुझत मन दुख भयउ अपारा ॥

कारन कवन नाथ नहिँ आयउ । जानि कुटिल कियौ मोहि बिसरायउ ॥

अहह धन्य लछिमन बड़भागी । राम पदारबिंदु अनुरागी ॥

कपटी कुटिल मोहि प्रभु चीन्हा । ताते नाथ संग नहिँ लीन्हा ॥

जौ करनी समुझै प्रभु मोरी । नहिँ निस्तार कलपसत कोरी ॥

जन अवगुन प्रभु मानन काऊ । दीन बंधु अति मृदुल सुभाऊ ॥

मोरे जियँ भरोस दृढ़ सोई । मिलिहहिँ राम सगुन सुभ होई ॥

बीतें अवधि रहहिँ जौ प्राना । अधम कवन जग मोहि समाना ॥

दो०—राम विरह सागर महँ भरत मगन मन होत ।

बिप्र रूप धरि पवनसुत आइ गयउ जनु पोत ॥१(क)॥

बैठे देखि कुसासन जटा मुकुट कस गात ।

राम राम रघुपति जपत स्रवत नयन जलजात ॥१(ख)॥

देखंत हनुमान अति हरषेउ । पुलक गात लोचन जल बरषेउ ॥

मन महँ बहुत भाँति सुख मानी । बोलेउ श्रवन सुधा सम बानी ॥

जासु बिरहँ सोचहु दिन राती । रटहु निरंतर गुन गन पाँती ॥
 रघुकुल तिलक सुजन सुखदाता । आयउ कुसल देव मुनि त्राता ॥
 रिपु रन जीति सुजस सुर गावत । सीता सहित अनुज प्रभु आवत ॥
 सुनत बचन बिसरे सब दूखा । तृषावंत जिमि पाह पियूषा ॥
 को तुम्ह तात कहाँ ते आए । मोहि परम प्रिय बचन सुनाए ॥
 मारुत सुत मैं कपि हनुमाना । नाथ मोर मुनु कृपानिधाना ॥
 दीनबंधु रघुपति कर किंकर । सुनत भरत मेटेउ उठि सादर ॥
 मिलत प्रेम नहि हृदयँ समाता । नयन स्रवत जल पुलकित गाता ॥
 कपि तव दरस सकल दुख बीते । मिले आजु मोहि राम पिरीते ॥
 बार बार बूझी कुसलाता । तो कहूँ देउँ काह सुनु भ्राता ॥
 एहि संदेस सरिस जग माहीं । करि बिचार देखेउँ कछु नाहीं ॥
 नाहिन तात उरिन मैं तोही । अब प्रभु चरित सुनावहु मोही ॥
 तब हनुमंत नाइ पद माथा । कहे सकल रघुपति गुन गाथा ॥
 कहूँ कपि कबहुँ कृपाल गोसाईं । सुमिरहिँ मोहि दास की नाई ॥
 छ०—निज दास ज्यों रघुवंसभूषन कबहुँ मम सुमिरन करयो ।

सुनि भरत बचन बिनीत अति कपि पुलकि तन चरनन्हि परयो ॥

रघुबीर निज मुख जासु गुन गन कहत अग जग नाथ जो ।

काहे न होइ बिनीत परम पुनीत सदगुन सिंधु सो ॥

दो०—राम प्राण प्रिय नाथ तुम्ह सत्य बचन मम तात ।

पुनि पुनि मिलत भरत सुनि हरष न हृदयँ समात ॥२ (क)॥

सो०—भरत चरन सिरु नाइ तुरित गयउ कपि राम पहिँ ।

कही कुसल सब जाइ हरषि चलेउ प्रभु जान चदि ॥२ (ख)॥

हरषि भरत कोसलपुर आए । समाचार सब गुरहि सुनाए ॥
 पुनि मंदिर महुँ बात जनाई । आवत नगर कुसल रघुराई ॥
 सुनत सकल जननीं उठि धाई । कहि प्रभु कुसल भरत समुझाई ॥
 समाचार पुरवासिन्ह पाए । नर अरु नारि हरषि सब धाए ॥
 दधि दुर्वा रोचन फल फूला । नव तुलसी दल मंगल मूला ॥
 भरि भरि हेम थार भामिनी । गावत चलिं सिंधुरगामिनी ॥
 जे जैसेहि तैसेहि उठि धावहिं । बाल बृद्ध कहँ संग न लावहिं ॥
 एक एकन्ह कहँ बूझहिं भाई । तुम्ह देखे दयाल रघुराई ॥
 अवधपुरी प्रभु आवत जानी । भई सकल सोभा कै खानी ॥
 बहइ सुहावन त्रिविध समीरा । भइ सरजू अति निर्मल नीरा ॥

दो०—हरषित गुर परिजन अनुज भूसुर बृंद समेत ।

चले भरत मन प्रेम अति सन्मुख कृपानिकेत ॥३ (क)॥

बहुतक चढ़ीं अटारिन्ह निरखहिं गगन बिमान ।

देखि मधुर सुर हरषित करहिं सुमंगल गान ॥३ (ख)॥

राका ससि रघुपति पुर सिंधु देखि हरषान ।

बढ़्यो कोलाहल करत जनु नारि तरंग समान ॥३ (ग)॥

इहाँ भानुकुल कमल दिवाकर । कपिन्ह देखावत नगर मनोहर ॥
 सुनु कपीस अंगद लंकेसा । पावन पुरी रुचिर यह देसा ॥
 जद्यपि सब बैकुंठ बखाना । बेद पुरान बिदित जगु जाना ॥
 अवधपुरीसमप्रिय नहिं सोऊ । यह प्रसंग जानइ कोउ कोऊ ॥
 जन्मभूमि मम पुरी सुहावनि । उत्तर दिसि बह सरजू पावनि ॥
 जा मज्जन ते बिनहिं प्रयासा । मम समीप नर पावहिं बासा ॥

अति प्रिय मोहि इहाँ के बानी । मम धामदा पुगी सुख रासी ॥
हरषे सब कपि सुनि प्रभु बानी । धन्य अवध जो राम बखानी ॥

दो०—आवत देखि लोग सब कृपासिंधु भगवान ।

नगर निकट प्रभु प्रेरेउ उतरेउ भूमि विमान ॥ ४ (क) ॥

उतरि कहेउ प्रभु पुष्पकहि तुम्ह कुवेर पहिं जाहु ।

प्रेरित राम चलेउ सो हरषु विरहु अति ताहु ॥ ४ (ख) ॥

आए भरत संग सब लोग । कृस तन श्रीरघुवीर बियोगा ॥
बामदेव बसिष्ट मुनिनायक । देखे प्रभु महि धरि धनु सायक ॥
धाइ धरे गुर चरन सरोरुह । अनुज सहित अति पुलकत नोरुह
मेंटि कुसल बूझी मुनिराया । हमरें कुसल तुम्हारीहिं दाया ॥
सकल द्विजन्ह मिलि नायक माथा । धर्म धुरंधर रघुकुलनाथा ॥
गहे भरत पुनि प्रभु पद पंकज । नमत जिन्हहि सुरमुनि संकर अज
परे भूमि नहिं उठत उठाए । बर करि कृपासिंधु उर लाए ॥
स्यामल गात रोम भए ठाढ़े । नव राजीव नयन जल बाढ़े ॥

छं०—राजीव लोचन सवत जल तन ललित पुलकावलि बनी ।

अति प्रेम हृदयें लगाइ अनुजहि मिले प्रभु त्रिभुवन धनी ॥

प्रभु मिलत अनुजहि सोह मो पहिं जाति नहिं उपमा कही ।

जनु प्रेम अरु सिंगार तनु धरि मिले घर सुषमा लही ॥ १ ॥

बूझत कृपानिधि कुसल भरतहि वचन बेगि न आवई ।

सुनु सिवा सो सुख वचन मन ते भिन्न जान जो पावई ॥

अब कुसल कौसलनाथ आरत जानि जन दरसन दियो ।

बूझत बिरह बारीस कृपानिधान मोहि कर गहि लियो ॥ २ ॥

दो०—पुनि प्रभु हरषि सन्नुहन भेंटे हृदयँ लगाइ ।

लछिमन भरत मिले तब परम प्रेम दोउ भाइ ॥ ५ ॥

भरतानुज लछिमन पुनि भेंटे । दुसह बिरह संभव दुख मेटे ॥
सीता चरन मरत सिरु नावा । अनुज समेत परम सुख पावा ॥
प्रभु बिलोकि हरषे पुरबासी । जनित बियोग बिपति सब नासी
प्रेमातुर सब लोग निहारी । कौतुक कीन्ह कृपाल खरारी ॥
अमित रूप प्रगटे तेहि काला । जथाजोग मिले सबहि कृपाला ॥
कृपादृष्टि रघुबीर बिलोकी । किए सकल नर नारि बिसोकी ॥
छन महिं सबहि मिले भगवाना । उमा मरम यह काहुँ न जाना ॥
एहि बिधि सबहि सुखी करि रामा । आगें चले सील गुन धामा ॥
कौसल्यादि मातु सब धाई । निरखि बच्छ जनु धेनु लवाई ॥

छं०—जनु धेनु बालक बच्छ तजि गृहँ चरन बन परबस गई ।

दिन अंत पुर रुख स्रवत थन हुंकार करि धावत भई ॥

अति प्रेम प्रभु सब मातु भेटौं बचन मृदु बहुविधि कहे ।

गइ बिषम बिपति बियोग भवतिन्ह हरष सुख अगनित लहे ॥

दो०—भेटैउ तनय सुमित्राँ राम चरन रति जानि ।

रामहि मिलत कैकई हृदयँ बहुत सकुचानि ॥ ६ (क) ॥

लछिमन सब मातन्ह मिलि हरषे आसिष पाइ ।

कैकइ कहैं पुनि पुनि मिले मन कर छोभु न जाइ ॥ ६ (ख) ॥

सासुन्ह सबनि मिली बैदेही । चरनन्हि लागि हरषु अति तेही ॥
देहिं अमीस बूझि कुमलाता । होइ अचल तुम्हार अहिवाता ॥
सब रघुपति मुख कमल बिलोकहिं । मंगल जानि नयन जल रोकहिं

कनक थार आरती उतारहिं । बार बार प्रभु गात निहारहिं ॥
नाना भाँति निछावरि करहीं । परमानंद हरष उर भरहीं ॥
कौसल्या पुनि पुनि रघुबीरहि । चितवति कृपासिंधु रनधीरहि ॥
हृदयँ बिचारति बारहिं बारा । कवन भाँति लंकापति मारा ॥
अति सुकुमार जुगल मेरे बारे । निसिचर सुभट महाबल भारे ॥

दो०—लछिमन अरु सीता सहित प्रभुहि बिलोकति मातु ।

परमानंद मगन मन पुनि पुनि पुलकित गातु ॥ ७ ॥
लंकापति कपीस नल नीला । जामवंत अंगद सुभसीला ॥
हनुमदादि सब बानर बीरा । धरे मनोहर मनुज सरीरा ॥
भरत सनेह सील ब्रत नेमा । सादर सब बरनहिं अति प्रेमा ॥
देखि नगरवासिन्ह कै रीती । सकल सराहहिं प्रभु पद प्रीती ॥
पुनि रघुपति सब सखा बोलाए । मुनि पद लागहु सकल सिखाए ॥
गुर बसिष्ट कुलपूज्य हमारे । इन्ह की कृपाँदनुजरन मारे ॥
ए सब सखा सुनहु मुनि मेरे । भए समर सागर कहँ बेरे ॥
मम हित लागि जन्म इन्ह हारे । भरतहु ते मोहि अधिक पिआरे
सुनि प्रभु बचन मगन सब भए । निमिषनिमिष उपजत सुख नए ॥

दो०—कौसल्या के चरनन्हि पुनि तिन्ह नायउ माथ ।

आसिष दीन्हे हरषि तुम्ह प्रिय मम जिमि रघुनाथ ॥ ८ (क) ॥

सुमन बृष्टि नभ संकुल भवन चले सुखकंद ।

चढ़ी अटारिन्ह देखहिं नगर नारि नर बृंद ॥ ८ (ख) ॥
कंचन कलस बिचित्र सँवारे । सबहिं धरे सजि निज निज द्वारे ॥
बंदनवार पताका केत । सबन्हि बनाए मंगल डेट ॥

बीथीं सकल सुगंध सिंचाई । गजमनि रचि बहु चौक पुराई ॥
 नाना भाँति सुमंगल साजे । हरषि नगर निसानबहु बाजे ॥
 जहँ तहँ नारि निछावरि करहीं । देहिं असीस हरष उर भरहीं ॥
 कंचन थार आरतीं नाना । जुबतीं सजें करहिं सुभ गाना ॥
 करहिं आरती आरतिहर कें । रघुकुल कमल बिपिन दिनकर कें
 पुर सोभा संपति कल्याना । निगम सेष सारदा बखाना ॥
 तेउ यह चरित देखि ठगि रहहीं । उमा तासु गुन नर किमि कहहीं ॥

दो०—नारि कुमुदिनीं अवध सर रघुपति विरह दिनेस ।

अस्त भएँ बिगसत भईं निरखि राम राकेस ॥ ९ (क) ॥

होहिं सगुन सुभ बिबिध बिधि बाजहिं गगन निसान ।

पुर नर नारि सनाथ करि भवन चले भगवान ॥ ९ (ख) ॥

प्रभु जानी कैकई लजानी । प्रथम तासु गृह गए भवानी ॥
 ताहि प्रबाधि बहुत सुख दीन्हा । पुनि निज भवन गवन हरि कीन्हा
 कृपासिंधु जब मंदिर गए । पुर नर नारि सुखी सब भए ॥
 गुर बासिष्ट द्विज लिए बुलाई । आजु सुधरी सुदिन समुदाई ॥
 सब द्विज देहु हरषि अनुभासन । रामचंद्र बैठहिं सिंघासन ॥
 मुनि बसिष्ट के बचन सुहाए । सुनत सकल बिप्रन्ह अति भाए ॥
 कहहिं बचन मृदु बिप्र अनेका । जग अभिराम राम अभिषेका ॥
 अब मुनिवर बिलंब नहिं कीजै । महाराज कहँ तिलक करीजै ॥

दो०—तब मुनि कहेउ सुमंत्र सन सुनत चलेउ हरषाइ ।

रथ अनेक बहु बाजि गज तुरत सँवारे जाइ ॥ १० (क) ॥

जहँ तहँ धावन पठइ पुनि मंगल द्रव्य मगाइ ।

हरष समेत बसिष्ट पद पुनि सिरु नायउ आइ ॥ १०(ख) ॥

नवाह्नपारायण, आठवाँ विश्राम

अवधपुरी अति रुचिर बनाई । देवन्ह सुमन वृष्टि झरि लाई ॥
 राम कहा सेवकन्ह बुलाई । प्रथम सखन्ह अन्हवावहु जाई ॥
 सुनत बचन जहँ तहँ जन धाए । सुग्रीवादि तुरत अन्हवाए ॥
 पुनि करुनानिधि भरतु हँकारे । निज कर राम जटा निरुआरे ॥
 अन्हवाए प्रभु तीनिउ भाई । भगत बछल कृपाल रघुराई ॥
 भरत भाग्य प्रभु कोमलताई । शेष कोटि सत सकहिं नगाई ॥
 पुनि निज जटा राम बिबराए । गुर अनुसासन मागि नहाए ॥
 करि मज्जन प्रभु भूषन साजे । अंग अनंग देखि सत लाजे ॥

दो०—सासुन्ह सादर जानकिहि मज्जन तुरत कराइ ।

दिब्य बसन बर भूषन अँग अँग सजे बनाइ ॥ ११(क) ॥

राम बाम दिसि सोभति रमा रूप गुन खानि ।

देखि मातु सब हरषीं जन्म सुफल निज जानि ॥ ११(ख) ॥

सुनु खगेस तेहि अवसर ब्रह्मा सिव मुनि वृंद ।

चढ़ि विमान आए सब सुर देखन सुखकंद ॥ ११(ग) ॥

प्रभु बिलोकि मुनि मन अनुरागा । तुरत दिव्य सिंघासन मागा ॥
 रबि सम तेज सो बरनि न जाई । बैठे राम द्विजन्ह सिरु नाई ॥
 जनकमुता समेत रघुगई । पेखि प्रहरषे मुनि समुदाई ॥
 बेद मंत्र तब द्विजन्ह उचारे । नभ सुर मुनि जय जयति पुकारे ॥
 प्रथम तिलक बसिष्ट मुनि कीन्हा । पुनि सब बिप्रन्ह आयसु दीन्हा ॥

सुत बिलोकि हरषीं महतारी । बार बार आरती उतारी ॥
विप्रन्ह दान विविधि विधि दीन्हे । जाचक सकल अजाचक कीन्हे
सिंघासन पर त्रिभुवन साईं । देखि सुरन्ह दुंदुभी बजाई ॥

छं०—नभ दुंदुभी बाजहि बिपुल गंधर्व किंनर गावहीं ।
नाचहिं अपछरा वृंद परमानंद सुर मुनि पावहीं ॥
भरतादि अनुज विभीषणांगद हनुमदादि समेत ते ।
गहैं छत्र चामर व्यजन धनु असि चर्म सक्ति विराजते ॥ १ ॥
श्री सहित दिनकर बंस भूषन काम बहु छवि सोहई ।
नव अंबुधर बरगात अंबर पीत सुर मन मोहई ॥
मुकुटांगदादि बिचित्र भूषन अंग अंगनिह प्रति सजे ।
अंभोज नयन बिसाल उर भुज धन्य नर निरखंति जे ॥ २ ॥

दो०—वह सोभा समाज सुख कहत न बनइ खगेस ।
बरनहिं सारद सेष श्रुति सो रस जान महेस ॥ १२(क) ॥
भिन्न भिन्न अस्तुति करि गए सुर निज निज धाम ।
बंदी बेष वेद तब आए जहँ श्रीराम ॥ १२(ख) ॥
प्रभु सर्वग्य कीन्ह अति आदर कृपानिधान ।
लखैउ न काहूँ मरम कछु लगे करन गुन गान ॥ १२(ग) ॥

छं०—जय सगुन निर्गुन रूप रूप अनूप भूप सिरोमने ।
दसकंधरादि प्रचंड निसिचर प्रबल खल भुज बल हने ॥
अवतार नर संसार भार विभंजि दारुन दुख दहे ।
जय प्रनतपाल दयाल प्रभु संजुक्त सक्ति नमामहे ॥ १ ॥
तव विषम माया बस सुरासुर नाग नर अग जग हरे ।
भव पंथ भ्रमत अभित दिवस निसि काल कर्म गुननि भरे ॥

जे नाथ करि करुना बिलोके त्रिविधि दुख ते निर्बहे ।
 भव खेद छेदन दच्छ हम कहँ रच्छ राम नमामहे ॥ २ ॥
 जे ग्यान मान बिमत्त तव भव हरनि भक्ति न आदरी ।
 ते पाइ सुर दुर्लभ पदादपि परत हम देखत हरी ॥
 बिस्वास करि सब आस परिहरि दास तव जे होइ रहे ।
 जपि नाम तव बिनु श्रम तरहिँ भव नाथ सो समरामहे ॥ ३ ॥
 जे चरन सिव अज पूज्य रज सुभ परसि मुनिपतिनी तरी ।
 नख निर्गता मुनि बंदिता त्रैलोक पावनि सुरसरी ॥
 ध्वज कुलिस अंकुस कंज जुत बन फिरत कंटक किन लहे ।
 पद कंज द्वंद मुकुंद राम रमेस नित्य भजामहे ॥ ४ ॥
 अब्यक्तमूलमनादि तरु त्वच चारि निगमागम भने ।
 षट कंध साखा पंच बीस अनेक पर्न सुमन घने ॥
 फल जुगल बिधि कटु मधुर बेलि अकेलि जेहि आश्रित रहे ।
 पल्लवत फूलत नवल नित संसार बिटप नमामहे ॥ ५ ॥
 जे ब्रह्म अजमद्वैतमनुभवगम्य मन पर ध्यावहीं ।
 ते कहहुँ जानहुँ नाथ हम तव सगुन जस नित गावहीं ॥
 करुनायतन प्रभु सदगुनाकर देव यह बर मागहीं ।
 मन बचन कर्म बिकार तजि तव चरन हम अनुरागहीं ॥ ६ ॥

दो०—सब के देखत बेदन्ह विनती कीन्हि उदार ।

अंतर्धान भए पुनि गए ब्रह्म आगार ॥ १३(क) ॥

बैनतेय सुनु संभु तब आए जहाँ रघुबीर ।

बिनय करत गदगद गिरा पूरित पुलक सरीर ॥ १३(ख) ॥

छं०—जय राम रमारमनं समनं । भव ताप भयाकुल पाहि जनं ।

अवधेस सुरेस रमेस बिभो । सरनागत मागत पाहि प्रभो ॥ १ ॥

दससीस बिनासन बीस भुजा।कृत दूरि महा महि भूरि रुजा ।

रजनीचर वृंद पतंग रहे । सर पावक तेज प्रचंड दहे ॥ २ ॥

महि मंडल मंडन चारुतरं । धृत सायक चाप निषंग बरं ।

मद मोह महा ममता रजनी । तम पुंज दिवाकर तेज अनी ॥ ३ ॥

मनजात किरात निपात किए । मृग लोग कुभोग सरेन हिए ।

हति नाथ अनाथनि पाहि हरे । बिषया बन पावैर भूलि परे ॥ ४ ॥

बहु रोग बियोगन्हि लोग हए । भवदंघ्रि निरादर के फल ए ।

भवसिंधु अगाध परे नर ते । पद पंकज प्रेम न जे करते ॥ ५ ॥

अति दीन मलीन दुखी नितहीं।जिन्ह कैं पद पंकज प्रीति नहीं ।

अवलंब भवंत कथा जिन्ह कैं । प्रिय संत अनंत सदा तिन्ह कैं॥६॥

नहिं राग न लोभन मान मदा । तिन्ह कैं सम बैभव वा बिपदा ।

एहि ते तव सेवक होत मुदा । मुनि त्यागत जोग भरोस सदा ॥७॥

करि प्रेम निरंतर नेम लिऐं । पद पंकज सेवत सुद्ध हिऐं ।

सम मानि निरादर आदरही । सव संत सुखी बिचरंति मही॥८॥

मुनिमानस पंकज भृंग भजे । रघुबीर महा रनधीर अजे ।

तव नाम जपामि नमामि हरी । भव रोग महागद मान अरी ॥ ९ ॥

गुन सील कृपा परमायतनं । प्रनमामि निरंतर श्रीरमनं ।

रघुनंद निकंदय द्रंघ्रघनं । महिपाल बिलोक्य दीन जनं ॥१०॥

दो०—बार बार वर मागउँ हरषि देहु श्रीरंग ।

पद सरोज अनपायनी भगति सदा सतसंग ॥ १४(क) ॥

बरनि उमापति राम गुन हरषि गए कैलास ।

तब प्रभु कपिन्ह दिवाए सब बिधि सुखप्रद बास ॥ १४ (ख) ॥

सुनु खगपति यह कथा पावनी । त्रिविध ताप भव भय दावनी ॥
महाराज कर सुभ अभिषेका । सुनत लहहि नर बिरति बिबेका ॥
जे सकाम नर सुनहि जे गावहि । सुख संपति नाना बिधि पावहि ॥
सुर दुर्लभ सुख करि जग माहीं । अंतकाल रघुपति पुर जाहीं ॥
सुनहि बिमुक्त बिरत अरु बिषई । लहहि भगति गति संपति नई ॥
खगपति राम कथा मैं बरनी । स्वमति बिलास त्रास दुख हरनी ॥
बिरति बिबेक भगति दृढ़ करनी । मोह नदी कहैं सुंदर तरनी ॥
नित नव मंगल कौसलपुरी । हरषित रहहि लोग सब कुरी ॥
नित नइ प्रीति राम पद पंकज । सब केँ जिन्हहि नमत सिव मुनि अज ॥
मंगन बहु प्रकार पहिराए । द्विजन्ह दान नाना बिधि पाए ॥

दो०—ब्रह्मानंद मगन कपि सब केँ प्रभु पद प्रीति ।

जात न जाने दिवस तिन्ह गए मास षट बीति ॥ १५ ॥

बिसरे गृह सरनेहुँ सुधि नाहीं । जिमि परद्रोह संत मन माहीं ॥
तबरघुगति सब सखा बोलाए । आइ सबन्हि सादर सिरु नाए ॥
परम प्रीति समीप बैठारे । भगत सुखद मृदु बचन उचारे ॥
तुम्ह अति कीन्हि मोरि सेवकाई । मुख पर केहि बिधि करौ बड़ाई ॥
ताते मोहि तुम्ह अति प्रिय लागे । मम हित लागि भवन सुख त्यागे ॥
अनुज राज संपति बैदेही । देह गोह परिवार सनेही ॥
सब मम प्रिय नहि तुम्हहि समाना । मृषा न कहउँ मोर यह बाना ॥
सब केँ प्रिय सेवक यह नीती । मोरें अधिक दास पर प्रीती ॥

दो०—अब गृह जाहु सखा सब भजेहु मोहि दृढ़ नेम ।

सदा सर्वगत सर्वहित जानि करेहु अति प्रेम ॥ १६ ॥

सुनि प्रभु बचन मगन सब भए । को हम कहाँ निसरित न गए ॥
एकटक रहे जोरि कर आगे । सकहि न कछु कहि अति अनुरागे ॥
परम प्रेम तिन्ह कर प्रभु देखा । कहा बिबिधि बिधि ग्यान बिसेषा ॥
प्रभु सन्मुख कछु कहन न पारहि । पुनि पुनि चरन सरोज निहारहि ॥
तब प्रभु भूषन बसन मगाए । नाना रंग अनूप सुहाए ॥
सुग्रीवहि प्रथमहि पहिराए । बसन भरत निज हाथ बनाए ॥
प्रभु प्रेरित लछिमन पहिराए । लंकापति रघुपति मन भाए ॥
अंगद बैठ रहा नहि डोला । प्रीति देखि प्रभु ताहि न बोला ॥

दो०—जामवंत नीलादि सब पहिराए रघुनाथ ।

हियँ धरि राम रूप सब चले नाइ पद माथ ॥ १७(क) ॥

तब अंगद उठि नाइ सिरु सजल नयन कर जोरि ।

अति बिनीत बोलेउ बचन मनहुँ प्रेम रस बोरि ॥ १७(ख) ॥

सुनु सर्वग्य कृपा सुख सिंधो । दीन दयाकर आरत बंधो ॥
मरती बेरनाथ मोहि बाली । गयउ तुम्हारेहि कोँछे घाली ॥
असरन सरन बिरहु संभारी । मोहि जनि तजहु भगत हितकारी ॥
मोरें तुम्ह प्रभु गुर पितु माता । जाउँ कहाँ तजि पद जलजाता ॥
तुम्हहि बिचारि कहहु नरनाहा । प्रभु तजि भवन काज ममकाहा ॥
बालक ग्यान बुद्धि बल हीना । राखहु सरन नाथ जन दीना ॥
नीचिं टहल गृह कै सब करिहुँ । पद पंकज बिलोकि भव तरिहुँ ॥
अस कहि चरन परेउ प्रभु पाही । अब जनि नाथ कहहु गृह जाही ॥

दो०—अंगद बचन बिनीत सुनि रघुपति करुना सीव ।

प्रभु उठाइ उर लायउ सजल नयन राजीव ॥१८(क)॥

निज उर माल बसन मनि बालितनय पहिराइ ।

विदा कीन्हि भगवान तब बहु प्रकार समुझाइ ॥१८(ख)॥

भरत अनुज सौमित्रि समेता । पठवन चले भगत कृत चेता ॥

अंगद हृदयँ प्रेम नहिं थोरा । फिरि फिरि चितव राम कीं ओरा ॥

बार बार कर दंड प्रनामा । मन अस रहन कहहिं मोहि रामा ॥

राम बिलोकनि बोलनि चलनी । सुमिरि सुमिरि सोचत हँसि मिलनी

प्रभु रुख देखि बिनय बहु भाषी । चलेउ हृदयँ पद पंकज राखी ॥

अति आदर सब कपि पहुँचाए । भाइन्ह सहित भरत पुनि आए ॥

तब सुग्रीव चरन गहि नाना । भाँति बिनय कीन्हे हनुमाना ॥

दिन दस करि रघुपति पद सेवा । पुनि तब चरन देखिहउँ देवा ॥

पुन्य पुंज तुम्ह पवनकुमारा । सेवहु जाइ कृपा आगारा ॥

अस कहि कपि सब चले तुरंता । अंगद कहइ सुनहु हनुमंता ॥

दो०—कहेहु दंडवत प्रभु सैं तुम्हहि कहउँ कर जोरि ।

बार बार रघुनायकहि सुरति कराएहु मोरि ॥१९(क)॥

अस कहि चलेउ बालिसुत फिरि आयउ हनुमंत ।

तासु प्रीति प्रभु सन कही मगन भए भगवंत ॥१९(ख)॥

कुलिसहु चाहि कठोर अति कोमल कुसुमहु चाहि ।

चित्त खगेस राम कर समुझि परइ कहु काहि ॥१९(ग)॥

पुनि कृपाल लियो बोलि निषादा । दीन्हे भूषन बसन प्रसादा ॥

जाहु भवन मम सुमिरन करेहु । मन क्रम बचन धर्म अनुसरेहु ॥

तुम्ह मम सखा भरत सम भ्राता । सदा रहेहु पुर आवत जाता॥
 बचन सुनत उपजा सुख भारी । परेउ चरन भरि लोचन बारी॥
 चरन नलिन उर धरि गृह आवा । प्रभु सुभाउ परिजनन्हि सुनावा॥
 रघुपति चरित देखि पुरबासी । पुनि पुनि कहहि धन्य सुखगसी॥
 राम राज बैठे त्रैलोका । हरषित भए गए सब सोका॥
 बयरु न कर काहू सन कोई । राम प्रताप बिषमता खोई॥

दो०—बरनाश्रम निज निज धरम निरत बेद पथ लोग ।

चलहि सदा पावहि सुखहि नहि भय सोक न रोग ॥ २० ॥

दैहिक दैविक भौतिक तापा । राम राज नहि काहुहि व्यापा॥
 सब नर करहि परस्पर प्रीती । चलहि स्वधर्म निरत श्रुति नीती॥
 चारिउं चरन धर्म जग माहीं । पूरि रहा सपनेहुँ अघ नाहीं॥
 राम भगति रत नर अरु नारी । सकल परम गति के अधिकारी॥
 अल्पमृत्यु नहि कवनिउ पीरा । सब सुंदर सब बिरुज सरीरा॥
 नहि दगिद्र कोउ दुखी न दीना । नहि कोउ अबुध न लच्छन हीना॥
 सब निर्दभ धर्मरत पुनी । नर अरु नारि चतुरसब गुनी ॥
 सब गुनग्य पंडित सब ग्यानी । सब कृतग्य नहि कपट सयानी॥

दो०—राम राज नभगेस सुनु सचराचर जग माहिं ।

काल कर्म सुभाव गुन कृत दुख काहुहि नाहिं ॥ २१ ॥

भूमि सप्त सागर मेखला । एक भूप रघुपति कोसला ॥
 भुअन अनेक रोम प्रति जासू । यह प्रभुता कछु बहुत न तासू ॥
 सो महिमा समुझत प्रभु केरी । यह बरनत हीनता घनेरी ॥
 सोउ महिमा खगेस जिन्ह जानी । फिरि एहिं चरित तिन्हहुँ रति मानी॥

सोउ जाने कर फल यह लीला । कहहिं महा मुनिबर दमसीला ॥
 राम राज कर सुख संपदा । बरनि न सकइ फनीस सारदा ॥
 सब उदार सब पर उपकारी । विप्र चरन सेवक नर नारी ॥
 एक नारि ब्रत रत सब झारी । ते मन बच क्रम पति हितकारी ॥

दो०—दंड जतिन्ह कर भेद जहँ नर्तक नृत्य समाज ।

जौतहु मनहि सुनिअ अस रामचंद्र के राज ॥ २२ ॥

कूलहिं फरहिं सदा तरु कानन । रहहिं एक सँग गजपंचानन ॥
 खग मृग सहज बधरु बिसराई । सबन्हि परस्पर प्रीति बढ़ाई ॥
 कूजहिं खग मृग नाना बृंदा । अभय चरहिं बन कगहिं अनंदा ॥
 सीतल सुरभि पवन बह मंदा । गुंजत अलि लै चलि मकरंदा ॥
 लता बिटप मार्गे मधु चवहीं । मन भावतो धेनु पय सवहीं ॥
 ससि संपन्न सदा रह धरनी । त्रेताँ भइ कृतजुग कै करनी ॥
 प्रगटीं गिरिन्ह बिबिधि मनि खानी । जगदातमा भूप जग जानी ॥
 सरिता सकल बहहिं बर बारी । सीतल अमल स्वाद सुखकारी ॥
 सागर निज मरजादाँ रहहीं । डारहिं रत्न तटन्हि नर लइहीं ॥
 सरसिज संकुल सकल तड़ागा । अति प्रसन्न दम दिसा बिभागा ॥

दो०—बिधु सहि पूर मयूखन्हि रवि तप जेतनेहि काज ।

मार्गे बारिद देहिं जल रामचंद्र के राज ॥ २३ ॥

कोटिन्ह बाजिमेध प्रभु कीन्है । दान अनेक द्विजन्ह कहँ दीन्है ॥
 श्रुति पथ पालक धर्म धुरंधर । गुनातीत अरु भोग पुरंदर ॥
 पति अनुकूल सदा रह मीता । मोभा खानि सुसील बिनीता ॥
 जानति कृपा सिंधु प्रभुताई । सेवति चरन कमल मन लाई ॥

जद्यपि गृहँ सेवक सेवकिनी । बिपुल सदा सेवा विधि गुनी ॥
 निज कर गृह परिचरजा करई । रामचंद्र आयसु अनुसरई ॥
 जेहि विधि कृपासिंधु सुख मानइ । सोइ कर भी सेवा विधि जानइ ॥
 कौसल्यादि सासु गृह माहीं । सेवइ सबन्हि मान मद नाहीं ॥
 उमा रमा ब्रह्मादि बंदिता । जगदंबा संततमनिदिता ॥

दो०—जासु कृपा कटाच्छु सुर चाहत चितव न सोइ ।

राम पदारविंद रति करति सुभावहि खोइ ॥ २४ ॥
 सेवहिं सानकूल सब भाई । रामचरनरति अति अधिकारि ॥
 प्रभु मुख कमल बिलोकत रहहीं । कबहुँ कृपाल हमहि कछु कहहीं ॥
 राम करहिं आतन्ह पर प्रीती । नाना भाँति सिखावहिं नीती ॥
 हरषित रहहिं नगर के लोगा । करहिं सकल सुरदुर्लभ भोगा ॥
 अहनि सि बिधिहि मनावत रहहीं । श्रीरघुबीर चरन रति चहहीं ॥
 दुइ सुत सुंदर सीताँ जाए । लव कुस बेद पुरानन्ह गाए ॥
 दोउ बिजई बिनई गुन मंदिर । हरि प्रतिबिंब मनहुँ अति सुंदर ॥
 दुइ दुइ सुत सब आतन्ह केरे । भए रूप गुन सील घनेरे ॥

दो०—ग्यान गिरा गोतीत अज माया मन गुन पार ।

सोइ सच्चिदानंद घन कर नर चरित उदार ॥ २५ ॥
 प्रातकाल सरऊ करि मञ्जन । बैठहिं सभौ संग द्विज सञ्जन ॥
 बेद पुरान बसिष्ट बखानहिं । सुनहिं राम जद्यपि सब जानहिं ॥
 अनुजन्ह संजुत भोजन करहीं । देखि सकल जननीं सुख भरहीं ॥
 भरत सश्रुहन दोनउ भाई । सहित पवनसुत उपवन जाई ॥
 बृह्महिं बैठि राम गुन गाहा । कह हनुमान सुमति अवगाहा ॥

सुनत बिमल गुन अति सुख पावहिं । बहुरि बहुरि करि बिनय कहावहिं
सब केँ गृह गृह होहिं पुराना । राम चरित पावन बिधि नाना ॥
नर अरु नारि राम गुन गानहिं । करहिं दिवस निसि जात न जानहिं
दो०—अवधपुरी बासिन्ह कर सुख संपदा समाज ।

सहस सेष नहिं कहि सकहिं जहँ नृप राम विराज ॥ २६ ॥
नारदादि सनकादि मुनीसा । दरसन लागि कोसलाधीसा ॥
दिन प्रति सकल अजोघ्या आवहिं । देखि नगरु बिरागु बिसरावहिं
जातरूप मनि रचित अटारीं । नाना रंग रुचिर गच ढारीं ॥
पुर चहुँ पास कोट अति सुंदर । रचे कँगूरा रंग रंग बर ॥
नव ग्रह निकर अनीक बनाई । जनु घेरी अमरावति आई ॥
महि बहु रंग रचित गच काँचा । जो बिलोकि मुनिबर मन नाचा ॥
धवल धाम ऊपर नभ चुंबत । कलस मनहुँ रबिससि दुति निंदत
बहु मनि रचित झरोखा भ्राजहिं । गृह गृह प्रति मनि दीप बिराजहिं
छं०—मनि दीप राजहिं भवन भ्राजहिं देहरीं बिद्रुम रची ।

मनि खंभ भीति बिरंचि बिरची कनक मनि मरकत खची ॥
सुंदर मनोहर मंदिरायत अजिर रुचिर फटिक रचे ।
प्रति द्वार द्वार कपाट पुरट बनाइ बहु बज्रन्हि खचे ॥
दो०—चारु चित्रसाला गृह गृह प्रति लिखे बनाइ ।
राम चरित जे निरख मुनि ते मन लेहिं चोराइ ॥ २७ ॥
सुमन बाटिका सबहिं लगाई । बिबिध भाँति करि जतन बनाई ॥
लता ललित बहु जाति सुहाई । फूलहिं सदा बसंत कि नाई ॥
गुंजत मधुकर मुखर मनोहर । मारुत त्रिविधि सदा बह सुंदर ॥

नानाखग बालकन्हि जिआए । बालत मधुर उड़ात सुहाए ॥
 मोर हंस सागस पारावत । भवननि पर सोभा अति पावत ॥
 जहँ तहँ देखहि निज परिछाहीं । बहु बिधि कूजहि नृत्य कराहीं ॥
 सुकसारिका पढ़ावहि बालक । कहहु गम रघुपति जन पालक ॥
 राज दुआर सकल बिधि चारु । बीथीं चौहट रुचिर बजारु ॥

छं०—बाजार रुचिर न बनइ बरनत वस्तु विनु गथ पाइए ।

जहँ भूप रमानिवास तहँ की संपदा किमि गाइए ॥

वैठे बजाज सराफ बनिक अनेक मनहुँ कुबेर ते ।

सब सुखी सब सचरित सुंदर नारि नर सिसु जरठ जे ॥

दो०—उत्तर दिसि सरजू बह निर्मल जल गंभीर ।

बाँधे घाट मनोहर स्वल्प पंक नहि तीर ॥ २८ ॥

दूर फराक रुचिर सो घाटा । जहँ जल पिअहि वाजि गज ठाटा
 पनिघट परम मनोहर नाना । तहाँ न पुरुष करहि अस्नाना ॥
 राजघाट सब बिधि सुंदर बर । मजहि तहाँ बरन चारिउ नर ॥
 तीर तीर भदेवन्ह के मंदिर । चहुँ दिसि तिन्ह के उपवन सुंदर
 कहूँ कहूँ मृगिता तीर उदासी । बसहि ग्यान रत मुनि संन्यासी ॥
 तीर तीर तुलसिका सुहाई । बृंद बृंद बहु मुनिन्ह लगाई ॥
 पुर सोभा कलु बगनिन जाई । बाहेर नगर परम रुचिगई ॥
 देखत पुरी अखिल अध भागा । बन उपवन वापिका तड़ागा ॥

छं०—बापी तड़ाग अनूप कूप मनोहरायत सोहहीं ।

सोपान सुंदर नोर निर्मल देखि सुर मुनि मोहहीं ॥

बहु रंग कंज अनेक खग कूजहिं मधुप गुंजारहीं ।
आराम रम्य पिकादि खग ख जनु पथिक हंकारहीं ॥
दो०—रमानाथ जहँ राजा सो पुर बरनि कि जाइ ।

अनिमादिक सुख संपदा रहीं अवध सब छाइ ॥ २९ ॥
जहँ तहँ नर रघुपति गुन गावहिं । बैठि परसपर इहइ सिखावहिं ॥
मजहु प्रनत प्रतिपालक रामहि । सोभा सील रूप गुन धामहि ॥
जलज बिलोचन स्यामल गातहि । पलक नयन इव सेवक त्रातहि ॥
धृत सर रुचिर चाप तूनीरहि । संत कंज बन रचिर नधीरहि ॥
काल कराल व्याल खगराजहि । नमत राम अकाम ममता जहि ॥
लोभ मोह मृगजूथ किरातहि । मनसिज करि हरि जन सुख दातहि
संसय सोक निबिड़ तम भानुहि । दनुज गहन घन दहन कुसानुहि
जनकसुता समेत रघुबीरहि । कस न भजहु भंजन भव भीरहि ॥
बहु वासना मसक हिम रासिहि । सदा एकरस अज अबिनासिहि ॥
मुनि रंजन भंजन महि भारहि । तुलसिदास के प्रभुहि उदारहि ॥
दो०—एहि विधि नगर नारि नर करहि राम गुन गान ।

सानुकूल सब पर रहहिं संतत कृपानिधान ॥ ३० ॥

जब ते राम प्रताप खगेसा । उदित भयउ अति प्रबल दिनेसा ॥
पूरि प्रकास रहेउ तिहुँ लोका । बहुतेन्ह सुख बहुतन मन सोका ॥
जिन्हहि सोक ते कहउँ बखानी । प्रथम अबिद्या निसा नसानी ॥
अघ उलूक जहँ तहाँ लुकाने । काम क्रोध कैरव सकुचाने ॥
बिबिध कर्म गुन काल सुभाऊ । ए चकोर सुख लहहिं न काँऊ ॥
मत्सर मान मोह मद चोरा । इन्ह करहुनर न कबनिहुँ ओरा ॥

धरम तड़ाग ग्यान बियाणा । ए पंकज बिकसे बिधि नाना ॥
सुख संतोष बिराग बिबेका । बिगत सोक ए कोक अनेका ॥

दो०—यह प्रताप रबि जाकें उर जब करइ प्रकास ।

पछिले बाढ़हिं प्रथम जे कहे ते पावहिं नास ॥ ३१ ॥

भ्रातन्ह सहित रामु एक बारा । संग परम प्रिय पवनकुमारा ॥
सुंदर उपवन देखन गए । सब तरु कुसुमित पल्लव नए ॥
जानि समय सनकादिक आए । तेज पुंज गुन सील सुहाए ॥
ब्रह्मानंद सदा लयलीना । देखत बालक बहु कालीना ॥
रूप धरें जनु चारिउ बेदा । समदरसी मुनि बिगत बिमेदा ॥
आसा बसन व्यसन यह तिन्हहीं । रघुपति चरित होइ तहँ सुनहीं ॥
तहाँ रहे सनकादि भवानी । जहँ घटसंभव मुनिबर ग्यानी ॥
राम कथा मुनिबर बहु बरनी । ग्यान जोनि पावक जिमि अरनी
दो०—देखि राम मुनि आवत हरषि दंडवत कीन्ह ।

स्वागत पूछि पीत पट प्रभु बैठन कहँ दीन्ह ॥ ३२ ॥

कीन्ह दंडवत तीनिउँ भाई । सहित पवनसुत सुख अधिकाई ॥
मुनि रघुपति छबि अतुल बिलोकी । भए मगन मन सके न रोकी ॥
स्यामल गात सरोरुह लोचन । सुंदरता मंदिर भव मोचन ॥
एकटक रहे निमेष न लावहिं । प्रभु कर जोरें सीस नवावहिं ॥
तिन्ह कै दसा देखि रघुबीरा । स्रवत नयन जल पुलक सरीरा ॥
कर गहि प्रभु मुनिबर बैठारे । परम मनोहर बचन उचारे ॥
आजु धन्य मैं सुनहु मुनीसा । तुम्हरेँ दरस जाहिं अघ खीसा ॥
बड़े भाग पाइब सतसंगा । बिनहिं प्रयास होहिं भव भंगा ॥

दो०—संत संग अपवर्ग कर कामी भव कर पंथ ।

कहहिं संत कवि कोबिद श्रुति पुरान सदग्रंथ ॥ ३३ ॥

सुनि प्रभु बचन हरषि मुनि चारी। पुलकित तन अस्तुति अनुसारी
जय भगवंत अनंत अनामय । अनघ अनेक एक करुनामय ॥
जय निर्गुन जय जय गुन सागर । सुख मंदिर सुंदर अति नागर ॥
जय इंदिरा रमन जय भूधर । अनुपम अज अनादि सोभाकर ॥
ग्यान निधान अमान मानप्रद । पावन सुजस पुरान बेद बद ॥
तग्य कृतग्य अग्यता भंजन । नाम अनेक अनाम निरंजन ॥
सर्व सर्वगत सर्व उरालय । बससि सदा हम कहूँ परिपालय
द्वंद्व विपति भव फंद विभंजय । हृदि बसि राम काम मद गंजय ॥

दो०—परमानंद कृपायतन मन परिपूरन काम ।

प्रेम भगति अनपायनी देहु हमहि श्रीराम ॥ ३४ ॥

देहु भगति रघुपति अति पावनि । त्रिविधि ताप भव दाप नसावनि
प्रनत काम सुरधेनु कलपतरु । होइ प्रसन्न दीजै प्रभु यह बरु ॥
भव बारिधि कुंभज रघुनायक । सेवत सुलभ सकल सुख दायक
मन संभव दारुन दुख दारय । दीनबंधु समता बिस्तारय ॥
आस त्रास हरिषादि निवारक । बिनय बिबेक बिरति बिस्तारक ॥
भूप मौलि मनि मंडन धरनी । देहि भगति संसृति सरि तरनी ॥
मुनि मन मानस हंस निरंतर । चरन कमल बंदित अज संकर ॥
रघुकुल केतु सेतु श्रुति रच्छक । काल करम सुभाउ गुन भच्छक ॥
तारन तरन हरन सब दूषन । तुलसिदास प्रभु त्रिभुवन भूषन ॥

दो०—बार बार अस्तुति करि प्रेम सहित सिरु नाइ ।

ब्रह्म भवन सनकादि गे अति अभीष्ट बर पाइ ॥ ३५ ॥
सनकादिक बिधि लोक सिधाए । भ्रातन्ह राम चरन सिरु नाए ॥
पूछत प्रभुहि सकल सकुचाहीं । चितवहिं सब मारुतसुत पाहीं ॥
सुनी चहहिं प्रभु मुख कै बानी । जो सुनि होइ सकल भ्रम हानी ॥
अंतरजामी प्रभु सभ जाना । बूझत कहहु काह हनुमाना ॥
जोरि पानि कह तब हनुमंता । सुनहु दीनदयाल भगवंता ॥
नाथ भरत कछु पूँछन चहहीं । प्रस्न करत मन सकुचत अहहीं ॥
तुम्ह जानहु कपि मोर सुभाऊ । भरतहि मोहि कछु अंतर काऊ ॥
सुनि प्रभु बचन भरत गहे चरना । सुनहु नाथ प्रनतारति हरना ॥

दो०—नाथ न मोहि संदेह कछु सपनेहुँ सोक न मोह ।

केवल कृपा तुम्हारिहि कृपानंद संदोह ॥ ३६ ॥
करउँ कृपानिधि एक ढिठाई । मैं सेवक तुम्ह जन सुखदाई ॥
संतन्ह कै महिमा रघुराई । बहु बिधि बेद पुरानन्ह गाई ॥
श्रीमुख तुम्ह पुनि कीन्ह बड़ाई । तिन्ह पर प्रभुहि प्रीति अधिकाई
सुना चहउँ प्रभु तिन्ह कर लच्छन । कृपासिंधु गुन ग्यान बिचच्छन
संत असंत मेद बिलगाई । प्रनतपाल मोहि कहहु बुझाई ॥
संतन्ह के लच्छन सुनु भ्राता । अगनित श्रुति पुरान बिख्याता
संत असंतन्हि कै असि करनी । जिमि कुठार चंदन आचरनी ॥
काटइ परसु मलय सुनु भाई । निज गुन देइ सुगंध बसाई ॥

दो०—ताते सुर सीसन्ह चढ़त जग बल्लभ श्रीखंड ।

अनल दाहि पीटत घनहिं परसु बदन यह दंड ॥ ३७ ॥

विषय अलंपट सील गुनाकर । पर दुख दुख सुख सुख देखे पर ॥
 सम अभूतरिपु बिमद बिरागी । लोभामरष हरष भय त्यागी ॥
 कोमलचित दीनन्ह पर दाया । मन बच क्रम मम भगति अमाया
 सबहि मानप्रद आपु अमानी । भरत प्रान सम मम ते प्रानी ॥
 बिगत काम मम नाम परायन । सांति बिरति बिनती मुदितायन
 सीतलता सरलता मयत्री । द्विज पद प्रीति धर्म जनयत्री ॥
 ए सब लच्छन बसहिं जासु उर । जानेहु तात संत संतत फुर ॥
 सम दम नियम नीति नहिं डोलहिं । परुष बचन कबहुँ नहिं बोलहिं

दो०—निंदा अस्तुति उभय सम ममता मम पद कंज ।

ते सज्जन मम प्रानप्रिय गुन मंदिर सुख पुंज ॥ ३८ ॥

सुनहु असंतन्ह केर सुभाऊ । भूलेहुँ संगति करिअ न काऊ ॥
 तिन्ह कर संग सदा दुखदाई । जिमि कपिलहि घालइ हरहाई ॥
 खलन्ह हृदयँ अति ताप बिसेषी । जरहिं सदा पर संपति देखी ॥
 जहँ कहूँ निंदा सुनहिं पराई । हरषहिं मनहुँ परी निधि पाई ॥
 काम क्रोध मद लोभ परायन । निर्दय कपटी कुटिल मलायन ॥
 बयरु अकारन सब काहू सों । जो कर हित अनहित ताहू सों ॥
 झूठइ लेना झूठइ देना । झूठइ भोजन झूठ चबेना ॥
 बोलहिं मधुर बचन जिमि मोरा । खाइ महा अहि हृदय कठोरा ॥

दो०—पर द्रोही पर दार रत पर धन पर अपबाद ।

ते नर पाँवर पापमय देह धरें मनुजाद ॥ ३९ ॥

लोभइ ओढ़न लोभइ डासन । सिस्नोदर पर जमपुर त्रासन ॥
 काहू की जौं सुनहिं बड़ाई । खास लेहिं जनुजूड़ी आई ॥

जब काहू कै देखहिं बिपती । सुखी भए मानहुँ जग नृपती ॥
 स्वारथ रत परिवार विरोधी । लंपट काम लोभ अति क्रोधी ॥
 मातु पिता गुर बिप्र न मानहिं । आपु गए अरु घालहिं आनहिं ॥
 करहिं मोह बस द्रोह परावा । संत संग हरि कथा न भावा ॥
 अवगुन सिंधु मंदमति कामी । बेद बिदूषक परधन स्वामी ॥
 बिप्र द्रोह पर द्रोह बिसेषा । दंभ कपट जियँ धरें सुबेषा ॥

दो०—ऐसे अधम मनुज खल कृतजुग त्रेताँ नाहिं ।

द्वापर कछुक बृंद बहु होइहहिं कलिजुग माहिं ॥ ४० ॥

पर हित सरिस धर्म नहिं भाई । पर पीड़ा सम नहिं अधमाई ॥
 निर्णय सकल पुगन बेद कर । कहेउँ तात जानहिं कोबिद नर ॥
 नर सरीर धरि जे पर पीरा । करहिं ते सहहिं महा भव भीरा ॥
 करहिं मोहबस नर अध नाना । स्वारथ रत परलोक नसाना ॥
 कालरूप तिन्ह कहँ मैं भ्राता । सुभ अरु असुभ कर्म फल दाता ॥
 अस बिचारि जे परम सयाने । भजहिं मोहि संसृत दुख जाने ॥
 त्यागहिं कर्म सुभासुभ दायक । भजहिं मोहि सुर नर मुनिनायक ॥
 संत असेतन्ह के गुन भाषे । ते न परहिं भव जिन्ह लखि राखे ॥

दो०—सुनहु तात मायाकृत गुन अरु दोष अनेक ।

गुन यह उभय न देखिअहिं देखिअ सो अबिबेक ॥ ४१ ॥

श्रीमुख बचन सुनत सब भाई । हरषे प्रेम न हृदयँ समाई ॥
 करहिं बिनय अति बारहिं बारा । हनूमान हियँ हरष अपारा ॥
 पुनि रघुपति निज मंदिर गए । एहि बिधि चरित करत नित नए ॥
 बार बार नारद मुनि आवहिं । चरित पुनीत राम के गावहिं ॥

नित नव चरित देखि मुनि जाहीं । ब्रह्मलोक सब कथा कहाहीं ॥
मुनि विगंचि अतिसय सुख मानहिं । पुनि पुनि तात करहु गुन गानहिं
सनकादिक नारदहि सराहहिं । जद्यपि ब्रह्म निरत मुनि आहहिं ॥
मुनि गुन गान समाधि बिसारी । सादर सुनहिं परम अधिकारी ॥

दो०—जीवनमुक्त ब्रह्मपर चरित सुनहिं तजि ध्यान ।

जे हरि कथाँ न करहि रति तिन्ह के हिय पाषाण ॥ ४२ ॥

एक बार रघुनाथ बोलाए । गुर द्विज पुरवासी सब आए ॥
बैठे गुरु मुनि अरु द्विज सज्जन । बोले बचन भगत भव भंजन ॥
सुनहु सकल पुरजन मम बानी । कहउँ न कछु ममता उर आनी ॥
नहिं अनीति नहिं कछु प्रभुताई । सुनहु करहु जो तुम्हहि सोहाई ॥
सोइ सेवक प्रियतम मम सोई । मम अनुसासन मानै जोई ॥
जौं अनीति कछु भाषौं भाई । तौ मोहि बरजहु भय बिसराई ॥
बढ़ें भाग मानुष तनु पावा । सुर दुर्लभ सब ग्रंथन्हि गावा ॥
साधन धाम मोच्छ कर द्वारा । पाइ न जेहि परलोक सँवारा ॥

दो०—सो परत्र दुख पावइ सिर धुनि धुनि पछिताइ ।

कालहि कर्महि ईस्वरहि मिथ्या दोस लगाइ ॥ ४३ ॥

एहि तन कर फल बिषय न भाई । स्वर्गउ स्वल्प अंत दुखदाई ॥
नर तनु पाइ बिषय मन देहीं । पलटि सुधा ते सठ बिष लेहीं ॥
ताहि कबहुँ भल कहइ न कोई । गुंजा ग्रहइ परस मनि खोई ॥
आकर चारि लच्छ चौरासी । जोनि भ्रमत यह जिव अग्निनासी
फिरत सदा माया कर प्रेरा । काल कर्म सुभाव गुन घेरा ॥
कबहुँक करि करुना नर देही । देत ईस बिनु हेतु सनेही ॥

नर तनु भव बारिधि कहूँ बेरो । सन्मुख मरुत अनुग्रह मेरो ॥
करनधार सदगुर दढ़ नावा । दुर्लभ साज सुलभ करि पावा ॥

दो०—जो न तरै भव सागर नर समाज अस पाइ ।

सो कृत निंदक मंदमति आत्माहन गति जाइ ॥ ४४ ॥

जौ परलोक इहाँ सुख चहहू । मुनि मम बचन हृदयँ दढ़ गहहू ॥
सुलभ सुखद मारग यह भाई । भगति मोरि पुरान श्रुति गाई ॥
ग्यान अगम प्रत्यूह अनेका । साधन कठिन न मन कहूँ टेका ॥
करत कष्ट बहु पावइ कोऊ । भक्ति हीन मोहि प्रिय नहिँ सोऊ ॥
भक्ति सुतंत्र सकल सुख खानी । बिनु सतसंग न पावहिँ प्रानी ॥
पुन्य पुंज बिनु मिलहिँ न संता । सतसंगति संसृति कर अंता ॥
पुन्य एक जग महूँ नहिँ दूजा । मन क्रम बचन बिप्र पद पूजा ॥
सानुकूल तेहि पर मुनि देवा । जो तजि कपटु करइ द्विज सेवा ॥

दो०—औरउ एक गुपुत मत सबहि कहउँ कर जोरि ।

संकर भजन बिना नर भगति न पावइ मोरि ॥ ४५ ॥

कहहु भगति पथ कवन प्रयासा । जोग नमख जप तप उपवासा ॥
सरल सुभावन मन कुटिलाई । जथा लाभ संतोष सदाई ॥
मोर दास कहाइ नर आसा । करइ तौ कहहु कहा बिखासा ॥
बहुत कहउँ का कथा बढ़ाई । एहि आचरन बस्य मै भाई ॥
बैर न बिग्रइ आस न त्रासा । सुखमय ताहि सदा सब आसा ॥
अनारंभ अनिकेत अमानी । अनघ अरोष दच्छ बिग्यानी ॥
प्रीति सदा सज्जन संसर्गा । तन सम बिषय स्वर्ग अपवर्गा ॥
भगति पच्छ हठ नहिँ सठताई । दुष्ट तर्क सब दूरि बढाई ॥

दो०—मम गुन ग्राम नाम रत गत ममता मद मोह ।

ता कर सुख सोइ जानइ परानंद संदोह ॥ ४६ ॥

सुनत सुधासम बचन राम के । गहे सबनिपद कृपाधाम के ॥
जननि जनक गुर बंधु हमारे । कृपा निधान प्रान ते प्यारे ॥
तनु धनु धाम राम हितकारी । सब विधि तुम्ह प्रनतारति हारी ॥
असि सिखतुम्ह बिनु देइ न कोऊ । मातु पिता स्वारथ रत ओऊ ॥
हेतु रहित जग जुग उपकारी । तुम्ह तुम्हार सेवक असुरारी ॥
स्वारथ मीत सकल जग माहीं । सपनेहुँ प्रभु परमारथ नाहीं ॥
सब के बचन प्रेम रस साने । सुनि रघुनाथ हृदयँ हरषाने ॥
निज निज गृह गए आयसु पाई । बरनत प्रभु बतकही सुहाई ॥

दो०—उमा अवधवासी नर नारि कृतारथ रूप ।

ब्रह्म सच्चिदानंद धन रघुनायक जहाँ भूप ॥ ४७ ॥

एक बार बसिष्ट मुनि आए । जहाँ राम सुखधाम सुहाए ॥
अति आदर रघुनायक कीन्हा । पद पस्वारि पादोदक लीन्हा ॥
राम सुनहु मुनि कह कर जोरी । कृपासिंधु बिनती कछु मोरी ॥
देखि देखि आचरन तुम्हारा । होत मोह मम हृदयँ अपारा ॥
महिमा अमिति बेद नहिँ जाना । मैं केहि भाँति कहउँ भगवाना ॥
उपरोहित्य कर्म अति मंदा । बेद पुरान सुमृति कर निंदा ॥
जब न लेउँ मैं तब विधि मोही । कहा लाभ आगेँ सुत तोही ॥
परमात्मा ब्रह्म नर रूपा । होइहि रघुकुल भूषन भूषा ॥

दो०—तब मैं हृदयँ बिचारा जोग जग्य व्रत दान ।

जा कहूँ करिअ सो पैहउँ धर्म न एहि सम आन ॥ ४८ ॥

जप तप नियम जोग निज धर्मा । श्रुतिसंभव नाना सुभ कर्मा ॥
 ग्यान दया दम तीरथ मज्जन । जहँ लगि धर्म कहत श्रुति सज्जन ॥
 आगम निगम पुरान अनेका । पढ़े सुने कर फल प्रभु एका ॥
 तब पद पंकज प्रीति निरंतर । सब साधन कर यह फल सुंदर ॥
 छूटइ मल कि मलहि के धोएँ । घृत कि पाव कोइ बारि बिलोएँ ॥
 प्रेम भगति जल बिनु रघुराई । अभि अंतर मल कबहुँ न जाई ॥
 सोइ सर्वग्य तग्य सोइ पंडित । सोइ गुन गृह बिग्यान अखंडित ॥
 दच्छ सकल लच्छन जुत सोई । जाके पद सरोज रति होई ॥

दो०—नाथ एक बर मागउँ राम कृपा करि देहु ।

जन्म जन्म प्रभु पद कमल कबहुँ घटै जनि नेहु ॥ ४९ ॥
 अस कहि मुनि बसिष्ट गृह आए । कृपासिंधु के मन अति भाए ॥
 हनुमान भरतादिक भ्राता । संग लिए सेवक सुखदाता ॥
 पुनि कृपाल पुर बाहेर गए । गजरथ तुरग मगावत भए ॥
 देखि कृपा करि सकल सराहे । दिए उचित जिन्ह जिन्ह तेइ चाहे ॥
 हरन सकल भ्रम प्रभु भ्रम पाई । गए जहाँ सीतल अबँराई ॥
 भरत दीन्ह निज बसन डसाई । बैठे प्रभु सेवहिं सब भाई ॥
 मारुत सुत तब मारुत करई । पुलक बपुष लोचन जल भरई ॥
 हनुमान सम नहिं बड़ भागी । नहिं कोउ राम चरन अनुरागी ॥
 गिरिजा जासु प्रीति सेवकाई । बार बार प्रभु निज मुख गाई ॥
 दो०—तेहि अवसर मुनि नारद आए करतल बीन ।

गावन लगे राम कल कीरति सदा नवीन ॥ ५० ॥

मामबलोक्य पंकज लोचन । कृपा बिलोकनि सोच बिमोचन ॥

नील तामरस स्याम काम अरि । हृदय कंज मकरंद मधुप हरि ॥
जातुधान बरूथ बल भंजन । मुनि सज्जन रंजन अघ गंजन ॥
भूसुर ससि नव बृंद बलाहक । असरन सरन दीन जन गाहक ॥
भुज बल बिपुल भार महि खंडित । खर दूपन बिराध बध पंडित ॥
रावनारि सुखरूप भूपवर । जय दसरथ कुल कुमुद सुधाकर ॥
सुजस पुरान बिदित निगमागम । गावत सुर मुनि संत समागम ॥
कारुणीक व्यलीक मद खंडन । सब बिधि कुसल कोसला मंडन ॥
कलि मल मथन नाम ममताहन । तुलसिदास प्रभु पाहि प्रनत जन ॥

दो०—प्रेम सहित मुनि नारद बरनि राम गुन ग्राम ।

सोभासिधु हृदयँ धरि गए जहाँ बिधि धाम ॥ ५१ ॥

गिरिजा सुनहु बिसद यह कथा । मैं सब कही मोरि मति जथा ॥
राम चरित सत कोटि अपारा । श्रुति सारदा न बरनै पारा ॥
राम अनंत अनंत गुनानी । जन्म कर्म अनंत नामानी ॥
जल सीकर महिरज गनि जाहीं । रघुपति चरित न बरनि सिराहीं ॥
बिमल कथा हरि पद दायनी । भगति होइ सुनि अनपायनी ॥
उमा कहिउँ सब कथा सुहाई । जो भुसुंडि खगपतिहि सुनाई ॥
कलुक राम गुन कहेउँ बखानी । अब का कहौं सो कहहु भवानी ॥
सुनि सुभ कथा उमा हरषानी । बोली अति विनीत मृदु बानी ॥
धन्य धन्य मैं धन्य पुरारी । सुनेउँ राम गुन भव भय हारी ॥

दो०—तुम्हरी कृपाँ कृपायतन अब कृतकृत्य न मोह ।

जानेउँ राम प्रताप प्रभु चिदानंद संदोह ॥ ५२ (क) ॥

नाथ तवानन ससि खवत कथा सुधा रघुबीर ।

श्रवन पुटन्हि मन पान करि नहिं अघात मतिधीर ॥ ५२ (ख) ॥

राम चरित जे सुनत अघाहीं । रस बिसेष जाना तिन्ह नाहीं ॥
जीवनमुक्त महामुनि जेऊ । हरि गुन सुनहिं निरंतर तेऊ ॥
भव सागर चह पारजो पावा । राम कथा ता कहँ दृढ़ नावा ॥
बिषइन्ह कहँ पुनि हरि गुन ग्रामा । श्रवन सुखद अरु मन अभिरामा ॥
श्रवनवंत अस को जग माहीं । जाहि न रघुपति चरित सोहाहीं ॥
ते जड़ जीव निजात्मक घाती । जिन्हहि न रघुपति कथा सोहाती ॥
हरिचरित्र मानस तुम्ह गावा । सुनि मैं नाथ अमिति सुख पावा ॥
तुम्ह जो कही यह कथा सुहाई । कागभसुंड़ि गरुड़ प्रति गाई ॥

दो०—बिरति ग्यान बिग्यान दृढ़ राम चरन अति नेह ।

बायस तन रघुपति भगति मोहि परम संदेह ॥ ५३ ॥

नर सहस्र महँ सुनहु पुरारी । कोउ एक होइ धर्म ब्रतधारी ॥
धर्म सील कोटिक महँ कोई । बिषय बिमुख बिराग रत होई ॥
कोटि बिरक्त मध्य श्रुति कहई । सम्यक ग्यान सकृत् कोउ लहई ॥
ग्यानवंत कौटिक महँ कोऊ । जीवनमुक्त सकृत् जग सोऊ ॥
तिन्ह सहस्र महँ सब सुख खानी । दुर्लभ ब्रह्म लीन बिग्यानी ॥
धर्मसील बिरक्त अरु ग्यानी । जीवनमुक्त ब्रह्मपर प्राणी ॥
सब ते सो दुर्लभ सुरराया । राम भगति रत गत मद माया ॥
सो हरि भगति काग किमि पाई । बिस्वनाथ मोहि कहहु बुझाई ॥

दो०—राम परायन ग्यान रत गुनागार मति धीर ।

नाथ कहहु केहि कारन पायउ काक सरीर ॥ ५४ ॥

यह प्रभु चरित पवित्र सुहावा । कहहु कृपाल काग कहँ पावा॥
 तुम्ह केहि भाँति सुना मदनारी । कहहु मोहि अति कौतुक भारी॥
 गरुड़ महाभ्यानी गुन रासी । हरि सेवक अति निकट निवासी
 तेहिं केहि हेतु काग सन जाई । सुनी कथा सुनि निकर बिहाई॥
 कहहु कवन बिधि भा संवादा । दोउ हरिभगत काग उरगादा॥
 गौरि गिरा सुनि सरल सुहाई । बोले सिव सादर सुख पाई॥
 धन्य सती पावन मति तोरी । रघुपति चरन प्रीति नहिं थोरी॥
 सुनहु परम पुनीत इतिहासा । जो सुनि सकल लोक भ्रम नासा॥
 उपजइ राम चरन बिखासा । भव निधि तर नर बिनहिं प्रयासा

दो०—ऐसिअ प्रसन्न बिहंगपति कीन्हि काग सन जाइ ।

सो सब सादर कहिहउँ सुनहु उमा मन लाइ ॥ ५५ ॥

मैं जिमि कथा सुनी भव मोचनि । सो प्रसंग सुनु सुमुखि सुलोचनि
 प्रथम दच्छ गृह तव अवतारा । सती नाम तब रहा तुम्हारा॥
 दच्छ जग्य तव भा अपमाना । तुम्ह अति क्रोध तजे तब प्राना॥
 मम अनुचरन्ह कीन्ह मख भंगा । जानहु तुम्ह सो सकल प्रसंगा॥
 तब अति सोच भयउ मन मोरें । दुखी भयउँ बियोग प्रिय तोरें॥
 सुंदर बन गिरि सरित तड़ागा । कौतुक देखत फिरउँ बेरागा॥
 गिरि सुमेर उत्तर दिसि दूरी । नील सैल एक सुंदर भूरी॥
 तासु कनकमय सिखर सुहाए । चारि चारु मोरे मन भाए॥
 तिन्ह पर एक एक बिटप बिसाला । बढे पीपर पाकरी रसाला॥
 सैलोपरि सर सुंदर सोहा । मनि सोपान देखि मन मोहा॥

दो०—सीतल अमल मधुर जल जलज विपुल बहुरंग ।

कूजत कल रव हंस गन गुंजत मंजुल भृंग ॥ ५६ ॥

तेहिं गिरि रुचिर बसइ खग सोई । तासु नास कल्पांत न होई ॥
 माया कृत गुन दोष अनेका । मोह मनोज आदि अबिबेका ॥
 रहे व्यापि समस्त जग माहीं । तेहि गिरि निकट कबहुँ नहिं जाहीं
 तहँ बसि हरिहि भजइ जिमि कागा । सो सुनु उमा सहित अनुरागा ॥
 पीपर तरु तर ध्यान सो धरई । जाप जग्य पाकरि तर करई ॥
 आँव छाँह कर मानस पूजा । तजि हरि भजनु काजु नहिं दूजा
 बर तर कह हरि कथा प्रसंगा । आवहिं सुनहिं अनेक बिहंगा ॥
 राम चरित बिचित्र बिधि नाना । प्रेम सहित कर सादर गाना ॥
 सुनहिं सकल मति बिमल भराला । बसहिं निरंतर जे तेहिं ताला ॥
 जब मैं जाइ सो कौतुक देखा । उर उपजा आनंद बिसेषा ॥

दो०—तब कछु काल मराल तनु धरि तहँ कीन्ह निवास ।

सादर सुनि रघुपति गुन पुनि आयउँ कैलास ॥ ५७ ॥

गिरिजा कहेउँ सो सब इतिहासा । मैं जेहि समय गयउँ खग पासा ॥
 अब सो कैथा सुनहु जेहि हेतू । गयउ काग पहिं खग कुल केतू ॥
 जब रघुनाथ कीन्हि रन क्रीड़ा । समुझत चरित होति मोहि ब्रीड़ा
 इंद्रजीत कर आपु बँधायो । तब नारद मुनि गरुड़ पठायो ॥
 बंधन काटि गयो उरगादा । उपजा हृदयँ प्रचंड बिषादा ॥
 प्रभु बंधन समुझत बहु भाँती । करत बिचार उरग आराती ॥
 व्यापक ब्रह्म विरज वागीसा । माया मोह पार परमीसा ॥
 सो अवतार सुनेउँ जग माहीं । देखेउँ सो प्रभाव कछु नाहीं ॥

दो०—भव बंधन ते छूटहिं नर जपि जा कर नाम ।

खर्व निसाचर बाँधेउँ नागपास सोइ राम ॥ ५८ ॥

नाना भाँति मनहि समुझावा । प्रगट न ग्यान हृदयँ भ्रम छावा ॥
खेद खिन्न मन तर्क बढ़ाई । भयउ मोहबस तुम्हरिहिं नाई ॥
ब्याकुल गयउ देवरिषि पार्हीं । कहेसि जो संसय निज मन माहीं ॥
सुनि नारदहि लागि अति दाया । सुनु खग प्रबल राम कै माया ॥
जो ग्यानिन्ह कर चित अपहरई । बरिआई बिमोह मन करई ॥
जेहिं बहु बार नचावा मोही । सोइ ब्यापी बिहंगपति तोही ॥
महामोह उपजा उर तोरें । मिटिहि न बेगि कहें खग मोरें ॥
चतुरानन पहिं जाहु खगेसा । सोइ करेहु जेहि होइ निदेसा ॥

दो०—अस कहि चले देवरिषि करत राम गुन गान ।

हरि माया बल बरनत पुनि पुनि परम सुजान ॥ ५९ ॥

तब खगपति बिरंचि पहिं गयऊ । निज संदेह सुनावत भयऊ ॥
सुनि बिरंचि रामहि सिरु नावा । समुझि प्रताप प्रेम अति छावा ॥
मन महुँ करइ बिचार बिधाता । माया बस कबि कोबिद ग्याता ॥
हरि माया कर अमिति प्रभावा । बिपुल बार जेहिं मोहि नचावा ॥
अग जगमय जग मम उपराजा । नहिं आचरज मोह खगराजा ॥
तब बोले बिधि गिरा सुहाई । जान महेस राम प्रभुताई ॥
बैनतेय संकर पहिं जाहु । तात अनत पूछहु जनि काहु ॥
तहँ होइहि तव संसय हानी । चलेउ बिहंग सुनत बिधि बानी ॥

दो०—परमातुर बिहंगपति आयउ तब मो पास ।

जात रहेउँ कुबेर गृह रहिहु उमा कैलास ॥ ६० ॥

तेहिं मम पद सादर सिरु नावा । पुनि आपन संदेह सुनावा॥
 सुनि ता करि बिनती मृदु बानी । प्रेम सहित मैं कहेउँ भवानी ॥
 मिलेउ गरुड़ मारग महँ मोही । कवन भाँति समुझावौं तोही ॥
 तबहिं होइ सब संसय भंगा । जब बहु काल करिअ सतसंगा॥
 सुनिअ तहाँ हरि कथा सुहाई । नाना भाँति मुनिन्ह जो गाई ॥
 जेहि महुँ आदि मध्य अवसाना । प्रभु प्रतिपाद्य राम भगवाना॥
 नित हरि कथा होत जहँ भाई । पठवउँ तहाँ सुनहु तुम्ह जाई॥
 जाइहि सुनत सकल संदेहा । राम चरन होइहि अति नेहा ॥

दो०—बिनु सतसंग न हरि कथा तेहि बिनु मोह न भाग ।

मोह गएँ बिनु राम पद होइ न दृढ़ अनुराग ॥ ६१ ॥

मिलहिं न रघुपति बिनु अनुरागा । किएँ जोग तप ग्यान बिरागा॥
 उत्तर दिसि सुंदर गिरि नीला । तहँ रह काकभुसुंडि सुसीला॥
 राम भगति पथ परम प्रबीना । ग्यानी गुन गृह बहु कालीना॥
 राम कथा सो कहइ निरंतर । सादर सुनहिं विविध बिहंगबर॥
 जाइ सुनहु तहँ हरि गुन भूरी । होइहि मोह जनित दुख दूरी॥
 मैं जब तेहि सब कहा बुझाई । चलेउ हरषि मम पद सिरु नाई॥
 ताते उमा न मैं समुझावा । रघुपति कृपाँ मरमु मैं पावा ॥
 होइहि कीन्ह कवहुँ अभिमाना । सो खोवै चह कृपानिधाना ॥
 कछु तेहि ते पुनि मैं नहिं राखा । समुझइ खग खगही कै भाषा॥
 प्रभु माया बलवंत भवानी । जाहि न मोह कवन अस ग्यानी॥

दो०—न्यानी भगत सिरोमनि त्रिभुवनपति कर जान ।

ताहि मोह माया नर पावैर करहि गुमान ॥६२(क)॥

मासपारायण, अट्टाईसवाँ विश्राम

सिव बिरंचि कहूँ मोहइ को हैं बपुरा आन ।

अस जियँ जानि भजहिँ मुनि मायापति भगवान ॥६२(ख)॥

गयउ गरुड़ जहँ बसइ भुसुंडा । मति अकुंठ हरि भगति अखंडा ॥

देखि सैल प्रसन्न मन भयऊ । माया मोह सोच सब गयऊ ॥

करि तड़ाग मज्जन जलपाना । बट तर गयउ हृदयँ हरषाना ॥

बृद्ध बृद्ध बिहंग तहँ आए । सुनै राम के चरित सुहाए ॥

कथा अरंभ करै सोइ चाहा । तेही समय गयउ खगनाहा ॥

आवत देखि सकल खजराजा । हरषेउ बायस सहित समाजा ॥

अति आदर खगपति कर कीन्हा । स्वागत पूछि सुआसन दीन्हा ॥

करि पूजा समेत अनुरागा । मधुर बचन तब बोलेउ कागा ॥

दो०—नाथ कृतारथ भयउँ मैं तव दरसन खगराज ।

आयसु देहु सो करौँ अब प्रभु आयहु केहि काज ॥६३(क)॥

सदा कृतारथ रूप तुम्ह कह मृदु बचन खगेस ।

जेहि कै अस्तुति सादर निज मुख कीन्हि महेस ॥६३(ख)॥

सुनहु तात जेहि कारन आयउँ । सो सब भयउ दरस तव पायउँ ॥

देखि परम पावन तव आश्रम । गयउ मोह संसय नाना भ्रम ॥

अब श्रीराम कथा अति पावनि । सदा सुखद दुख पुंन नसावनि ॥

सादर तात सुनावहु मोही । बार बार बिनवउँ प्रभु तोही ॥

सुनत गरुड़ कै गिरा बिनीता । सरल सुप्रेम सुखद सुपुनीता ॥

भयउ तासु मन परम उछाहा । लाग कहै रघुपति गुन गाहा ॥
 प्रथमहिं अति अनुराग भवानी । रामचरित सर कहेसि बखानी ॥
 पुनि नारद कर मोह अपारा । कहेसि बहुरि रावन अवतारा ॥
 प्रभु अवतार कथा पुनि गाई । तब सिसुचरित कहेसि मन लाई ॥

दो०—बालचरित कहि बिबिधि बिधि मन महँ परम उछाह ।

रिषि आगवन कहेसि पुनि श्री रघुबीर बिबाह ॥ ६४ ॥

बहुरि राम अभिषेक प्रसंगा । पुनि नृप बचन राज रस भंगा ॥
 पुरबासिन्ह कर बिरह बिषादा । कहेसि राम लछिमन संवादा ॥
 बिपिन गवन केवट अनुरागा । सुरसरि उतरि निवास प्रयागा ॥
 बालमीक प्रभु मिलन बखाना । चित्रकूट जिमि बसे भगवाना ॥
 सचिवागवन नगर नृप मरना । भरतागवन प्रेम बहु बरना ॥
 करि नृप क्रिया संग पुरबासी । भरत गए जहँ प्रभु सुखरासी ॥
 पुनि रघुपति बहुबिधि समुझाए । लै पादुका अवधपुर आए ॥
 भरत रहनि सुरपति सुत करनी । प्रभु अरु अत्रि भेंट पुनि बरनी ॥

दो०—कहि बिराध बध जेहि बिधि देह तजी सरभंग ।

भरनि सुतीछन प्रीति पुनि प्रभु अगस्ति सतसंग ॥ ६५ ॥

कहि दंडक बन पावनताई । गीध मइत्री पुनि तेहिं गाई ॥
 पुनि प्रभु पंचवटीं कृत बासा । मंजी सकल मुनिन्ह की त्रासा ॥
 पुनि लछिमन उपदेस अनूपा । सूपनखा जिमि कीन्हि कुरूपा ॥
 खर, दूषन बध बहुरि बखाना । जिमि सब मरगु दसानन जाना ॥
 दसकंधर मारीच बतकही । जेहि बिधि भई सो सब तेहिं कही ॥
 पुनि माया सीता कर हरना । श्रीरघुबीर बिरह कछु बरना ॥

पुनि प्रभु गीध क्रिया जिमि कीन्ही । बधि कबंध सबरिहि गति दीन्ही
बहुरि बिरह बरनत रघुबीरा । जेहि बिधि गए सरोबर तीरा ॥

दो०—प्रभु नारद संवाद कहि मारुति मिलन प्रसंग ।

पुनि सुग्रीव मिताई बालि प्रान कर भंग ॥६६(क)॥

कपिहि तिलक करि प्रभु कृत सैल प्रवरषन बास ।

बरनन वर्षा सरद अरु राम रोष कपि त्रास ॥६६(ख)॥

जेहि बिधि कपिपति कीस पठाए । सीता खोज सकल दिसि धाए ॥
बिबर प्रबेस कीन्ह जेहि भाँती । कपिन्ह बहोरि मिला संपाती ॥
सुनि सब कथा समीरकुमारा । नाघत भयउ पयोधि अपारा ॥
लंकाँ कपि प्रबेस जिमि कीन्हा । पुनि सीतहि धीरजु जिमि दीन्हा
बन उजारि रावनहि प्रबोधी । पुर दहि नाघेउ बहुरि पयोधी ॥
आए कपि सब जहँ रघुराई । बैदेही की कुसल सुनाई ॥
सेन समेति जथा रघुबीरा । उतरे जाइ बारिनिधि तीरा ॥
मिला बिभीषन जेहि बिधि आई । सागर निग्रह कथा सुनाई ॥

दो०—सेतु बाँधि कपि सेन जिमि उतरी सागर पार ।

गयउ बसीठी वीरवर जेहि बिधि बालिकुमार ॥६७(क)॥

निसिचर कीस लराई बरनिसि बिबिधि प्रकार ।

कुंभकरन घननाद कर बल पौरुष संघार ॥६७(ख)॥

निसिचर निकर मरन बिधि नाना । रघुपति रावन समर बखाना ॥
रावन बध मंदोदरि सोका । राज बिभीषन देव असोका ॥
सीता रघुपति मिलन बहोरी । सुरन्ह कीन्हि अस्तुति कर जोरी
पुनि पुष्पक चढ़ि कपिन्ह समेता । अवध चले प्रभु कृपा निकेता ॥

जेहि बिधि राम नगर निज आए । बायस बिसद चरित सब गाए ॥
 कहेसि बहोरि राम अभिषेका । पुर बरनत नृपनीति अनेका ॥
 कथा समस्त भुसुंड बखानी । जो मैं तुम्ह सन कही भवानी ॥
 सुनि सब राम कथा खगनाहा । कहत बचन मन परम उछाहा ॥
 सो०—गयउ मोर संदेह सुनेउँ सकल रघुपति चरित ।

भयउ राम पद नेह तव प्रसाद बायस तिलक ॥६८(क)॥

मोहि भयउ अति मोह प्रभु बंधन रन महुँ निरखि ।

चिदानंद संदोह राम बिकल कारन कवन ॥६८(ख)॥

देखि चरित अति नर अनुसारी । भयउ हृदयँ मम संसय भारी ॥
 सोइ भ्रम अब हित करि मैं माना । कीन्ह अनुग्रह कृपानिधाना ॥
 जो अति आतप व्याकुल होई । तरु छाया सुख जानइ सोई ॥
 जौं नहिं होत मोह अति मोही । मिलतेउँ तात कवन बिधि तोही ॥
 सुनतेउँ किमि हरि कथा सुहाई । अति बिचित्र बहु बिधि तुम्ह गाई ॥
 निगमागम पुरान मत एहा । कहहिं सिद्ध मुनि नहिं संदेहा ॥
 संत बिसुद्ध मिलहिं परि तेही । चितवहिं राम कृपा करि जेही ॥
 राम कृपाँ तव दरसन भयऊ । तव प्रसाद सब संसय गयऊ ॥
 दो०—सुनि बिहंगपति बानी सहित विनय अनुराग ।

पुलक गात लोचन सजल मन हरषेउ अति काग ॥६९(क)॥

श्रोता सुमति सुसील सुचि कथा रसिक हरिदास ।

पाइ उमा अति गोप्यमपि सज्जन करहिं प्रकास ॥६९(ख)॥

बोलेउ कागभसुंड बहोरी । नभग नाथ पर प्रीति न थोरी ॥
 सब बिधि नाथ पूज्य तुम्ह मेरे । कृपापात्र रघुनायक केरे ॥

तुम्हहि न संसय मोह न माया । मो पर नाथ कीन्हि तुम्ह दाया ॥
पठइ मोह मिस खगपति तोही । रघुपति दीन्हि बड़ाई मोही ॥
तुम्ह निज मोह कही खग साई । सो नहिं कछु आचरज गोसाई ॥
नारद भव बिरंचि सनकादी । जे मुनिनायक आतमवादी ॥
मोह न अंध कीन्ह केहि केही । को जग काम नचाव न जेही ॥
तुखौं केहि न कीन्ह बौराह । केहि कर हृदय क्रोध नहिं दाहा ॥

दो०—ग्यानी तापस सूर कवि कोबिद गुन आगार ।

केहि कै लोभ बिडंबना कीन्हि न एहि संसार ॥ ७०(क)॥

श्री मद बक्र न कीन्ह केहि प्रभुता बधिर न काहि ।

मृगलोचनि के नैन सर को अस लाग न जाहि ॥ ७०(ख) ॥

गुन कृत सन्यपात नहिं केही । कोउ न मान मद तजेउ निबेही ॥
जोबन ज्वर केहि नहिं बलकावा । ममता केहि कर जस न नसावा ॥
मच्छर काहि कलंक न लावा । काहि न सोक समीर डोलावा ॥
चिंता साँपिनि को नहिं स्वाया । को जग जाहि न न्यापी माया ॥
कीट मनोरथ दारु सरीरा । जेहि न लाग घुन को अस धीरा ॥
सुत बित लोक ईषना तीनी । केहि कै मति इन्ह कृत न मलीनी ॥
यह सब माया कर परिवारा । प्रबल अमिति को बरनै पारा ॥
सिव चतुरानन जाहि डेराहीं । अपर जीव केहि लेखे माहीं ॥

दो०—ब्यापि रहेउ संसार महुँ माया कटक प्रचंड ।

सेनापति कामादि भट दंभ कपट पाषंड ॥ ७१(क) ॥

सो दासी रघुबीर कै समुझें मिथ्या सोपि ।

छूट न राम कृपा बिनु नाथ कहउँ पद रोपि ॥ ७१(ख) ॥

जो माया सब जगहि नचावा । जासु चरित लखि काहुँ न पावा॥
 सोइ प्रभु भूबिलास खगराजा । नाच नटी इव सहित समाजा ॥
 सोइ सच्चिदानंद घन रामा । अज बिग्यान रूप बल धामा ॥
 व्यापक व्याप्य अखंड अनंता । अखिल अमोघसक्ति भगवंता॥
 अगुन अदभ्र गिरा गोतीता । सबदरसी अनवद्य अजीता ॥
 निर्मम निराकार निरमोहा । नित्य निरंजन सुख संदोहा ॥
 प्रकृति पार प्रभु सब उर बासी । ब्रह्म निरीह बिरज अविनासी ॥
 इहाँ मोह कर कारन नाहीं । रबि सन्मुख तम कबहुँ कि जाहीं॥

दो०—भगत हेतु भगवान प्रभु राम धरेउ तनु भूप ।

किए चरित पावन परम प्राकृत नर अनुरूप ॥ ७२(क) ॥

जथा अनेक बेष धरि नृत्य करइ नट कोइ ।

सोइ सोइ भाव देखावइ आपुन होइ न सोइ ॥ ७२(ख) ॥

असि रघुपति लीला उरगारी । दनुज बिमोहनि जन सुखकारी॥
 जे मति मलिन विषयबस कामी । प्रभु पर मोह धरहिँ इमि स्वामी ॥
 नयन दोष जा कहँ जब होई । पीत बरन ससि कहँ कह सोई ॥
 जब जेहि दिसि भ्रम होइ खगेसा । सो कह पच्छिम उयउ दिनेसा॥
 नौकारुढ़ चलत जग देखा । अचल मोह बस आपुहि लेखा ॥
 बालक भ्रमहिँ न भ्रमहिँ गृहादी । कहहिँ परस्पर मिथ्याबादी ॥
 हरि विषइक अस मोह बिहंगा । सपनेहुँ नहिँ अग्यान प्रसंगा ॥
 मायाबस मतिमंद अभागी । हृदयँ जमनिका बहुबिधि लागी॥
 ते सठ इठ बस संसय करहीं । निज अग्यान राम पर धरहीं ॥

दो०—काम क्रोध मद लोभ रत गृहासक्त दुस्वरूप ।

ते किमि जानहिं रघुपतिहि मूढ़ परे तम कूप ॥ ७३(क) ॥

निर्गुन रूप सुलभ अति सगुन जान नहिं कोइ ।

सुगम अगम नाना चरित सुनि मुनि मन भ्रम होइ ॥ ७३(ख) ॥

सुनु खगेस रघुपति प्रभुताई । कहउँ जथामति कथा सुहाई ॥

जेहि बिधि मोह भयउ प्रभु मोही । सोउ सब कथा सुनावउँ तोही ॥

राम कृपा भाजन तुम्ह ताता । हरि गुन प्रीति मोहि सुखदाता ॥

ताते नहिं कछु तुम्हहिं दुरावउँ । परम रहस्य मनोहर गावउँ ॥

सुनहु राम कर सहज सुभाऊ । जन अभिमान न राखहिं काऊ ॥

संसृत मूल सूलप्रद नाना । सकल सोकदायक अभिमाना ॥

ताते करहिं कृपानिधि दूरी । सेवक पर ममता अति भूरी ॥

जिमि सिसु तन व्रन होइ गोसाई । मातु चिराव कठिन की नाई ॥

दो०—जदपि प्रथम दुख पावइ रोवइ बाल अधीर ।

व्याधि नास हित जननी गनति न सो सिसु पीर ॥ ७४(क) ॥

तिमि रघुपति निज दास कर हरहि मान हित लागि ।

तुलसिदास ऐसे प्रभुहि कस न भजहु भ्रम त्यागि ॥ ७४(ख) ॥

राम कृपा आपनि जड़ताई । कहउँ खगेस सुनहु मन लाई ॥

जब जब राम मनुज तनु धरहीं । भक्त हेतु लीला बहु करहीं ॥

तब तब अवधपुरी मैं जाऊँ । बालचरित बिलोकि हरषाऊँ ॥

जन्म महोत्सव देखउँ जाई । बरष पाँच तहँ रहउँ लोभाई ॥

इष्टदेव मम बालक रामा । सोभा बपुष कोटि सत कामा ॥

निजप्रभु बदन निहारि निहारी । लोचन सुफल करउँ उरगारी ॥

लघु बायस बपु धरि हरि संग। देखउँ बालचरित बहु रंगा ॥

दो०—लरिकाईं जहँ जहँ फिरहिँ तहँ तहँ संग उड़ाउँ ।

जूठनि परइ अजिर महँ सो उठाइ करि खाउँ ॥ ७५(क) ॥

एक बार अतिसय सब चरित किए रघुबीर ।

सुमिरत प्रभु लीला सोइ पुलकित भयउ सरीर ॥ ७५(ख) ॥

कइइ भसुंड सुनहु खगनायक । रामचरित सेवक सुखदायक ॥
नृप मंदिर सुंदर सब भाँती । खचित कनक मनि नाना जाती ॥
बरनि न जाइ रुचिर अँगनाई । जहँ खेलहिँ नित चारिउ भाई ॥
बालबिनोद करत रघुराई । बिचरत अजिर जननि सुखदाई ॥
मरकत मृदुल कलेवर स्यामा । अंग अंग प्रति छबि बहु कामा ॥
नव राजीव अरुन मृदु चरना । पदज रुचिर नख ससि दुति हरना
ललित अंक कुलिसादिक चारी । नूपुर चारु मधुर रवकारी ॥
चारु पुरट मनि रचित बनाई । कटि किंकिनि कल मुखर सुहाई ॥

दो०—रेखा त्रय सुंदर उदर नाभी रुचिर गँभीर ।

उर आयत आजत विविधि बाल बिभूषन चीर ॥ ७६ ॥

अरुन पानि नख करज मनोहर । बाहु बिसाल बिभूषन सुंदर ॥
कंध बाल केहरि दर ग्रीवा । चारु चिबुक आनन छबि सींवा ॥
कलबल बचन अथर अरुनारे । दुइ दुइ दसन बिसद बर बारे ॥
ललित कपोल मनोहर नासा । सकल सुखद ससि कर सम हासा ॥
नील कंज लोचन भव मोचन । आजत भाल तिलक मोरोचन ॥
बिकट भृकुटि सम भवन सुहाए । कुंचित कच मेचक छबि छाए ॥
पीत झीनि झगुली तन सोही । किलकनि चितवनि भावति मोही ॥

रूप रासि नृप अजिर बिहारी । नाचहिं निज प्रतिबिंब निहारी॥
मोहि सन करहिं विविधि विधि क्रीड़ा । बरनत मोहि होति अति क्रीड़ा
किलकत मोहि धरन जब धावहिं । चलउँ भागि तब पूष देखावहिं॥

दो०—आवत निकट हँसहिं प्रभु भाजत रुदन कराहिं ।

जाउँ समीप गहन पद फिरि फिरि चितइ पराहिं ॥७७(क)॥

प्राकृत सिसु इव लीला देखि भयउ मोहि मोह ।

कवन चरित्र करत प्रभु चिदानंद संदोह ॥७७(ख)॥

एतना मन आनत खगराया । रघुपति प्रेरित व्यापी माया ॥
सो माया न दुखद मोहि काहीं । आन जीव इव संसृत नाहीं ॥
नाथ इहाँ कछु कारन आना । सुनहु सो सावधान हरिजाना ॥
ग्यान अखंड एक सीताबर । माया बस्य जीव सचराचर ॥
जौ सब कें रह ग्यान एकरस । ईस्वर जीवहि मेद कहहु कस ॥
माया बस्य जीव अभिमानी । ईस बस्य माया गुन खानी ॥
परबस जीव स्वबस भगवंता । जीव अनेक एक श्रीकंता ॥
मुधा मेद जद्यपि कृत माया । बिनु हरि जाइ न कोटि उपाया ॥
दो०—रामचंद्र के भजन बिनु जो चह पद निर्बान ।

ग्यानवंत अपि सो नर पसु बिनु पँछ बिषान ॥७९(क)॥

राकापति षोडस उअहिं तारागन समुदाइ ।

सकल गिरिन्हि दव लाइअ बिनु रवि राति न जाइ ॥७८(ख)॥

ऐसेहिं हरि बिनु भजन खगेसा । मिटइ न जीवन्ह केर कछेसा ॥
हरि सेवकहि न व्याप अविद्या । प्रभु प्रेरित व्यापइ तेहि विद्या ॥
ताते नास न होइ दास कर । मेद भगति बाढ़इ बिहंगबर ॥

भ्रम ते चकित राम मोहि देखा । बिहँसे सो सुनु चरित बिसेषा ॥
 तेहि कौतुक कर मरमु न काहूँ । जाना अनुज न मातु पिताहूँ ॥
 जानु पानि धाए मोहि धरना । स्यामल गात अरुन कर चरना ॥
 तब मैं भागि चलेउँ उरगारी । राम गहन कहूँ भुजा पसारी ॥
 जिमि जिमि दूर उड़ाउँ अकासा । तहूँ भुज हरि देखेउँ निज पासा ॥
 दो०—ब्रह्मलोक लागि गयेउँ मैं चितयउँ पाछ उड़ात ।

जुग अंगुल कर बीच सब राम भुजहि मोहि तात ॥७९(क)॥
 सप्ताबरन भेद करि जहाँ लगें गति मोरि ।

गयेउँ तहाँ प्रभु भुज निरखि व्याकुल भयेउँ बहोरि ॥७९(ख)॥

मूदेउँ नयन त्रसित जब भयेऊँ । पुनि चितवत कोसलपुर गयेऊँ ॥
 मोहि बिलोकि राम मुसुकाहीं । बिहँसत तुरत गयेउँ मुख माहीं ॥
 उदर माझ सुनु अंडज राया । देखेउँ बहु ब्रह्मांड निकाया ॥
 अति बिचित्र तहँ लोक अनेका । रचना अधिक एक ते एका ॥
 कोटिन्ह चतुरानन गौरीसा । अगनित उडगनर बि रजनीसा ॥
 अगनित लोकपाल जम काला । अगनित भूधर भूमि बिसाला ॥
 सागर स्वरि सर बिपिन अपारा । नाना भाँति सृष्टि बिस्तारा ॥
 सुर मुनि सिद्ध नाग नर किंनर । चारि प्रकार जीव सचराचर ॥
 दो०—जो नहिं देखा नहिं सुना जो मनहूँ न समाइ ।

सो सब अद्भुत देखेउँ बरनि कवनि बिधि जाइ ॥८०(क)॥

एक एक ब्रह्मांड महुँ रहउँ बरष सत एक ।

एहि बिधि देखत फिरउँ मैं अंड कटाह अनेक ॥८०(ख)॥

लोक लोक प्रति भिन्न बिधाता । भिन्न बिष्णु सिव मनु दिसि त्राता

नर गंधर्व भूत बेताला । किंनरनिसिचर पसु खग व्याला ॥
देव दनुज गन नाना जाती । सकल जीव तहँ आनहि भाँती ॥
महि सरि सागरसर गिरि नाना । सब प्रपंच तहँ आनइ आना ॥
अंडकोस प्रति प्रति निजरूपा । देखेउँ जिनस अनेक अनूपा ॥
अवधपुरी प्रति भुवन निनारी । सरजू भिन्न भिन्न नर नारी ॥
दसरथ कौसल्या सुनु ताता । बिबिधरूप भरतादिक आता ॥
प्रति ब्रह्मांड राम अवतारा । देखेउँ बालबिनोद अपारा ॥

दो०—भिन्न भिन्न मैं दीख सबु अति बिचित्र हरिजान ।

अगनित भुवन फिरेउँ प्रभु राम न देखेउँ आन ॥८१(क)॥

सोइ सिसुपन सोइ सोभा सोइ कृपाल रघुवीर ।

भुवन भुवन देखत फिरउँ प्रेरित मोह समीर ॥८१(ख)॥

अमत मोहि ब्रह्मांड अनेका । बीते मनहुँ कल्प सत एका ॥
फिरत फिरत निज आश्रम आयउँ । तहँ पुनि रहि कछु काल गवाँयउँ
निज प्रभु जन्म अवध सुनि पायउँ । निर्भर प्रेमहरषि उठि धायउँ ॥
देखेउँ जन्म महोत्सव जाई । जेहि बिधि प्रथम कहा मैं गाई ॥
राम उदर देखेउँ जग नाना । देखत बनइ न जाइ बखाना ॥
तहँ पुनि देखेउँ राम सुजाना । माया पति कृपाल भगवाना ॥
करउँ बिचार बहोरि बहोरी । मोह कलिल व्यापित मति मोरी
उभय घरी महँ मैं सब देखा । भयउँ अमित मन मोह बिसेषा ॥

दो०—देखि कृपाल विकल मोहि बिहँसे तब रघुवीर ।

बिहँसतही मुख बाहेर आयउँ सुनु मतिधीर ॥८२(क)॥

सोइ लरिकाई मो सन करन लगे पुनि राम ।

कोटि भाँति समुझावउँ मनु न लहइ विश्राम ॥८२(ख)॥

देखि चरित यह सो प्रभुताई । समुझत देह दसा बिसराई ॥
 धरनि परेउँ मुख आव न बाता । त्राहि त्राहि आरत जन त्राता ॥
 प्रेमाकुल प्रभु मोहि बिलोकी । निज माया प्रभुता तब रोकी ॥
 कर सरोज प्रभु मम सिर धरेऊ । दीनदयाल सकल दुख हरेऊ ॥
 कीन्ह राम मोहि बिगत बिमोहा । सेवक सुखद कृपा संदोहा ॥
 प्रभुता प्रथम बिचारि बिचारी । मन महुँ होइ हरष अति भारी ॥
 भगत बछलता प्रभु कै देखी । उपजी मम उर प्रीति बिसेपी ॥
 सजल नयन पुलकित कर जोरी । कीन्हिउँ बहु बिधि बिनय बहोरी ॥
 दो०—सुनि सप्रेम मम बानी देखि दीन निज दास ।

बचन सुखद गंभीर मृदु बोले रमानिवास ॥८३(क)॥

काकभसुंडि मागु बर अति प्रसन्न मोहि जानि ।

अनिमादिक सिधि अपर रिधि मोच्छ सकल सुख खानि ॥८३(ख)॥

ग्यान बिबेक बिरति बिग्याना । मुनि दुर्लभ गुन जे जग नाना ॥
 आजु देउँ सब संसय नाहीं । मागु जो तोहि भाव मन माहीं ॥
 सुनि प्रभु बचन अधिक अनुरागेउँ । मन अनुमान करन तब लागेउँ
 प्रभु कह देन सकल सुख सही । भगति आपनी देन न कही ॥
 भगति हीन गुन सब सुख ऐसे । लवन बिना बहु बिंजन जैसे ॥
 भजन हीन सुख कवने काजा । अस बिचारि बोलेउँ खगराजा ॥
 जौ प्रभु होइ प्रसन्न बर देह । मो पर करहु कृपा अरु नेह ॥
 मन भावत बर मागउँ स्वामी । तुम्ह उदार उर अंतरजामी ॥

दो०—अबिरल भगति बिसुद्ध तव श्रुति पुरान जो गाव ।

जेहि खोजत जोगीस मुनि प्रभु प्रसाद कोउ पाव ॥८४(क)॥

भगत कल्पतरु प्रनत हित कृपा सिंधु सुख धाम ।

सोइ निज भगति मोहि प्रभु देहु दया करि राम ॥८४(ख)॥

एवमस्तु कहि रघुकुलनायक । बोले बचन परम सुखदायक॥

सुनु बायस तैं सहज सयाना । काहे न मागसि अस बरदाना॥

सब सुख खानि भगति तैं मागी । नहिं जग कोउ तोहि सम बड़भागी॥

जो मुनि कोटि जतन नहिं लहहीं । जे जप जोग अनल तन दहहीं॥

रीझैउं देखि तोरि चतुराई । मागेहु भगति मोहि अति भाई॥

सुनु बिहंग प्रसाद अब मोरें । सब सुभ गुन बसिहहिं उर तोरें॥

भगति ग्यान बिग्यान विरागा । जोग चरित्र रहस्य बिभागा ॥

जानब तैं सबही कर भेदा । मम प्रसाद नहिं साधन खेदा॥

दो०—माया संभव भ्रम सब अब न ब्यापिहहिं तोहि ।

जानेसु ब्रह्म अनादि अज अगुन गुनाकर मोहि ॥८५(क)॥

मोहि भगत प्रिय संतत अस बिचारि सुनु काग ।

कायें बचन मन मम पद करेसु अचल अनुराग ॥८५(ख)॥

अब सुनु परम विमल मम बानी । सत्य सुगम निगमादि बखानी॥

निज सिद्धांत सुनावउँ तोही । सुनु मन धरु सब तजि भजु मोही ॥

मम माया संभव संसारा । जीव चराचर बिबिधि प्रकारा ॥

सब मम प्रिय सब मम उपजाए । सब ते अधिक मनुज मोहि भाए॥

तिन्ह महुँ द्विज द्विज महुँ श्रुतिधारी । तिन्ह महुँ निगम धरम अनुसारी॥

तिन्ह महुँ प्रिय विरक्त पुनि ग्यानी । ग्यानिहु ते अति प्रिय बिग्यानी॥

तिन्ह ते पुनि मोहि प्रिय निज दासा । जेहि गति मोरि न दूसरि आसा ॥
 पुनि पुनि सत्य कहउँ तोहि पाहीं । मोहि सेवक सम प्रिय कोउ नाहीं ॥
 भगति हीन बिरंचि किन होई । सब जीवहु सम प्रिय मोहि सोई ॥
 भगतिवन्त अति नीचउ प्रानी । मोहि प्रानप्रिय असि मम बानी ॥

दो०—सुचि सुसील सेवक सुमति प्रिय कहु काहि न लाग ।

श्रुति पुरान कह नीति असि सावधान सुनु काग ॥ ८६ ॥

एक पिता के बिपुल कुमारा । होहि पृथक गुन सील अचारा ॥
 कोउ पंडित कोउ तापस ग्याता । कोउ धनवंत स्रर कोउ दाता ॥
 कोउ सर्वग्य धर्मरत कोई । सब पर पितहि प्रीति सम होई ॥
 कोउ भगवत भगवत बचन मन कर्मा । सपनेहुँ जान न दूसर धर्मा ॥
 सो सुत प्रिय पितु प्रान समाना । जद्यपि सो सब भाँति अयाना ॥
 एहि बिधि जीव चराचर जेते । त्रिजग देव नर असुर समेते ॥
 अखिल बिस्व यह मोर उपाया । सब पर मोहि बराबरि दाया ॥
 तिन्ह महँ जो परिहरि मद माया । भजै मोहि मन बच अरु काया ॥

दो०—पुरुष नपुंसक नारि वा जीव चराचर कोइ ।

सबै भाव भज कपट तजि मोहि परम प्रिय सोइ ॥ ८७(क) ॥

सो०—सत्य कहउँ खग तोहि सुचि सेवक मम प्रानप्रिय ।

अस बिचारि भजु मोहि परिहरि आस भरोस सब ॥ ८७(ख) ॥

कबहुँ काल न व्यापिहि तोही । सुमिरेसु भजेसु निरन्तर मोही ॥
 प्रभु बचनानृत सुनि न अघाऊँ । तनु पुलकित मन अति हरषाऊँ ॥
 सो सुख जानइ मन अरु काना । नहिँ रसना पहिँ जाइ बखाना ॥
 प्रभु सोभा सुख जानहिँ नयना । कहि किमि सकहिँ तिन्हहि नहिँ बयना ॥

बहु बिधि मोहि प्रबोधि सुख देई । लगे करन सिसु कौतुक तेई ॥
सजल नयन कछु मुख करि रूखा । चितइ मातु लागी अति भूखा ॥
देखि मातु आतुर उठि धाई । कहि मृदु बचन लिए उर लाई ॥
गोद राखि कराव पय पाना । रघुपति चरित ललित कर गाना ॥

सो०—जेहि सुख लागि पुरारि असुभ बेष कृत सिव सुखद ।

अवधपुरी नर नारि तेहि सुख महुँ संतत मगन ॥८८(क)॥

सोई सुख लवलेस जिन्ह बारक सपनेहुँ लहेउं ।

ते नहिँ गनहिँ खगेस ब्रह्मसुखहि सज्जन सुमति ॥८८(ख)॥

मैं पुनि अवध रहेउँ कछु काला । देखेउँ बालबिनोद रसाला ॥
राम प्रसाद भगति बर पायउँ । प्रभु पद बंदि निजाश्रम आयउँ ॥
तब ते मोहि न व्यापी माया । जब ते रघुनायक अपनाया ॥
यह सब गुप्त चरित मैं गावा । हरि मायाँ जिमि मोहि नचावा ॥
निज अनुभव अब कहउँ खगेसा । बिनु हरि भजन न जाहिँ कलेसा ॥
राम कृपा बिनु सुनु खगराई । जानि न जाइ राम प्रभुताई ॥
जानें बिनु न होइ परतीती । बिनु परतीति होइ नहिँ प्रीती ॥
प्रीति बिना नहिँ भगति दिढ़ाई । जिमि खगपति जल कैचिकनाई ॥

सो०—बिनु गुर होइ कि ग्यान ग्यान कि होइ विराग बिनु ।

गावहिँ बेद पुरान सुख कि लहिअ हरि भगति बिनु ॥८९(क)॥

कोउ विश्राम कि पाव तात सहज संतोष बिनु ।

चलै कि जल बिनु नाव कोटि जतन पचि पचि मरिअ ॥८९(ख)॥

बिनु संतोष न काम नसाहीं । काम अलत सुख सपनेहुँ नाहीं ॥
राम भजन बिनु मिटहिँ कि कामा । थल बिहीन तरु कबहुँ कि जामा ॥

बिनु बिग्यान कि समता आवइ । कोउ अवकास कि नभ बिनु पावइ
 भद्रा बिना धर्म नहि होई । बिनु महि गंध कि पावइ कोई॥
 बिनु तप तेज कि कर बिस्तारा । जल बिनु रस कि होइ संसारा॥
 सील कि मिल बिनु बुध सेवकाई । जिमि बिनु तेज नरूप गोसाँई॥
 निज सुख बिनु मन होइ कि थीरा । परस कि होइ बिहीन समीरा॥
 कवनिउ सिद्धि कि बिनु बिखासा । बिनु हरि भजन न भव भय नासा॥
 दो०—बिनु बिस्वास भगति नहि तेहि बिनु द्रवहि न रामु ।

राम कृपा बिनु सपनेहुँ जीव न लह विश्रामु ॥९०(क)॥

सो०—अस बिचारि मतिधीर तजि कुतर्क संसय सकल ।

भजहु राम रघुबीर करुनाकर सुंदर सुखद ॥९०(ख)॥

निज मति सरिस नाथ मैं गाई । प्रभु प्रताप महिमा खगराई ॥
 कहेउँ न कछु करि जुगुति बिसेषी । यह सब मैं निज नयनन्हि देखी ॥
 महिमा नाम रूप गुन गाथा । सकल अमित अनंत रघुनाथा॥
 निज निज मति मुनि हरि गुन गावहि । निगम सेष सिव पार न पावहि ॥
 तुम्हहि आदि खग मसक प्रजंता । नभ उड़ाहि नहि पावहि अंता॥
 तिमि रघुपति महिमा अवगाहा । तात कबहुँ कोउ पाव कि थाहा॥
 राम काम सत कोटि सुभग तन । दुर्गा कोटि अमित अरिमर्दन॥
 सक्र कोटि सत सरिस बिलासा । नभ सत कोटि अमित अवकासा॥

दो०—मरुत कोटि सत बिपुल बल रवि सत कोटि प्रकास ।

ससि सत कोटि सुसीतल समन सकल भव त्रास ॥९१(क)॥

काल कोटि सत सरिस अति दुस्तर दुर्ग दुरंत ।

धूमकेतु सत कोटि सम दुराधरष भगवंत ॥९१(ख)॥

प्रभु अगाध सत कोटि पताला । समन कोटि सत सरिस कराला ॥
 तीरथ अमित कोटि सम पावन । नाम अखिल अघ पूग नसावन ॥
 हिमगिरि कोटि अचल रघुबीरा । सिंधु कोटि सत सम गंभीरा ॥
 कामधेनु सत कोटि समाना । सकल काम दायक भगवाना ॥
 सारद कोटि अमित चतुराई । बिधिसत कोटि सृष्टि निपुनाई ॥
 बिष्णु कोटि सम पालन कर्ता । रुद्र कोटि सत सम संहर्ता ॥
 धनद कोटि सत सम धनवाना । माया कोटि प्रपंच निधाना ॥
 भार धरन सत कोटि अहीसा । निरवधि निरुपम प्रभु जगदीसा ॥

छं०—निरुपम न उपमा आन राम समान रामु निगम कहै ।
 जिमि कोटि सत खद्योत सम रवि कहत अति लघुता लहै ॥
 एहि भाँति निज निज मति बिलास मुनीस हरिहि बखानहीं ।
 प्रभु भाव गाहक अति कृपाल सप्रेम सुनि सुख मानहीं ॥

दो०—रामु अमित गुन सागर थाह कि पावइ कोइ ।
 संतन्ह सन जस किछु सुनेउँ तुम्हहि सुनायउँ सोइ ॥ ९२(क) ॥
 सो०—भाव बस्य भगवान सुख निधान करुना भवन ।
 तजि ममता मद मान भजिअ सदा सीता रवन ॥ ९२(ख) ॥

सुनि भुसुंडि के बचन सुहाए । हरषित खगपति पंख फुलाए ॥
 नयन नीर मन अति हरषाना । श्रीरघुपति प्रताप उर आना ॥
 पाछिल मोह समुझि पछिताना । ब्रह्म अनादि मनुज करि माना ॥
 पुनि पुनि काग चरन सिरु नावा । जानि राम सम प्रेम बढ़ावा ॥
 गुर बिनु भव निधि तरइ न कोई । जौ बिरंचि संकर सम होई ॥
 संसय सर्प ग्रसेउ मोहि ताता । दुखद लहरि कुतर्क बहु ब्राता ॥

तव सरूप गारुड़ रघुनायक । मोहि जिआयउ जन सुखदायक॥
तव प्रसाद मम मोह नसाना । राम रहस्य अनूपम जाना ॥

दो०—ताहि प्रसंसि विविधि विधि सीस नाइ कर जोरि ।

बचन विनीत सप्रेम मृदु बोलेउ गरुड़ बहोरि ॥ ९३(क) ॥

प्रभु अपने अबिवेक ते बूझउँ स्वामी तोहि ।

कृपासिंधु सादर कहहु जानि दास निज मोहि ॥ ९३(ख) ॥

तुम्ह सर्वग्य तग्य तम पारा । सुमति सुसील सरल आचारा ॥
ग्यानबिरति बिग्यान निवासा । रघुनायक के तुम्ह प्रिय दासा॥
कारन कवन देह यह पाई । तात सकल मोहि कहहु बुझाई ॥
राम चरित सर सुंदर स्वामी । पायहु कहाँ कहहु नभगामी ॥
नाथ सुना मैं अस सिव पाहीं । महा प्रलयहुँ नास तव नाहीं ॥
मुधा बचन नहिँ ईस्वर कहई । सोउ मोरें मन संसय अहई ॥
अग जग जीव नाग नर देवा । नाथ सकल जगु काल कलेवा ॥
अंड कटाह अमित लय कारी । कालु सदा दुरतिक्रम भारी ॥

सो०—तुम्हहि न व्यापत काल अति कराल कारन कवन ।

मोहि सो कहहु कृपाल ग्यान प्रभाव कि जोग बल ॥ ९४(क) ॥

दो०—प्रभु तव आश्रम आएँ मोर मोह भ्रम भाग ।

कारन कवन सो नाथ सब कहहु सहित अनुराग ॥ ९४(ख) ॥

गरुड़ गिरा सुनि हरषेउ कागा । बोलेउ उमा परम अनुरागा ॥
धन्य धन्य तव मति उरगारी । प्रस्न तुम्हारि मोहि अति प्यारी ॥
सुनि तव प्रस्न सप्रेम सुहाई । बहुत जनम कै सुधि मोहि आई ॥
सब निज कथा कहउँ मैं गाई । तात सुनहु सादर मन लाई ॥

जप तप सम दम व्रत दाना । बिरति बिबेक जोग बिग्याना ॥
सब कर फल रघुपति पद प्रेमा । तेहि बिनु कोउ न पावइ छेमा ॥
एहि तन राम भगति मै पाई । ताते मोहि ममता अधिकाई ॥
जेहि तें कछु निज स्वारथ होई । तेहि पर ममता कर सब कोई ॥

सो०—पचगारि असि नीति श्रुति संमत सज्जन कहहिं ।

अति नीचहु सन प्रीति करिअ जानि निज परम हित ॥ ९५(क) ॥

पाट कीट तें होइ तेहि तें पाटंबर रुचिर ।

कुमि पालइ सबु कोइ परम अपावन प्रान सम ॥ ९५(ख) ॥

स्वारथ साँच जीव कहूँ एहा । मन क्रम बचन राम पद नेहा ॥
सोइ पावन सोइ सुभग सरीरा । जो तनु पाइ भजिअ रघुबीरा ॥
राम बिमुख लहि बिधि सम देही । कबि कोविद न प्रसंसहिं तेही ॥
राम भगति एहिं तन उर जामी । ताते मोहि परम प्रिय स्खामी ॥
तजउँ न तन निज इच्छा मरना । तन बिनु बेद भजन नहिं बरना ॥
प्रथम मोहँ मोहि बहुत बिगोवा । राम बिमुख सुख कबहुँ न सोवा ॥
नाना जनम कर्म पुनि नाना । किए जोग जप तप मख दाना ॥
कवन जोनि जनमेउँ जहँ नाही । मै खगेस भ्रमि भ्रमि जग माहीं ॥
देखेउँ करि सब करम गोसाईं । सुखी न भयउँ अबहिं की नाई ॥
सुधि मोहि नाथ जन्म बहु केरी । सिव प्रसाद मति मोहँ न बेरी ॥

दो०—प्रथम जन्म के चरित अब कहउँ सुनहु विहगेस ।

सुनि प्रभु पद रति उपजइ जातें मिटहिं कलेस ॥ ९६(क) ॥

पूरुब कल्प एक प्रभु जुग कलिजुग मल मूल ।

नर अरु नारि अधर्म रत सकल निगम प्रतिकूल ॥ ९६(ख) ॥

तेहिं कलिजुग कोसलपुर जाई । जन्मत भयउँ सूद्र तनु पाई ॥
 सिव सेवक मन क्रम अरु बानी । आन देव निंदक अभिमानी ॥
 धन मद मत्त परम बाचाला । उग्रबुद्धि उर दंभ बिसाला ॥
 जदपिरहेउँ रघुपति रजधानी । तदपि न कछु महिमा तब जानी ॥
 अब जाना मै अवध प्रभावा । निगमागम पुरान अस गावा ॥
 कवनेहुँ जन्म अवध बस जोई । राम परायन सो परि होई ॥
 अवध प्रभाव जान तब प्रानी । जब उर बसहिं राम धनुपानी ॥
 सो कलिकाल कठिन उरगारी । पाप परायन सब नर नारी ॥

दो०—कलिमल ग्रसे धर्म सत्र लुप्त भए सदग्रंथ ।

दंभिन्ह निज मति कल्पि करि प्रगट किए बहु पंथ ॥ ९७(क) ॥

भए लोग सब मोहबस लोभ ग्रसे सुभ कर्म ।

सुनु हरिजान ग्यान निधि कहउँ कछुक कलिधर्म ॥ ९७(ख) ॥

बरन धर्म नहिं आश्रमचारी । श्रुति बिरोध रत सब नरनारी ॥
 द्विज श्रुति बेचक भूप्रजासन । कोउ नहिं मान निगम अनुसासन ॥
 मारग सोइ जा कहूँ जोइ भावा । पंडित सोइ जो गाल बजावा ॥
 मिथ्यारंभ दंभ रत जोई । ता कहूँ संत कहइ सब कोई ॥
 सोइ सयान जो परधन हारी । जो कर दंभ सो बड़ आचारी ॥
 जो कह झूठ मसखरी जाना । कलिजुग सोइ गुनवंत बखाना ॥
 निराचार जो श्रुति पथ त्यागी । कलिजुग सोइ ग्यानी सो बिरागी ॥
 जाकेँ नख अरु जटा बिसाला । सोइ तापस प्रसिद्ध कलिकाला ॥

दो०—असुभ वेष भूषन धरें भच्छाभच्छ जे खाहिं ।

तेइ जोगी तेइ सिद्ध नर पूज्य ते कलिजुग माहिं ॥ ९८(क) ॥

सो०—जे अपकारी चार तिन्ह कर गौरव मान्य तेइ ।

मन क्रम बचन लबार तेइ बकता कलिकाल महुँ ॥९८(ख)॥

नारि बिबस नर सकल गोसाईं । नाचहिं नट मर्कट की नाई ॥
 छद्र द्विजन्ह उपदेसहिं ग्याना । मेलि जनेऊ लेहिं कुदाना ॥
 सब नर काम लोभ रत क्रोधो । देव बिप्र श्रुति संत बिरोधी ॥
 गुन मंदिर सुंदर पति त्यागी । भजहिं नारि पर पुरुष अभागी ॥
 सौभागिनीं बिभूषन हीना । बिधवन्ह के सिंगार नबीना ॥
 गुर सिष बधिर अंध का लेखा । एक न सुनइ एक नहिं देखा ॥
 हरइ सिष्य धन सोक न हरई । सो गुर घोर नरक महुँ परई ॥
 मातु पिता बालकन्ह बोलावहिं । उदर भरै सोइ धर्म सिखावहिं ॥

दो०—ब्रह्म ग्यान विनु नारि नर कहहिं न दूसरि वात ।

कौड़ी लागि लोभ बस करहिं बिप्र गुर घात ॥९९(क)॥

बादहिं सूद्र द्विजन्ह सन हम तुम्ह ते कछु घाटि ।

जानइ ब्रह्म सो बिप्रवर आँखि देखावहिं डाटि ॥९९(ख)॥

पर त्रिय लंपट कपट सयाने । मोह द्रोह ममता लपटाने ॥
 तेइ अमेदबादी ग्यानी नर । देखा मैं चरित्र कलिजुग कर ॥
 आपु गए अरु तिन्हहू घालहिं । जे कहूँ सत मारग प्रतिपालहिं ॥
 कल्प कल्प भरि एक एक नरका । परहिं जे दूषहिं श्रुति करि तरका ॥
 जे बरनाधम तेलि कुम्हारा । स्वपच किरात कोल कलवारा ॥
 नारि मुई गृह संपति नासी । मूढ़ मुढ़ाइ होहिं संन्यासी ॥
 ते बिपन्ह सन आपु पुजावहिं । उभय लांक निज हाथ नमावहिं ॥
 बिप्र निरच्छर लोलुप कामी । निराचार सठ बृषली स्वामी ॥

सूद्र करहिं जप तप व्रत नाना । बैठि बरासन कहहिं पुराना ॥
सब नर कल्पित करहिं अचारा । जाइ न बरनि अनीति अपारा ॥

दो०—भए बरन संकर कलि भिन्नसेतु सब लोग ।

करहिं पाप पावहिं दुख भय रुज सोक बियोग ॥१००(क)॥

श्रुति संमत हरि भक्ति पथ संजुत बिरति बिबेक ॥

तेहिं न चलहिं नर मोह बस कल्पहिं पंथ अनेक ॥१००(ख)॥

छं०—बहु दाम सँवारहिं धाम जती । बिषया हरि लीन्हि न रहि बिरती ॥

तपसी धनवंत दरिद्र गृही । कलि कौतुक तात न जात कही ॥

कुलवंति निकारहिं नारि सती । गृह आनहिं चेरि निबेरि गती ॥

सुत मानहिं मातु पिता तब लौं । अबलानन दीख नहीं जब लौं ॥

ससुरारिपिआरिलगी जब तें । रिपुरूप कुटुंब भए तब तें ॥

नृप पाप परायन धर्म नहीं । करि दंड बिडंब प्रजा नितहीं ॥

धनवंत कुलीन मलीन अपी । द्विज चिन्ह जनेउ उधार तपी ॥

नहिं मान पुरान न बेदहि जो । हरि सेवक संत सही कलि सो ॥

कवि बृंद उदार दुनी न सुनी । गुन दूषक बात न कोपि गुनी ॥

कलि बारहिं बार दुकाल परै । बिनु अन्न दुखी सब लोग मरै ॥

दो०—सुनु खगेस कलि कपट हठ दंभ द्वेष पाषंड ।

मान मोह मारादि मद व्यापि रहे ब्रह्मंड ॥१०१(क)॥

तामस धर्म करहिं नर जप तप व्रत मख दान ।

देव न बरषहिं धरनीं बए न जामहिं धान ॥१०१(ख)॥

छं०—थबला कच भूषन भूरि छुधा । धनहीन दुखी ममता बहुधा ॥

सुख चाहहिं मूढ़ न धर्म रता । मति थोरि कठोरि न कोमलता ॥

नर पीड़ित रोग न भोग कहीं । अभिमान बिरोध अकारनहीं ॥

लघु जीवन संबतु पंच दसा । कलपांत न नास गुमानु असा ॥
 कलिकाल बिहाल किए मनुजा । नहिं मानत कौ अनुजा तनुजा ॥
 नहिं तोष बिचार न सीतलता । सब जाति कुजाति भए मगता ॥
 इरिषा परुषाच्छर लोलुपता । भरि पूरि रही समता बिगता ॥
 सब लोग बियोग विसोक हए । वरनाश्रम धर्म अचार गए ॥
 दम दान दया नहिं जानपनी । जड़ता परबंचनताति घनी ॥
 तनु पोषक नारि नरा सगरे । परनिंदक जे जग मो बिगरे ॥

दो०—सुनु ब्यालारि काल कलि मल अवगुन आगार ।
 गुनउ बहुत कलिजुग कर बिनु प्रयास निस्तार ॥१०२(क)॥
 कृत जुग त्रेताँ द्वापर पूजा मख अरु जोग ।
 जो गति होइ सो कलि हरि नाम ते पावहिं लोग ॥१०२(ख)॥

कृतजुग सब जोगी बिग्यानी । करि हरि ध्यान तरहिं भव प्रानी॥
 त्रेताँ बिबिध जग्य नर करहीं । प्रभुहि समर्पि कर्म भव तरहीं ॥
 द्वापर करि रघुपति पद पूजा । नर भव तरहिं उपाय न दूजा॥
 कलिजुग केवल हरि गुन गाहा । गावत नर पावहिं भव थाहा॥
 कलिजुग जोग न जग्य न ग्याना । एक अधार राम गुन गाना ॥
 सब भरोस तजि जो भज रामहि । प्रेम समेत गाव गुन ग्रामहि ॥
 सोइ भव तर कछु संसय नाही । नाम प्रताप प्रगट कलि माहीं॥
 कलि कर एक पुनीत प्रतापा । मानस पुन्य होहिं नहिं पापा॥

दो०—कलिजुग सम जुग आन नहिं जौ नर कर बिस्वास ।
 गाइ राम गुन गन बिमल भव तर बिनाहिं प्रयास ॥१०३(क)॥

प्रगट चारि पद धर्म के कलि महुँ एक प्रधान ।

जेन केन बिधि दीन्हें दान करइ कल्याण ॥१०३(ख)॥

नित जुग धर्म होहिं सब केरे । हृदयँ राम माया के प्रेरे ॥
सुद्ध सत्व समता बिग्याना । कृत प्रभाव प्रसन्न मन जाना ॥
सत्व बहुत रज कछु रति कर्मा । सब बिधि सुख त्रेता कर धर्मा ॥
बहु रज स्वल्प सत्व कछु तामस । द्वापर धर्म हरष भय मानस ॥
तामस बहुत रजोगुन थोरा । कलि प्रभाव बिरोध चहुँ ओरा ॥
बुध जुग धर्म जानि मन माहीं । तजि अधर्म रति धर्म कराहीं ॥
काल धर्म नहिं व्यापहिं ताही । रघुपति चरन प्रीति अति जाही ॥
नट कृत बिकट कपट खगराया । नट सेव कहि न व्यापइ माया ॥

दो०—हरि माया कृत दोष गुन बिनु हरि भजन न जाहिं ।

भजिअ राम तजि काम सब अस बिचारि मन माहिं ॥१०४(क)॥

तेहिं कलिकाल वरष बहु बसेउँ अवध बिहगेस ।

परेउ दुकाल बिपति बस तब मैं गयउँ बिदेस ॥१०४(ख)॥

गयउँ उज्जैनी सुनु उरगारी । दीन मलीन दरिद्र दुखारी ॥
गएँ काल कछु संपति पाई । तहँ पुनि करउँ संभु सेवकाई ॥
बिप्र एक बैदिक सिव पूजा । करइ सदा तेहि काजु न दूजा ॥
परम साधु परमारथ बिंदक । संभु उपासक नहिं हरि निंदक ॥
तेहि सेवउँ मैं कपट समेता । द्विज दयाल अति नीति निकेता ॥
बाहिज नम्र देखि मोहि साई । बिप्र पढ़ाव पुत्र की नाई ॥
संभु मंत्र मोहि द्विजवर दीन्हा । सुभ उपदेस बिबिध बिधि कीन्हा ॥
जपउँ मंत्र सिव मंदिर जाई । हृदयँ दंभ अहमिति अधिकाई ॥

दो०—मैं खल मल संकुल मति नीच जाति बस मोह ।

हरि जन द्विज देखें जरउँ करउँ बिष्णु कर द्रोह ॥१०५(क)॥

सो०—गुर नित मोहि प्रबोध दुखित देखि आचरन मम ।

मोहि उपजइ अति क्रोध दंभिहि नीति कि भावई ॥१०५(ख)॥

एक बार गुर लीन्ह बोलाई । मोहि नीति बहु भाँति सिखाई ॥
 सिव सेवा कर फल सुत सोई । अबिरल भगति राम पद होई ॥
 रामहि भजहिं तात सिव धाता । नर पावँर कै केतिक बाता ॥
 जासु चरन अज सिव अनुरागी । तासु द्रोहँ सुख चहसि अभागी ॥
 हर कहूँ हरि सेवक गुर कहेऊ । सुनि खगनाथ हृदय मम दहेऊ ॥
 अधम जाति मैं विद्या पाएँ । भयउँ जथा अहि दूध पिआएँ ॥
 मानी कुटिल कुभाग्य कुजाती । गुर कर द्रोह करउँ दिनु राती ॥
 अति दयाल गुर स्वल्प न क्रोधा । पुनि पुनि मोहि सिखाव सुबोधा ॥
 जेहि ते नीच बढ़ाई पावा । सो प्रथमहिं हति ताहि नसावा ॥
 धूम अनल संभव सुनु भाई । तेहि बुझाव घन पदवी पाई ॥
 रज मग परी निरादर रहई । सब कर पद प्रहार नित सहई ॥
 मरुत उड़ाव प्रथम तेहि भरई । पुनि नृप नयन किरीटन्हि परई ॥
 सुनु खगपति अस समुझि प्रसंगा । बुध नहिं करहिं अधम कर संग्गा
 कबि कोचिद गावहिं असि नीती । खल सन कलह न भल नहिं प्रीती
 उदासीन नित रहिअ गोसाई । खल परिहरिअ खान की नाई ॥
 मैं खल हृदयँ कपट कुटिलाई । गुर हित कहइ न मोहि सोहाई ॥

दो०—एक बार हर मंदिर जपत रहेउँ सिव नाम ।

गुर आयउ अभिमान तें उठि नहिं कीन्ह प्रनाम ॥१०६(क)॥

सो दयाल नहिं कहेउ कछु उर न रोस लवलेस ।

अति अघ गुर अपमानता सहि नहिं सके महेस ॥१०६(ख)॥

मंदिर माझ भई नभवानी । रे हतभाग्य अग्य अभिमानी॥
जद्यपि तव गुर केँ नहिं क्रोधा । अति कृपाल चित सम्यक बोधा॥
तदपि साप सठ दैहउँ तोही । नीति बिरोध मोहाइ न मोही॥
जौं नहिं दंड करौं खल तोरा । भ्रष्ट होइ श्रुतिमारग मोरा॥
जे सठ गुर सन इरिषा करहीं । रौरव नरक कोटि जुग परहीं॥
त्रिजग जोनि पुनि धरहिं सरीरा । अयुत जन्म भरि पावहिं पीरा॥
बैठ रहेसि अजगर इव पापी । मर्प होहि खल मल मति व्यापी॥
महा बिटप कोटर महुँ जाई । रहु अधमाधम अधगति पाई॥

दो०—हाहाकार कीन्ह गुर दारुन सुनि सिव साप ।

कंपित मोहि बिलोकि अति उर उपजा परिताप ॥१०७(क)॥

करि दंडवत सप्रेम द्विज सिव सन्मुख कर जोरि ।

बिनय करत गदगद स्वर समुझि घोर गति मोरि ॥१०७(ख)॥

नमाभीशूमीशान निर्वाणरूपं । विभुं व्यापकं ब्रह्म वेदस्वरूपं ॥
निजं निर्गुणं निर्विकल्पं निरीहं । चिदाकाशमाकाशवासं भजेऽहं ॥
निराकारमोकारमूलं तुरीयं । गिरा ग्यान गोतीतमीशं गिरीशं ॥
करालं महाकाल कालं कृपालं । गुणागार संसारपारं नतोऽहं ॥
तुषाराद्रि संकाश गौरं गभीरं । मनोभूत कोटि प्रभा श्री शरीरं ॥
स्फुरन्मौलि कल्लोलिनीचारु गंगा । लसद्भालबालेन्दु कंठे मुजंगा ॥
चलत्कुंडलं भ्रू सुनेत्रं विशालं । प्रसन्नाननं नीलकंठं दयालं ॥
मृगाधीशचर्माम्बरं मुण्डमालं । प्रियं शंकरं सर्वनाथं भजामि ॥

अचंडं प्रकृष्टं प्रगल्भं परेशं । अखंडं अजं भानुकोटिप्रकाशं ॥
 त्रयः शूल निर्मूलनं शूलपाणि । भजेऽहं भवानीपतिं भावगम्यं ॥
 कलातीत कल्याण कल्पान्तकारी । सदा सज्जनानन्ददाता पुरारी ॥
 चिदानन्द संदोह मोहापहारी । प्रसीद प्रसीद प्रभो मन्मथारी ॥
 न यावद् उमानाथ पादारविन्दं । भजंतीह लोके परे वा नराणां ॥
 न तावत्सुखं शान्ति सन्तापनाशं । प्रसीद प्रभो सर्वभूताधिवासं ॥
 न जानामि योगं जपं नैव पूजां । नतोऽहं सदा सर्वदा शंभु तुभ्यं ॥
 जरा जन्म दुःखौघ तातप्यमानं । प्रभो पाहि आपन्नमामीश शंभो ॥
 श्लोक—रुद्राष्टकमिदं प्रोक्तं विप्रेण हरतोषये ।

ये पठन्ति नरा भक्त्या तेषां शम्भुः प्रसीदति ॥ ९ ॥

दो०—सुनि बिनती सर्वग्य सिव देखि बिप्र अनुरागु ।
 पुनि मंदिर नभबानी भइ द्विजवर वर मागु ॥१०८(क)॥
 जौ प्रसन्न प्रभु मो पर नाथ दीन पर नेहु ।
 निज पद भगति देइ प्रभु पुनि दूसर वर देहु ॥१०८(ख)॥
 तव माया बस जीव जड़ संतत फिरइ भुलान ।
 तेहि पर क्रोधन करिअ प्रभु कृपासिंधु भगवान ॥१०८(ग)॥
 संकर दीनदयाल अब एहि पर होहु कृपाल ।
 साप अनुग्रह होइ जेहिं नाथ शोरेहीं काल ॥१०८(घ)॥

एहि कर होइ परम कल्याणा । सोइ करहु अब कृपानिधाना ॥
 बिप गिरा सुनि परहित सानी । एवमस्तु इति भइ नभबानी ॥
 जदपि कीन्ह एहिं दारुन पापा । मै पुनि दीन्हि कोप करि सापा ॥
 तदपि तुम्हारि साधुता देखी । कगिहउँ एहि पर कृपा बिसेषी ॥
 छमासील जे पर उपकारी । ते द्विज मोहि प्रिय जथा खरारी ॥

मोर श्राप द्विज व्यर्थ न जाइहि । जन्म सहस अवस्य यह पाइहि ॥
 जनमत मरत दुसह दुख होई । एहि खल्पउ नहिं व्यापिहि सोई ॥
 कवनेउँ जन्म मिटिहि नहिं ग्याना । सुनिहि छद्र मम बचन प्रवाना ॥
 रघुपति पुरी जन्मतव भयऊ । पुनि तैं मम सेवाँ मन दयऊ ॥
 पुरी प्रभाव अनुग्रह मोरें । राम भगति उपजिहि उर तोरें ॥
 सुनु मम बचन सत्य अब भाई । हरितोषन व्रत द्विज सेवकाई ॥
 अब जनि करहि बिप्र अपमाना । जानेसु संत अनंत समाना ॥
 इंद्र कुलिस मम सूल बिसाला । कालदंड हरि चक्र कराला ॥
 जो इन्ह कर मारा नहिं मरई । बिप्र द्रोह पावक सो जरई ॥
 अस बिबेक राखेहु मन माहीं । तुम्ह कहँ जग दुर्लभ कछु नाहीं ॥
 औरउ एक आसिषा मोरी । अप्रतिहत गति होइहि तोरी ॥

दो०—सुनि सिव बचन हरषि गुर एवमस्तु इति भाषि ।

मोहि प्रबोधि गयउ गृह संभु चरन उर राखि ॥ १०९(क) ॥

प्रेरित काल बिधि गिरि जाइ भयउँ मैं ब्याल ।

पुनि प्रयास बिनु सो तनु तजेउँ गएँ कछु काल ॥ १०९(ख) ॥

ओइ तनु धरउँ तजउँ पुनि अनायास हरिजान ।

जिमि नूतन पट पहिरइ नर परिहरइ पुरान ॥ १०९(ग) ॥

सिवँ राखी श्रुति नीति अरु मैं नहिं पावा क्लेश ।

एहि बिधि धरेउँ बिबिधि तनु ग्यान न गयउ खगेस ॥ १०९(घ) ॥

त्रिजग देव नर जोइ तनु धरउँ । तहँ तहँ राम भजन अनुसरउँ ॥

एक सूल मोहि बिसर न काऊ । गुर कर कोमल सील सुभाऊ ॥

चरम देह द्विज कै मैं पाई । सुर दुर्लभ पुरान श्रुति गाई ॥

खेलउँ तहूँ बालकन्ह मीला । करउँ सकल रघुनायक लीला ॥
 प्रौढ़ भएँ मोहि पिता पढ़ावा । समझउँ सुनउँ गुनउँ नहिं भावा ॥
 मन ते सकल बासना भागी । केवल राम चरन लय लागी ॥
 कहहु खगेस अस कवन अभागी । खरी सेव सुरधेनुहि त्यागी ॥
 प्रेम मगन मोहि कह्युन सोहाई । हारेउ पिता पढ़ाइ पढ़ाई ॥
 भए कालबस जब पितु माता । मै बन गयउँ भजन जनत्राता ॥
 जहँ जहँ बिपिन मुनीखर पावउँ । आभ्रम जाइ जाइ सिरु नावउँ ॥
 बूझउँ तिन्हहि राम गुन गाहा । कहहिँ सुनउँ हरषित खगनाहा ॥
 सुनत फिरउँ हरि गुन अनुबादा । अन्याहत गति संभु प्रसादा ॥
 छूटी त्रिविधि ईषना भाढ़ी । एक लालसा उर अति बाढ़ी ॥
 राम चरन बारिज जब देखौं । तब निज जन्म सफल करि लेखौं ॥
 जेहि पूछउँ सोइ मुनि अस कहई । ईखर सर्व भूतमय अहई ॥
 निर्गुन मत नहिं मोहि सोहाई । सगुन ब्रह्म रति उर अधिकाई ॥

दो०—गुर के बचन सुरति करि राम चरन मनु लाग ।

रघुपति जस गावत फिरउँ छन छन नव अनुराग ॥११०(क)॥

मेरु सिखर बट छायाँ मुनि लोमस आसीन ।

देखि चरन सिरु नायउँ बचन कहेउँ अति दीन ॥११०(ख)॥

मुनि मम बचन बिनीत मृदु मुनि कृपाल खगराज ।

मोहि सादर पूँछत भए द्विज आयहु केहि काज ॥११०(ग)॥

तब मैं कहा कृपानिधि तुम्ह सर्वग्य सुजान ।

सगुन ब्रह्म अवराधन मोहि कहहु भगवान ॥११०(घ)॥

तब मुनीस रघुपति गुन गाथा । कहे कह्युन सादर खगनाथा ॥

ब्रह्मग्यान रत मुनि विग्यानी । मोहि परम अधिकारी जानी ॥
 लागे करन ब्रह्म उपदेसा । अज अद्वैत अगुन हृदयेसा ॥
 अकल अनीह अनाम अरूपा । अनुभव गम्य अखंड अनूपा ॥
 मन गोतीत अमल अविनासी । निर्विकार निरवधि सुख रासी ॥
 सो तैं ताहि तेहि नहिं भेदा । बारि बीचि इव गावहिं बेदा ॥
 बिबिधि भाँति मोहि मुनि समुझावा । निर्गुन मत मम हृदयँ न आवा
 पुनि मैं कहेउँ नाइ पद सीसा । सगुन उपासन कहहु मुनीसा ॥
 राम भगति जल मम मन मीना । किमि बिलगाइ मुनीस प्रबीना ॥
 सोइ उपदेस कहहु करि दाया । निज नयनन्हि देखौं रघुराया ॥
 भरि लोचन बिलोकि अवधेसा । तब सुनिहउँ निर्गुन उपदेसा ॥
 मुनि पुनि कहि हारे कथा अनूपा । खंडि सगुन मत अगुन निरूपा ॥
 तब मैं निर्गुन मत कर दूरी । सगुन निरूपउँ करि हठ भूरी ॥
 उत्तर प्रतिउत्तर मैं कीन्हा । मुनि तन भए क्रोध के चीन्हा ॥
 सुनु प्रभु बहुत अवग्या किएँ । उपज क्रोध ग्यानिन्ह के हिऐँ ॥
 अति संघरषन जाँ कर कोई । अनल प्रगट चंदन ते होई ॥

दो०—बारंबार सकोप मुनि करइ निरूपन ग्यान ।

मै अपने मन बैठ तब करउँ बिबिधि अनुमान ॥१११(क)॥

क्रोध कि द्वैतबुद्धि बिनु द्वैत कि बिनु अग्यान ।

मायाबस परिछिन्न जड़ जीव कि ईस समान ॥१११(ख)॥

कबहुँ कि दुख सब कर हित ताकें । तेहि कि दरिद्र परस मनि जाकें
 परधोही की होहिं निसंका । कामी पुनि कि रहहिं अकलंका ॥
 बंस कि रह द्विज अनहित कीन्हें । कर्म कि होहिं स्वरूपहि चीन्हें ॥

काहू सुमति कि खल सँग जामी । सुभ गति पाव कि परत्रिय गामी
भव कि परहिं परमात्मा बिंदक । सुखी किहोहि कबहुँ हरि निंदक
राजु कि रहहिं नीति बिनु जानें । अघ कि रहहिं हरि चरित बखानें
पावन जस कि पुन्य बिनु होई । बिनु अघ अजस कि पावइ कोई ॥
लाभु कि किलु हरि भगति समाना । जेहि गावहिं श्रुति संत पुराना
हानि कि जग एहि सम कलु भाई । भजिअ न रामहि नर तनु पाई
अघ कि पिसुनता सम कलु आना । धर्म कि दया सरिस हरिजाना
एहि बिधि अमिति जुगुति मन गुनऊँ । मुनि उपदेस न सादर मुनऊँ
पुनि पुनि सगुन पच्छ मैं रोपा । तब मुनि बोलेउ बचन सकोपा ॥
मूढ़ परम सिख देउँ न मानसि । उत्तर प्रतिउत्तर बहु आनसि ॥
सत्य बचन बिस्वास न करही । बायस इव सबही ते डरही ॥
सठ स्वपच्छ तब हृदयँ बिसाला । सपदि होहि पच्छी चंडाला ॥
लीन्ह श्राप मैं मीस चढ़ाई । नहिं कलु भय न दीनता आई ॥

दो०—तुरत भयउँ मैं काग तव पुनि मुनि पद मिरु नाइ ।

सुमिरि राम रघुवंस मनि हरषित चलेउँ उड़ाइ ॥११२(क)॥

उमा जे राम चरन रत विगत काम मद क्रोध ।

निज प्रभुमय देखहिं जगत केहिं सन करहिं निरोध ॥११२(ख)॥

सुनु खगेस नहिं कलु रिषि दूषन । उर प्रेरक रघुवंस बिभूषन ॥
कृपासिंधु मुनि मति करि भोरी । लीन्ही प्रेम परिच्छा मोरी ॥
मन बचक्रम मोहि निज जन जाना । मुनि मति पुनि फेरी भगवाना
रिषि मम महत सीलता देखी । राम चरन बिस्वास बिसेषी ॥
अति बिसमय पुनि पुनि पछिताई । सादर मुनि मोहि लीन्ह बोलाई

मम परितोष बिबिधि विधि कीन्हा । हरषित राममंत्र तब दीन्हा ॥
 बालकरूप राम कर ध्याना । कहेउ मोहि मुनि कृपानिधाना ॥
 सुंदर सुखद मोहि अति भावा । सो प्रथमहि मैं तुम्हहि सुनावा ॥
 मुनि मोहि कलुक काल तहँ राखा । रामचरितमानस तब भाषा ॥
 सादर मोहि यह कथा सुनाई । पुनि बोले मुनि गिरा सुहाई ॥
 राम चरित सर गुप्त सुहावा । संछु प्रसाद तात मैं पावा ॥
 तोहि निज भगत राम कर जानी । ताते मैं सब कहेउँ बखानी ॥
 राम भगति जिन्ह कें उर नाही । कबहुँ न तात कहिअ तिन्ह पाहीं ॥
 मुनि मोहि बिबिधि भाँति समुझावा । मैं सप्रेम मुनि पद सिरु नावा ॥
 निज कर कमल परसि मम सीसा । हरषित आसिष दीन्ह मुनीसा ॥
 राम भगति अबिरल उर तारें । बसिहि सदा प्रसाद अब मोरें ॥

दो०—सदा राम प्रिय होहु तुम्ह सुभ गुन भवन अमान ।

कामरूप इच्छामरन ग्यान विराग निधान ॥११३(क)॥

जेहिं आश्रम तुम्ह बसब पुनि सुमिरत श्रीभगवंत ।

व्यापिहि तहँ न अविद्या जोजन एक प्रजंत ॥११३(ख)॥

काल कर्मगुन दोष सुभाऊ । कलु दुख तुम्हहि न व्यापिहि काऊ ॥
 राम रहस्य ललित विधि नाना । गुप्त प्रगट इतिहास पुराना ॥
 बिनु श्रम तुम्ह जानब सब सोऊ । नित नव नेह राम पद होऊ ॥
 जो इच्छा करिहहु मन माहीं । हरि प्रसाद कलु दुर्लभ नाही ॥
 सुनि मुनि आसिष सुनु मतिधीरा । ब्रह्मगिरा भइ गगनगँभीरा ॥
 एवमस्तु तब बच मुनि ग्यानी । यह मम भगत कर्म मन बानी ॥
 सुनि नभगिरा हरष मोहि भयऊ । प्रेम मगन सब संसय गयऊ ॥

करि बिनती मुनि आयसु पाई । पद सरोज पुनि पुनिसि रुनाई ॥
हरष सहित एहि आश्रम आयउँ । प्रभु प्रसाद दुर्लभ बर पायउँ ॥
इहाँ बसत मोहि सुनु खग ईसा । बीते कलप सात अरु बीसा ॥
करउँ सदा रघुपति गुन गाना । सादर सुनहि बिहंग सुजाना ॥
जब जब अवधपुरी रघुबीरा । धरहि भगत हित मनुज सरीरा ॥
तब तब जाइ राम पुर रहऊँ । सिसुलीला बिलोकि सुख लहऊँ ॥
पुनि उर राखि राम सिसुरूपा । निज आश्रम आवउँ खगभूपा ॥
कथा सकल मैं तुम्हहि सुनाई । काग देह जेहि कारन पाई ॥
कहिउँ तात सब प्रस्न तुम्हारी । राम भगति महिमा अति भारी ॥

दो०—ताते यह तन मोहि प्रिय भयउ राम पद नेह ।

निज प्रभु दरसन पायउँ गए सकल संदेह ॥ ११४(क) ॥

मासपारायण, उन्तीसवाँ विश्राम

भगति पच्छ हठ करि रहेउँ दीन्ह महारिषि साप ।

मुनि दुर्लभ बर पायउँ देखहु भजन प्रताप ॥ ११४(ख) ॥

जे असि भगति जानि परिहरहीं । केवल ग्यान हेतु श्रम करहीं ॥
ते जड कामधेनु गृहँ त्यागी । खोजत आकु फिरहि पय लागी ॥
सुनु खगोस हरि भगति बिहाई । जे सुख चाहहि आन उपाई ॥
ते सठ महासिंधु बिनु तरनी । पैरि पार चाहहि जड करनी ॥
मुनि भसुंढि के बचन भवानी । बोलेउ गरुड़ हरषि मृदु बानी ॥
तब प्रसाद प्रभु मम उर माहीं । संसब सोक मोह भ्रम नाही ॥
सुनेउँ पुनीत राम गुन ग्रामा । तुम्हरी कृपाँ लहेउँ विश्रामा ॥

एक बात प्रभु पूँछउँ तोही । कहहु बुझाइ कृपानिधि मोही ॥
 कहहि संत मुनि बेद पुराना । नहिं कछु दुर्लभ ग्यान समाना ॥
 सोइ मुनि तुम्ह सन कहेउ गोसाईं । नहिं आदरेहु भगति की नाईं ॥
 ग्यानहि भगतिहि अंतर केता । सकल कहहु प्रभु कृपानिकेता ॥
 सुनि उरगारि बचन सुख माना । सादर बोलेउ काग सुजाना ॥
 भगतिहि ग्यानहि नहिं कछु भेदा । उभय हरहिं भव संभव खेदा ॥
 नाथ मुनीस कहहिं कछु अंतर । सावधान सोउ सुनु बिहंगबर ॥
 ग्यान विराग जोग बिग्याना । ए सब पुरुष सुनहु हरिजाना ॥
 पुरुष प्रताप प्रबल सब भाँती । अबला अबल सहज जड़ जाती ॥

दो०—पुरुष त्यागि सक नारिहि जो विरक्त मति धीर ।

न तु कामी विषयाबस बिमुख जो पद रघुबीर ॥११५(क)॥

सो०—सोउ मुनि ग्यान निधान मृगनयनी बिधु मुख निरखि ।

बिबस होइ हरिजान नारि बिष्नु माया प्रगट ॥११५(ख)॥

इहाँ न पूँछपात कछु राखउँ । बेद पुरान संत मत भाषउँ ॥
 मोह न नारि नारि कै रूपा । पन्नगारि यह रीति अनूपा ॥
 माया भगति सुनहु तुम्ह दोऊ । नारि बर्ग जानइ सब कोऊ ॥
 पुनि रघुबीरहि भगति पिआरी । माया खलु नर्तकी बिचारी ॥
 भगतिहि सानुकूल रघुराया । ताते तेहि डरपति अति माया ॥
 राम भगति निरुपम निरुपाधी । बसइ जासु उर सदा अबाधी ॥
 तेहि बिलोकि माया सकुचाई । करि न सकइ कछु निज प्रभुताई ॥
 अस बिचारि जे मुनि बिग्यानी । जाचहिं भगति सकल सुख स्वानी ॥

दो०—यह रहस्य रघुनाथ कर बेगि न जानइ कोइ ।

जो जानइ रघुपति कृपाँ सपनेहुँ मोह न होइ ॥११६(क)॥

औरउ ग्यान भगति कर भेद सुनहु सुप्रवीन ।

जो सुनि होइ राम पद प्रीति सदा अबिछीन ॥११६(ख)॥

सुनहु तात यह अकथ कहानी । समुझत बनइ न जात बखानी॥
ईस्वर अंस जीव अबिनासी । चेतन अमल सहज सुख रासी॥
सो मायाबस भयउ गोसाई । बँध्यो कीर मरकट की नाई ॥
जड चेतनहि ग्रंथि परि गई । जदपि मृषा छूटत कठिनई ॥
तब ते जीव भयउ संसारी । छूट न ग्रंथि न होइ सुखारी ॥
श्रुति पुरान बहु कहेउ उपाई । छूट न अधिक अधिक अरुझाई॥
जीव हृदयँ तम मोह बिसेषी । ग्रंथि छूट किमि परइ न देखी ॥
अस संजोग ईस जब करई । तबहुँ कदाचित सो निरुअरई ॥
सात्त्विक श्रद्धा घेनु सुहाई । जौं हरिकृपाँ हृदयँ बस आई ॥
जप तप व्रत जम नियम अपारा । जे श्रुति कह सुभ धर्म अचारा॥
तेइ तन हरित चरै जब गाई । भाव बच्छ सिसु पाइ पेन्हाई ॥
नोइ निवृत्ति पात्र बिखासा । निर्मल मन अहीर निज दासा॥
परम धर्ममय पय दुहि भाई । अवटँ अनल अकाम बनाई ॥
तोष मरुत तब छमाँ जुड़ावै । धृति सम जावनु देइ जमावै ॥
मुदितौं मथै बिचार मथानी । दम आधार रजु सत्य सुबानी ॥
तब मथि काढ़ि लेइ नवनीता । बिमल बिराग सुभग सुपुनीता॥

दो०—जोग अग्नि करि प्रगट तब कर्म सुभासुभ लाइ ।

बुद्धि सिरावै ग्यान घृत ममता मल जरि जाइ ॥११७(क)॥

तब बिग्यानरूपिनी बुद्धि बिसद घृत पाइ ।
 चित्त दिया भरि घरै हृद समता दिअटि बनाइ ॥११७(ख)॥
 तीनि अवस्था तीनि गुन तेहि कपास तें कादि ।
 तूल तुरीय सँवारि पुनि बाती करै सुगादि ॥११७(ग)॥
 सो०—एहि बिधि लेसै दीप तेज रासि बिग्यानमय ।
 जातहिं जासु समीप जरहिं मदादिक सलभ सब ॥११७(घ)॥

सोहमस्मि इति वृत्ति अखंडा । दीप सिखा सोइ परम प्रचंडा ॥
 आतम अनुभव सुख सुप्रकासा । तब भव मूल भेद भ्रम नासा ॥
 प्रबल अबिद्या कर परिवारा । मोह आदि तम मिटइ अपारा ॥
 तब सोइ बुद्धि पाइ उँजिआग । उर गृहँ बैठि ग्रंथि निरुआरा ॥
 छोग्न ग्रंथि पाव जौँ सोई । तब यह जीव कृतारथ होई ॥
 छोगत ग्रंथि जानि खगराया । बिघ्न अनेक करइ तब माया ॥
 रिद्धि सिद्धि प्रेइ बहु भाई । बुद्धिहि लोभ दिखावहिं आई ॥
 कल बल छल करि जाहिं समीपा । अंचल बात बुझावहिं दीपा ॥
 होइ बुद्धि जौँ परम सयानी । तिन्ह तन चितव न अनहित जानी ॥
 जौँ तेहि बिघ्न बुद्धि नहिं बाधी । तौँ बहोरि सुर करहिं उपाधी ॥
 इंद्री द्वार झरोखा नाना । तहँ तहँ सुर बैठे करि थाना ॥
 आवत देखहिं बिषय बयारी । ते हठि देहिं कपाट उघारी ॥
 जब सो प्रभंजन उर गृहँ जाई । तबहिं दीप बिग्यान बुझाई ॥
 ग्रंथि न छूटि मिटा सो प्रकासा । बुद्धि बिकल भइ बिषय बतासा ॥
 इंद्रिन्ह सुगन्ह न ग्यान सोहाई । बिषय भोग पर प्रीति सदाई ॥
 बिषय समीर बुद्धि कृत भोरी । तेहि बिधि दीप को बार बहोरी ॥

दो०—तब फिरि जीव बिबिधिं बिधि पावइ संसृति क्लेश ।

हरि माया अति दुस्तर तरि न जाइ बिहगेस ॥११८(क)॥

कहत कठिन समुझत कठिन साधत कठिन बिबेक ।

होइ धुनाच्छर न्याय जौ पुनि प्रत्यूह अनेक ॥११८(ख)॥

ग्यान पंथ कृपान कै धारा । परत स्वगेस होइ नहिं बारा ॥

जो निर्विघ्न पंथ निर्वहई । सो कैवल्य परम पद लहई ॥

अति दुर्लभ कैवल्य परमपद । संत पुरान निगम आगम बद ॥

राम भजत सोइ मुकुति गोसाई । अनहच्छित आवइ बरिआई ॥

जिमि थल बिनु जल रहि न सकाई । कोटि भाँति कोउ करै उपाई ॥

तथा मोच्छ सुख सुनु खगराई । रहि न सकइ हरि भगति बिहाई ॥

अस बिचारि हरि भगत सयाने । मुक्ति निरादर भगति लुभाने ॥

भगति करत बिनु जतन प्रयासा । संसृति मूल अबिद्या नासा ॥

भोजन करिअ तृपिति हित लागी । जिमिसो असन पचवै जठरागी ॥

असि हरि भगति सुगम सुखदाई । को अस मूढ़ न जाहि सोहाई ॥

दो०—सेवक सेव्य भाव बिनु भव न तरिअ उरगारि ।

भजहु राम पद पंकज अस सिद्धांत बिचारि ॥११९(क)॥

जो चेतन कहँ जड़ करइ जड़हि करइ चैतन्य ।

अस समर्थ रघुनायकहि भजहिं जीव ते धन्य ॥११९(ख)॥

कहेउँ ग्यान सिद्धांत बुझाई । सुनहु भगति मनि कै प्रभुताई ॥

राम भगति चिंतामनि सुंदर । बसइ गरुड़ जाके उर अंतर ॥

परम प्रकास रूप दिन राती । नहिं कछु चहिय दिआ घृत बाती ॥

मोह दरिद्र निकट नहिं आवा । लोभ बात नहिं ताहि बुझावा ॥

प्रबल अबिद्या तम मिटि जाई । हारहिं सकल सलभ समुदाई ॥
 खल कामादि निकट नहिं जाहीं । बसइ भगति जाके उर माहीं ॥
 गरल सुधासम अरि हित होई । तेहि मनि बिनु सुख पाव न कोई
 व्यापहिं मानस रोग न भारी । जिन्ह के बस सब जीव दुखारी ॥
 राम भगति मनि उर बस जाकें । दुख लवलेस न सपनेहुँ ताकें ॥
 चतुर सिरोमनि तेइ जग माहीं । जे मनि लागि सुजतन कराहीं ॥
 सो मनि जदपि प्रगट जग अहई । राम कृपा बिनु नहिं कोउ लहई ॥
 सुगम उपाय पाइबे केरे । नर हतभाग्य देहिं भटभेरे ॥
 पावन पर्वत बेद पुराना । राम कथा रुचिराकर नाना ॥
 मर्मो सज्जन सुमति कुदारी । ग्यान विराग नयन उरगारी ॥
 भाव सहित खोजइ जो प्रानी । पाव भगति मनि सब सुख खानी
 मारें मन प्रभु अस बिस्वासा । राम ते अधिक राम कर दासा ॥
 राम सिंधु घन सज्जन धीरा । चंदन तरुं हरि संत समीरा ॥
 सब कर फल हरि भगति सुहाई । सो बिनु संत न काहुँ पाई ॥
 अस बिचारि जोइ कर सतसंगा । राम भगति तेहि सुलभ बिहंगा ॥

दो०—ब्रह्म पयोनिधि मंदर ग्यान संत सुर आहिं ।

कथा सुधा मथि काढ़िं भगति मधुरता जाहिं ॥१२०(क)॥

विरति चर्म असि ग्यान मद लोभ मोह रिपु मारि ।

जय पाइअ सो हरि भगति देखु खगेस बिचारि ॥१२०(ख)॥

पुनि सप्रेम बोलेउ खगराऊ । जौं कृपाल मांहि ऊपर भाऊ ॥
 नाथ मोहिं निज सेवक जानी । सप्त प्रस्न भम कहहु बखानी ॥
 प्रथमहिं कहहु नाथ मतिधीरा । सब ते दुर्लभ कवन सरीरा ॥

बड़ दुख कवन कवन सुख भारी । सोउ संछेपहिं कहहु बिचारी ॥
 संत असंत मरम तुम्ह जानहु । तिन्ह कर सहज सुभाव बखानहु ॥
 कवन पुन्य श्रुति बिदित बिसाला । कहहु कवन अध परम कराला ॥
 मानस रोग कहहु समुझाई । तुम्ह सर्वग्य कृपा अधिकाई ॥
 तात सुनहु सादर अति प्रांती । मैं संछेप कहउँ यह नीती ॥
 नर तन सम नहिं कवनिउ देही । जीव चराचर जाचत तेही ॥
 नरक स्वर्ग अपवर्ग निसेनी । ग्यान विराग भगति सुभ देनी ॥
 सो तनु धरि हरि भजहिं न जे नर । होहिं बिषय रत मंद मंद तर ॥
 काँच किरिच बदलें ते लेहीं । कर ते डारि परस मनि देहीं ॥
 नहिं दरिद्र सम दुख जग माहीं । संत मिलन सम सुख जग नाहीं ॥
 पर उपकार बचन मन काया । संत सहज सुभाउ खगराया ॥
 संत सहहिं दुख परहित लागी । पर दुख हेतु असंत अभागी ॥
 भूर्ज तरु सम संत कृपाला । पर हित निति सह बिपति बिसाला ॥
 सन इव खल पर बंधन करई । खाल कड़ाइ बिपति सहि मरई ॥
 खल बिनु स्वारथ पर अपकारी । अहि मूषक इव सुनु उरगारी ॥
 पर संपदा बिनासि नसाहीं । जिमि ससि हति हिम उपल बिलाहीं ॥
 दुष्ट उदय जग आरति हेतू । जथा प्रसिद्ध अधम ग्रह केतू ॥
 संत उदय संतत सुखकारी । बिस्व सुखद जिमि इंदु तमारी ॥
 परम धर्म श्रुति बिदित अहिंसा । पर निंदा सम अध न गरीसा ॥
 हर गुर निंदक दादुर होई । जन्म सहस्र पाव तन सोई ॥
 द्विज निंदक बहु नरक भोग करि । जग जनमइ बायस सरोर धरि ॥
 सुर श्रुति निंदक जे अभिमानी । रौरव नरक परहिं ते प्राणी ॥

होहि उलूक संत निंदा रत । मोह निसा प्रिय ग्यान भानुगत ॥
 सब कै निंदा जे जड़ करहीं । ते चमगादुर होइ अवतरहीं ॥
 सुनहु तात अब मानस रोगा । जिन्ह ते दुख पावहिं सब लोगा ॥
 मोह सकल व्याधिन्ह कर मूला । तिन्ह ते पुनि उपजहिं बहु सूला ॥
 काम बात कफ लोभ अपारा । क्रोध पित्त नित छाती जारा ॥
 प्रीति करहिं जौं तीनि उ भाई । उपजइ सन्यपात दुखदाई ॥
 विषय मनोरथ दुर्गम नाना । ते सब सूल नाम को जाना ॥
 ममता दादु कंडु इरषाई । हरष बिषाद गरह बहुताई ॥
 पर सुख देखि जरनि सोइ छई । कुष्ट दुष्टता मन कुटिलई ॥
 अहंकार अति दुखद डमरुआ । दंभ कपट मद मान नेहरुआ ॥
 तृम्ना उदरवृद्धि अति भारी । त्रिविध ईषना तरुन तिजारी ॥
 जुग बिधि ज्वर मत्सर अत्रिबेका । कहैं लगि कहों कुरोग अनेका ॥

दो०—एक व्याधि बस नर मरहिं ए असाधि बहु व्याधि ।

पीड़हिं संतत जीव कहूँ सो किमि लहै समाधि ॥१२१(क)॥

नेम धर्म आचार तप ग्यान जग्य जप दान ।

भेषज पुनि कोटिन्ह नहिं रोग जाहि हरिजान ॥१२१(ख)॥

एहि बिधि सकल जीव जग रोगी । सोक हरष भय प्रीति बियोगी ॥
 मानस रोग कलुक मैं गाए । हहिं सब कै लखि बिरलेन्ह पाए
 जाने ते छीजहिं कलु पापी । नास न पावहिं जन परितापी ॥
 विषय कुपथ्य पाइ अंकुरे । मुनिहु हृदय का नर बापुरे ॥
 राम कृपा नासहिं सब रोगा । जौं एहि भाँति बनै संयोगा ॥
 सदगुर बैद बचन बिस्वासा । संजम यह न विषय कै आसा ॥

रघुपति भगति सजीवन मूरी । अनूपान श्रद्धा मति पूरी ॥
 एहि बिधि भलेहिं सो रोग नसाहीं । नाहिं त जतन कोटि नहिं जाहीं ॥
 जानिअ तब मन बिरुज गोसाँई । जब उर बल बिराग अधिकारै ॥
 सुमति छुधा बाढ़इ नित नई । बिषय आस दुर्बलता गई ॥
 बिमल ग्यान जल जब मो नहाई । तब रह राम भगति उर छाई ॥
 सिव अज सुक सनकादिक नारद । जे मुनि ब्रह्म बिचार बिसारद ॥
 सब कर मत खगनायक एहा । करिअ राम पद पंकज नेहा ॥
 श्रुति पुरान सब ग्रंथ कहाहीं । रघुपति भगति बिना सुख नाहीं ॥
 कमठ पीठ जामहिं बरु बारा । बंध्या सुत बरु काहुहि मारा ॥
 फूलहिं नभ बरु बहु बिधि फूला । जीव नलह सुख हरि प्रतिकूला ॥
 तृषा जाइ बरु मृगजल पाना । बरु जामहिं सस सीस बिषाना ॥
 अंध ऋगु बरु रबिहि नसावै । राम बिमुख न जीव सुख पावै ॥
 हिम ते अनल प्रगट बरु होई । बिमुख राम सुख पाव न कोई ॥

दो०—बारि मथें घृत होइ बरु सिकता ते बरु तेल ।

बिनु हरि भजन न भव तरिअ यह सिद्धांत अपेल ॥१२२(क)॥

मसकहि करइ बिरंचि प्रभु अजहि मसक ते हीन ।

अस बिचारि तजि संसय रामहि भजहिं प्रवीन ॥१२२(ख)॥

श्लोक—विनिश्चितं वदामि ते न अन्यथा वचांसि मे ।

हरिं नरा भजन्ति येऽतिदुस्तरं तरन्ति ते ॥१२२(ग)॥

कहेउँ नाथ हरि चरित अनूपा । व्यास समास स्वमति अनुरूपा ॥

श्रुति सिद्धांत इहइ उरगारी । गम भजिअ सब काज बिसारी ॥

प्रभु रघुपति तजि सेइअ काही । मोहि से मठ परममता जाही ॥

तुम्ह विग्यानरूप नहिं मोहा । नाथ कीन्हि मो पर अति छोहा ॥
 पूछिहु राम कथा अति पावनि । सुक सनकादि संभु मन भावनि ॥
 सत संगति दुर्लभ संसारा । निमिष दंड भरि एकउ बारा ॥
 देखु गरुड़ निज हृदयँ विचारी । मैं रघुबीर भजन अधिकारी ॥
 सकुनाधम सब भौंति अपावन । प्रभु मोहि कीन्ह बिदित जग पावन ॥

दो०—आजु धन्य मैं धन्य अति जद्यपि सब विधि हीन ।

निज जन जानि राम मोहि संत समागम दीन ॥१२३(क)॥

नाथ जथामति भाषेउँ राखेउँ नहिं कछु गोइ ।

चरित सिंधु रघुनायक थाह कि पावइ कोइ ॥१२३(ख)॥

सुमिरि राम के गुन गन नाना । पुनि पुनि हरष भुसुंड़ि सुजाना ॥
 महिमा निगम नेति करि गाई । अतुलित बल प्रताप प्रभुताई ॥
 सिव अज पूज्य चरन रघुराई । मो पर कृपा परम मृदुलाई ॥
 अस सुभाउ कहूँ सुनउँ न देखउँ । केहि खगेस रघुपति सम लेखउँ ॥
 साधक सिद्ध बिमुक्त उदासी । कबि कोबिद कृतग्य संन्यासी ॥
 जोगी स्त्र सुतापस ग्यानी । धर्म निरत पंडित विग्यानी ॥
 तरहिं न बिनु सेएँ मम स्वामी । राम नमामि नमामि नमामी ॥
 सरन गएँ मो से अघ रासी । दोहिं सुद्ध नमामि अबिनासी ॥

दो०—जासु नाम भव भेषज हरन घोर त्रय सूल ।

सो कृपाल मोहि तो पर सदा रहउ अनुकूल ॥१२४(क)॥

सुनि भुसुंड़ि के वचन सुभ देखि राम पद नेह ।

* बोलेउ प्रेम सहित गिरा गरुड़ बिगत संदेह ॥१२४(ख)॥

मैं कृतकृत्य भयउँ तव बानी । सुनिरघुबीर भगति रस सानी ॥

राम चरन नूतन रति भई । माया जनित बिपति सब गई॥
मोह जलधि बोहित तुम्ह भए । मो कहँनाथ बिबिध सुख दए॥
मो पहिँ होइ न प्रति उपकार । बंदउँ तव पद बारहिँ वारा ॥
पूरन काम राम अनुरागी । तुम्ह सम तात न कोउ बड़भागी॥
संत बिटप सरिता गिरि धरनी । पर हित हेतु सबन्ह कै करनी॥
संत हृदय नवनीत समाना । कहा कबिन्ह परि कहै न जाना॥
निज परिताप द्रवइ नवनीता । पर दुख द्रवहिँ संत सुपुनीता ॥
जीवन जन्म सुफल मम भयऊ । तव प्रसाद संसय सब गयऊ॥
जानेहु सदा मोहि निज किंकर । पुनि पुनि उमा कहइ बिहंगबर॥

दो०—तासु चरन सिरु नाइ करि प्रेम सहित मतिधीर ।

गयउ गरुड़ बैकुंठ तब हृदयँ राखि रघुवीर ॥ १२५(क)॥

गिरिजा संत समागम सम न लाभ कछु आन ।

बिनु हरि कृपा न होइ सो गावहिँ बेद पुरान ॥ १२५(ख)॥

कहेउँ परम पुनीत इतिहासा । सुनत श्रवन छूटहिँ भव पासा ॥
प्रनत कल्पतरु करुना पुंजा । उपजइ प्रीति राम पद कंजा ॥
मन क्रम बचन जनित अघ जाई । सुनहिँ जे कथा श्रवन मन लाई ॥
तीर्थाटन साधन समुदाई । जोग बिराग ग्यान निपुनाई ॥
नाना कर्म धर्म ब्रत दाना । संजमदम जप तप मख नाना ॥
भूत दया द्विज गुर सेवकाई । बिद्या बिनय विवेक बड़ाई ॥
जहँ लाग साधन बेद बखानी । सब कर फल हरि भगति भवानी
सो रघुनाथ भगति श्रुति गाई । राम कृपाँ काहूँ एक पाई ॥

दो०—मुनि दुर्लभ हरि भगति नर पावहिं बिनहिं प्रयास ।

जे यह कथा निरंतर सुनहिं मानि बिस्वास ॥ १२६ ॥

सोइ सर्वग्य गुनी सोइ ग्याता । सोइ महि मंडित पंडित दाता ॥
 धर्म परायन सोइ कुल त्राता । राम चरन जा कर मन राता ॥
 नीति निपुन सोइ परम सयाना । श्रुति सिद्धांत नीक तेहिं जाना ॥
 सोइ कवि कोविद सोइ रनधीरा । जो छल छाड़ि भजइ रघुबीरा ॥
 धन्य देस सो जहँ सुरसरी । धन्य नारि पतिव्रत अनुसरी ॥
 धन्य सो भूपु नीति जो करई । धन्य सो द्विज निज धर्म न टरई ॥
 सो धन धन्य प्रथम गति जाकी । धन्य पुन्य रत मति सोइ पाकी ॥
 धन्य घरी सोइ जब सतसंगा । धन्य जन्म द्विज भगति अभंगा ॥

दो०—सो कुल धन्य उमा सुनु जगत पूज्य सुपुनीत ।

श्रीरघुबीर परायन जेहिं नर उपज बिनीत ॥ १२७ ॥

मति अनुरूप कथा मैं भाषी । जद्यपि प्रथम गुप्त करि राखी ॥
 तव मन प्रीति देखि अधिकारि । तब मैं रघुपति कथा सुनाई ॥
 यह न कहि अ सठही हठसीलहि । जो मन लाइ न सुन हरि लीलहि
 कहि न लौं भिहि क्रांदिहि कामिहि । जो न भजइ सचराचर स्वामिहि ॥
 द्विज द्रोहिहि न सुनाइ अ कबहूँ । सुरपति सरिस होइ नृप जबहूँ ॥
 राम कथा के तेइ अधिकारी । जिन्ह कें सत संगति अति प्यारी ॥
 गुर पद प्रीति नीति रत जेई । द्विज सेवक अधिकारी तेई ॥
 ता कहँ यह बिसेष सुखदाई । जाहि प्रानप्रिय श्रीरघुराई ॥

दो०—राम चरन रति जो चह अथवा पद निर्बान ।

भाव सहित सो यह कथा करउ श्रवन पुट पान ॥ १२८ ॥

राम कथा गिरिजा मै बरनी । कलि मल समनि मनोमल हरनी ॥
 संसृति रोग मजीधन मूरी । राम कथा गावहिं श्रुति सखी ॥
 एहि महँ रुचिर सप्त मोपाना । रघुपति भगति केर पंथाना ॥
 अति हरि कृपा जाहि पर होई । पाउँ देइ एहिं मारग सोई ॥
 मन कामना सिद्धि नर पावा । जे यह कथा कपट तजि गावा ॥
 कहहिं सुनहिं अनुमोदन करहीं । ते गोपद इव भवनिधि तरहीं ॥
 सुनि सब कथा हृदय अति भाई । गिरिजा बोली गिरा सुहाई ॥
 नाथ कृपाँ मम गत संदेहा । राम चरन उपजेउ नव नेहा ॥

दो०—मैं कृतकृत्य भइउँ अब तव प्रसाद बिस्वैस ।

उपजी राम भगति हृद बीते सकल कलेस ॥ १२९ ॥

यह सुभ संभ्रु उमा संबादा । सुख संपादन समन बिषादा ॥
 भव भंजन गंजन संदेहा । जन रंजन सज्जन प्रिय एहा ॥
 राम उपासक जे जग माहीं । एहि सम प्रिय तिन्ह कैंकलु नाहीं ॥
 रघुपति कृपाँ जथामति गावा । मैं यह पावन चरित सुहावा ॥
 एहिं कलिकाल न साधन दूजा । जोग जग्य जप तप व्रत पूजा ॥
 रामहि सुमिरिअ गाइअ रामहि । संतत सुनिअ राम गुन ग्रामहि ॥
 जासु पतित पावन बड़ बाना । गावहिं कबि श्रुति संत पुराना ॥
 ताहि भजहि मन तजि कुटिलाई । राम भजें गति केहिं नहिं पाई ॥

छं०—पाई न केहिं गति पतित पावन राम भजि सुनु सठ मना ।

गनिका अजामिल ब्याध गीध गजादि खल तारे घना ॥

आभीर जमन किरात खस स्वपचादि अति अधरूप जे ।
 कहि नाम बारक तेपि पावन होहि राम नमामि ते ॥ १ ॥
 रघुवंस भूषन चरित यह नर कहहि सुनहि जे गावहीं ।
 कलि मल मनोमल घोड़ बिनु श्रम राम धाम सिधावहीं ॥
 सत पंच चौपाई मनोहर जानि जो नर उर धरै ।
 दारुन अविद्या पंच जनित बिकार श्री रघुबर हरै ॥ २ ॥
 सुंदर सुजान कृपा निधान अनाथ पर कर प्रीति जो ।
 सो एक राम अकाम हित निर्बानप्रद सम आन को ॥
 जाकी कृपा लवलेस ते मतिमंद तुलसीदासहूँ ।
 पायो परम बिश्रामु राम समान प्रभु नाहीं कहूँ ॥ ३ ॥

दो०—मो सम दीन न दीन हित तुम्ह संमान रघुबीर ।
 अस बिचारि रघुवंस मनि हरहु बिषम भव भीर ॥ १३०(क) ॥
 कामिहि नारि पिआरि जिमि लोभिहि प्रिय जिमि दाम ।
 तिमि रघुनाथ निरंतर प्रिय लागहु मोहि राम ॥ १३०(ख) ॥

श्लोक—यत्पूर्वं प्रभुणा कृतं सुकविना श्रीशम्भुना दुर्गमं
 श्रीमद्रामपदाब्जभक्तिमनिशं प्राप्त्यै तु रामायणम् ।
 मत्वा तद्रघुनाथनामनिरतं स्वान्तस्तमःशान्तये
 भाषाबद्धमिदं चकार तुलसीदासस्तथा मानसम् ॥ १ ॥
 पुण्यं पापहरं सदा शिवकरं विज्ञानभक्तिप्रदं
 श्यामोहमलापहं सुविमलं प्रेमान्बुधं शुभम्

श्रीमद्रामचरित्रमानसमिदं भक्त्यावगाहन्ति ये
ते संसारपतङ्गघोरकिरणैर्दहन्ति नो मानवाः ॥ २ ॥

मासपारायण, तीसवाँ विश्राम ।

नवाह्नपारायण, नवाँ विश्राम ।

इति श्रीमद्रामचरितमानसे सकलकलिकलुषविध्वंसने
सप्तमः सोपानः समाप्तः ।

(उत्तरकाण्ड समाप्त)



श्रीसमायणजीकी आरती



आरति श्रीरामायणजी की । कीरति कलित ललित सिय पी की ॥
गावत ब्रह्मादिक मुनि नारद । बालमीक विग्यान बिसारद ॥
सुक सनकादि सेष अरु सारद । बरनि पवन सुत कीरति नीकी ॥
गावत बेद पुरान अष्टदस । छभो साक्ष सब ग्रंथन को रस ॥
मुनि जन धन संतन को सरबस । सार अंस संमत सबही की ॥
गावत संतत संभु भवानी । अरु घटसंभव मुनि विग्यानी ॥
व्यास आदि कबिबर्ज बखानी । कागभुसुंड़ि गरुड के ही की ॥
कलि मल हरनि बिषय रस फीकी । सुभग सिंगार मुक्ति जुबती की ॥
दलन रोग भव मूरि अमी की । तात मात सब विधि तुलसी की ॥



